

СТАСТИКА  
ЦИЦИЗМ  
АЛИП  
ШЕЪР  
ЖАЗ  
БАИТ  
ЭРТАК  
РЕМАРКА  
ХАФИФ  
ФЕЛЬЕТОН  
ПОСТМОДЕРНИЗМ  
ЮМОР  
МАЖОЗ  
ЭПОПЕЯ  
ХАФ  
БАДИЙЛИК  
ЭЗОП  
ТИПИ

Д.ҚУРОНОВ, З.МАМАЖОНОВ, М.ШЕРАЛИЕВА

# АДАБИЁТШУНОСЛИК ЛУҒАТИ



Д.ҚУРОНОВ, З.МАМАЖОНОВ, М.ШЕРАЛИЕВА

# АДАБИЁТШУНОСЛИК ЛУҒАТИ

*Қайта нашр*

Тошкент  
«Akademnashr»  
2013

УДК: 821.512.133'374  
КБК 83.3(5Ў)  
Қ-80

Қ-80

Курунов Д.

Адабиётшунослик лугати / Д.Курунов, З.Мамажонов, М.Шера-  
лиева. – Тошкент: Akademnashr, 2013. – 408 б.

ISBN 978-9943-389-57-1

УДК: 821.512.133'374  
КБК 83.3(5Ў)я2

Луғат-маълумотнома тарзида тартибланган ушбу китобда ада-  
биётшуносликка оид терминлар изоҳланиб, уларнинг мазмун-моҳияти  
мисоллар ёрдамида ёритилган.

Луғат олий ўқув юр்தларининг бакалаврият ва магистратура босқич-  
ларида тахсил олаётган талабалар, академик лицей ва касб-ҳунар кол-  
лежлари ўқувчилари, ўзбек тили ва адабиёти ўқитувчилари, абитури-  
ентлар, шунингдек кенг китобхонлар оммасига мўлжалланган.

Заҳириддин Муҳаммад Бобур номидаги Андижон давлат университе-  
ти Илмий кенгаши қарори (26.02.2010. 7-байнома) билан нашрга тавсия  
этилган.

© Д.Курунов, З.Мамажонов, М.Шералиева  
«Адабиётшунослик лугати»  
© «Академнашр», 2013.

ISBN 978-9943-389-57-1

## ҲОЙДАЛАНУВЧИЛАРГА

Луғатдан ҳозирги ва мумтоз адабиётшунослик терминларини  
жамлаган ҳолда изоҳлаш ва бу билан фойдаланувчиларга қулайлик  
яратиш мақсади кўзланган. Луғат анъанавий тарзда тартиблан-  
ган бўлиб, уни тузишда фойдаланиш учун қулайлик диққат марка-  
зига қўйилди. Ҳажми эътиборда тутган ҳолда бир қатор шарт-  
ли қисқартмалардан фойдаланилди:

қ. – қарања  
ар. – арабча  
лот. – лотинча  
юн. – юнонча  
фр. – французча  
нем. – немисча  
ингл. – инглизча  
итал. – италиянча  
мас. – масалан  
ва б. – ва бошқалар  
ва ш.к. – ва шу каби  
ва х. – ва ҳоказо

Изоҳланаётган термин изоҳ матни ичида бош ҳарфи билан  
(мас., Муболага – М.) берилди. Шунингдек, сўз бирикмаси шаклида-  
ги терминлар ҳам матнда қисқартириб ифодаланди: бирикмадаги  
сўзларнинг биринчи ҳарфлари оланиб, уларнинг дастлабкиси бош  
ҳарф, кейингилари эса кичик ҳарф шаклида берилди (мас., Адабиёт  
назарияси – А.н.). Сўз ўзгартирувчи қўшимчалар қисқартмаларга  
тўғридан-тўғри қўшилди (мас., А.н.га – адабиёт назариясига;  
Б.о.нинг – бадий образнинг). Луғатнинг ўзига ҳаволалар термин-  
дан сўнг (қ.) қисқартмасини бериш орқали ифодаланди.

Тузувчилар мутахассисларнинг луғат ҳақидаги ҳолис фикр-  
мулоҳазаларини кутиб, уларни кейинги нашрларда эътиборга  
олиш ниятида қоладилар.



**АБЖАД ҲИСОБИ** – араб алифбосидаги ҳарфларнинг ҳар бири маълум сонга тенглиги асосида юритилувчи ҳисоб. Яъни араб ҳарфларининг ҳар бири алифбо тартибида маълум сонни ифода қилади. Осон эслаб қолиниши учун сонларни ифода қиладиган ҳарфларни қатъий алифбо тартибида бириктириш орқали саккизта сунъий сўз ҳосил қилинган бўлиб, улар ҳеч қандай лугавий маънога эга эмас: абжад (ا ب ج د), ҳавваз (ه و ز ح ط ت), каламан (ك ل م ن), саъфас (س ع ف ص), қарашат (ق ر ش ت), саххаз (ث ذ ظ), зазағ (ض ط غ). А.ҳ. атамаси мазкур сўзларнинг биринчиси номидан келиб чиққан. Шу саккиз сўз таркибидаги қисқа унлилар истисно қилинса, қолган ҳарфлар 1 дан 1000 гача бўлган сонларни билдиради (бу ўринда ўзбек алифбосидаги «т», «с», «ҳ», «з» ҳарфларининг араб алифбосида турли кўри-нишлари мавжудлигини ҳисобга олиш керак):

Сунъий сўз	Ҳарф номи	Ҳарф шакли	Сон	Сунъий сўз	Ҳарф номи	Ҳарф шакли	Сон
Абжад	Алиф	ا	1	Саъфас	Син	س	60
	Бе	ب	2		Айн	ع	70
	Жим	ج	3		Фо	ف	80
	Дол	د	4		Се	ص	90
Ҳавваз	Ҳои ҳавваз	ه	5	Қарашат	Қоф	ق	100
	Вов	و	6		Ре	ر	200
	Зайн	ز	7		Шин	ش	300
Ҳутти	Ҳои ҳутти	ح	8	Саххаз	Те	ت	400
	То	ط	9		Сод	ث	500
	Йой	ي	10		Хо	خ	600
Каламан	Коф	ك	20	Зазағ	Зол	ذ	700
	Лом	ل	30		Зод	ض	800
	Мим	م	40		Зе	ظ	900
	Нун	ن	50		Ғайн	غ	1000

Шарқ мумтоз шеърлятида А.ҳ.дан у ёки бу воқеа-ҳодисанинг юз бериш вақтини қайд этиш (қ. таърих), шеърда турли сўз ўйинларини юзага келтириш каби мақсадларда самарали фойдаланилган. Шунингдек, А.ҳ. имкониятлари чистон (қ.), муаммо (қ.) каби шеърый бошқотирма жанрларида ҳам кенг истифода этилган.

**АВАНГАРДИЗМ** (фр. avant-garde – олдинги отряд, илгор) – 1) шартли равишда модернистик адабиётнинг бир қатор оқимларига хос бўлган хусусиятнинг умумий номи сифатида қўлланувчи термин. Яъни А. адабий жараёндаги муайян бир йўналиш ёки оқим эмас, балки бир қатор оқимларга хос хусусият, яна ҳам аниқроғи, модернизмнинг кескин, радикал қанотидир. А. адабиётнинг реаллик билан алоқасини инкор қилиш, адабиёт ва санъатни ижтимоий ҳаёт билан боғлиқ бўлмаган алоҳида соҳа деб билиш, адабий аъёнларни инкор қилиш ва бадиий шаклда мутлақ янгилик яратиш даъвосини олға суриш кабиларда намоён бўлади (қ. футуризм, дадаизм, сюрреализм); 2) модернизмнинг босқичларидан бири, ўз ичига Биринчи жаҳон уруши арафасидан бошлаб Иккинчи жаҳон уруши охиригача бўлган даврни қамраб олади. Модернизмни бу тарзда даврлаштирувчи мутахассислар унинг яна неовангардизм (XX асрнинг 50 – 60-йиллари) ва постмодернизм (70-йиллардан) босқичларини ҳам ажратадилар. Лекин бу мавжуд қарашлардан биригина бўлиб, умум-эътироф этилган эмас; 3) Ғарб адабиётшунослигида модернизмнинг бир қатор оқимларига хос хусусият ёки унинг бир босқичи сифатида эмас, балки, умуман, модернизм маъносида ҳам қўлланади.

**АВТОБИОГРАФИК АСАР** (юн. autos – ўзим, bios – ҳаёт, grapho – ёзаман) – муаллифнинг ўз ҳаёти ҳақида изчил ҳикоя қилишига асосланган адабий жанр. А.а.ни ёзувчининг турли муносабат билан ёзилган автобиографияси (таржимаи ҳол)дан фарқлаш позим. А.а. муаллифи ўз ҳаётини қайтадан яшаб кўради, уни бир бутун сифатида идрок этишга интилади. Яшаб ўтилган ҳаётни бир бутунликда идрок этиш эҳтиёжи туфайли А.а. муаллифи баъзан бадиий тўқималарга ҳам йўл қўйиши табиий, чунки у ҳаётини яхлит эстетик мушоҳада қиларкан, уни ижодий қайта яратади. Шунинг учун А.а.лар аксар ҳолларда муаллифларнинг ижодий етуклик паллаларида, умрлари ниҳоясида ёзилади (мас., Ойбекнинг «Болалик» қиссаси). Мутахассислар А.а.ни чегарадаги, яъни бошқа жанрлар билан кесишувчи жанр деб ҳисоблайдилар. Ҳақиқатан ҳам, А.а.нинг мемуарлар, кундаликлар, айрим савҳатномалар билан ўхшаш томонлари бор. А.а.нинг мемуарлардан фарқи шуки, мемуар асарда муал-

лифни воқелик (ўзи учратган кишилар, гувоҳи бўлган ёки қатнашган воқеалар) қизиқтирса, А.а. муаллифи диққат марказида ўзининг воқелик билан узвий алоқадаги шаклланиш тарихи, қалб ва онги тарихи туради. Ёки *кундаликларда* ҳам А.а.даги каби муаллифнинг бошдан ўтказган ва кўнгилдан кечирганлари акс этади. Фарқ шуки, *кундаликларда* тасвирланаётган воқеаларнинг юз бериш вақти билан улар ҳақида ёзиш вақти орасида даврий масофа йўқ, бу эса ўз ҳаётини бир бутунликда кўришга халал беради, яъни муаллиф босиб ўтган ҳаёт йўли унинг ўзи учун эстетик идрок объектига айланмайди. А.а. билан автобиографик характердаги асарларни фарқлаш керак. Аввало шунга айтиш керакки, ҳар қандай адабий асарда автобиографиклик унсурлари мавжуд, чунки асар муаллифнинг ҳаётини тажрибаси асосида дунёга келади: ижодкор ҳаётида юз берган айрим воқеалар, у гувоҳ бўлган ҳолатлар, шулар таъсирида юзага келган ўй-кечинмалар матнга сингиб кетиши табиий. Автобиографик характердаги асарда биографик унсурлар салмоқли ўрин тутгани ҳолда, бадиий тўқима ҳал қилувчи аҳамият касб этади (мас., Ф.Ғулумнинг «Шум бола» қиссаси). Бошқача айтсак, худди реал прототипига эга асарлардаги каби автобиографик характердаги асар учун муаллиф – прототип, холос, унинг асосида бошқа бир шахс образи яратилади.

**АВТОГРАФ** (юн. *autos* – ўзим, *grapho* – ёзма) – 1) муаллиф қўлёзмаси; адабий асарнинг муаллиф қўли билан ёзилган матни. А. матншунослик учун муҳим манба бўлиб, асарнинг асл (каноник) матнини белгилашда, ёзувчи ижодий лабораториясини тадқиқ этишда жуда катта аҳамиятга эга. А.лар, одатда, ёзувчи-шоирларнинг хонадонларида (уларнинг меросхўрлари қўлида), уй-музейларида, турли архив, кутубхона, илмий-тадқиқот муассасалари фондларида сақланади. Илм-фан ва техника тараққиёти А. тушунчасига маълум ўзгартиришлар киритди. XIX аср охириларида бошлаб ёзувчилар орасида ўз асарларини ёзув машинкасида, XX аср охириларида эса компьютерда ёзиш расм бўлди. Шунга қўра, эндиликда асарнинг муаллиф томонидан ёзув машинкаси ёки компьютерда терилган матни ҳам А. саналади; 2) китобни бирор шахс (ташкilot, муассаса ва ш.к.)га тақдим этиш чоғида унинг титул варағига муаллиф қўли билан битиладиган мўъжаз ёзув, дастхат. Унда, одатда, муаллифнинг китоб тақдим этилаётган кишига самимий тилаклари, миннатдорлиги ва ш.к.лар изҳор этилади.

**АВТОИНТЕРПРЕТАЦИЯ** (юн. *autos* – ўзим, лот. *interpretation* – тушунтирма) – муаллифнинг ўқувчига ўз асарини тушунтириш,

унга ўзи назарда тутган маънони англатишга қаратилган ҳаракати. А. турли шаклларда (сўзбоши, сарлавҳа, эпиграф, бағишлов, сўнгсўз, сатр ости изоҳлари ва ш.к.) амалга ошиши мумкин. Мас., Фахриёрнинг «Арафа» шеърида сарлавҳа мазмуннинг англатишида жуда муҳим:

*Деворда осиглиқ қилич  
занглари тўқа бошлади,  
ярақлай бошлади тўсатдан  
ярим ой шаклида...  
Девор эса қизил эди.*

Шеър 1989 йили ёзилгани эътиборга олинса, шоир уни нима учун «Арафа» деб номлагани ҳам, шеърдаги рамзий образлар мазмуни ҳам англашилади. Ёки Х.Даврон «Дунё гўзал, – деди...» деб бошланувчи шеърига Рудакийдан «Кўзларимдан айрилиб кўрдим бутун дунёни» мисрасини эпиграф қилиб олади, шу эпиграф туфайлигина ўқувчи матнда «кекса шоир» деб аталган лирик персонаж Рудакий эканини англайди, шеърдаги ўткир драматизмни ҳис қилади, унинг фалсафий мазмунини тушунади. «Ўткан кунлар»нинг бир ўрнида А.Қодирий сатр ости изоҳи шаклида Мусулмонқулнинг қатл этилиши эпизодини беради, бу эса Мусулмонқул Отабек билан тўқнашган ҳолат моҳиятини, муаллифнинг инсон концепциясини тўғри тушуниш учун бир қалитдир. Кўпинча А.нинг мазкур шаклларида қувлик, тағдор маънога ишора мавжудлиги кузатилади. Мас., Чўлпон «Кеча» романига М.Горькийнинг: «Маърифат чоғиштириб кўриш орқали ҳосил бўлади, бизнинг ёшлар эса ўз кўрганларини ҳеч нима билан чоғиштиролмайдилар, улар кечмишни билмайдилар ва шу учун ҳозирги замоннинг нималигини етарли даражада очик англаёлмайдилар», – деган сўзларини эпиграф қилиб олади. Бу ўринда эпиграф маъносини икки ёқлама тушуниш имконияти бор: Чўлпон кечмишни ёшлар ҳозирги замоннинг қадрига етсинлар деган мақсадда тасвирлаётганини «совет ёзувчиси» мавқеидан туриб таъкидлайди, айни чоғда, сохта тарих миясига сингдирилиб, манқуртга айлантирилаётган ёшлар «ҳозирги замоннинг нималигини етарли даражада очик англасинлар» учун асарни яратганини миллатнинг кўзи очик бир вакили мавқеида туриб айтади. Яъни эпиграф танлашдаёқ Чўлпон романининг мазмун структураси моделини шакллантиради: ўзи айтмоқчи бўлган фикр тубда, юзадагиси эса фақатгина «ниқоб» – во-

сита, холос. Муаллиф ўз асари (айниқса, асар баҳс-мунозараларга сабаб бўлса) ҳақида матбуот орқали билдирган фикрлар (суҳбат, мақола, очиқ хат ва ш.к.) ҳам А.нинг кўринишларидан саналади.

**АВТОПСИХОЛОГИК ЛИРИКА** – лириканинг субъектив ташкилланишига кўра кўриниши, *ижровий лирикага* (қ.) зидлаган ҳолда фарқланувчи лирик кечинма бевосита шоир тилидан ифода этилган шеър. Мутахассислар лирика аксар ҳолларда автопсихологик бўлиши, айти чоғда, лирик қаҳрамон билан биографик шоир доим ҳам *бир-бирига тенг эмаслигини таъкидлайдилар* (қ. *лирик қаҳрамон*).

**АВТОР** (лот. autor – асосчи, ижодкор) – қаранг: **муаллиф**

**АВТОР НУТҚИ** – қаранг: **муаллиф нутқи**

**АВТОР ОБРАЗИ** – қаранг: **муаллиф образи**

**АДАБИЁТ** (ар. *ادب* адаб – гузал хулқ) – кенг маънода инсон тафаккурининг маҳсули ўлароқ дунёга келган, ўқиш учун мўлжаллаб ёзилган асарлар жами. Тор маънода сўз санъати, бадиий адабиёт. Мумтоз адабиётшунослигимизда сўз санъатини умумлаштириб А. деб аташ одати кузатилмайди, терминнинг бу маънода ишлатилиши кўпроқ кейинги даврларда, хусусан, XX асрда оммалашган. Ғарбда антик даврлардан бошлаб то XVII – XVIII асрларга қадар бадиий адабиётни «поэзия» деб атаб, унга «проза»ни (қ. *проза*) қарши қўйишган. Шунга ўхшаш Шарқда мумтоз адабиётшунослиқда ҳам кўпроқ «шеър» ва «наср» атамалари ишлатилган. Ҳозирги даврга келиб сўзлашув амалиётида ҳам, илмий муомалада ҳам А. терминининг тор маъноси фаолроқ қўлланилади, у бадиий адабиёт маъносида ишлатилади. Ҳолбуки, тор маънода қўлланганида ҳам терминнинг қамрови жуда кенг, чунки у *адабий-бадиий асарларнигина эмас, адабий асарларни ҳам тўла қамраб олади*. Яъни А.ни сўз санъати деб билган ҳолда унга санъат ҳодисаси бўлмаган асарлар (мас., мемуарлар, кундалиқлар, сафарномалар, эсселар, афоризмлар ва б.) ҳам мансуб этилади. Мазкур ҳол муайян чигалликларни келтириб чиқаради, илмий аниқлик талаби билан баъзан «бадиий адабиёт», «адабий-бадиий асар» тарзидаги аниқловчилик бирикмаларни ишлатишни тақозо этади. А. термини остида умумлаштирилган икки турли ҳодисани фарқлаш учун бирини *бадиий адабиёт*, иккинчисини *беллетристика* деб юритиш ҳоллари ҳам мавжуд. Рус тилидаги манбаларда қўлланувчи «словесность» термини шу жиҳатдан анча қулай ва аниқ: у сўз воситасида яратилган маънавий қадриятларнинг барини жам этса, унинг таркибидаги бадиий асарларни «художественная словесность» деб фарқлашади. Терминологик аниқликка

зришиш учун сўз воситасида яратилган маънавий қадриятларнинг жамини А., унинг таркибидаги сўз санъатига дахлдор ҳодисаларни эса *бадиий адабиёт* деб юритиш мақсадга мувофиқдир.

**АДАБИЁТШУНОСЛИК** (ар. *ادب* – адаб, форс. *شأنس* – таниш, ўрганиш) – бадиий адабиётнинг келиб чиқиши, моҳияти, ривожланиш қонуниятлари, ижтимоий алоқаларини ўрганувчи фан. А.нинг объекти бўлмиш бадиий адабиётга тааллуқли илмий муаммолар кўлами – предмети жуда кенг. Уларнинг бир қисми умумэстетик (яъни бадиий санъат соҳаларининг барчасига тааллуқли, мас., бадиий образ ва образлилик, бадиий образ ва реаллик муносабатлари, дунёқараш ва бадиий ижод, бадиий ижод жараёни хусусиятлари, бадиий асарни қабул қилиш жараёни хусусиятлари ва б.) муаммолар сирасига кирса, бошқа бир қисми соф А. муаммолари саналади. Санъатнинг барча турларига оид муаммоларни А. бадиий адабиёт нуқтаи назаридан, бадиий адабиёт билан боғлаган ҳолда ва унинг мисолида ўрганади. *Бадиий адабиётнинг моҳияти, унинг ривожланиш омиллари ва қонуниятлари, бадиий (адабий) асар табиати, унинг тузилиши, бадиий (поэтик) тил хусусиятлари, адабий тур ва жанрлар каби қатор масалалар борки, улар соф А. муаммоларидир*. Замонавий А. фани учта асосий соҳадан ташкил топади: *адабиёт тарихи, адабиёт назарияси ва адабий танқид*. Мазкур соҳаларнинг ҳар бири бадиий адабиёт билан боғлиқ муайян масалалар мажмуини ўз олдига қўйилган мақсад ва вазифалардан келиб чиққан ҳолда ўрганади. Айти чоғда, бу соҳалар ўзаро мустаҳкам алоқада бўлиб, бир-бирини тўлдиради, бир-бирига манба яратади, асос бўлиб хизмат қилади ва шу тарзда ягона бир тизимга бирикади. Булардан ташқари, А.нинг *матншунослик, манбашунослик, библиография* сингари ёрдамчи соҳалари ҳам мавжуд.

Ўзининг объекти, предмети ва тадқиқ усулларига эга бўлган мустақил фан сифатида А.нинг фанлар тизимида муқим ўрин олиши XVIII аср охири – XIX аср бошларига тўғри келади. Антик даврларда фанлар ўзаро ажралмаган, хусусан, А. ҳам фалсафа ичидаги бир бўлим эди. *Кишилик жамиятининг тараққиёти, инсон тафаккурининг ривожидан бошқа фанлар қатори А. ҳам алоҳида фан сифатида ажралиб чиқди ва ривож топди*. Бироқ буни маҳдудлашиш деб тушунмаслик лозим, чунки А. бошқа фанлар билан, айтиқса, ижтимоий-гуманитар фанлар билан мустаҳкам алоқада яшайди. *Жумладан, айрим фанлар (фалсафа, эстетика, герменевтика) А. учун методологик асос бўлиб хизмат қилса, бошқалари (фольк-*

лоршунослик, маданиятшунослик, санъатшунослик) билан у вазифалари ва тадқиқ предметининг кўп жиҳатдан яқинлиги туфайли алоқадордир. А.нинг предмети бадиий адабиёт, бадиий адабиётнинг предмети эса борлиқда, турфа ижтимоий муносабатлар ичинда яшаётган инсондир. Шу жиҳатдан А. инсон ва жамиятни умумий йўналишда ўрганувчи фанлар (тарих, социология, психология каби) билан табиий алоқада бўлади. Филологик фан сифатида А.нинг тилшунослик билан алоқаси, айниқса, самарали ва муҳим. Бадиий адабиётнинг материали сўз, адабий асар сўзлардан таркиб топувчи матндир. Бадиий матн тил қонуниятлари асосида таркиб топади. Шундай экан, тил қонуниятларини билиш матн қурилиши, унинг таъмаънолари, ишлатилган стилистик фигураларнинг эстетик қиммати, функциялари каби қатор масалаларни ўрганишда жуда муҳим. Одатда, бадиий матн тилини ўрганишга қаратилган ишларга А. ва тилшунослик чегарасидаги ишлар сифатида қаралади. Бироқ бунда чегарани аниқ олиш лозим. Гап шундаки, А. тилшунослик ютуқларига таянган ҳолда тасвир воситаларининг, умуман, матннинг эстетик томонларини ўрганса, тилшунослик тил қонуниятларини ўрганишни мақсад қилади. Яъни тилшунос учун бадиий матн материал бўлса, адабиётшунос учун у асосий объект саналади. Тилшунослик билан А. алоқалари шу билангина чекланмайди. Тилшунослик кишилар орасидаги мулоқот воситаси бўлган тилни ўрганса, А. ижодкор ва ўқувчи орасидаги бадиий мулоқот воситаси бўлган бадиий асарни ўрганади. Мулоқот қонуниятларининг муштараклиги эса А.нинг қатор муаммоларини тил қонуниятлари билан қиёсан ўрганиш имкониятини беради. А. фаолиятида бадиий нутқ шакллари, ритми, интонация, шеър синтаксиси, экспрессивликни оширувчи воситалар каби қатор тушунчаларга дуч келинадик, буларнинг тилшуносликдаги талқинини билган адабиётшуноснинг изланишлари, албатта, самаралироқ бўлади. Кейинги давр А.ида пайдо бўлган «психологик мактаб», «структурал А.», «генератив поэтика», янги кириб келаётган «когнитив А.» каби йўналишлар бевосита тилшунослик ютуқлари асосида юзага келган.

**АДАБИЁТ НАЗАРИЯСИ** – адабиётшунослик фанининг асосий соҳаларидан бири. А.н. бадиий адабиётнинг моҳияти, ривожланиш омиллари, жамият ҳаётидаги ўрни ва вазифалари, бадиий асар табиати ҳамда унинг тузилиши, бадиий тил хусусиятлари, адабий тур ва жанрлар каби масалаларни умумий тарзда ўрганади ва шу асосда умумий қонуниятларни очиб беради. Шунингдек, А.н. бадиий образ

ва образлилик, бадиий образ ва реаллик муносабатлари, дунёқараш ва бадиий ижод, бадиий ижод жараёни хусусиятлари, бадиий асарни қабул қилиш жараёни хусусиятлари каби қатор умумэстетик масалаларни ҳам сўз санъатига татбиқан ўрганади. А.н. бадиий асарларни таҳлил қилиш тамойиллари, баҳолаш мезонлари, таҳлил методларини ишлаб чиқади, адабий-назарий тушунчалар тизимини яратади. А.н. адабиётшуносликнинг ядросини ташкил қилади. А.н. *адабиёт тарихи* ва *адабий танқид* материалларини умумлаштиради, бу иккиси ўз фаолиятида А.н. очган қонуниятлар, у ишлаб чиққан илмий тушунчалар тизимига таянади. Шу тариқа адабиётшуносликнинг ҳар учала асосий соҳалари бир-бири билан боғланади, яхлит бир тизим – адабиётшунослик илминини ташкил қилади.

Шарқ мумтоз адабиётшунослигида, жумладан, ўзбек адабиётшунослигида А.н.нинг бир қатор масалалари анча кенг ўрганилган. Бундай масалалар сирасига *илми аруз* (Навоий, Бобур), *илми қофия*, *илми бадиъ* (А.Хусайний, Тарозий) кабиларни киритиш мумкин. Мазкур масалалар адабиётшуносликнинг бир қисми – *поэтика* доираси билан чекланган эди. Шарқда «муаллими соний» дея улуғланувчи Форобий эса юнон файласуфи Арасту таъсирида ва бевосита унинг асарларини шарҳлаш жараёнида бадиий адабиёт спецификаси (моҳияти), тур ва жанрлар каби масалаларга эътибор қаратган. Бироқ мумтоз адабиётшуносликда А.н. муайян бир тизим ҳолига келмаган, татбиқий характердаги ҳодиса эди. Ўзбек адабиётшунослигида А.н.нинг алоҳида тармоқ сифатида шаклланиши ХХ асрнинг дастлабки чорагига тўғри келади, соҳанинг қалдирғочлари сифатида Фитрат, Абдураҳмон Саъдийларни кўрсатиш мумкин. Адабиётшунослигимизнинг кейинги тараққиёти давомида И.Султон, Н.Шукуров, Б.Саримсоқов, Б.Назаров, Т.Бобоев каби қатор олимларнинг тадқиқотлари адабий-назарий тафаккур ривожига сезиларли ҳисса бўлиб қўшилди.

**АДАБИЙ АНЪАНА** – ўтмиш адабиёти тўплаган ижодий тажрибалар қаймоғи, даврлар ўтиши билан аҳамияти ва долзарблигини йўқотмаган, боқий қадриятга айланиб, авлоддан-авлодга ўтиб келаётган қисми. Демак, А.а. доирасига ўтмиш адабиёти эришган ютуқлар, тўплаган тажрибаларнинг ҳаммаси ҳам эмас, балки унинг муайян давр ижодкорлари томонидан долзарб деб топилган, боқий қадрият сифатида баҳоланган ва ўз ижодий фаолиятларида намуна деб ҳисоблаган қисмигина киради. Ҳар бир авлод ўтмиш адабиётига сайлаб муносабатда бўлади, унга фаол ижодий ёндашади, са-

лафлар тажрибасини ўз даври кўйган бадиий-эстетик вазибаларни бажаришга хизмат қилдиради. Шунга кўра, А.а. ва янгилик (қ. *новаторлик*) ҳамқадамлиги қонуний ҳодиса бўлиб, бу иккиси диалектик алоқадаги бирликни ташкил этади ва адабиёт тараққийнинг муҳим ички омилига айланади. Ҳар бир давр ўзидан олдинги давр адабиётида мавжуд энг яхши жиҳатларни ўзига сингдиради ва унга нимадир қўшишга интилади, шу асосда тараққийт жараёнининг узлуксизлиги таъминланади. Адабиётдаги *ворисийлик*, А.а.ларга содихлик миллий адабиётдаги ўзига хослик, миллий киффани йўқотмаслик кафолатидир. Табиийки, бой А.а.га таянган адабиётнинг ривожланиш имкониятлари бошқаларга нисбатан юқори бўлади. Мас., халқимизнинг бой адабий-маданий анъаналари XX аср бошларида кузатилган янги ўзбек адабиётининг шаклланиш жараёни тез кечишини таъминлади: адабиётимиз жуда қисқа фурсат ичида жаҳон адабиётидаги ютуқларнинг кўпини ижодий ўзлаштирди, ўзининг бадиий арсеналини бойитди. Айтайлик, роман Ғарб адабиётига хос жанр эканлиги, унинг ўзбек адабиётида ўзлашиши 20-йилларга тўғри келиши маълум. Бироқ ғарбона шакл миллий адабиётимизни бойитдигина эмас, балки адабий анъаналаримиз заминидан унинг ўзи ҳам бойиди – ўзбек романчилиги дунёга келди. Миллий романчилигимизнинг илк намунаси бўлмиш «Ўткан кунлар»дан бошлаб «Отандан қолган далалар»гача бўлган намуналарида минг йилликлар билан ўлчанадиган адабий-маданий анъаналаримиз излари бор, шу туфайли ҳам у ўзининг киффасига эга «ўзбек романи»дир.

**АДАБИЙ ЙЎНАЛИШ** (русчадан калька: «литературное направление», «литературное течение») – адабий жараён билан боғлиқ категория. А.й. тушунчаси *ҳаётни бадиий акс эттириш принциплари*, *метод* ва *услуг* тушунчалари билан бевосита боғлиқ, у бадиий тафаккур тарзи, метод ва услуб кесишган нуқтада юзага келади. Муайян даврда яшаган бир қатор ижодкорлар яратган кўплаб асарларда типологик умумийлик мавжуд. Типологик умумийлик ҳаёт материални танлаш, уни бадиий идрок қилиш ва баҳолаш принципларида, асарларнинг бадиий шакл хусусиятлари, услубий жиҳатларида ўзини намоён этади. Узлуксиз адабий жараённинг муайян босқичларида кузатиловчи бадиий ижоднинг гоаявий-эстетик тамойиллари асосидаги умумийлик А.й. ҳақида гапириш имконини беради. А.й. адабий жараённинг, бадиий тафаккур тараққийнинг маълум бир босқичини назарий жиҳатдан умумлаштириш орқали унинг моҳиятини англаш имконини беради. Айни пайтда, адабиёт

тараққийи, бадиий тафаккурнинг ривожланиш тамойиллари А.й.лар алмашинуви, улар орасидаги курашда очиқ намоён бўладики, шу жиҳатдан А.й. адабий жараённи ўрганишдаги муҳим адабий-эстетик категория саналади. Мас., Европа адабиётида *классицизм* йўналишининг гоаявий-эстетик принциплари билан зиддият, бир томондан, *барокко*, иккинчи томондан, *маърифатпарварлик реализми*ни майдонга чиқарди, ўз навбатида, кейинчалик худди шундай зиддиятлар асосида *романтизм* ва *тўққидий реализм* йўналишлари юзага келди. Адабиёт тараққийидаги *ворисийлик* қонуниятига кўра, ҳар бир А.й. куртаклари аввалгилари бағрида етилади. Дейлик, классицизм бағрида ҳам маърифатпарварлик реализмига, ҳам сентиментализмга хос унсурлар мавжуд эди, кейинги йўналишга мансуб ижодкорлар улардан маъқулини олиб, маъқул келмаганини инкор қилган ҳолда ўз гоаявий-эстетик принципларини қарор топтиришга интидиларки, бу бадиий тафаккур ривожига (ундаги силжиш, ўзгаришга) асос бўлди.

Адабиётшуносликда А.й. истилоҳини қўллашда турличалик кузатилади: баъзан у *адабий оқим* атамасига, баъзан эса *метод* тушунчасига синоним сифатида ишлатилади. Мас., *классицизм*ни метод, *барокко* ёки *сентиментализм*ни оқим, *романтизм*ни эса адабиёт тараққийидаги босқич деб қараш ҳоллари борки, моҳиятан бир хил адабий ҳодисаларнинг турли атамалар билан номланиши чалқашликлар келтириб чиқаради.

**АДАБИЙ МАКТАБ** (русчадан калька: «литературная школа») – адабий йўналиш ичидаги ҳодиса, муайян гоаявий-эстетик қарашлар, ижодий принципларни дастурий тарзда қабул қилган ижодкорлар гуруҳи. Мас., француз романтизм адабиётидаги «Парнас» гуруҳи шундай ижодкорларни бирлаштирган бўлиб, «парнас»чиларнинг гоаявий-эстетик қарашлари, ижод намуналари «Янги Парнас» номи билан чоп этилган тўпламларда ўз аксини топган. XX аср бошларида рус адабиётида майдонга чиққан *модернистик* йўналиш ичида *символизм*, *акмеизм*, *футуризм* каби оқимлар, футуризм оқими ичида эса, мас., *кубофутуризм* деб юритилувчи адабий мактаб бўлган. В.Хлебников, В.Маяковский сингари истеъдодли ижодкорларни бирлаштирган кубофутуристларнинг «Гилея» гуруҳи ўз адабий-эстетик қарашлари, ижодий принципларини «Жамият дидига тарсаки» номи манифестда эълон қилган.

**АДАБИЙ ОҚИМ** (русчадан калька: «литературное течение») – адабий жараён билан боғлиқ категория, муайян давр адабиёти-



даги адабий йўналишнинг бир кўриниши, ўзига хос бир варианты. Типологик умумийлик бир йўналишга мансуб ижодкорларнинг ҳам гоёвий ёки эстетик жиҳатдан ўзига хос томонлари бўлишини инкор қилмайди. Яъни бир йўналиш доирасидаги асарларда турлича идеаллар, дунёқараш акс этиши, бадиий-эстетик принципларда муайян фарқлар кузатилиши табиий ҳодисадир. Бу нарса бир йўналиш ичида алоҳида гуруҳни ташкил этаётган ижодкорларга хос типологик умумийлик ҳақида, адабий йўналишнинг варианты сифатида бўй кўрсатувчи А.о. ҳақида гапиришга имкон беради. Мас., барокко йўналишининг варианты сифатида испан адабиётидаги *гонгоризм*, италян адабиётидаги *маринизм* ёки французларнинг *прециоз адабиётини* кўрсатиш мумкин. Дейлик, *гонгоризм* гоёвий-эстетик принциплари (уйғониш даври идеалларига зидлик, услубнинг жимжимадорлиги, образларнинг метафориклиги) жиҳатидан бароккога мансуб этилади, айни чоғда, унда араб шеърини таъсирида бу хусусиятлар (мажозийликнинг ўта кучайиши, услубнинг мураккаблашуви, фикрни яширин ифодалаш, фикрни закийлик билан айтишга интилиш ва б.) ўзига хос тарзда намоён бўлади.

**АДАБИЁТ ТАРИХИ** – адабиётшунослик фанининг асосий соҳаларидан бири. А.т.нинг предмети ўтмиш адабиёти бўлиб, уни жараён ёки шу жараённинг бир бўлаги (босқичи) сифатида тадқиқ этади. А.т.нинг асосида тарихийлик принципи ётади. Тарихийлик принципи адабий жараённи конкрет ижтимоий-тарихий шароит билан боғлиқ ҳодиса сифатида ўрганишни тақозо этади. Яъни А.т. ўтмишдаги адабий ҳодисаларни, яратилган асарларнинг гоёвий-мазмуний хусусиятларини белгилаган, бадиий тафаккур ривожини, поэтик усул ва воситаларнинг ўзгариши ва ш.к.ларга асос бўлган ижтимоий-иқтисодий, маданий-маърифий омилларни очиб беради. А.т. нуқтаи назаридан конкрет бадиий асар таҳлил қилинганда ҳам ўша асар яратилган давр шароити, давр адабий жараёни хусусиятларини назарда тутиш шарт. А.т.ни қизиқтирадиган масалалардан яна бири конкрет ижодкор фаолиятини ўрганишдир. Ижодкор фаолиятини ўрганганда, унинг ижодий ўсиш жараёнини кузатганда ҳам асосга қўйилган принцип тарихийлик бўлиши лозим. А.т. ўтмиш адабиёти хусусиятларини очиб бераркан, биринчидан, ўтмиш адабиёти тажрибаларини бугунги адабиёт хизматида сафарбар этади, иккинчидан, кенг кўламли назарий хулосалар чиқариш учун зарур материал ҳозирлайди. Шунга кўра, А.т. бадиий тафаккур тараққиётида ҳам, адабий-назарий тафаккур ривожига ҳам катта аҳамият касб этади.

Ўзбек адабиётшунослигида А.т. соҳасининг дастлабки куртаклари сифатида *тазкираларни* кўрсатиш мумкин. Шунингдек, қатор тарихий ва мемуар асарларда айрим адабий фактлар, муайян ижодкор ҳаёти ва фаолиятига доир маълумотлар ҳам қайд этилган. Бироқ ўзбек адабиётини тарихий аспектда кўламли ўрганиш, яъни ўзбек адабиётшунослигида А.т.нинг мустақил тармоқ сифатида шаклланиши ва ривожини XX асрга тўғри келади. Ўзбек адабиётшунослигида адабиёт тарихи соҳасининг шаклланишида Фитрат, А.Саъдий, О.Шарафуддинов, В.Зоҳидов, В.Абдуллаев, Ҳ.Сулаймонов, Ф.Каримов, Н.Маллаев, А.Қаюмов, А.Ҳайитметов, А.Абдуғафуров сингари олимларнинг улкан хизматларини алоҳида қайд этмоқ лозим. Ўзбек адабиёти тарихини ўрганиш борасидаги изланишлар ҳозирги кунда ҳам давом эттириляптир. Мавжуд ижтимоий воқелик ўтмиш меросимизга муносабатни ўзгартиришни, қатор, адабий ҳодисалар, фактлар, ижодкор шахслар тақдири ва фаолиятини янгилаш, илмий холис талқин қилиш заруратини кун тартибига қўйдик, бу А.т. зиммасига улкан вазифаларни юклайди.

**АДАБИЙ ТАЪСИР** (русчадан калька: «литературное влияние») – адабий жараёнда табиий равишда ва қонуният мақомида мавжуд бўлган, бадиий тафаккур ривожига муҳим аҳамиятга молик ҳодиса. А.т. адабий-бадиий ҳодисаларнинг замон ва макондан қатъи назар ўзаро алоқада яшаши оқибати ўлароқ воқе бўлади. Демак, А.т. битта миллий адабиёт ёки адабиётлараро алоқалар, бир давр адабиёти ёки турли даврлар адабиёти доирасида ҳам кузатилади. Шунга кўра, А.т.нинг кўлами ва даражаси турлича (умумий ва шахсий) бўлиб, улар бир қатор омилларга боғлиқдир. Дейлик, турли халқларнинг яшаш ҳудуди, турмуш тарзи, эътиқоди каби омиллардаги муштараклик (мас., форсий ва туркий адабиётлар) ёки муайян тарихий шароитда турли халқлар орасидаги ўзаро иқтисодий, сиёсий ва маданий алоқаларнинг кучайиши (мас., рус адабиёти билан ўзбек адабиёти) бир миллий адабиёт тажрибаларининг бошқа бир миллий адабиётлар доирасида кечувчи А.т. билан бир қаторда шахсий А.т. ҳам борки, аҳамияти жиҳатидан у аввалгисидан асло кам эмас. Ҳар қандай ижодкор фаолиятининг илк босқичида салафларнинг муайян таъсири мавжудки, бу ўша ижодкорнинг шаклланишида, унинг ўз ижодий индивидуаллигига эга бўлишида муҳим аҳамиятга эгадир. Маълумки, А.Қаҳҳор ижодига, айниқса, унинг илк ҳикояларида рус адиби А.П.Чехов асарларининг таъсири яққол сезилади. Чинакам

истеъдод эгаси сифатида А.Қаҳҳор салафига ижодий эргашиб босқичидан у билан ижодий мусобақалашиб даражасига кўтарила олди, рус адаби кўллаган усул ва воситаларни миллий адабиёт анъаналари билан омикталаштириб, уларни миллий адабиётимиз заминидан кўкартира билди, шу туфайли ҳам ўзбек ҳикоячилигининг тан олинган устаси мақомига эришди. Айни чоғда, А.Қаҳҳор ижодида Н.В.Гоголь, И.Тургенев, Ж.Лондон, О'Генри каби адабларнинг ҳам турли даражадаги таъсири сезилади: Гоголь таъсири кўпроқ услубда, воқеликка кинояли муносабатда; И.Тургенев ва О'Генри таъсири айрим ҳикояларнинг, Ж.Лондон таъсири эса «Сароб» романининг ички структурасида кўзга ташланади. Бундан аён бўладики, улкан истеъдод эгалари яратган асарларнинг таъсири кейинги авлодлар ижодида турли даражада намён бўлади. Мас., Алишер Навоий ижодининг таъсири мумтоз шеърятимизнинг ундан кейин қалам тебратган деярли барча намояндалари ижодида сезилади. Дейлик, Мунис ва Огаҳий ижодида бу таъсир бўртиб кўзга ташланса, бошқа ижодкорларда яққол кўринувчи таъсир аломатлари камроқ. Шу билан бирга, ўзбек шеърятини Навоий даҳоси таъсиридан буткул холи ижодкорни кўрсатиш мушкул. Чунки Навоий сингари улкан даҳолар миллат руҳиятига, миллий бадий тафаккурга батамом сингиб кетади – ўзига хос атмосферага айланадики, ўша атмосферадан нафас олганки ижодкор ундан нафланган бўлади. Демак, шундан келиб чиққан ҳолда А.т.нинг бевосита ва билвосита кўринишлари ҳақида ҳам гапириш мумкин экан.

Умуман олганда, адабий алоқалар ва уларнинг ҳосиласи бўлмиш А.т. адабиёт тараққиётида ижобий ҳодиса саналади. Адабий алоқа ва А.т. туфайли у ёки бу миллий адабиёт тараққиётида сезиларли сифат ўзгаришлари, кескин силжишлар кузатилиши мумкин. Буни, мас., ХХ аср бошларидаги ўзбек адабиёти мисолида, янги ўзбек адабиётининг шаклланишида кузатиш мумкин. Ўзбек адабиёти жаҳондаги илғор адабиётлар асрлар давомида етиб келган даражага қисқа вақт ичида кўтарила олди. Биргина ўзбек романчилиги мисолида қарасак ҳам, адабиётимизда ХХ асрнинг 1-чорагида қарор топган романчилик қисқа вақт ичида жаҳон романчилиги билан бўйлаша оладиган даражага етганини, бунда бой миллий анъаналар билан бирга адабий алоқалар ва А.т.нинг жуда катта ўрни борлигини кўриш мумкин. Чунки ўзбек романнавислари учун жаҳон романчилигининг тайёр тажриба мактаби мавжуд бўлиб, улар бундан миллий адабий анъаналаримиз заминидан самарали фойдалана билдилар.

**АДАБИЙ ТАНҚИД** (ар. – نقد муҳокама қилиш, саралаш) – адабиётшуносликнинг асосий соҳаларидан бири. А.т. ҳозирги адабий жараён муаммоларини ўрганиш, янги пайдо бўлган асарларни бугунги кун нуқтаи назаридан гоёвий-бадий таҳлил ва талқин этиш, баҳолашни мақсад қилиб қўяди. А.т. адабиётшуносликнинг оператив, жорий адабий жараёнга бевосита аралашадиган соҳасидир. Айтиш керакки, А.т.ни адабиётшуносликнинг таркибий қисми сифатида тушуниш умумэътирофга молик қараш эмас. Айрим мутахассислар А.т.ни адабиётшунослик илмининг таркибий қисми эмас, балки адабий ёки публицистик ижоднинг бир тури деб ҳисоблайдилар. Бу нарса А.т.нинг ўзигагина хос, адабиётшуносликнинг бошқа соҳаларидан фарқланувчи хусусиятлари билан изоҳланади. А.т. ўзида адабиётшунослик илми, бадий адабиёт ва публицистикага хос жиҳатларни уйғунлаштиради. Аввало, адабий-танқидий асар фақат илмий доираларга эмас, балки кенг аудиторияга мўлжаллаб ёзилади. Унда адабий асар баҳона куннинг долзарб ижтимоий-сиёсий, маънавий-маърифий масалаларидан ҳам баҳс этилади. Шунга кўра, унинг тили – илмий-оммабоп тил. Боз устига, бадий асар ҳақида сўз бораркан, танқидчи фақат тушунчалар воситасида эмас, баъзан образли тафаккур унсурлари билан ҳам фикрлайди; мантикийгина эмас, ҳиссий мушоҳадаларга ҳам таянади. Бадий асар ҳақида фикр юритаётган, уни бугунги кун нуқтаи назаридан баҳолаётган танқидчи ўқувчи оммага бевосита таъсир қилишни ҳам кўзда туттади. Айни пайтда, бадий асарни таҳлил қилаётган танқидчининг фикрлари адабиёт назариясига, адабиётшунослик илмининг ютуқларига асосланади. Буларнинг бари А.т.ни адабиётшунослик, бадий адабиёт ва публицистика оралиғидаги ҳодисага айлантиради.

**АДАБИЙ ТУР** – адабий асарларнинг нутқий ташкилланиши, тасвир предмети, объект ва субъект муносабати каби жиҳатлари билан умумийлик касб этувчи йирик гуруҳи. Анъанавий равишда бадий асарлар учта катта гуруҳга: эпик, лирик ва драматик турларга ажратиб келинади. Адабий асарларни турларга ажратиш масаласи қадимдан диққат марказида бўлган. Антик давр юнон файласуфи Афлотун ўзининг «Давлат» асарида шоир ўз тилидан (лирика), ўзгаларнинг гапларини мулоқот сифатида тасвирлаб (драма) ёки бу иккисини қоришиқ (эпос) кўллаган ҳолда тақлид қилиши мумкинлигини айтади. Санъатни табиатга «тақлид қилиш» деб билган Арасту эса табиатга уч хил йўсинда: 1) ўзидан ташқаридаги нарса тўғрисида ҳикоя қилаётгандек (эпос); 2) тақлидчи ўз ҳолича қолган, қиёфасини

ўзгартирмаган ҳолда (лирика); 3) тасвирланаётган кишиларни фаол ҳаракатда тақдим этган ҳолда (драма) тақлид қилиш мумкин деб билган. Турларга ажратишда тақлид усулини асосга қўйиш анъанаси XVIII асргача давом этди. XVIII асрга келиб немис файласуфи Гегель бадиий адабиётни турларга ажратишда «объект» ва «субъект» муносабатини, шунингдек, тасвир предметини, яъни конкрет асарда нима тасвирланаётганини асос қилиб олди: эпос воқеани, лирика руҳий кечинмани, драма ҳаракатни тасвирлайди. Гегель анъанасини давом эттирган В.Г.Белинский объект (воқелик) ва субъект (ижодкор) муносабатига кўпроқ ургу берди: эпосда объективлик, лирикада субъективлик, драмада иккисининг қоришиқлиги кузатилишини таъкидлади. Эпосни «объектив поэзия» деркан, Белинский эпик асар муаллифи ўзининг ихтиёридан ташқари «ўз-ўзича амалга ошган нарсанинг оддий ҳикоячиси» мақомида туришини, лирикани «субъектив поэзия» деганида эса «унда ижодкор шахсиятининг биринчи планда туриши ва барча нарса унинг шахсияти орқали қабул қилиниши ва англаниши»ни назарда тутди. Албатта, объективлик ва субъективлик тушунчаларини мутлақлаштирмаслик зарур. Зеро, эпос «объектив поэзия» дейилса ҳам, унинг «объективлиги» ўқувчи наздидаги иллюзия, холос, аслида, эпик асарда ҳам субъектив ибтидо мавжуд.

Гегель тасниф асосларидан бири қилиб олган адабий асарларни тасвир предметидан келиб чиқиб турларга ажратиш тамойили ҳозирда кенгроқ оммалашган. Бунда конкрет асарда нима тасвирлангани эътиборга олинади: драматик асарда ҳаракат, лирик асарда кечинмалар, эпик асарда воқелик (воқеалар) тасвирланади. Бунга кўшимча асос сифатида асарда ниманинг образи яратилганини олиш мумкинки, бу тасвир предмети асосидаги таснифни тўлдиради; лирикада субъектнинг ноластик образи, бунинг зидди ўлароқ драмада объектнинг пластик образи, эпосда эса объект ва субъектнинг қоришиқ образи яратилади. Лирик асарнинг етакчи образи – лирик қахрамон, лирик асар ўқилганда лирик қахрамон ҳолати, кайфияти, кечинмалар қандай ҳолатда юзага келгани, унинг ҳис-кечинмаларига туртки бўлган воқелик фрагментлари ҳис этилади. Бироқ лирик қахрамоннинг ўзи жонли инсон (яъни объективлаштирилган тасвир) сифатида намоён бўлмайди. Драмада эса қахрамонлар реал, жонли инсон сифатида хатти-ҳаракатда бўладилар, унда субъект образи йўқ. Эпосда сўз воситасида тасвирланган бадиий воқеликни тасаввурда пластик жонлантириш мумкин, шу билан бирга, унда муаллиф

образи ҳам мавжуд. Бундаги муаллиф образи ҳам лирикадаги каби ноластик образ: унинг воқеа-ҳодисаларга муносабати, кайфияти, ўй-қарашлари ва ш.к. ҳар вақт сезилиб туради, бироқ муаллиф образи бошқа персонажлар образи сингари жонли инсон сифатида гавдаланмайди (асарда унинг объективлаштирилган тасвири йўқ).

Мазкур белгиловчи хусусиятлар билан бирга ҳар бир А.т.га мансуб адабий асарларга кўпроқ хос (яъни белгиловчи бўлмаган) хусусиятлар ҳам кузатилади. Жумладан, улар ўзларининг нутқий шаклланиши жиҳатидан фарқланади: лирик асарлар, асосан, шеъринг нутқ шаклида мавжуд, айна пайтда, насрий нутқ шаклида ёзилган лирик асарлар (мас., Фитрат, Чўлпон, Миртемир, И.Ғафуровларнинг насрий шеърлари; Чўлпоннинг «Октябрь қизи», А.Аъзамнинг «Ўзим билан ўзим» лирик дostonлари) ҳам бор. Эпик асарлар, асосан, насрда яратилади, лекин шеъринг йўлда ёзилганлари ҳам кенг тарқалган (мас., Б.Бойқобиловнинг «Кун ва тун» шеъринг қиссаси, Ҳ.Шариповнинг «Бир савол», М.Алининг «Боқий дунё» шеъринг романлари ва б.). Турли А.т.га мансуб асарлар ўзаро бадиий вақт ҳисси нуқтаи назаридан ҳам фарқланади. Мас., лирик асар «ҳозир кўнгилдан кечаётган» ҳис-туйғуларни тасвирлайди, шоир билан у тасвирлаётган кечинма, шеърхон билан у танишаётган ва ўзига юқтираётган кечинма орасида ҳар вақт «мен – ҳозир» тарзидаги вақт ҳисси мавжуд бўлади. Аксинча, эпик асарда «ўтмишда бўлиб ўтган» воқеалар қаламга олинади, зеро, замонда кечиб бўлган воқеаларнигина ҳикоя қилиб бериш мумкин. Ҳатто олис келажак тасвирланган фантастик асарда ҳам бўлиб ўтган воқеалар ҳикоя қилинади: ўқувчи гўё бўлиб ўтган воқеалар билан танишади. Яъни эпик асарда ёзувчи билан у тасвирлаётган бадиий воқелик, ўқувчи билан у тасаввурда қайта тиклаётган бадиий воқелик ўртасида ҳаммиша «мен – ўтмиш» тарзидаги вақт ҳисси мавжуддир. Бу жиҳатдан драматик асарлар ўзига хос: драмада тасвирланаётган воқеа, ўқилиши ёки сахнадан томоша қилинишидан қатъи назар, гўё «ҳозир содир бўлаётган воқеа» каби таассурот қолдиради. Демак, драматик асар ўқувчиси (ёки томошабини) билан унда тасвирланган воқеа орасида ҳам «мен – ҳозир» тарзидаги вақт ҳисси мавжуд бўлади. Шунингдек, ҳар бир адабий турга мансуб асарда бадиий конфликтнинг муайян бир тури устувор: драмада характерлараро конфликт, лирикада ички конфликт (асардаги акси жиҳатидан), эпосда эса конфликтнинг ҳар учала тури қоришиқ намоён бўла олади. Айрим манбаларда мазкур хусусият ҳам турга ажратиш асоси, турга мансубликни белгиловчи хусусият

сифатида кўрсатилади. Бироқ бу қараш баҳсли, чунки ҳар қандай асарда, унинг турга мансублигидан қатъи назар, конфликтнинг ҳар учала нави мавжуд бўлаверади (фақат акс этиши турлича, баъзилари аниқ тасвирланса, бошқалари ҳис этилади); улар ўзаро апоқада бўлиб, бири иккинчисини келтириб чиқаради, бири орқали иккинчиси ифодаланади.

А.т.лар орасида қатъий чегара, «хитой девори» йўқ. Яъни турларга ажратишда маълум шартлилик сақланиб қолаверади, зеро, муайян асарда барча А.т.ларга хос хусусиятлар ҳам зухур қилаверади. Иккинчи томондан, бадиий адабиёт ривожини давомидан А.т.лар бир-бирини бойитади, улар орасида синтезлашув жараёнлари кечади. Мас., замонавий эпос ўзига драмага хос элементларни сингдиргани учун тасвир ва ифода имкониятларини кенгайтди. Ҳозирги эпик асарларни улардаги диалоглар, бошқача айтсак, «сахна-эпизод»ларсиз тасаввур қилиб бўлмайди. Яна, ҳозирги эпосда драмага хос сюжет қурилиши (сюжет вақтининг қисқариши, воқеаларнинг драматик шиддат билан ривожланиши)нинг таъсири тобора кучайиб бораётгани кузатилади. Шунга ўхшаш драма ва лириканинг ўзига эпик унсурларни сингдириши уларнинг бадиий имкониятларини кенгайтиради. Мас., ҳозирги шеърятда воқеабанд шеърлар кенг оммалашгани, тавсифий лирикада эпик унсурлар салмоқли ўрин тутаётгани ҳам турлараро синтезлашув натижасидир.

А.т.ларнинг муайян давр адабий жараёнида тутган ўрни, мавқеи ҳар вақт ҳам бир хил эмас, тараққиётнинг маълум босқичларида уларнинг айримлари етакчилик мавқеини эгаллайди. Бу эса турли омиллар (ижтимоий-сиёсий, маданий-маърифий шароит, адабий-маданий анъаналар ва ҳ.) билан боғлиқдир. Мас., ўзбек адабиётида анъана билан боғлиқ ҳолда узоқ вақт лирика етакчилик қилган бўлса, XX аср бошларидан эпос етакчилик мавқеини эгаллай бошладики, бу ижтимоий-сиёсий, маданий-маърифий шароит (эпик турда бадиий концептуал функцияни амалга ошириш, дунёни англаш ва англатиш имкониятларининг кенглиги ва бунинг XX аср бошларида долзарблик касб этгани) билан изоҳланади. Ўтган асрнинг 60 – 70-йиллари ижтимоий-сиёсий шароити яна шеърятни етакчи мавқега олиб чиқдики, бу ижод эркинлиги бўғилган шароитда бадиий проза ўзининг энг муҳим функцияси – бадиий-концептуал функциясини тўлақонли бажаролмай қолгани билан изоҳланиши мумкин. 80-йилларга келиб эса эпос йўқотган мавқеини яна тиклай бошлади: М.М.Дўст, Э.Аъзам, А.Аъзам, Х.Султон каби ижодкорлар асарлари-

да жамиятни, замона кишилари руҳиятини ва бунинг воситасида жамиятнинг мавжуд ҳолатини чуқур бадиий идрок этишга интилиш кучайди. Бироқ, таъкидлаш зарурки, А.т.ларнинг бирини иккинчисидан устун қўйишга интилиш номақбулдир. Зеро, ҳар бир А.т. ўзига хос устун жиҳатларга эга, бу эса уларнинг ҳар бирида дунёни англаш ва англатиш имкониятлари турлича эканлиги билан изоҳланади. Баъзан «фалон шоир ўзининг фалон рубоийсида катта романда ҳам айтиш қийин бўлган гапни айта олган» қабилдаги мақтовлар эшитиладикки, бу хил қараш ўта жўн ва илмийликдан буткул йироқ, бадиий адабиёт ҳақида, бадиий асар ҳақида бу тарзда фикрлаш дилетантликдан бошқа нарса эмас. Негаки бадиий адабиётда айтишгина эмас, қандай айтиш ҳам муҳим. Зеро, ҳар бир адабий турга мансуб асарнинг қабул қилиниш механизмлари, ўқувчи руҳиятига таъсир ўтказиш имкониятлари ва йўллари турличадир. Бу ўринда халқимизнинг «ўнта бўлса ўрни бошқа, қирқта бўлса – қилиғи» қабилдаги нақлига амал қилган тўғрироқ бўлади.

**АДРЕСАТ** (нем. Adressat – почта жўнатмасини олувчи) – бадиий ижод жараёни билан боғлиқ ҳолда ишлатилувчи термин, ижод онларида ёзувчи тасаввурда мавжуд бўлган, асар мўлжалланган ўқувчи. Адабиётшуносликда ушбу тушунча реал ўқувчига зидланган ҳолда яна *имплицит ўқувчи*, *тасаввурдаги ўқувчи*, *ички ўқувчи* каби терминлар билан ҳам юритилади. Адабий асар, аввало, нутқ ҳодисасидир. Нутқ жараёни эса икки томон – нутқ субъекти (нутқ эгаси) ва нутқ объекти (нутқ йўналтирилган шахс)нинг мавжудлигини тақозо этади. Модомики, ижод жараёнида ёзувчи нутқ ирод этаётган экан, бу нутқ кимгадир (тасаввурдаги ўқувчига, А.га) қаратилган бўлади. Ёзувчи ўша ўқувчига муайян бадиий информацияни етказиш, информацияга ўзининг гоъвий-эмоционал муносабатини ифодалаш ва шулар орқали унга муайян таъсир ўтказишни кўзлайди. Бу эса А.ни, унинг дунёқараши, ҳаётини тажрибаси, бадиий диди, ижтимоий-маънавий эҳтиёжлари каби омилларни ҳам эътиборда тутишни тақозо этади. Яъни А. маълум маънода асарнинг бадиий-композицион хусусиятлари, тили ва услуби, образлар тизимини белгилайди. Маъкур ҳол, мас., болалар адабиёти мисолида ёрқин кўринади: болалар учун ёзилган асарда А. хусусиятларини, бола психологияси, фикрлаш тарзи, идрок имкони кабиларни эътиборда тутиш зарур. Бироқ буни мутлақлаштирмаслик, яъни гўё ёзувчи ҳамини юксақда-ю, А.га мос гапларни айтади, маъносида тушунмаслик керак. Аксинча, ёзувчи тасаввурдаги А. савияси кўп жиҳатдан унинг ижодий салоҳияти билан

боғлиқдир; санъаткор ижодий камоли билан баробар А. ҳам камол топиб боради. Мас., Чўлпоннинг илк ижодида А. бирмунча мавҳум бўлиб, асарлари кенг оммага қаратилган, у кўпнинг гапини кўпга етказиш («Бизни халқ», «Қурбони жаҳолат», «Доктор Муҳаммадиёр») билан машғул эди. Кейинчалик унинг А.и бирмунча конкретлашади: асарлари кўпроқ ўзининг ҳаммаслақларига (мас., «Халқ», «Бузилган ўлкага», «Пўртана») мўлжалланади. Айни чоғда, шоир ижодида А. янада конкретлашиб боради, энди у кўпроқ ўзини тушуна оладиган, ҳамдард бўла биладиган хос ўқувчига мурожаат этади («Кўнгил», «Йўл эсдалиги»). Шеърларидан бирида бу ҳақда шундай дейди:

*Сўйларкан тилларим на ёмон сўзлар,  
Ёзаркан қаламим на ҳазин оғлар,  
Соддадил бунлардан не маъни онлар,  
Билмаз-ку ўлдугин изҳор ишқи.*

Яъни Чўлпон ўзининг «ишқ изҳори»ни ҳар ким ҳам англай олмаслигини билади, ҳаммага дардини тўккани ҳолда чинакам ҳамдард бўла оладиганларнинг озлигини теран идрок этади. Бу эса шоирнинг аксар шеърларида хос ўқувчига мўлжалланган рамзий қатлам мавжудлиги, унда юрт озодлиги мавзуси поэтик талқин қилинганига унинг ўзи берган гувоҳлиқдир. Кейинроқ, 30-йилларнинг бўғиқ муҳитида, Чўлпоннинг А.и англи тарзда иккиланади: у бир пайтнинг ўзиде ҳам хос ўқувчисига, ҳам шўро тарбиясини олган оммавий ўқувчига мурожаат этади («Соз» тўпламидаги қатор шеърлар, «Кеча» романи).

Ижод онларида А.ни эътиборда тутиш талаби ўқувчи омма диди, талаб-эҳтиёжларига мослашиш дегани эмас. Чинакам ижодкор А.нинг диди, фаросатини юқори баҳолаши, унинг ижодий имкониётларига, асарни ўқиш пайти ўзига ҳаммуаллиф бўла олишига ишониши лозим. Бироқ кейинги даврда кенг урчиган оммавий адабиёт сўз санъатининг бу талабидан чекинади: унинг ўртамиёна савиядаги А.ни нишон қилиши, уни осонгина ўзига жалб этадиган йўллардан (интригага бойлик, ошкор эмоционаллик, сохта романтика, зўравонлик ва фахш сингари тубан инстинктларни уйғотиш ва ш.к.) бориши сўз санъати ичидаги бузғунчиликки эмас, чуқурроқ қаралса, А.га ҳурматсизлик ҳамдир.

**АЖУЗ (АРУЗ)** (ар. عجز – ожиз, кучсиз) – қаранг: **тақтиъ**

**АКМЕИЗМ** (юн. акме – бирор нарсанинг камолот чўққиси) – XX асрнинг 10-йилларида рус шеъриятида вужудга келган ада-

бий оқим. А.нинг назарий асослари Н.С.Гумилев, С.М.Городецкий, М.А.Кузьмин томонидан ишлаб чиқилган. Жумладан, Н.С.Гумилев «Символизм мероси ва акмеизм» номли мақоласида символизм инсоннинг идрок имконидан ташқари нарсаларни англашга интилгани бекорлиги, уни англаб бўлмаслигини таъкидлайди. С.Городецкий эса символизм ва акмеизм орасидаги зиддиятни моддий оламга муносабатда кўради. Унга кўра, символистлар учун олам фақат ўзга оламлар сояси сифатидагина аҳамиятли бўлса, акмеистларга у бор ҳолича ҳам қадрли; символистлар учун атиргул илоҳий ишқ рамзи сифатидагина қадрли бўлса, акмеистлар учун у ўз ҳолича ҳам гўзал ва қадрлидир. С.Городецкий акмеистлар дунёни бутунича, бутун гўзаллигу хунуқлиги билан қабул қилганларини, дунёга муҳаббат унинг асосий тамойили эканини таъкидлайди. А. намояналарининг ижодий фаолияти табиий тарзда кечувчи ҳаётни, конкрет ҳис этиладиган дунёни куйлаш, сўзнинг рамзий маъноси ўрнига асл маъносини қайтариш шиорлари остида кечди. Айни чоғда, улардаги ҳаётга, моддий дунёга муҳаббат реализмга яқинлашиш деб тушунилмаслиги керак. Аксинча, уларнинг ҳаётни, дунёни поэтиклаштириши моҳиятан реалликдан, унинг муаммоларидан қочишнинг бир кўриниши эди. Чунки улар, Н.С.Гумилев айтмоқчи, нафақат идрокдан ташқаридаги нарса-ғояларни, балки шахс эволюциясини ҳам давр ва макон шарт-шароитлари билан боғлиқ англаб бўлмайди, бу «адабий усул»дан бошқа нарса эмас деб биладилар. А.нинг адабий оқим сифатидаги фаолияти узоқ давом этмади: 20-йилларнинг ўрталарига келиб тарқалиб кетди, унинг сафларида бўлган ижодкорларнинг кўпчилиги шўро даврида турли тазйиқларга дучор қилиндилар. Ижодий фаолиятини А. мавқеида бошлаган С.Городецкий, А.Ахматова, О.Мандельштам каби иқтидорли шоирларнинг ижоди рус поэзиясига муносиб ҳисса бўлиб қўшилди.

**АКРОСТИХ** (юн. acros – чеккаси, stichos – мисра) – қаранг: **мувашшаҳ**

**АКСИЛҚАҲРАМОН** (русчадан калька: «антигерой») – адабий персонажлар (характерлар)ни таснифлашда шартли равишда қўлланувчи термин. Терминнинг юзага келиши қаҳрамон соф эстетик категория бўлмай, маълум даражада этик категория ҳам эканлиги билан боғлиқдир. Одатда, қаҳрамондан ўзининг хатти-ҳаракати, ақл-заковати, характер хусусиятлари билан ўқувчини ҳайратга солиш кутилади (қаҳрамон термини этимологияси «ярим худо», «илоҳий одам» маъноларини берувчи юнонча heros сўзи билан

боглик). Аънага кўра, адабиётда қаҳрамон ҳайрату ҳурмат объекти, маълум даражада, ибрат намунаси бўлиб келган. Бироқ адабиёт тараққийнинг кейинги даврларида, XIX асрдан бошлаб шундай асарлар кўпайдики, уларнинг марказидаги қаҳрамон бундай сифатлардан маҳрум, уни қаҳрамон деб аташнинг ўзи ноқулай. Шунга кўра, асарда марказий ўрин тутиб, муаллиф концепциясини ифодалашда муҳим аҳамият касб этган, лекин ўзи қаҳрамонлик сифатларига эга бўлмаган қаҳрамон А. деб атала бошлаган. Термин илк бор рус ёзувчиси Ф.Достоевский томонидан ишлатилган ва бу бежиз эмас: унинг Родион Раскольников, Иван Карамазов каби қаҳрамонлари том маънодаги А.лар эди. XX аср модернистик адабиётида, жумладан, А.Камю, Ф.Кафка асарларида бундай А.лар кенг ўрин тутди.

**АЛОГИЗМ** (юн. *α* – инкор юкламаси, *λογισμός* – ақл, мантик) – мантиқан бир-бирига зид тушунчаларни ўзаро боғлиқ ҳолда бериш, мантиқий алоқаларни онгли равишда бузишга асосланган усулларнинг умумий номи. А бадиий асарнинг турли сатҳларида, сўз бирикмасидан тортиб сюжет-композицион қурилишигача кузатилиши мумкин. Мас., мазмунан бир-бирига мутлақо зид сўзларнинг синтактик бутунлик ҳосил қилиши (қ. *оксиморон*); тескари ўхшатишга асосланган кўчимлар (қ. *киноя*), диалоглардаги конкрет ҳаётий ҳолат моҳиятига зид репликалар (қ. *антифразис*) А.нинг кўринишлари саналади.

**АЛЛЕГОРИЯ** (юн. *allos* – ўзгача, *agoreuo* – гапираман) – 1) мавҳум тушунча ёки ҳодисани конкрет нарса орқали ифодалашга асосланган кўчим тури. Бу ҳолда конкрет нарсани ифодаловчи сўз (мас., *тулки*) мавҳум тушунчани (*тулки – айёрлик*) ифодалаш учун кўчма маънода қўлланади. Мас., Ш.Раҳмон шеърларидан бирида лирик қаҳрамоннинг тоғдаги кечинмаларини тасвирлайди: «тоғларнинг мусаффо қорлари одам изларини сақлаб қолган, бу излар уни тобора юқорига олиб боради»:

*Аммо тоғдан тушганим сари,  
сезар эдим бадбўй исларни,  
кўрар эдим тулки, қашқирлар,  
тўнғизлару илон изларин...*

Келтирилган парчадаги «тулки», «қашқир», «тўнғиз», «илон» сўзлари А.лар бўлиб, улар матнда инсонга хос хусусиятлар орқали маълум тоифадаги кишиларни билдиради; 2) образлилик типи.

Аллегорик образнинг тасвир плани билан мазмун плани бир-бирига мос келмайди. Яъни аллегорик образда тасвирланаётган нарса ўзини эмас, муаллиф кўзда тутган маънони ифодалайди. Мас.:

*Бойўгли эса  
отаси сотган чалдеворлар пулига  
хорижда ўқиб келган.  
Отаси энди унга  
тунни хатлаб берган.  
Бойўгли – тунлар султони.  
Бироқ тунда ишланмайди. Савод керакмас.  
Шунинг учун  
унинг нима билишини тусмоллаб бўлмайди.*

Фахриёрнинг «Қушлар саводхонлиги» шеърдан олинган ушбу парчадаги «бойўгли» – аллегорик образ, у асло асл маъносида тушунилмайди, шундай тушунмаслик лозимлиги матнданоқ аён бўлиб туради. Шеърда аънавий А.лардан саналувчи «бойўгли»га янгича маъно юклайди, унинг воситасида иқтисодий ислохотлар жараёнида устомонлик билан орттирилган беҳисоб давлат (отаси сотган чалдеворлар) ҳисобига барча имконлардан фойдаланиб қолган (хорижда ўқиб келган), эндиликда тунги кафеларда айшини сураётган «бой ўғиллари» тасвирланади. Аллегорик образларнинг бир қисми миллий маданият контекстида кўп тақдорланганидан тургун маънога эга бўлганки, бу жиҳати билан улар *эмблемага* яқинлашади. Мас., миллий адабий аънаваларимизга кўра, Ҳотами Тойда сахийлик, Рустамда жасурлик, Исо Масихда жон бағишлаш, Юсуфда гўзаллик, Марямда бокиралик, Намрудда кибр ва х. маънолар муқимлашган. Аллегорик образларнинг бошқа бир қисми эса кўзда тутилган маънога ишора қилинишини тақозо этади (масаллардаги «қиссадан ҳисса» каби). Айни шу ишоранинг мавжудлиги А.ни *рамз (символ)*дан фарқловчи муҳим жиҳатдир. Мас., А.Ориповнинг «Тилла балиқча» шеъри ниҳоясидаги «Менга алам қилар тилла балиқча Бир кўлмак ҳовуз деб билар дунёни» сатрлари кўзда тутилган маънога очиқ ишора бўлиб, образнинг аллегориклигини белгилайди. Агар шу ишора бўлмай, аввалги сатрлардаги тасвир билан чекланилганда, образнинг тасвир ва ифода планларининг ҳар бири ўз ҳолича мустақил бўлардики, бу ҳолда образ *рамзий (символик)* саналарди.

**АЛЛИТЕРАЦИЯ** (лот. al – ёнида, litera – ҳарф) – шеъринг нутқда (насрода нисбатан кам) бир хил ундош товушларнинг такрорланишига асосланган ифодавийликни кучайтирувчи восита, такрорнинг фонетик сатҳдаги хусусий кўриниши. А. шеърнинг алоҳида сатри ёки мисрадаги сўзлар гуруҳини фоник жиҳатдан ажратади, натижада уларнинг ифодавийлиги ортади, шеърнинг мусиқийлиги, хушоҳанглиги кучаяди. Мас., «Сочилган сочингдөк сочилса сиринг... (Чўлпон), «Қумдан курган кўргоним қани... (Иқбол Мирзо). Ўзбек адабиётида барча мисралари ёки барча сўзлари бир хил ундош билан бошланган шеърлар ҳам машқ қилинганки, бу ҳам А.нинг бир кўринишидир (мас., Э.Воҳидов. «Қаро қошинг, қалам қошинг...»). Булардан фарқли ўлароқ, мисрадаги сўзлар таркибида бир хил ундошларни такрорлашга асосланган А. кўзга унчалик яққол ташланмайди, лекин улар яққол «эшитилади»: улар шеърнинг мусиқийлигини оширади, хушоҳанглик орқали эстетик таъсирни кучайтиради. Мас., Ш.Раҳмондан олинган қуйидаги парчада:

*Қорли уваларда қора кўтослар,  
темир ҳалқалар бор бурунларида.  
Бир жойда айланар буюк чўлларнинг  
дарага қамалган қуюнларидай.  
Қамчилар тарсиллар,  
ёрилар ҳаво,  
қий-чувлар,  
хуштаклар  
суронлар жўшар, ҳарсиллар,  
гулдирар ўжар кўтослар,  
жон кириб қутурган тоғларга ўхшаб, –*

«р» товуши такрорига асосланган А. бўлиб, товуш такрори парчага шиддатли ҳаяжон руҳига мос жаранг ва оҳанг бахш этади. Аслида, энг муҳими, А.ни бадиий восита санаш асоси ҳам шу: товуш такрорининг эмоционалликни, муайян ҳис-туйғулар ифодасини кучайтиришга хизмат қилмоғи шарт қилинади. Мазкур шарт бажарилмаган ўринларда товуш такрори бадиий восита эмас, балки тилда мавжуд товушларнинг нутқдаги табиий такроридир.

**АЛЛЮЗИЯ** (лот. allusio – ишора, ҳазил) – барчага таниш деб ҳисобланган реал сиёсий, маиший, тарихий ёки адабий фактга ишора қилишга асосланган стилистик усул. Моҳиятан шарқ мумтоз

шеъриятида кенг қўлланган *талмөҳ* (қ.) санъатиға яқин келади. Фарқли жиҳати шуки, *талмөҳ*да кўпроқ машҳур тарихий ва бадиий фактларга ишора қилинса, А.да ижодкор ўз замонасидаги сиёсий, маиший ёки бадиий фактларга ишора қилиши ҳам мумкин. Яъни А.да ишора объектининг доираси кенгроқ. Мас., Фаҳриёр:

*Дарвоқе, орзу,  
Орзу милтиқ эмас,  
Шеърнинг интиҳосида  
Отилмайди, –*

деганида Чеховнинг «Саҳнада милтиқ осиглиқ бўлса, у албатта отилиши керак» деган машҳур иборасига ишора қилади.

Ш.Раҳмоннинг «Тухмат» шеърда эса ишора объекти ўзгача:

*Кеча ўғри бўлди,  
бугун ваҳшийдир  
энди бутун дунё билар бу ҳақда.  
Қандай мўмин эди,  
қандай яхшийди  
анқайиб жимгина терганда пахта.*

Бу ўринда ишора 80-йиллар ижтимоий-сиёсий фактларига қаратилган: шоирнинг «кеча ўғри бўлди» деганида собиқ Иттифоқ марказий матбуоти сиёсий мақсадлар билан ногора қилиб чалган, янги тарихимизга «ўзбеклар иши», «пахта иши» деган номлар билан кирган мудҳиш воқеалар, «бугун ваҳшийдир» деганида эса Ўш, Фарғона воқеаларига ишора бор. Таъкидламоқ жоизки, публицистик руҳда ёзилган шеърлардаги А.лар вақт ўтиши билан изоҳга, шарҳга муҳтож бўлиб боради.

**АЛЬМАНАХ** (ар. المنّاخ – тақдим қилиш) – адабий асарлар тўплами, нодаврий адабий нашр. Одатда, А.га тартиб беришда муайян белгилар (асарлар мавзуси, жанри, муаллифлар ёши, яшаш ҳудуди ва б.) асос қилиб олинади. Мас., 70-йиллар охирларидан бошлаб чиқарилган «Ёшлик» А.и., шунингдек, қутлуг тарихий сана муносабати билан (Ғалаба байрами, Мустақиллик байрами) ёки муаллифларни умумлаштирган бирор белги (жангчи шоирлар тўплами, ижодкор ўқитувчилар тўплами) асосида тартиб берилган А.лар ҳам мавжуд.

**АМИҚ** (ар. عقيق – чуқур) – аруз баҳрларидан бири, *фоилун* (–v –) ва *фоилотун* (–v –) аслларининг кетма-кет такроридан ҳосил бўлади. А. баҳри илк бор Бобурнинг «Мухтасар» асарида тилга олинган ва унинг араб шеърятига хос эмаслиги, асосан, форс шеърятда мавжудлиги таъкидланган. «Мухтасар»да *амиқи мусаммани солим* (–v – / –v – – / –v – / –v – –) вазнига:

*Кел бери, эй париким, ҳажрдин хастадурман,  
Лаълингга ташнадурман, зулфунга бастадурман, –*

байти мисол сифатида келтирилган.

**АМР ВА НАҲИЙ** (ар. امر و نهی – буюриш ва ман қилиш) – иншо йўлларидан бири, фикрни ифодалаш усули, лирик қаҳрамон кечинмаларининг бирон-бир ҳаракатта ундаш ёки, аксинча, ундан қайтариш, ман қилиш тарзида баён этилиши. Уқувчини яхши ишни қилиш ва ёмон ишдан сақланишга чорлов мазмунидаги байтларда моҳиятан А. ва н. билан *каломи жомӣ* (қ.) санъати қоришиқ қўлланади. А. ва н. ҳам деярли барча шоирлар ижодида учрайди. Мас., Навоийнинг:

*Нозанинлар, бенаволарга тараҳхум айлангиз,  
Лутф агар йўқтур, ғазаб бирла такаллум айлангиз, –*

байтида амр, яъни ундаш бўлса, Ҳазинийнинг:

*Ажаб мотамсаро дунё экан поёни йўқ билсам  
Ки, сен дунёга мағрур ўлмағилким, ҳаргиз вафо қилмас, –*

байтида наҳий, яъни қайтариш мазмуни акс этган.

**АНАЛИЗ** (юн. analisis – қисмларга ажратиш) – қаранг: **бадий таҳлил**

**АНАЛОГИЯ** (юн. analogia – ўхшашлик, муштараклик) – адабий асардаги образлар, сюжет мотивлари, айрим эпизодлар, характерлар ва ш.к.ларда кузатиловчи муштараклик, ўхшашликлар. А.лар битта асар доирасида ҳам, шу асар билан бошқа (турли давр ёки турли миллий адабиётларга мансуб) асарлар орасида ҳам кузатилиши мумкин. Мас., «Ўткан кунлар» романидаги Отабек ва уста Олим, «Кеча»даги Зеби ва Марям тақдирлари орасидаги А.лар ёзувчига қиёс воситасида муайян фикрларни ифодалаш, муаммони англаш ва англатишда муҳим ўрин тутади. Шунингдек, асарда ёзувчи то-

монидан онгли равишда ёки бошқа сабаблар билан воқе бўлувчи А.лар ҳам кузатилиши мумкин. Мас., «Ўткан кунлар» билан халқ достонлари сюжет мотивларида А.лар кузатиладики, улар ғарб адабиётига хос роман жанрининг миллий заминга ўтқазилиши, миллий адабий аъёнлар таъсири ўлароқ воқе бўлган. Чўлпоннинг «Кеча» романи билан А.Қодирийнинг «Ўткан кунлар» ва «Мехробдан чаён», Л.Толстойнинг «Тирилиш» ва «Анна Каренина» романлари орасида ҳам қатор А.лар мавжуд бўлиб, бирлари ижодий таъсирланиш, бошқалари ижодий мусобақа истаги натижасида юзага келган.

А.лар муайян миллий адабиёт тарихининг турли босқичлари орасида ҳам, турли миллий адабиётлар орасида ҳам кузатилиши мумкин. Мас., ўзбек жаҳид адабиёти билан 80-йиллар ўзбек шеърятини орасида қатор ғоявий-тематик ва бадий-услубий А.лар кузатилади; худди шу ҳол ўзбек жаҳид адабиёти билан Европа маърифатчилик адабиёти орасида ҳам мавжуд. Бу эса А.ни тарихий-қиёсий адабиётшуносликнинг марказий категорияларидан бирига айлантиради. Тарихий-қиёсий адабиётшунослик турли давр ёки турли миллий адабиётлардаги А.ларни аниқлаш, уларнинг омилларини ўрганиш асосида қўламли назарий умумлашмалар чиқариш, адабиёт тараққийнинг умумий қонуниятларини аниқлашни мақсад қилади.

**АНАФОРА** (юн. anaphora – олдинга, юқорига чиқариш) – сўз ёки сўзлар гуруҳининг мисра ёки банд бошида такрорланиши, сўз такрорининг хусусий кўриниши. А. маълум фикр, ҳис-туйғу, ҳолат ва ҳ.ни таъкидлаб кўрсатишга хизмат қилади, табиий равишда, шеърнинг хушоҳанглигини ҳам оширади. Мас., У.Ҳамдамдан олинган қуйидаги парчада:

*Бир ҳолат...*

*Ҳолатки, исмимни эслай олмайман,  
Ҳолатки, қасдида ҳар нега шайман,  
Ҳолатки, кўзимга кўринмас дунё,  
Ҳолатки, ҳаётим энг ширин рўё, –*

тавсиф этилаётган ҳолат мазмунан кучайтириб борилади, А. эса таъкидлаш орқали маънони янада кучайтиради. А. энг кўп қўлланилувчи стилистик усуллардан бири бўлиб, шеърятда унинг турли кўринишлари мавжуд. Мас., А.Қутбиддиннинг қатор шеърларида («Сенсизман», «Ака», «Истардим») барча бандлар битта сўз билан бошланади. Ёки И.Отамуроднинг «Кун бўйи сукутга чўмди телефон»



шеърининг барча тоқ мисралари «кун бўйи» бирикмаси билан, бошқа бир шеърининг барча тоқ мисралари «ичкари», жуфт мисралари «ташқари» сўзи билан, «Канглум, ким ҳам сенинг ҳаддинг сиғдирар» шеърда эса тўртлик бандларнинг биринчи икки мисраси «канглум», кейинги икки мисраси эса «биргина» сўзи билан бошланган. Мазкур шеърлар А. кўп ҳолларда нафақат стилистик восита, балки шеърнинг композицион асосини белгиловчи усул сифатида ҳам намоён бўлишини кўрсатади. А.нинг композицион-стилистик имконларидан И.Отамуроднинг «Ебондаги ёлғиз дарахт» достонида, айниқса, самарали фойдаланилган.

**АНАХРОНИЗМ** (юн. ана – орқага, қарши; chronos – вақт) – ўтмиш-ни бадий акс эттириш жараёнида йўл қўйилувчи вақт билан боғлиқ ноаниқликлар, хатоларнинг умумий номи. А. тасвирланаётган даврга оид бўлмаган фактлар (воқеалар, шахслар, ишонч-эътиқодлар, ғоялар, маиший деталлар ва ш.к.), тамом ўзга замонга хос хусусиятларнинг кириб қолиши билан воқе бўлади. А.нинг юзага келиш сабаблари турлича. Фактларни етарли даражада ўрганмаслик ёки эътиборсизлик оқибатида юзага келган А. билан муайян ғоявий-бадий мақсадни кўзлаб йўл қўйилган А.ни фарқлаш керак. Кейинги ҳолда А. тарихийлик ва замонавийлик муаммоси доирасига кириб кетади. Ўтмиш мавзусидаги асарда замона руҳи, замона хусусиятларининг акс этиши табиий, шундай экан, муайян ғоявий-эстетик мақсад тақозоси билан воқе бўлган А.га бадий шартлиликнинг бир кўриниши сифатида қараш мумкин.

**АННОТАЦИЯ** (лот. annotatio – изоҳ, шарҳ) – асар мазмунининг қисқача баёни. Ноширлик амалиётида китобларнинг ички муқовасида, илмий мақолаларнинг сарлавҳасидан кейин берилади. Бу хил А.ларни беришнинг тартиби шаклланган. Жумладан, китобларга берилувчи А.ларда муаллиф, китобнинг таркибланиши, мавзуси, аҳамияти ва ш.к.лар ҳақида; илмий мақолаларга ёзилган А.ларда эса қўйилган муаммо, уни тадқиқ этиш усуллари, олинган натижалар ва ш.к.лар ҳақида қисқача маълумот берилади. Шунингдек, библиографик кўрсаткичларда ҳам А.лар бериладиги, бу уларнинг фойдаланишда қулай бўлишини таъминлаб, амалий аҳамиятини оширади. А. асарнинг ўзига хос «паспорти» бўлиб, у билан умумий тарзда та-ништиради, ўқувчининг информация оқимидан ўзига керакли мате-риални танлашига ёрдам беради.

**АНТИГЕРОЙ** (юн. anti – зидлик маъносини берувчи олдқўшимча, heros – илоҳий одам, яримхудо) – қаранг: **аксилқаҳрамон**

**АНТИТЕЗА** (юн. antithesis – қаршилантириш) – 1) образ замиридаги нарса, ҳодиса, тушунчаларни кескин қаршилантиришга асосланган стилистик фигура, бу маънода тазодга тўғри келади. А. услубий безак сифатида антик даврдан бошлаб кенг қўлланилади. А.да қаршилантириш, асосан, антоним сўзлар воситасида воқе бўлади, шу сабабли ҳам у доим очиқ кўзга ташланади. А. фикр-туйғуни аниқ-равшан, таъкидлаб, эмоционал тўйинтириб ифодалашга хизмат қилади. Мас., Огаҳийнинг «Эй шоҳ, қарам айлар чоғи тенг тут ямону яхшими» мисрасида «ямону яхши» А.си «ҳаммани, барчани» маъноларини беради. Лекин уни шу сўзлардан бири билан алмаштириб бўлмайди. Чунки «ямону яхши» А.сида айтилмоқчи бўлган фикр «яхши демай, ёмон демай – ҳаммани» тарзида таъкидланиб, конкретлаштириб ифода этилмоқда; агар «тенг тут ҳаммани» дейлишида эмоционал жиҳатдан нейтраллик бўлса, А.да эътибордан четда қолганликдан келган алам-изтироб ҳам акс этади; 2) ҳозирги адабиётшуносликда А. термини стилистик фигурагина эмас, умуман, контраст маъносида ҳам ишлатилади. Бу ҳолда А.га бадий усул деб қаралади ҳамда бадий асардаги унсурларининг бир-бирига қарама-қарши қўйилиши назарда тутилади.

**АНТИФРАЗИС** (юн. anti – зидлик қўшимчаси, phrasis – гап, жумла) – киноянинг фаол қўлланивчи кўриниши, нутқ жараёнида сўз ёки жумланинг тескари маънода ишлатилиши. А. контекстдан англашилиб турган конкрет ҳаётий ҳолатга, соғлом мантиққа ёхуд сўзловчининг мақсадига мувофиқ келмайдиган гап сифатида намоён бўлади. А. тасвир предметиға ёзувчи муносабатини ифодалашда, айниқса, кўл келади. М.М.Дўстнинг «Истеъфо» қиссасида бу усулдан кенг фойдаланилган. Мас., Бинафшахон қизини ҳимоя қилиб: «Қизимиз кимдан кам? Ўзи хусндор бўлса, дипломи яқин қолди, ақли-одоби жойида. Ўзбекча гапиришнинг билади...» – дейди. Мантиқан қараганда, «ўз она тилида гаплаша олиш» фазилат эмас, бунинг мақтовга дўнгани персонаж маънавий қиёфасини очиб берувчи муҳим чизгига айланади. Айни чоғда, бу ўринда киноя субъекти Бинафшахон эмас, балки муаллифнинг ўзи. Ёзувчининг қаҳрамонига, у мансуб муҳитга муносабатини ифодалайди. Қиссадаги бошқа бир персонаж эса: «Ўзимиздаям дўхтир кўп, бариси ота кадрдон, пораям сўрамайди», – дейдики, бу ўринда персонаж ҳам, муаллиф ҳам бирдек киноя субъектидир. Ҳар қандай киноя сингари А.нинг мазмуни ҳам контекстда реаллашади. Мас., биринчи мисолдаги Бинафшахоннинг гапи замирида ки-

ноя борлигини англаш учун ўтган асрнинг 70 – 80-йиллари мухити, жамиятда ўз тили, миллий урф-одатларига беписанд қараб, ўзича «маданийлаш»ган, аслида эса «манқурт»лашган қатлам пайдо бўлгани ҳақида тасаввурга эга бўлиш тақозо этилади.

**АНТОЛОГИЯ** (юн. *anthologia* – гулдаста) – бирор миллий адабиёт, давр, адабий йўналиш ва ш.к.ларга мансублиги жиҳатидан танланган ижодкорлар асарларидан намуналарни жамловчи тўплам. А.лар тузиш анъанаси Қадимги Юнонистонда бошланган бўлиб, кейинги даврларда унинг турфа кўринишлари пайдо бўлган. Шарқ адабиётидаги *тазкиралар* ҳам моҳиятан А.га яқин туради. Шунингдек, Фитратнинг «Энг эски турк адабиёти намуналари» (1927) ва «Ўзбек адабиёти намуналари» (1928) номли хрестоматияларига ҳам А. принциплари асосида тартиб берилган. XX аср ўзбек адабиётида бир қатор А.лар тузилган. Жумладан, «Ўзбек ёш шоирлари» (1922), «Ўзбек поэзияси антологияси»(1949), «Антология узбекской поэзии» (1950), «Ўзбек модерн шеърляти»(2005), «XX аср ўзбек шеърляти антологияси»(2007) ва б.

**АПЕЛЛЯТИВ ФУНКЦИЯ** – нутқ функцияларидан бири, нутқ субъекти томонидан нутқ йўналтирилган шахсга муайян таъсир ўтказилиши. Нутқ жараёнида тингловчига маълум бир информацияни етказиш (*репрезентатив* функция), етказилаётган информацияга ўз муносабатини ифодалаш (*экспрессив* функция) ва унга муайян таъсир ўтказиш (апеллятив функция) мақсадлари ҳамиша мавжуддир. Улар универсал характерга эга бўлиб, конкрет нутқ моментида улардан бири етакчилик, устуворлик қилади, айти дамдаги нутқ бўлаги шунга мос (қурилиши, сўз танлаш, интонация ва ш.к.) тарзда шакллантирилади. Бу нутқ ходисаси бўлмиш адабий асарга ҳам тўла тааллуқлидир.

**АПОСТРОФА** (юн. *apostrophe* – бир томон оғиш) – нарса ёки ходисага хурди жонли мавжудотга каби мурожаат этиш асосида юзага келувчи стилистик фигура. Мас., «Эй сабо, ҳолим бориб сарви хиромонимга айт» (А.Навоий), «Ёруғ юлдуз, гўзал юлдуз, тез сўзла...» (Чўлпон), «Денгиз, тўлқинларинг урма қирғоққа...» (Э.Воҳидов). Адабиётимизда бошидан-охиригача шу усул асосига қурилган шеърлар ҳам кўплаб учрайди (Ш.Раҳмон. «Гўза»). Шунингдек, шеърый асарларда кузатилувчи айти пайтда ўзи бўлмаган одамга гўё шу ерда ҳозирдек, вафот этган кишига гўё тирикдек мурожаат этиш ҳам А.нинг бир кўриниши саналади. Бунга мисол қилиб А.Ориповнинг «Баҳор» шеърдаги «Баҳор кепаетир, бош кўтар, қара, О сурур

қуйчиси, донгдор замондош» дея Ф.Фуломга ёки «Онажон, онажон, кечиргил, ахир, Шодланмасин дедим биров ғамимдан» дея онасига қилган мурожаатини келтириш мумкин.

**АРГО** (фр. *argot* – бегона, тушунарсиз тил; жаргон) – жамиятдаги ёпиқ ижтимоий гуруҳлар (ўғрилар, гадойлар, дайдилар, фоҳишалар ва ш.к.)га мансуб кишиларга хос нутқ кўриниши; баъзан жаргон терминига синоним тарзида ҳам ишлатилади. А.ни жаргондан фарқловчи муҳим бир хусусияти бор: қўлланиш доирасидан келиб чиққан ҳолда А. «махфийлик» хусусиятига эга, яъни у фақат шу доира кишиларига тушунарли бўлиб, бевосита упарнинг фаолияти билан боғлиқ ва ўзгалардан сир тутилиши керак бўлган мулоқотни амалга ошириш учун хослангандир. А. миллий тил базасида воқе бўлади, унинг грамматик қоидаларига асосланади. Айти чоғда, у тор доирадаги мулоқот учун зарур тушунчаларни англатувчи махсус унсурларни ҳам ўз ичига олади. Булар миплий тип, шевалар ёки хорижий тиллардан олиб мослаштирилган, шунингдек, сунъий ҳосил қилинган унсурлардан ташкил топади. А.лар бадий адабиётда муҳит колоритини бериш, нутқий характеристика воситаси сифатида қўлланади.

**АРИЗ** (ар. *عريض* – энли, кенг) – аруз баҳрларидан бири. *Мафоилюн* (V – – –) ва *фаувлун* (V – –) аслларининг кетма-кет такроридан ҳосил бўлади. Бобургача яратилган илми арузга оид асарларда мазкур баҳр тилга олинмаган. «Мухтасар»да мазкур баҳрни ажаб халқлари яратганлиги таъкидланган ва унинг тўрт вазнига бир бийтдан мисол келтирилган. Хусусан, Бобурнинг:

*Лабинг маржон, тишинг дур, хатинг райҳон, ҳадинг гул,  
Сочинг анбар, юзунг хур, менгинг мўлтон, юзунг мул, –*

байти аризи мусаммани солим (V – – – \ V – – \ V – – – \ V – –) вазнида ёзилган.

**АРУЗ** (ар. *عروض* – чодирни ушлаб туриш учун ўртага қўйиладиган ёғоч) – 1) қисқа, чўзиқ ва ўта чўзиқ хиҷоларнинг муайян тартибда гуруҳланиб такрорланишига асосланган метрик шеър тизими. Манбаларда арузга VIII асрда яшаган араб олими Халил ибн Аҳмад томонидан асос солингани, бу атама олим яшаган водий номи билан боғлиқ эканлиги қайд этилади. А. минг йиллар давомида Шарқ адабиётидаги етакчи шеър тизими бўлиб келди, муттасил бойиш ва ривожланишда бўлди, мукаммал тизимга айланди, унинг қонуниятлари

билан шугулланувчи соҳа – *илми аруз* (қ.) шаклланди. Дастлаб араб адабиётида майдонга келган А. шеър тизими IX асрдаёқ форсий адабиётда ҳам қўлланила бошлаган. Туркий халқлар адабиётида, жумладан, ўзбек адабиётида ҳам А. қадимдан қўлланиб келинади деган фикр мавжуд: «Бизнинг Ўрта Осиё турклари томонидан қачон қабул этилгани аниқ эмас. Бироқ ҳижрий 462 да Қашқарда ёзилган машҳур «Қутадғу билиг» китобининг шу аруз вазнида ёзилгани эътибор этилса, жуда эскидан қабул этилгани маълум бўладур» (Фитрат). XI асрдан то XIX аср охири – XX аср бошларига қадар А. ўзбек мумтоз адабиётидаги асосий шеърий тизим бўлиб келди. Албатта, форсий ва туркий адабиётлар А.ни механик тарзда ўзлаштирган эмас, аксинча, у форс ва туркий тил хусусиятларига имкон қадар мослаштирилган. Табиийки, бу ҳол А.ни бойитган, араб А., форс А., туркий А. каби тушунчаларнинг юзага келишига асос бўлган.

Мумтоз арузшуносликда А.нинг ритмик бирликлари сифатида ҳарф (қ.), жузе (қ.), рукн (қ.) ва баҳр (қ.) кўрсатилиб, бу кўпроқ араб А.ига хосдир. Ўзбек мумтоз адабиётшунослигида, жумладан, Навоийнинг «Мезон ул-авзон», Бобурнинг «Мухтасар» асарларида туркий А. ҳам шу анъана йўлида ўрганилган. XX асрдан, хусусан, Фитратдан ўзбек арузшунослигида энг кичик ритмик бўлак сифатида ҳижо (қ.) кўрсатила бошландики, бу А. илмини ўзбек тили табиатида мослаш заруратининг ҳосиласидир. Натижада ўзбек арузшунослигида ҳарф ва жузе атамалари пассивлашди, яъни туркий (ўзбек) А.нинг ритмик бирликлари сифатида ҳижо, рукн ва баҳр эътироф этилди. Мазкур бирликларнинг кичиги каттасини ҳосил қилади (ҳарфларнинг маълум тартибда бирикишидан жузе, жузларнинг маълум тартибда такрорланишидан рукн (асл), рукнларнинг маълум тартибда такрорланишидан эса баҳр), шунингдек, рукнлар сифат ёки миқдор жиҳатидан зиҳоф (қ.)га учрашдан қатор шохобчалар пайдо бўлади, бу эса А.нинг ритмик имкониятларини кенгайтиради, унга ритмик-интонацион ранг-баранглик беради. Натижада А. юзлаб вазнларни ўз ичига олган мукамал тизимга айланадики, у қайсидир жиҳатлари билан Менделеев жадвалини ёдга солади. Яъни назарий жиҳатдан барча вазнлар тақтеъсини чизиб кўрсатиш, шунга тушадиган шеър ёзиш мумкин; тизим таркибидаги айрим вазнлар фаол бўлса, бошқалари жуда кам қўлланади; айрим вазнлар кўпроқ араб, бошқалари форс, баъзи бирлари эса туркий шеъриятда қўлланади ва х.

XX асрнинг 20-йилларига келиб А. шеъриятимиздаги етакчилик мақомини йўқотди, ўз ўрнини тилимиз табиатида мувофиқроқ бўлган

бармоққа бўшатиб берди. Шунга қарамай, XX асрда яшаб ижод этган Ҳамид Олимжон, Ҳабибий, Собир Абдулла, Чустий, Чархий каби, шунингдек, ушбу анъанани муваффақиятли давом эттирган Эркин Воҳидов, Абдулла Орипов, Жамол Камол, Ойдин Ҳожиева, Мирзо Кенжабек каби замондош шоирларимиз ижодида ҳам А.да ёзилган шеърлар кўплаб учрайди.

## 2) қаранг: тақтиъ

**АРХАИЗМ** (юн. *archaios* – қадимги) – эскирган, истеъмолдан чиққан сўз (ёки грамматик шакллар). А.лардан тарихий мавзудаги асарларда давр колоритини бериш, қаҳрамонлар нутқини индивидуаллаштириш (замонасига мос ҳолда) каби мақсадларда фойдаланилади. Мас., М.Алининг «Сарбадорлар» романидаги илк жумла: «Ҳижрий 764 йил шаввол ойининг 18-куни ўттиз чоғли туялар қарвони Самарқанднинг *Кеш* дарвозасига етиб келганида, вақт хуфтондан ошган эди». Дастлабки жумлаёқ ўқувчи диққат-эътиборини ўзга вақтга созлайди, бунга жумлада қўлланган сўзлар асос бўлади. Ўтмиш руҳи юқтирилган ўқувчи романи ўқиш давомида Темур «даставвал ўзига хос *лашкар* тузишга уринди», «турли шаҳарларга *тингчилар*, *қуловузлар* юбора бошлади» тарзидаги жумлалар, «*Нақоралар* чалинди. *Навкарлар* кўлига *кишан* солинган, учовининг бўйинларига битта *желе* ташланган... *дор тағига* олиб бордилар» каби лавҳаларда қўлланган тарихий сўз ва шаклларни табиий қабул қилади, айна шу тил унсурлари унда ўтмиш руҳини тутиб туради. Бундан ташқари, А.лардан баъзан услубга тантанаворлик бериш, баъзан эса дўстона ҳазил ё киноя учун ҳам фойдаланилади. Бунга Ғ.Ғуломнинг Чархий, Улфат, С.Абдулла, О.Валихонов каби дўстларига битган мактублари мисол бўла олади. Жумладан, Чархийга ёзилган мактуб:

*«Дўсти муҳтарам мавлоно Асқарали Чархий Хўқандий.  
Асъада каллоҳу фиддорайн.*

*Мактуби муҳаббат услублари соати саъдда қўлимизга теғди.  
Бошимиз авжи фалақдан ҳам ошиб кетди. Шайхи-шуюҳ, алломаи  
пири Киромиддин ҳазратларининг дебочаи қаламилари ҳақиндаги  
хабари суруроварларидан бисёр мамнун бўлдик. Тез фурсатда  
дастрас бўлмоғи умидидамиз, албатта.*

*Масалаи дуввумга келганда, фикримча, бу иш ўзим бормасдан,  
орқаворот – мактуб орқали ҳал бўлмоғи мушкул кўринур. Яқин ўр-  
таларда Фарғона томонларга сафар ихтиёр қилсаммуқун деган*

ниятим ҳам йўқ эмас. Балки шу муддатда жанобларининг илтимосларини ҳал қилиш учун арбоби шаҳри Хўқанди фирдавсмонандга мурожаат қилурман, иншоолпоҳ.

Боқи: Ассалому алайкум.

Ғафур Ғуломи Шошийи Қоратоший».

Ғ.Ғулом мактубида А. ва варваризмлар қўллаш орқали эскича услубни тиклаш (стилизация)га интилади: мадраса кўрган зиёлилар услубига хос жумла қурилиши, арабча-форсча сўзлар, калималар ва синтактик қурилмаларнинг ишлатилгани шуни кўрсатади. Булар эса мактубга тантанавор руҳ бериш билан бирга шоирнинг дўстона ҳазил-мутойибага мойиллиги, эскича аъаналарга содиқ қолган Чархий домлага киноясини ҳам ифодалайди.

**АРХЕОГРАФИЯ** (юн. *archaios* – қадимги, *grapho* – ёзаман) – тарихий фанларнинг қадимги ёзма ёдгорликлар билан шуғулланувчи ёрдамчи соҳаси. А. кўҳна кўлэмаларни чоп этишга тайёрлашнинг назарий асосларини, амалий тартиб-қоидалари ва методикасини ишлаб чиқади. А.нинг вазифалар доирасига қадимги битикларни ўқиш, ёши, муаллифи, ёзилган жойи ва вақтини аниқлаш кабилар ҳам киради.

**АРХИВШУНОСЛИК**, адабий архившунослик (лот. *archivum* – хужжат сақлаш жойи, форс. شناس – ўрганиш) – адабиётшуносликнинг ёрдамчи соҳаларидан бири, аксарият ҳолларда манбашуносликнинг таркибий қисми сифатида ҳам қаралади. А. адабиёт тарихига оид манбаларни сақлаш, тартибга солиш, тавсифлаш каби вазифаларни бажаради. Адабиёт тарихига оид манбалар сақланадиган муассасалар (давлат архивларидаги турли ижодий уюшма, адабий нашрлар фондлари; адабиёт музейлари, адилларнинг уй-музейлари) кўпайиши билан адабиётшуносликда А.нинг роли ва аҳамияти ҳам ортиб борди, шу боис ҳозирда унга адабиётшунослик илмининг алоҳида бир ёрдамчи соҳаси сифатида қараш оммалашмоқда.

**АРХИТЕКТОНИКА** (юн. *architektonike* – қурилиш санъати, меъморлик) – адабиётшуносликда адабий асарнинг ташқи қурилиши, унинг асосий қисмлари (боблар, фасллар; парда, кўриниш)ни бир бутунга бирлаштириш маъносига қўлланади; баъзан композиция терминига синоним тарзида ҳам ишлатилади, лекин бу маъносига термин оммалашган эмас. Чунки ҳозирда адабий асар турли сатҳлардан ташкил топишидан келиб чиқиб композициянинг турли аспекти (матн композицияси, сюжет композицияси ва ш.к.)

ҳақида гапирилади, шунга кўра, А.га мазкур аспектилардан бири сифатида қаралади. Яъни композиция термини А. тушунчасини ҳам қамраб олади.

**АРХЕТИП** (юн. *archetypon* – образнинг илк асоси, модель) – инсон тафаккури, ижодий тасаввурига хос бўлган турғун «схема», фикрий конструкция ва қолиплар, мотивлар ва уларнинг турли комбинациялари. А. тушунчаси швейцариялик руҳшунос К.Юнг таълимоти билан боғлиқ ҳолда оммалашди. Унга кўра, А.лар кишилик жамиятининг энг қадимги даврларидан бошлаб инсоният хотирасида «коллектив онгсизлик» сифатида яшайди ва ижод жараёнида турли шаклларда ўзини намоён этаверади. Яъни А.лар универсал характерга эга бўлиб, уларнинг изларини энг қадимги даврлардан то ҳозирги адабиётгача кўриш мумкин. А. конструкция ва схемалардан ўзига хос «сюжет ва сюжет ҳолатлари» жамғармаси ҳосил бўладики, улар асардан-асарга, даврдан-даврга кўчиб юради. К.Юнгга кўра, А., аввало, шакл ҳодисаси бўлиб, муайян даврда яшаётган ижодкор онгида уйғонганидагина унинг ҳаётий тажрибаси билан бойитилади ва конкрет мазмун касб этади. Мас., ер юзидаги биринчи қотилликдан нақл қилувчи «Қобил ва Хобил» қиссасида ҳасад, кўролмаслик қотилликни келтириб чиқарган бўлса, худди шу мотив турли комбинациялар кўринишида жаҳон адабиётида қайта-қайта жонланаверади (Шекспир. «Отелло»; А.Пушкин. «Моцарт ва Сальери»). Шунга ўхшаш, хўжайин хотинининг хизматкорни яқинликка ундаши мотиви («Эзол ҳаёти», «Юсуф қиссаси» ва б.) қадимги даврлардаёқ кенг оммалашган бўлиб, у кейинги даврлар адабиётида, хусусан, ўзбек адабиётида ҳам турли комбинацияларда намоён бўлади (Чўлпон. «Кеча»; У.Ҳамдам. «Мувозанат»). Ёки «Шоҳ Эдип»даги инцест мотиви Ги де Мопассаннинг «Портда» ҳикояси, Т.Қайипбергеновнинг «Қорақалпоқ қиссаси», Ў.Ҳошимовнинг «Икки эшик ораси», М.Алининг «Сарбадорлар» романларида ўзгачароқ кўринишларда аксланади. Мисолга олинган ҳолларнинг бари қадимдан мавжуд бўлган илк асосга – А.ига эга бўлиб, бу илк асос конкрет давр хусусиятлари билан боғлиқ ҳолда турлича кўринишлар олади.

**АССОНАНС** (лот. *assonare* – уйғун жаранглаш; фр. *assonance* – оҳангдошлик) – 1) шеърий нутқда (насрода нисбатан кам) бир хил унлилар такрорига асосланган ифодавийликни кучайтирувчи восита, такрорнинг фонетик сатҳдаги хусусий кўриниши; шеърга хушоҳанглик бахш этади, мусиқийликни кучайтиради. Мас., Э.Шукурдан олинган кўйидаги парчада «О» товушининг такрори А.ни юзага келтиради:

*Олтин ойга олма отар Ойбодом,  
Ойботарда йиглаб ётар Ойбодом,  
Ойқизларнинг ойпариси Ойбодом,  
Кунботардан куйиб ўтар Ойбодом,  
Олма юзли, бодомқовоқ Ойбодом,  
Ёниқ сочи ёнар байроқ Ойбодом,  
Йил ботарда чўкар қора сувларга,  
Бу дунёда ой каби тоқ Ойбодом;*

2) рус адабиётшунослигида, хусусан, шеършунослигида фақат урғули унлиларигина ўзаро мос келувчи оч қофия, баъзан эса умуман оч қофия маъносида ҳам қўлланади.

**АССОЦИАТИВ ОБРАЗ** (лот. *associatio* – бирлаштирмақ, қўшмоқ) – нарса-ҳодиса ва тушунчалар орасидаги илғаб олинши қийин бўлган алоқаларга асосланган, уларни қутилмаган тарзда бириктириш (қиёслаш, чоғиштириш, қаршилантириш) орқали воқе бўлувчи ва шу туфайли юксақ даражадаги метафориклик, субъективлик касб этувчи образ. Аслида, ассоциативлик ҳар қандай образ табиатига хос хусусиятдир. Яъни А.о. бадий образнинг алоҳида бир тури эмас, бу термин остида, умуман, бадий образга хос ассоциативликни кучли намоён этувчи образ тушунилади. Демак, терминнинг қўлланишида муайян шартлилик мавжуд. А.о. ўқувчидан ижодий фаолликни, нарса-ҳодисалар орасидаги муаллиф таянган алоқаларни, алоқалар занжирини илғай олишни тақозо этади. Мас., З.Рўзиеванинг қуйидаги мисраларини олайлик:

*Сезармисиз, мен бир гул, майса,  
Шабнамимда қулган қуёш бор...*

Маълумки, шеър ичидаги сўз, бир томондан, бошқа сўзлар билан мустаҳкам алоқада – у бошқа сўзга ё тенгланади, ё зидланади, ё тобеланади; иккинчи томондан, сўз ортида олам, у англатаётган нарса-ҳодиса ва тушунчалар ҳам борки, улар ҳам бир-бири билан алоқадор. Яъни маъно, сўз сўзга уриштирилганда, воқе бўлади. Зеро, сўзнинг сўзга урилиши – бамисоли бонг, унинг жаранги тасаввуримизда қандайдир тушунчалар, нарсалар, манзаралар, қиёсларни, бир сўз билан айтганда, ассоциацияларни, ассоциациялар занжирини уйғотади. Шоира «мен бир гул» дейди-да, ортиданок шошиб буни инкор қилади – ўзини майсага қиёслади. Яъни қулоқларимиз ўрга-

ниб кетган «аёл – гул» қиёси «аёл – майса» қиёси учун кўприк мисоли. Майса эса тасаввурда майинлик, беозорлик, заифлик, синиқлик сингари аёлга хос тушунчаларни уйғотади. Шу тушунчалар билан боғлиқ ҳолда «шабнам» аёл қалбини – ҳар не гарду губордан фориғ, ўзига олам ташвишини сиғдира олган митти-улкан маконни суратлантиради. Софлик эталони бўлмиш қатрада эса «қулган қуёш» бор. Аждодларимиз қуёшни «мехр» деб атаганлари ёдга олинса, аён бўладики, бу чизги билан аёл қалби таърифи бўртиб кўзга ташланади. Шу нуқтада муаллифнинг оригинал қарашини, бадий фалсафасини англаш мумкин бўлади. Аёлни гулга менгаш асоси – гўзаллик, гўзаллик эса ўткинчи. Шоира топган қиёс «гул»дан кўра сиғимлироқ, зеро, у аёл зоти учун умумийроқ ва боқийроқ хусусиятни мужассам этмоқда. Парчада аёл қалби ҳақида умуман гап йўқ, лекин ассоциатив алоқалар туфайли у илғаб олинади. Дунёни метафорик идрок этишга интилаётган замонавий шеърятда А.о.лар тобора кенг ўрин олиб бормоқдаки, бу каби мисолларни жуда кўплаб келтириш мумкин.

**АТРИБУЦИЯ** (лот. *attribution* – нисбат бермоқ) – матншунослик соҳаси олдида турувчи асосий илмий муаммо (вазифа)лардан бири, адабий асарнинг муаллифи, ёзилган вақти ёки жойини аниқлаш, *эристика*. Бу муаммо турли манбалардан (мас., таъкиралар, тарихий асарлар, архив материаллари, хотиралар ва б.) ҳужжатли далиллар топиш; муаллифи номаълум асарнинг гоъвий-бадий, тил ва услуб хусусиятларини шакл-шубҳасиз нисбат берилаётган ижодкор қаламига мансуб асар билан қиёсий ўрганиш; асарнинг ёзуви (котиби, хаттотлик мактаби, хат ва унинг оммалашган даври), китобат қилиниш хусусиятлари (қоғоз, сиёҳ, муқова, безаклар ва б.)ни тадқиқ этиш каби йўллар билан ҳал қилинади. Шуларнинг барини эътиборда тутган ҳолда комплекс ёндашув асосида амалга оширилган А.пна илмий саналади.

**АФОРИЗМ** (юн. *aphorismos* – таъриф, ихчам ифода) – муаллифи маълум бўлган, ихчам шаклда ва таъсирли ифода этилган умумлашма фикр. А.га берилган таърифларда турличалик мавжуд: айрим манбаларда А. аниқ муаллифга эга бўлиши шарт ва шу нарса уни мақоллардан фарқловчи асосий жиҳат дейилса, бошқаларида бу шарт қўйилмайди (қ. *афористика*). А.лар пайдо бўлиши жиҳатидан турлича. Айрим ҳолларда А. махсус яратилади, бу ҳолда уни том маънода жанр деб ҳисоблаш мумкин (мас., А.Қаҳҳорнинг машҳур «Адабиёт атомдан кучли, лекин унинг кучини ўтин ёришга сарф

қилиш керак эмас» деган гапи). Зеро, бу ҳолда ижодкорнинг ҳаётий тажрибасига таянган ҳолда бирон-бир масала юзасидан умумлашма фикрини ифодалашга имкон берувчи шакл ҳодисаси ҳақида гап боради. Мас., А.Мухторнинг «Тундаликлар», Ғ.Ҳошимовнинг «Дафтар хошиясидаги битиклар»идан шу жанрнинг кўпгина яхши намуналари жой олган. Бироқ кўп ҳолларда у ёки бу асардан олинган ихчам ибратли фикр ҳам А. сифатида оммалашади (мас., «Синчалак»дан: «Тўкилгандан томчилаган ёмон...» ёки «Чаласавод киши ўзидан паст, нима деса «ҳикмат» деб турадиган одамлар билан улфатчилик қилишга мойилроқ бўлади»).

**АФОРИСТИКА** – адабий ижоднинг бир тури, муайян ҳаётий тажрибага асосланган ибратга молик умумлашма фикрни ихчам бадиий шаклда (антитеза, параллелизм, қиёс, парадокс ва ш.к. услубий воситалар ёрдамида) ифодалаш. А. воқеликнинг индивидуал-хусусий томонларига кўз юмган ҳолда умумий, типик томонларга эътибор қаратади: унинг асосида тасвирлаш ёки ҳис-туйғуларни ифодалаш мақсади эмас, муайян ҳукм-хулосани баён қилиш мақсади ётади. Яъни А. образ билан эмас, фикр билан иш кўради. Айни чоғда, у илм эмас, А.даги фикр илмий тафаккурдан фарқ қилади: илмий фикр муайян объектнинг атрофлича таҳлили асосида олинса, афористик фикр муаллифнинг шахсий (маънавий, руҳий, сиёсий, маиший ва ҳ.) тажрибасига таянади; илмий фикрнинг тўғрилиги далиллар силсиласи билан исботланса, афористик фикр объектив ҳақиқатлик даввосини қилолмайди, чунки унинг тўғрилиги исбот қилинмайди, ҳис этилади. Агар А.ни адабий ижод тури сифатида тушунилса, унинг жанр кўринишлари деб халқ оғзаки ижодидаги *мақол*, *ёзма адабиёт*даги *гнома*, *хрия*, *сентенция*, *апофтегма*, *максима* кабиларни кўрсатиш мумкин.

**АХЛОҚИЙ-ТАЪЛИМИЙ АДАБИЁТ** – қаранг: **дидактик адабиёт**

## Б

**БАДИИЙ АСАР** – адабиёт ва санъатнинг воқе бўлиш ва яшаш шакли, яхлитлик касб этган образлар тизими, бадиий мулоқот воситаси. Кенг маънода Б.а. санъатнинг у ёки бу тури (муסיқа, расомлик, ҳайкалтарошлик, кино, театр ва ҳ.)га мансуб бўлган, инсоннинг гўзаллик қонуниятлари асосидаги ижодий-руҳий фаолияти маҳсули сифатида яралган янги мавжудликни англатади, яъни бу маънода алоҳида олинган муסיқа асари ҳам, ҳайкал ёки рангтасвир ҳам, фильм ёки спектакль ҳам – бари Б.а. саналади. Термин фаол қўлланувчи тор маъносида бадиий адабиётга мансуб бўлган «*адабий бадиий асар*»ни билдиради. Шу ўринда адабиётга мансуб этилувчи асарларнинг ҳаммаси ҳам Б.а. бўлавермаслигини, «адабий асар» билан «адабий-бадиий асар» тушунчалари фарқланишини таъкидлаш лозим (қ. *адабиёт*, *беллетристика*). Яъни «адабий асар» тушунчасининг қамров доираси кенг бўлиб, «адабий бадиий асар» унинг таркибига киради. Мас., *ҳикоя*, *қисса*, *роман*, *мемуар*, *саёҳатнома*, *эссе* жанрларида битилган асарларнинг ҳаммаси – «адабий асар», бироқ саналганлар ичида *ҳикоя*, *қисса* ва *роман*га нисбатангина «бадиий асар» дейиш мумкин (қ. *поэзия*). Адабиётга мансуб Б.а. тил воситаларидан таркиб толувчи матн, у ҳам моҳият эътибори билан нутқ ҳодисасидир. Нутқ эса, маълумки, жараён бўлиб, бу жараённинг амалга ошиши учун *адресант* ва *адресат*нинг бўлиши талаб этилади. Яъни Б.а. мулоқот асосида дунёга келади; ёзувчи ижод онларида тасаввуридаги ўқувчи билан мулоқотда бўлади – унга муайян бадиий информацияни етказади, ўзининг ўй-ҳислари билан ўртоқлашади, у билан баҳслашади, уни нималаргадир ишонтиришга интилади ва ҳ. Айни шу мулоқот – ижод жараёни асар матнида муҳрланади. Асарни ўқиш жараёнида мулоқот қайтадан жонланади: энди ёзувчи «тасаввурдаги суҳбатдош» мавқеига ўтса, ўқувчи реал суҳбатдошга айланади. Бадиият ҳодисаси фақат икки онг туташган нуқтада (М.Бахтин)гина, яъни ижод (ёзувчи ва тасаввурдаги

ўқувчи) ва ўқиш (ўқувчи ва тасаввурдаги ёзувчи) жараёнларидагина мавжуд. Бошқача айтсак, матн ўқиш (ҳамда ижод) жараёнидагина Б.а.га, бадиият ҳодисасига айланади, ўқилмаган пайтда эса у бир жисм – қоғоз, муқова, рангдан иборат нарса, холос. Шунга кўра, Б.а. сўз санъатининг *воқе бўлиш (моддийлашиш) шаклидир*. Иккинчи томондан, ўзида мулоқот жараёнини акс эттирган бадиий матнда кейинги мулоқотлар потенциал ҳолда мавжуд: у ҳар гал ўқилганда мулоқот (бадиият ҳодисаси) жонланаверади, шунга кўра, Б.а. сўз санъатининг яшаш шаклидир. Ижодкор ва ўқувчи орасидаги *бадиий мулоқотни* амалга оширишга хизмат қилгани учун ҳам Б.а. *бадиий мулоқот воситаси* деб тушунилади. Б.а.да ижод жараёни, санъаткор онгида кечган ижодий-руҳий жараён аксланади. Санъаткорнинг ижод онларидаги ижодий-руҳий ҳолати бетакрор бўлиб, битта дарёга икки бора шўнғиб бўлмаганидек, унинг худди шу ижодий-руҳий ҳолатга қайта тушиши мумкин эмас. Демак, ўзида муайян ижодий-руҳий ҳолатни акс эттирган бадиий асар ҳам *бетакрор (феноменал)* ҳодисадир. Иккинчи томондан, ўша ижодий-руҳий ҳолатнинг ўзи том маънодаги бутунлик, ижод онларида реалликдан узилиб, Идеал ўлчовига ўтган санъаткорнинг маънавий-руҳий бутунлиги. Б.а.даги ҳар бир унсур эса ўша *бетакрор* ва *бутун* ижодий-руҳий ҳолат маҳсули, унда биронта ҳам ортиқча унсур мавжуд эмас. Зеро, асардаги барча унсурлар, *қатто бизга ортиқчадек туюлганлари ҳам муаллифнинг ижод онларидаги руҳий ҳолатини, демакки, асарнинг мазмун-моҳиятини ўзида акс эттиради*. Англашиладики, бадиий асар – бутунлик, бу бутунликдаги бирор-бир унсурни асар мазмун-моҳиятига путур етказмаган ҳолда олиб ташлаш мумкин эмас. Сабаби, бадиий асарни ташкил қилаётган унсурларнинг бари бир-бири билан мустаҳкам алоқада, айна шу алоқалар асосида бутунлик юзага келади, яъни бадиий асар – қисмлардан ташкил топаётган бутунлик, *систем бутунлик*дир. Унинг қисмлари орасидаги алоқа шу қадар муҳимки, уларнинг етарлича англамаслиги асарни чала, ўз моҳиятидан ўзгача тушунишга олиб келиши мумкин. Зеро, ҳар бир қисм бутун талабига мос киритилган, демак, қисмлар орқали бутун тушунилади, қисмнинг моҳияти бутун таркибидагина намоён бўлади. Демак, Б.а.ни ўқибётган одамдан унинг систем бутунлик эканини ҳамиша ёдда тутиш, ҳар бир қисмни алоҳида ва бошқа қисмлар билан алоқадорликда, шунингдек, уни бир бутун ҳолича ҳам тасаввур эта билиш талаб қилинади.

**БАДИИЙ ОБРАЗ** – адабиёт ва санъатнинг фикрлаш шакли, олам ва одамни бадиий идрок этиш воситаси, бадииятнинг умумий кате-

горияси. Лугавий маъносида ҳар қандай аксни билдирувчи «образ» сўзи турли фан соҳаларида (фалсафа, психология) муайян терминологик маънода қўлланади. Жумладан, эстетика ва адабиётшуносликда у «бадиий образ» маъносида тушунилади. Б.о. деганда *борлик* (ундаги инсон, нарса, ҳодиса ва х.)нинг санъаткор кўзи билан қўрилган ва идеал асосида ижодий қайта ишланган акси анланади. Албатта, бу аксда борлиқнинг қўллаб таниш излари бор, бироқ энди у биз билган борлиқнинг айниқўзи эмас, балки ундан шартлилик асосида ажралган янги мавжудлик – бадиий борлиқдир. Худди шу ҳол Б.о.ни объектив ва субъектив ибтидолар бирлигига айлантиради. Яъни, бир томондан, борлиқнинг акси сифатида Б.о. макон ва замонда мавжуд бўлган конкрет нарсадек ҳис этилади. Иккинчи томондан, у тушунча, тасаввур, фараз ва ш.к. тафаккур унсурларига хос хусусиятларга эга: ижодкор Б.о. воситасида фикрлайди, борлиқни оддийгина акс эттирмасдан, уни ижодий қайта яратади. Шунга кўра, Б.о.нинг вужудга келишини қуйидагича схемада кўрсатиш мумкин: борлиқнинг ҳислар орқали онда аксланиши – тафаккур кучи билан ўз маънавий-руҳий эҳтиёжларига мос ижодий қайта ишлаш ва умумлаштириш – конкрет ҳис этиладиган тарзда (Б.о. шаклида) ифодалаш. Конкрет ҳис этиладиган тарзда ифодаланган Б.о. қатор специфик хусусиятларга эга. Аввало, Б.о. *индивидуаллаштирилган умумлашма* сифатида намоён бўлади. Воқеликдаги ҳар бир нарса-ҳодисада турга хос умумий хусусиятлар билан унинг ўзигагина хос хусусиятлар мужассамдир. Нарса-ҳодисанинг умумий хусусиятларига таянувчи абстракт тафаккурдан фарқли ўлароқ, образли тафаккур унинг индивидуал хусусиятларига таянган ҳолда фикрлайди. Дейлик, фан, умуман, одам ҳақида (мас., биолог, умуман, одамнинг физиологик хусусиятлари ҳақида) сўз юритиши мумкин, бироқ санъат ҳеч вақт, умуман, одам образини яратолмайди. Шу маънода *конкретлик* Б.о.нинг муҳим специфик хусусиятидир. Мисол учун, А.Ориповнинг «Аёл» шеъридаги аёл образи ўзида қатта бадиий умумлашмани ташийди, шу билан бирга, у ўқувчи тасаввурида конкрет бир инсон сифатида гавдаланади. Санъат конкрет нарса-ҳодисанинг индивидуал хусусиятларини бўрттириш орқали умумлаштиришга зришади. Мас., А.Қаҳҳор «Ўғри» ҳикоясида амин ҳақида «оғзини очмасдан қаттиқ кежирди, кейин бақбақасини осилтириб кулди», «чинчалогини иккинчи бугинигача бурнига тикиб кулди» қабилидаги индивидуал белгиларни бўрттиради. Шу индивидуал белгиларни бўрттириш билан адиб замона амалдорларига хос умумий хусусиятни – қўл остидаги

фуқаро тақдирига бефарқликни кўрсатади. Яъни индивидуаллаштириш ҳисобига, бир томондан, амин образи кўз олдимизда конкрет инсон сифатида гавдаланади, иккинчи томондан, образ бадиий умумлашмаллик касб этади. Шу тариқа Б.о.да бир-бирига зид икки жиҳат (индивидуаллик ва умумийлик) уйғун бирикади. Шунга ўхшаш Б.о. ўзида ақл билан ҳисни ҳам бирлаштиради, шу боис уни *рационал* ва *эмоционал* бирлик сифатида тушунилади. Б.о.даги рационал жиҳат шуки, унинг ёрдамида ижодкор ўзини қийнаган муаммоларни бадиий идрок этади. Мас., «Кеча» романидаги қатор образлар ёрдамида Чўлпон Туркистоннинг тарихий тараққиёти масалалари, юртининг эртаси билан боғлиқ муаммоларни бадиий тадқиқ этади, образлар тизими воситасида бу борадаги фикр-қарашларини шакллантиради ва ўзи англаган ҳақиқатни бадиий концепция (туғал бир қараш, тизим ҳолидаги бадиий хулоса) тарзида ифода этади. Айни пайтда, асардаги образларда адибнинг ҳиссий муносабати ҳам ўз аксини топган. Ҳиссий муносабат бадиий концепцияни шакллантиришда, асар мазмунининг ўқувчига етказилишида муҳим аҳамият касб этади. Ҳар бир конкрет образнинг ҳиссий тоналлиги турлича бўлиб, бу, биринчи галда, ижодий ният билан боғлиқдир. «Кеча»нинг бошланишидаёқ Чўлпон Зебига бир турли, Раззоқ сўфига яна бир турли, Акбаралига эса бошқа бир турли муносабатда бўлади. Воқеалар ривожини давомидида ҳиссий муносабатда ҳам маълум ўзгаришлар кузатилади. Жумладан, асар бошланишидаги Зебига шайдолик тўла меҳр су-сайиб (адиб характер моҳиятини холис идрок этади), Раззоқ сўфи ёки Акбаралига нисбатан мазахли нафрат қисман ачинишга (адиб уларнинг тақдиринидаги фожеликни кашф этади) айланиб боради. Яъни характер моҳиятига кирилгани сари, ҳиссий муносабатда ўзгариш юзага келади. Ҳиссий муносабатдаги ўзгариш ўқиш жараёнида китобхонга ҳам ўтади ва айни шу нарса уни асар мазмунини адиб истагандек тушунишига йўналтиради. Демак, Б.о.даги рационал ва эмоционал жиҳатлар уйғунлиги бадиий концепциянинг шакллантирилишида ҳам, ифодаланишида ҳам бирдек муҳим экан.

Б.о.нинг муҳим хусусиятларидан яна бири унинг *кўл маънолилиги* бўлиб, бу унинг *метафориклиги* ва *ассоциативлиги* билан белгиланади. Б.о.га хос «метафориклик»ни «ўхшашлик» билангина боғлаб қўямаслик лозим. Яъни «метафориклик» деганда Б.о.нинг бир нарса моҳиятини бошқа бир нарса орқали очишга интилиши, санъатга хос фикрлаш йўсини тушунилади. Чинакам санъаткор нигоҳи моҳиятга қаратилади, у нарса-ҳодисалар орасидаги ташқи ўхшашликка эмас

нигоҳимиздан яширин ички ўхшашлигига таяниб фикрлайди. У биз кутмаган ички ўхшашликни кашф этади, натижада ўша биз билган нарса-ҳодиса кўз олдимизда буткул янгича бир тарзда гавдаланади, ўзининг бизга ноаён қирраларини намоён қилади. Мас., шоир (Х.Даврон) рангтасвир санъати ҳақида ёзади: «Мусаввир бўлмоқ эрсанг, Тилингни сугуриб ол Ва ярадан тўкилган қон рангига қулоқ сол». Албатта, рангтасвирда ранглар «гапириши» ҳаммага маълум, бироқ айни шу фикрни «гапираётган қон ранги» образи орқали берилгани — кашфиёт, метафорик фикрлаш натижаси ва худди шу нарса бизни ҳайратга солади, шууримизда муқим ўрнашади. Моҳиятга қараган санъаткор қобилигига ўралиб яшаётган одам билан сассиқ кўлмақдаги тилла балиқча ёхуд ўзида чексиз куч-қудрат сўзгани ҳолда мақсадсиз яшаётган одам билан бемақсад учиб юрган бургут орасида (А.Орипов), турғунликнинг биқик муҳитида яшаётган зиёли билан бир издан бетўхтов юраётган трамвай (А.Аъзам) ёки қатагон шароитида ижод қилаётган шоир билан ваҳший қоялар орасида қуёшга оппоқ гул узатганча нафис чайқалаётган наъматак (Ойбек) орасида ўхшашликлар топади, бирининг моҳиятини иккинчиси орқали очиб беради. Келтирилган мисоллар образли тафаккурда юксак даражадаги ассоциативлик бўлишини кўрсатади. Маълумки, ассоциативлик, умуман, инсон тафаккурига хос, ташқи олам таъсирида онгимизда бирор нарсанинг акси пайдо бўлиши ҳамоно, у билан боғлиқ ассоциациялар ҳам уйғонади. Мас., «қиш» дейилиши билан, хаёлимизда ассоциатив тарзда «қор», «совуқ», «пўстин», «чана» каби у билан боғлиқ тушунчалар ҳам уйғонади. Образли тафаккур юксак даражада ассоциатив саналишига сабаб шуки, реалликда кўрилган бир нарса санъаткор хаёлида бутунлай бошқа бир нарсани, у билан мутлақо алоқаси бўлмаган нарсани уйғотиши мумкин. Шу боис санъаткор юқоридагича ўхшашликларни топади ва Б.о.да акс этирадики, натижада образ юксак даражадаги ассоциативлик касб этади, шу асосда у кўп маънолилик хусусиятига эга бўлади. Буни, айниқса, ассоциативлик даражаси юқори бўлган рамзий образлар мисолида яққол кўришимиз мумкин. Мас., Ойбекнинг «Наъматак» шеъридаги табиат манзарасини Б.о. деб олсак, табиийки, унинг биринчи маъноси табиат манзарасининг ўзи. Ҳолбуки, ўз вақтида шоир ассоциатив равишда шу манзарада истибдод тузуми шароитидаги ижодкор тақдирини кўрган ва маъкур маънони ифодалаган. Айни дамда, образнинг маъно кўлами шулар билангина чекланмайди: ўқувчи ўз ҳаётий тажрибаси, шеърни ўқиш пайтидаги руҳий ҳолати билан боғлиқ равишда унда тамом



бошқа мазмунни, ўз мазмунини ҳам топиши мумкин. Кўп маънолилиқ нафақат рамзий, балки том маънодаги реалистик образларга ҳам хос, фақат бунда кўп маънолилиқнинг юзага келиш механизми ўзгача, у Б.о.нинг яхши маънодаги *нотугаллиги* билан боғлиқдир. Санъаткор ифодаламақчи бўлган фикр Б.о.да тугал айтилмайди (яъни китобхон оғзига чайнаб солиб кўйилмайди), Б.о.нинг айрим чизгилари пунктир (узук-узук чизиклар) билан тортилади. Яъни санъаткор Б.о.да маълум имкониятлар яратади-да, уларни рўёбга чиқаришни ўқувчига қолдиради. Бу хил имкониятлар, айниқса, «объектив тасвир» йўсинидан борилган, ёзувчи холис кузатувчи мавқеида турган асарларда кучли намоён бўлади. Гарчи асарда тасвирланган нарса битта бўлса-да, ўқувчилар (ижодий тасаввур имконияти, характери, дунёқараши ва б.га кўра) турлича бўлгани учун, конкрет Б.о. уларнинг онгида турлича аксланади, турли хулосаларга олиб келади. Шу боис ўқувчилар тасаввурда минглаб Отабегу Кумушлар, Қобил бобою Саидалар, Зебию Мирёқублар яшайди. Б.о.га хос шу хусусият туфайли ҳам асарни турли даврларда турлича тушуниш, унинг замиридан янги-янги маъноларни очиш имкони яратиладики, айни шу нарса чинакам санъат асарини боқийликка дахлдор этади.

**БАДИИЙ ОБРАЗ ТУРЛАРИ** – адабиётшунослиқда бадиий образлар турлича тасниф этилади, бу турличалиқ тасниф учун қайси жиҳат асос қилиб олингани билан боғлиқдир. Жумладан, ижодкор эстетик идеали билан муносабатига кўра *ижобий* ва *салбий* образлар, ижодий методга кўра *реалистик*, *романтик* ва б., яратилиш усулига кўра *фантастик*, *эротик* ва б., характер хусусияти ва эстетик белгисига кўра *трагик*, *сатирик*, *юмористик* образлар фарқланаверади. Шунингдек, баъзан бадиий образнинг тасвир планидан келиб чиқиб *инсон образи*, *жониворлар образи*, *нарса-буюмлар образи* тарзидаги атамалар ҳам кўпланади. Албатта, илмий муомалада бу каби таснифлар, атамалар ҳам ўрни билан керак. Бироқ мавжуд таснифларнинг ҳеч бири бадиий образларни тўла қамраб ололмайди. Қамров кўлами кенгроқ таснифлардан бири бадиий образларни: 1) предметлилиқ даражаси; 2) умумлаштириш даражаси; 3) тасвир ва ифода қатламлари муносабати (структураси)га кўра гуруҳлашни (М.Эпштейн) кўзда тутати.

Предметлилиқ даражаси дейилганда бадиий образ тасвирлаётган нарсанинг кўлами назарда тутилиб, бу жиҳатдан бадиий реалистик тўртта сатҳдан таркиб топади: 1) деталь образлар; 2) воқеа-ҳодисалар образи; 3) характер ва шароит; 4) дунё ва тақдир образи (бадиий реалистик). Деталь образлар (тафсилотлар, нарса-буюмлар

портрет, пейзаж)дан бадиий реалистикнинг иккинчи қатлами – ички ёки ташқи ҳаракатдан таркиб толувчи воқеа-ҳодисалар образи ўсиб чиқади. Шу ҳаракат ортида туриб уни юргизаётган «характер ва шароит» учинчи қатламни ташкил қилади ва олдингиларини бирлаштирган ҳолда «дунё ва тақдир» образини юзага келтиради. Яъни бадиий реалистик ғиштчалардан – бутунни ташкил қилувчи унсурлардан ташкил топади, бу унсурлар ўзаро предметлилиқ даражаси, тасвир кўлами жиҳатидан фарқланади.

Умумлаштириш даражасига кўра бадиий образнинг қатор кўринишлари фарқланади. Жумладан, инсон образига татбиқан *индивидуал образ*, *характер* ва *тип* ажратилади. Бироқ уларнинг орасидаги фарқ доим ҳам яққол эмас, бу хил таснифда муайян шартлилиқ сақланиб қолади. Индивидуал образ деб ўзига хос феъл-атвори, гап-сўзлари, бетакрор характер хусусиятлари билан намоён бўлувчи образ тушунилади (мас., «Ўтмишдан эртақлар»даги Бабар, «Менинг ўғригина болам» ҳикоясидаги Роқия биби). Характер эса муайян давр ва муҳит кишиларига хос энг муҳим, характерли умумий хусусиятлар билан алоҳида шахсга хос индивидуал хусусиятларни ўзида мужассам этган образдир. Муайян ижтимоий-тарихий шароит, давр ва муҳитга хос муҳим характерли хусусиятларни ўзида намоён этган образ эса тип деб юритилади. Умумлаштириш даражасига кўра бадиий образнинг яна адабий-маданий анъаналар доирасида муайян тургун шаклга айланиб, асардан-асарга кўчиб юриш хусусиятига эга бўлган *мотив*, *топос*, *архетип* деб юритилувчи кўринишлари ҳам ажратилади. Мотив (мотив образ) шаклий ва мазмуний жиҳатлардан муайян тургунлик касб этган, бир ёки бир неча ижодкорнинг асарларида қайтарилиб туриши билан уларнинг ижодий интилишларини намоён этувчи образдир. Мас., Чўлпон ижоди учун «йўл» образи мотив саналиши мумкин. Чунки бу образ унинг ҳам шеърий, ҳам насрий асарларида тез-тез такрорланади. Ёки «юлдуз», «йўлчи» мотивлари XX аср 20 – 30-йиллари шеъриятида, хусусан, А.Фитрат, Чўлпон, Ойбек ва У.Носир асарларида кўп учрайди. Топос мотивга нисбатан кенгроқ тушунча бўлиб, у миллий маданиятда катта бир адабий давр мобайнида такрорланувчи образ саналади. Ўзбек мумтоз шеъриятидаги пайгамбарлар образлари, гул ва булбул, шам ва парвона каби такрорланувчи образлар топос саналиши мумкин. Архетип деганда эса инсон тафаккури, ижодий тасаввурига хос бўлган тургун «схема»лар, конструкциялар, қолиплар тушунилиб, уларнинг изларини энг қадимги даврлардан бошлаб то

ҳозирги адабиётгача кўриш мумкин. Архетип конструкция ва схема-лардан ўзига хос «сюжет ва сюжет ҳолатлари» жамғармаси ҳосил бўладики, улар асардан-асарга, даврдан-даврга кўчиб юради. Мас., «булбул – гул – чақиртиканак».

Юқорида айтилганидек, бадий образ воқелиқдаги нарса-ҳодисанинг ижодий қайта ишланган акси, шунга кўра, у ўша нарса-ҳодисани конкрет ҳис этиладиган тарзда тасвирлайди. Айни чоғда, тасвирланган нарса муайян мазмунни ифодалашга хизмат қилади. Демак, структурасига кўра бадий образ тасвир ва ифода планларидан иборат экан. Бадий образнинг тасвир ва ифода планлари бир-бири билан турлича муносабатда бўлади, шундан келиб чиққан ҳолда *автологик*, *металогик* ва *суперлогик* образлар ажратилади. Автологик образда тасвир ва ифода планлари бир-бирига мос тушади (мас., чинор тасвирланган ва чинор назарда тutilган). Металогик образда тасвирланаётган нарса билан ифодаланаётган нарса мос бўлмаса-да, уларда кўчимлардаги каби муштарак нуқта бор (мас., чинор тасвирланади – собитлик, улугворлик кабилар назарда тutilади), суперлогик образда эса тасвир билан ифода мос эмас, уларни боғловчи муштарак нуқта ҳам йўқ; тасвир муайян шартлилик асосида ва контекст доирасидагина кўзланган мазмунни ифодалайди (чинор тасвирланади – бутун бир халқ назарда тutilади).

**БАДИЙ ПСИХОЛОГИЗМ** – бадий асарда тўлақонли инсон образини яратишнинг муҳим воситаларидан бири; персонаж руҳиятининг очиб берилиши, хатти-ҳаракатлари ва гап-сўзларининг психологик жиҳатдан асосланиши, шу мақсадларга хизмат қилувчи усул ва воситаларнинг жами. Ёзувчи персонаж руҳиятини бевосита ёки билвосита тасвирлаб бериши мумкин. Персонаж ўй-кечинмалари, ҳис-туйғуларининг «ички монолог», «онг оқими» тарзида ёки муаллиф тилидан (ўзиники бўлмаган муаллиф гапи) баён қилиниши психологик тасвирнинг бевосита шакли ҳисобланади. Асардаги персонаж руҳиятининг унинг хатти-ҳаракатлари, гап-сўзлари, юз-кўз ифодалари (мимикаси), ундаги физиологик ўзгаришларни кўрсатиш орқали очиб берилиши эса билвосита психологик тасвирдир. Руҳий тасвирнинг бу икки кўриниши бир-бирини тўлдиради, шу боис муайян персонаж руҳиятини тасвирлашда ёзувчи буларнинг иккисидан ҳам ўрни билан фойдаланади. Шунингдек, персонаж руҳиятини очишда ёзувчи табиат тасвиридан ёки бошқа бирор нарса образидан фойдаланиши мумкин бўладики, бу ҳам билвосита психологизмнинг кўри-нишидир. Мас., «Ўткан кунлар» романида А.Қодирий Кумушнинг тур-

мушга берилиш хабарини эшитган Отабек руҳиятини «Хўжа Маъоз» қабристони манзараси орқали акс эттирса, унинг Кумуш ҳижронида яшаган пайтлардаги руҳий ҳолатини «Наво» куйининг шарҳида умумлаштириб ифодалайди. Адабий асарда характер руҳиятини очиш, умуман, инсон образини яратишнинг муҳим воситаларидан яна бири персонаж нутқидир. Замоनावий насрда диалог салмоғининг ортиши баробарида, персонаж нутқининг образ яратишдаги мавқеи ҳам кучайди. Персонаж нутқини индивидуаллаштириш орқали унинг шахсияти, дунёқараши, муайян ҳаётий ҳолатдаги руҳияти ҳақида ўқувчига кўп нарсаларни етказиш мумкин. Диалогларда персонаж нутқи муаллифнинг қисқа, лўнда шарҳлари билан таъминланади. Персонажнинг юз-кўз ифодаси, мимикаси, ундаги физиологик ўзгаришлар ҳақида маълумот берувчи бу шарҳлар жуда катта аҳамият касб этади. Улар ўқувчига персонаж нутқини «эшитиш», хатти-ҳаракатларини «кўриб туриш» ва шу асосда унинг айни пайтдаги руҳиятини ҳис қилиш имконини яратади. Адабиётшуносликка оид манбаларда Б.п.нинг динамик, типологик ва аналитик принциплари фарқлаб кўрсатилади. Динамик принципда персонаж руҳияти унинг муайян ҳаётий ситуацияларда ўзини туттиши, хатти-ҳаракатлари ва гап-сўзлари орқали очилади, моҳиятан бу драматик асар персонажлари руҳиятини очиш усулига ўхшаш, шу боис динамик принцип баъзан психологик таҳлилнинг драматургик усули деб ҳам таърифланади. Б.п.нинг типологик принципи персонаж руҳиятини у шаклланган ва ҳаракатланаётган муҳит шарт-шароитлари билан боғлаган, шулардан келиб чиққан ҳолда тасвирлашни назарда туттади. Аналитик принцип эса персонаж дилидаги ҳис-туйғулар, онгидаги ўй-фикрларнинг илдизлари, тадрижини жараён тарзида изчил ва атрофлича тасвирлашни тақозо этади. Бунда бир ҳисдан иккинчи ҳис, бир ўйдан бошқа бир фикр ўсиб чиқади, улар бир-бирини тўлдиради, сифат жиҳатидан ўзгартиради ва ҳ. Бу эса персонаж тақдири, қарашлари ва амалларидаги кескин бурилишларни тайёрлаш ва кўрсатишга имкон берадики, у баъзан Б.п.нинг «қалб диалектикаси» шакли деб ҳам юритилади. Айтиш керакки, муайян персонаж руҳияти тасвирида бу учала принцип ҳам қоришиқ ҳолда намоён бўлади, улардан бири етакчилик қилгани ҳолда, бошқалари уни тўлдириш, конкретлаштиришга хизмат қилади.

**БАДИЙ ТАСВИР ВА ИФОДА ВОСИТАЛАРИ** – бадий асарда нарса-ҳодисаларни жонли тасвирлаш, ҳис-туйғу ва кечинмаларни ёрқин ифодалашга хизмат қилувчи тил воситаларининг умумий

номи. Адабиётшуносликда ушбу тушунча турли номлар билан юритилади: *фигуралар, синтактик фигуралар, стилистик фигуралар, тилнинг поэтик воситалари, тилнинг бадиий-тасвирий воситалари, тасвирий воситалар, ифода-тасвирий воситалар* ва б. Аввало, тилнинг бадиийлиги Б.т. ва и.в.нинг ишлатилиши билан белгиланмайди, улар ишлатилмаган ҳолда ҳам, бадиий тилнинг бош специфик хусусиятлари – *образлилик (тасвирийлик)* ва *эмоционаллик* мавжуд бўла олади; Б.т. ва и.в. мазкур хусусиятларни кучайтириб намоён этишга хизмат қилади. Иккинчидан, бадиий адабиёт сўз воситасида тасвирлайди (*образлилик*), айна пайтда, бадиий адабиётдаги тасвир қуруқ эмас, у ҳис-туйғуларга йўғрилган (*эмоционаллик*)дирки, шу тасвир орқали муайян ўй-фикр, ҳис-кечинма ҳам ифода этилади. Яъни битта воситанинг ўзи ҳам тасвир, ҳам ифодага хизмат қилади. Демак, бу воситаларнинг униси тасвир, буниси ифода воситаси деб ажратиш тўғри бўлмайди. Шу билан бирга, мазкур воситаларни *бадиий тасвир воситалари* дебгина юритиш ҳам маъқул эмас: айрим воситалар (*мас., такрорлар, риторик сўроқ, риторик мурожаат, эллипсис, жим қолиш* ва б.) борки, улар ифодавийликни кучайтиришга хизмат қилади. Яъни улар *бадиий тасвир воситалари* термини қамров доирасидан четда қолади. Шу сабабли ушбу тушунча Б.т. ва и.в. тарзида аталгани маъқулроқ.

Б.т. ва и.в. тилдан фойдаланишда муайян бадиий-эстетик мақсадни кўзлаб умумодатий нормадан огиш (яъни тил унсурларини одатдагидан ўзга шакл, маъно, тартиб, муносабат ва ш.к.ларда қўллаш) натижасида юзага келади ва тасвирнинг жонли, ифоданинг таъсирли бўлишига хизмат қилади. Бу хил оғишлар тилнинг турли сатҳларида: фонетик (*аллитерация, ассонанс*), морфологик (*асиндетон, полисиндетон*), лексик (*архаизм, диалектизм, жаргон*), семантик (*троплар*), синтактик (*инверсия, сўз такрори, синтактик параллелизм, эллипсис, хиазм*) сатҳларда кузатилиши мумкин.

**БАДИЙ ТИЛ** – бадиий асар тили, сўз санъатининг асосий қуроли, бадиий адабиётнинг образ яратиш воситаси; *поэтик тил, бадиий адабиёт тили* каби шаклларда ҳам ишлатилади. Яъни бадиий адабиёт бирламчи белгилар системаси саналувчи тил воситасида иккиламчи белгилар системасини – бадиий воқеликни ташкил қилувчи образлар тизимини яратади. Адабиётшуносликда Б.т.ни алоҳида ҳодиса деб тушунувчилар ҳам, уни миллий тилнинг алоҳида вазифага (яъни бадиий мулоқот учун) хосланган кўриниши сифатида билувчилар ҳам мавжуд. Агар Б.т. миллий тил негизида вужуд-

га келиши, миллий тил элементлари воситасида бадиий образлар яратилиши ва айна шу образлар иккиламчи белги (яъни юқорироқ сатҳдаги ўзига хос тил бирлиги) сифатида бадиий мулоқотни амалга ошириши эътиборга олинса, иккинчи қараш ҳақиқатга яқинроқ кўринади. Шунга кўра, Б.т. атамасини қўллашда маълум шартлилик бор: алоҳида ҳодиса сифатида мавжуд бўлмагани ҳолда у бадиий асар(лар) доираси (яъни амалга ошиб бўлган бадиий нутқ)дагина мавжудки, аниқлик талаби билан тушунча баъзан *бадиий асар тили* тарзида ифодаланиши шундан. Йирик рус филолог олими Г.Винокур Б.т.га таърифни: «Бадиий тил деганда бадиий асарлар ёзишда ишлатиладиган тил тушунилади», – дея бошлаганди. Маълумки, бадиий асарлар ёзишда қандайдир алоҳида тилдан эмас, балки кундалик мулоқотдаги каби миллий тил унсурларидан фойдаланилади. Аввало, кундалик мулоқот тили ҳам, бадиий тил ҳам информация етказиш ва информация олишга хизмат қилади. Бироқ бу иккиси етказётган информациянинг табиати турлича: кундалик мулоқот тили оддий информация етказса, бадиий тил бадиий информацияни етказди. Б.т. етказётган информация – образли информация, зеро, унинг воситасида санъаткор тасаввурида яралган образ моддийлашади. Бадиий образ эса воқеликнинг конкрет ҳис этиладиган, ўқувчи онгида қайта жонланадиган ижодий аксидир. Тилнинг илмий, расмий ва х. функционал услубларида етказилган информация тушунча сифатида, бадиий информация эса конкрет образ тарзида қабул қилинади; образ санъаткор қалбида ижодий қайта ишлангани боис ҳамisha ҳиссиётга йўғрилган. Шунга кўра, Б.т.нинг энг муҳим белгиловчи (специфик) хусусиятлари образлилик (*тасвирийлик*) ва эмоционалликдир. Бадиий тафаккур тараққиёти давомида Б.т. имкониятлари кенгайиб боради, унинг аъъаналари шаклланиб, воририйлик асосида авлоддан-авлодга ўтади. Б.т.да аъъанавий тарзда қўлланувчи тасвир ва ифода воситалари (*қ. бадиий тасвир ва ифода воситалари*), бадиий образ яратишда яримтайёр маҳсулот сифатида хизмат қилувчи унсурлар (*қ. мотив, рамз, аллегория, эмблема*) мажмуи шаклланади; матнлараро алоқадорлик асосида ишоранинг ўзи билан Б.т.нинг ифода имконларини кенгайтириш мумкин бўлади ва б. Бунинг натижасида Б.т. кундалик мулоқот тилидан буткул фарқли алоҳида ҳодисадек, шундай мақомга эгадек кўринаверади. Шунга қарамай, у алоҳида ҳодиса эмас, балки миллий тил базасида воқе бўлиб, миллий тилдан бадиий информацияни шакллантириш ва етказиш мақсадида фойдаланиш шаклидир.

**БАДИЙ ТАҲЛИЛ** (ар. *حَل* – текшириш, ҳал қилиш) – адабий асарнинг мазмун-моҳиятини идрок этиш, унинг яхлит эстетик ҳодиса сифатидаги мавжудлигини турли аспектларда ўрганиб, ўзига хослигини очиб бериш ва қимматини белгилашга қаратилган ҳиссий-интеллектуал фаолият. Таҳлил атамаси илмда кенг қўлланувчи анализ (юн. *analysis* – қисмларга ажратиш) терминининг синоними сифатида ишлатилади. Ҳар икки атама ҳам бутунни англаш учун уни қисмларга ажратишни, қисмнинг бутун таркибидаги моҳиятини, унинг бошқа қисмлар билан алоқаси ва бутунликнинг юзага чиқишидаги ўрнини ўрганишни кўзда тутди. Айримлар бадиий асарни тирик организмга қиёс этишади-да, «уни қисмларга ажратиш жонсиз танага айлантиришдан бошқа нарса эмас» деган қарашга таяниб таҳлилга қарши чиқадилар. Бироқ бу хил қараш асоссиздир. Зеро, биринчидан, адабиётшуносликдаги таҳлил ҳам ўқиш, фақат бунда бадиий асарни тадқиқотчи сифатида ўқиш тушунилади. Яъни тадқиқотчининг асарни қисмларга ажратиши мақсад эмас, бир восита – асарнинг бадиият ҳодисаси сифатидаги мавжудлигини, ундаги ўқувчи онги ва руҳиятига таъсир қилаётган, унинг у ёки бу тарзда тушунилишига асос бўлаётган омилларни ўрганиш воситасидир. Иккинчидан, Б.т. жараёнида ҳар вақт *талқин* амали ҳам мажуд (бу ўринда *талқин* «интерпретация»нинг синоними). Кенг маънода «талқин» сўзи ўзга томонидан айтилган гап ёхуд ёзилган асар (илмий, фалсафий, диний, бадиий ва ҳ.) мазмунини англаш, уни маълум яхлитликда тушуниш ва тушунтириш (адабиётшуносликнинг мақсади тушунишнинг ўзига эмас, тушунтириш ҳамдир) маъноларини англатади. Бошқача айтганда, талқин бадиий асардаги «образлар тили»ни «мантик тили»га ўтirmoқ, образлар воситасида ифодаланган мазмунни тушуниш ва тушунтирмоқдир. Шундай экан, чинакам илмий бўлиши учун талқиннинг таҳлилга таяниши шарт қилинади. Зеро, агар талқин қилувчи шахс бадиий матнни чуқур билмаса, асар қисмларини, уларнинг ўзаро алоқаларини етарли тасаввур қилолмаса, унинг талқини илмийликдан йироқ субъективлик касб этади. Бошқа томондан, бадиий адабиётнинг образлар орқали фикрлаши, образ эса ассоциатив тафаккур маҳсули эканлиги эътиборга олинса, талқин субъектсиз мавжуд эмаслиги ҳам аён. Чунки ижодкорнинг ассоциатив фикрлаши маҳсули ўларoқ яратилган ва асарда акс этган образнинг мазмун қирралари фақат субъект онгидагина (яъни унинг ҳам ассоциатив фикрлаши асосида) қайта тикланиши мумкин бўлади. Булар бадиий асарни тушуниш жараёнида таҳлил ва талқин ҳар

вақт ҳозирлигига ёрқин далилдир. Оддий ўқувчидан фарқли ўларoқ, адабиётшунос бадиий асарни талқин қилишда таҳлилга таянади, унинг талқини таҳлил асосида юзага келгани учун ҳам илмий саналади. Шу маънода таҳлил талқиннинг илмий асоси, бадиий асарни тадқиқотчи сифатида ўқиш ва ўқиш демакдир.

**БАДИЙ ТҲКИМА** (русчадан калька: «художественный вымысел») – ёзувчининг ижодий тасаввур ва тахайюли маҳсули, воқеликда реал асоси ёки тўлиқ ўхшаши мавжуд бўлмаган бадиий образлар, ҳаётий ҳолатлар, воқеалар ва ш.к.ни яратишда намоён бўлувчи бадиий ижоднинг муҳим компоненти. Муҳимлигидан, антик даврлардан бошлаб то XVII – XVIII асрларга қадар Б.т.га ижоднинг бирламчи шarti, поэзия (бадиий адабиёт)нинг белгиловчи хусусияти деб қаралган, унга Б.т.дан мосуво асарлар – проза қарши қўйилган. Ҳозирда ҳам Б.т. адабий асар (қ. *беллетристика*) билан адабий-бадиий асарни фарқловчи белгилигича қолмоқда. Б.т.нинг моҳияти ва аҳамиятини тарихий мавзудаги асарлар мисолида тушуниш қулай. Ёзувчи тарихий манбаларни ўрганади, фактлар, воқеалар, уларнинг иштирокчилари ҳақида маълумотларни йиғади. Унинг эндиги вазифаси – ўрганганларини бадиий қайта ишлаш: бадиий воқеликда фактлар жонланиши, воқеалар юз бериши, шахслар яшаши лозим. Худди шу нарса – бадиий тасаввурни ишга солган ҳолда ўтмиш ҳаётини қайта яратиш ижод бўлиб, унда Б.т.нинг роли беқийсдир. Шундай ёндашилса, «тарихий шахс образи» билан «тўқима образ»ни қарши қўйишимизда ҳам каттагина шартлилик борлиги аён бўлади. Мас., манбаларда Абдуллатифнинг падаркушлиги қайд этилган. Ҳаммага маълум фактни бадиий мушоҳада этган О.Ёқубовни фожианинг илдиэлари қизиқтиради: у фарзандни падаркуш этган омилларни – у вояга етган муҳитни, бу муҳитдаги мураккаб муносабатларни, фарзанднинг отага меҳрсиз бўлиб қолиши сабабларини, қаҳрамони руҳиятидаги зиддиятлар ва ш.к.ларни англашга интилади. «Улуғбек хазинаси» учун қуруққина сюжет схемасини берган фактлар Б.т. воситасида тўлдирилади, оқибатда ўқувчи кўз ўнгиде жонли Абдуллатиф бутун мураккаблиги билан намоён бўлади. Демак, гарчи Абдуллатифни тарихий образ деб таърифлаш-са, унинг яратилишида ҳам Б.т.нинг салмоғи катта экан. Худди шу гапни ҳаётдаги реал воқеага, реал прототипларга асосланган замонавий мавзудаги асарларга нисбатан ҳам, умуман, ҳар қандай бадиий асарга нисбатан ҳам тўла асос билан қўллаш мумкин. Зеро, бадиий воқелик унсурлари уйғун алоқадаги бутунлик ва унда жонли

характерлар ҳаракатланаркан, бу нарса фақат ижодкорнинг бадиий тасаввур кучи туфайлигина мумкин бўлади ва бунда Б.т. муҳим бутловчи ашё – «цемент» вазифасини ўтайди.

**БАДИЙЛИК** – ижодий-руҳий фаолият маҳсули ўлароқ дунёга келган асарнинг санъатга мансублигини белгиловчи хусусиятлар мажмуи. Образлилик Б.нинг бирламчи шarti саналиб, у воқеликни бадиий образлар орқали идрок этиш, бадиий образлар воситасида фикрлаш демакдир. Образлилик санъатнинг ўзак хусусияти бўлиб, у йўқ жойда Б. ҳам мавжуд эмас. Б. тарихий категория саналади, унинг талаб ва мезонлари ҳар бир даврнинг маънавий-эстетик эҳтиёжлари, бадиий диди билан боғлиқ ҳолда ўзгариб туради. Шунга қарамай, Б.нинг жавҳари бўлган барқарор шартлар ҳам мавжуд. Жумладан, Б.нинг муҳим шартларидан бири мазмун ва шаклнинг уйғун бирлиги, уларнинг ўзаро мувофиқлигидир. Б.нинг мазкур шarti инсон учун (инсоният учун) аҳамиятли мазмуннинг гўзал шаклда ифодаланиши, бадиий мукамал асарнинг органик бутунликка айланиши демакдир. Бутунлик эса асарда биронта ҳам ортиқча, тасодифий, аҳамиятсиз унсур мавжуд бўлмаслиги, ундаги барча шакл унсурлари мазмунни, эстетик объектни шакллантиришга қаратилишини тақозо этади. Шу шартга дош бероладиган бадиий жиҳатдан мукамал асарнинг ортиги ҳам, ками ҳам йўқ – унга бирон нарса қўшиб ҳам, олиб ҳам бўлмайди, иккала ҳолда ҳам бутунликка путур етади. Шундай бутунлик асосида ирреал олам – бадиий реаллик воқе бўлади. Бу воқелик реалликка нечоғлик монанд бўлмасин, у барибир шартлилик хусусиятини сақлаб қоладик, айна шу *шартлилик* Б.нинг яна бир муҳим талабидир. Бадиий воқелик образлар воситасида яралган ирреал олам эканлигини, *бадиий шартлиликни* қабул қилган ҳолдагина унга эстетик объект сифатида ёндашиш мумкин бўлади. Яъни шу туфайлигина бадиий воқелик реаллик билан чалкаштирилмайди, бадиий асар матн даражасидагина қолиб кетмасдан, эстетик объект сифатида тасаввурда қайта яралади. Қайта яратилишнинг асоси бадиий асарнинг *ўқувчига йўналтирилганлигидирки*, бу Б.нинг яна бир муҳим белгиси саналади. Бадиий асар аввалбошданок муайян ўқувчига мўлжаллаб ёзилади, унда ўша ўқувчи эгаллаши ва шундан туриб бадиий воқеликни жонлантириши керак бўлган жой ҳозирланган. Бу эса ўқувчини эстетик субъектга айлантиради, уни эстетик объектни қайта яратишга ундайди. Яъни ўқиш – ижодий жараён, чунки ўқувчи ёзувчи етказётган мазмуннинг оддий истеъмолчиси эмас, у белгилар асосида ба-

диий воқеликни қайта яратаётган ижодкордир. Ижодкорлик ҳақида эса *оригиналлик* бор ҳолдагина гапириш мумкинки, у Б.нинг муҳим шarti ҳисобланади. Зеро, чинакам бадиий асар бетакрор, оригинал ҳодисадир. Унда санъаткорнинг ижод онларидаги маънавий-руҳий ҳолати, шу онларда аён бўлган МАЪНО аксланади. Ижод онларидаги маънавий-руҳий ҳолат бетакрор бўлганидек, ўша МАЪНО ҳам бетакрордирки, у энди фақат ўқиш жараёнида – қайта яратиш жараёнида воқе бўлади. Гарчи МАЪНО санъаткор – алоҳида бир шахс ҳаётий тажрибаси, маънавий-руҳоний изланишлари маҳсули ўлароқ воқе бўлса-да, ижод онларида у реалликдан узилиб ИДЕАЛ бағрида, *универсал инсон* мақомида турган. Худди шу ҳол МАЪНОнинг *универсаллигини* таъминлайдики, *универсаллик* Б.нинг яна бир белгисидир. Шу *универсаллик* туфайли ҳам чинакам бадиий асар ким ҳақда ёзилганидан, ҳамма ҳақида, қайси гўша ҳақида ёзилишидан қатъи назар, бутун олам ҳақида бўлади, башариятнинг маънавий мулки, кадриятига айлана олади.

**БАДИЙЛИК МОДУСЛАРИ** (русчадан калька: «модусы художественности») – бадиийлик кўринишлари; бадиийлик қонуниятлари (*бадиий бутунлик, шартлилик, ўқувчига йўналтирилганлик, оригиналлик, универсаллик*)нинг намоён бўлиш усуллари. Модус тушунчаси адабиётшуносликка канадалик олим Нортроп Фрай томонидан киритилган. Фрай модусларни ажратишда муаллифнинг бадиий асар қахрамониغا нисбатан нуқтаи назарини асос қилиб олади ҳамда модусларнинг миф, ривоят, юксак-миметик, тубан-миметик, киноявий модус турларини ажратади. Н.Фрайга кўра, мифнинг қахрамони маъбудлар, ривоятники сеҳрли кучлар, юксак-миметик модусдаги асарлар (эпос ва трагедия)нинг қахрамони эса қахрамон-етакчидир. Мазкур модусларнинг қахрамони муаллиф ва китобхондан балеандда туради. Тубан-миметик модус (комедия ва реалистик адабиёт)нинг персонажлари худди биз қатори одамлардир, киноявий модус персонажи ақл ва кучда биздан қуйида туради, унинг эрксизлиги ва мавжудлигининг маънисизлигини гўё юқоридан туриб кузатамиз. Н.Фрай ўзининг модус назариясида бадиийликнинг умум-эстетик кўринишлари – модуслар билан адабий жанрлар орасига чегара қўймайди. Ундан фарқли равишда рус олими В.Тюпа Б.м. тушунчаси остида *қахрамонлик, трагизм, сатира, юмор, сарказм, идиоллиявийлик, элегиявийлик, драматизм, киноя* каби тушунчаларни бирлаштиради. Одатда, бадиий мазмуннинг субъектив томони деб ҳисоблаб келинган юқоридаги тушунчаларга *лафос* (қ.),

гоявий-эмоционал баҳо, муаллиф эмоционаллиги типлари сифатидагина қаралиши мазкур ҳодисаларнинг моҳиятини торайтириш бўлади. Бадиийлик субъект – объект – адресат бутунлигидагина намоён бўлар экан, пафос тушунчаси бадиийлиқнинг фақат бир қиррасигина саналиши мумкин. Мас., трагиклик фақат гоявий-ҳиссий муносабат ёки муаллиф эмоционаллиги бўлибгина қолмай, ўз навбатида, қаҳрамонни типиклаштиришнинг ўзига хос кўриниши ҳамдир. Шу билан бирга, трагиклик китобхонда трагизмга хос катарсисни талаб қилади, китобхонда трагик катарсис содир бўлсагина, бадиийлик рўёбга чиққан деб ҳисоблаш мумкин. Демак, юқорида саналган трагизм, сатира, юмор, драматизм каби тушунчалар муаллифга нисбатан олинганда пафос, қаҳрамонга нисбатан олинганда типиклаштиришнинг алоҳида кўринишини, китобхонга нисбатан эса шу иккисига, яъни пафос ва типиклаштиришга мос катарсисни англатади. Мазкур уч ҳодисанинг бирлиги Б.м.нинг конкрет бир турини юзага чиқаради.

Бадиийлик марказида шахс ва унга қарама-қарши турган ташқи оламнинг ўзаро муносабати, «мен – оламда» концепцияси ётади. Б.м. эса шахс мавжудлигининг руҳий-амалий тажрибасига эстетик аналогия сифатида намоён бўлади. Яъни трагиклик, сатириклик, драматиклик, энг аввало, шахснинг ўз-ўзини англаши ва намоён этиши шакллари бўлиб, бадиий асарда улардан бири асосий ўрин туттади.

**БАДИЙ ШАКЛ ВА МАЗМУН** – воқелиқдаги ҳар қандай нарса ўзининг ташқи кўриниши (шакли) ва шу шакл орқали англашилаётган моҳияти (мазмун)га эга. Шакл ва мазмун категориялари умумфалсафий характерда бўлиб, улар воқелиқни (нарсани) идрок қилишда муҳим илмий абстракциялардир. Зеро, шакл ва мазмун тарзида бўлиш шартли, негаки улар – яхлит бир нарсанинг ҳар вақт бирлиқда мавжуд бўлган ва бир-бирини тақозо этадиган икки томони. Шакл нарсанинг биз бевосита кўриб турган, ҳис қилаётган томони ва айнан у бизга ўша нарсанинг нималигини – мазмун-моҳиятини англатади. Мазмун муайян шаклдагина яшайди, шаклсиз мазмун бўлмаганидек, мазмунсиз шакл ҳам мавжуд эмас. Бошқа ҳар қандай нарса сингари бадиий асар ҳам шакл ва мазмуннинг яхлит бирлигидир. Шунинг учун бадиий шакл (Б.ш.), бадиий мазмун (Б.м.) тушунчаларининг атиги илмий абстракция эканини унутмаслик лозим. Яъни биз яхлит бутунлик – бадиий асарни атрофлича таҳлил қилиш, бу ишни осонлаштириш мақсадидагина шу хил шартли бўлишга йўл

қўямиз. Аслида, Б.ш. мазмунсиз, Б.м. эса шаклсиз мавжуд эмас. Зеро, Б.ш. Б.м.нинг биз қабул қилаётган мавжудлиги, Б.м. эса унинг ички маъноси, мағзидир.

Бадиий асарда шакл ва мазмун ўзаро диалектик алоқада бўлиб, улар бир-бирини тақозо этади, бир-бирига таъсир қилади, бир-бирига утади. Б.ш. билан Б.м.нинг ўзаро муносабатида кейингиси етакчи мавқега эга, у шаклни ҳосил қилишда жуда фаолдир. Санъаткор ижодий ниятидан келиб чиққан ҳолда бўлғуси асарнинг шаклини белгилайди, яна ҳам аниқроғи, бўлғуси асарнинг мазмуни унинг шаклини белгилайди. Мас., жамиятнинг жорий ҳолатини бадиий идрок этиш, у ҳақдаги ҳукмини бадиий концепция тарзида шакллантириш ва ифодалаш мақсадини кўзлаган ижодкор роман шаклини танлайди. Чунки айна шу шакл ижодий ниятда кўзда тутилган мазмунга ҳар жиҳатдан мувофиқ келади ва ўша ният ижроси учун имкон беради. Шу билан бирга, Б.ш. нисбий мустақилликка эга ҳамдир. Ҳар бир давр адабиётида кенг қўлланиб келаётган, ўқувчи оммага тушунарли ва ўзининг нисбатан турғун кўрсаткичларига эга бўлган шакллар мавжуд. Шунга кўра, санъаткор ифодалашни кўзда тутган мазмунни ўша шакллар доирасига сиғдиришга интилади. Мас., сахна учун асар ёзаётган ижодкор уни пардаларга, кўринишларга бўлади, сюжет воқеаларини ижро вақтига сиғдиради, диалогларни сахна ижроси учун мос ҳолга келтиради, уларни ремаркалар билан таъминлайди ва ҳ. Шакл консервативроқ ҳодиса бўлганлигидан узоқ яшовчанлик хусусиятига эга. Мазмун эса ўзгарувчанликка мойил ҳодиса бўлиб, ҳар бир бадиий асар мазмунан ўзича оригиналдир. Сабаби, ўша асарни яратган ижодкор – индивид, у дунёни ўзича кўради ва баҳолайди. Шунга кўра, ҳатто ошкор тақлидий руҳдаги асар ҳам мазмунан оригинал саналиши мумкин. Мас., ҳикоя жанри ўзининг асосий шаклий хусусиятлари билан бадиий адабиётда узоқ вақтлардан бери мавжуд. Айна шу Б.ш.да минглаб ёзувчилар ифодаллаган турфа Б.м.ларнинг саногига етиб бўлмайди. Албатта, ҳар бир ҳикоянинг шаклида ҳам муайян ўзига хосликлар бўлади, бироқ ҳикояга хос асосий шаклий белгилар сақланиб қолаверади. Мазмуннинг шаклга ўтиш ҳодисаси, аввало, генетик асосга эгадир. Мас., газал жанри дастлаб мазмун ҳодисаси бўлиб, «аёлларга ҳушомад, муҳаббат» мазмунидаги шеърий асар газал дейилган. Кейинчалик, газал ўз мазмунига мос энг мувофиқ шаклга эга бўлгач, у шакл ҳодисасига – турғун шеърий жанрга айланди. Ёки итальянча «янгилик» сўзидан олинган новелла ҳам дастлаб мазмун ҳодисаси эди: новелла дейилганда

жонли қизиқиш уйғотувчи янги воқеани ҳикоя қилувчи асар тушуниланган. Айни чоғда, новелла ўзига хос шакл хусусиятларига ҳам эга бўлган: қисқалик, сюжет ўткирлиги ва б. Кейинча новеллага хос шаклий хусусиятлар муқимлашиб, ўзига хос шакл – новелла жанри юзага келади. Шунингдек, шакл ва мазмуннинг бир-бирига ўтиши бир асар доирасида ҳам кузатилади. Бу бадиий асарнинг *система* экани, ҳар қандай система куйи ва юқори даражадаги структуравий бўлақлардан таркиб топиши билан боғлиқ. Мас., тил образга нисбатан шакл, образ тилга нисбатан мазмун; айни пайтда, образнинг ўзи бадиий мазмунни ифодалаш шакли. Ёки бадиий образнинг предметлилик даражасига кўра турлари (деталь – фабула – характер ва шароит – дунё образи) ҳам шаклнинг мазмунга, мазмуннинг шаклга ўтишига мисол бўла олади.

Бадиий асар қимматини белгилашда мазмун ва шаклнинг ўзаро мувофиқлиги энг муҳим мезонлардан саналади. Бадиият гўзал шаклда ифодаланган актуал, умуминсоний қадриятларга мос мазмунни тақозо қилади. Шундай экан, шаклни бадиият, мазмунни гоёвийлик (бунда ҳам, албатта, шартлилик бор) ҳодисаси сифатида тушуниб, ҳар иккисига бирдек эътибор бериш зарур. Адабиётшунослиқда мазкур қоидадан чекинилан ҳоллар ҳам бўлган, албатта. Шаклнинг нисбий мустақиллигини мутлақлаштириб, уни бадииятнинг бош мезони сифатида қараганлар формалистлар деб юритилади (қ. *формализм, формал метод*). Шунингдек, бадиий асарнинг шаклига кўз юмиб, унинг қимматини мазмундан келиб чиқибгина баҳолашга уришилар ҳам бўлган. Хусусан, 20-йиллар шўро адабиётшунослигида майдонга келган «вульгар социологизм» тарафдорлари фаолиятида бадиий асарни фақат гоёвий мазмунидан, синфий моҳиятидан келиб чиқиб баҳолаш амалиёти кузатилади (қ. *вульгар социологизм*). Бадиий адабиётга бундай ёндашув унинг санъат ҳодисаси эканлигини инкор қилиш, уни мафкура қуролига айлантиришнинг кўпол кўриниши эди. Гарчи шўро адабиётшунослиги вульгар социологизмга ўз вақтида кескин зарба берган бўлса-да, унинг ўзи ҳам бир оёғи билан шу мавқеда турар, яъни моҳиятан бадиий адабиётга шу хил ёндашувнинг «юмшоқ» варианты эди. Шўро даврида янги тузумни, коммунистлар партиясини, пролетариат доҳийсини улуғлаган бадиий жиҳатдан ночор асарларнинг рағбатлантирилиб, чинакам бадиият ҳодисаси саналадиган асарларнинг эътибордан четда қолгани, энг ёмони, тазийқ остига олингани бунинг ёрқин далилидир. Бундан бадиий асарни унинг табиатидан келиб чиққан ҳолда, шакл ва маз-

мунни бирликда олиб текшириш зарур экани аён бўлади. Табиийки, бадиий асарни ўрганишда улардан бири диққат марказига кўйилиши мумкин. Шунда ҳам, мас., асар шакли ҳақида фикр юритаётганда унинг мазмунни уюштириш ва ифодалаш, таъсирдорлигию бадиий жозибасини оширишдаги аҳамиятини; мазмун ҳақида фикр юритганда эса унинг шаклга қай даражада мувофиқлигини назардан қочирмаслик тақозо этилади.

**БАДИХА** (ар. *بديخا* – ўйлловсиз, бирданига айтилган чиройли сўз, топқирлик) – аввалдан махсус тайёрланмасдан, дафъатан айтилган шеър; *экспромт* (қ.). Б. бирор воқеадан қаттиқ таъсирланиш, мушоираларда ўзга шоир айтган шеърга жавобан ёки қалтис вазиятдан ҳозиржавоблик билан чиқиш зарурати туфайли яратилади. Б. шеър шоирдан юксак даражадаги образли тафаккурни, шеър техникасини мукаммал эгаллаш, бадиий санъатлардан ўринли ва моҳирона фойдалана олиш, конкрет нарса-ҳодиса, воқеа ёки ҳолатни зудлик билан ва закиёна баҳолаб, улардан бадиий умумлашма чиқара билиш каби малакаларни талаб этади. Манбаларда жанр хусусиятлари жиҳатидан қулай бўлгани учун Б.нинг кўпроқ рубоий ёки қитъа кўринишида битилиши айтилади. Мас., Бобурнинг бир қатор рубоийлари Б. тарзида ёзилган: чоғир мажлисларида, қир-адирлар бағридаги сайрларда, тоғларда сарсон юрган кезларида, узоқларда қолган яқинларидан мактуб ё бирор хабар келтирилганда Б. тарзида яратилган рубоийлардан бир қанчаси «Бобурнома»да эслатиб ўтилган. Жумладан, Хожа Калоннинг Деҳлидаги уйи шифтига битиб кетган «Агар соғу саломат Синд дарёсидан ўтиб олсам, юзим қаро бўлсин Ҳиндни яна орзу ҳавас қилсам» мазмунидаги байтига жавобан Бобур «Мен даги бадиҳада бир рубоий айтиб, битиб йибордим» дейди-да, куйидаги рубоийни келтиради:

*Юз шукр де, Бобурки, Кариму Ғаффор  
Берди сenga Синду Ҳинду мулк бисёр.  
Иссиқлигига гар сenga йўқтур тоқат,  
Совуқ юзин кўрай десанг Ғазни бор.*

Сўфизода ҳам «бадиҳагўй шоир» сифатида шуҳрат қозонган. Унинг турли муносабатлар билан куча деворларига, дарвозаларнинг тепасига, чойхона эшикларига ёзиб қолдирган Б.лари халқ орасида машҳур бўлган.

**БАЁЗ** (ар. *بياض* – оқ, оққа кўчирилган нусха) – XIX асрдан бошлаб кенг тарқалган шеърий тўплам бўлиб, аъъанавий девонлардан фарқли қатор жиҳатларга эга. Жумладан, *девон* (қ.) бир шоир қаламига мансуб шеърлардан тузилса, Б. бир муаллиф шеърларидан ҳам, бир неча шоир асарларидан ҳам таркибланиши мумкин. Яна бир фарқи – Б.да девондаги хаби шеърларни жойлаштиришнинг қатъий тартиби белгиланмайди. Шунингдек, Б.га тартиб бериш принциплари ҳам турлича: муайян бир жанрда ёзилган (мас., «Баёзи мухаммасот») шеърлар ёки мухлислар эътиборига тушган алоҳида шохбайтлардан, баъзан муайян бир мавзудаги (мас., муҳаббат, ватан, табиат ва ш.к.) ёки бирон-бир ҳофиз мусиқага солиб қуйлаган шеърлардан тузилиши ҳам мумкин. Баёзчилик, айниқса, XIX асрда кенг равнақ топди. Жумладан, Муҳаммад Раҳимхон (Феруз) даврида Хоразмда турли принциплар асосида тартибланган бир қатор Б.лар чоп этилди (мас., «Баёзи мусаддасот», «Баёзи мажмуаи ашъор», «Баёзи мухаммасот», «Баёзи ашъор» ва б.). Матбаа ишлари анча кенг йўлга қўйилган XX аср бошларида ҳам кўплаб Б.лар чоп этилган. Мас., ўз даврида кенг шуҳрат қозонган Ҳазиний шеърлари 1910 – 1913 йиллар давомида «Баёзи Ҳазиний» номи билан 7 маротаба чоп этилган. Аксар ҳолларда Б.ларга ноширлар тартиб беришган бўлиб, уларга турли ҳудудларда яшаб ижод қилган шоирларнинг асарлари киритилганки, бу шеъриятнинг оммалашшида муҳим аҳамиятга эга бўлган. Мас., тошкентлик Каримбек Камий шеърлари Бухоро амирлиги худуди – Когонда чоп этилган баёзларда учрайди. Ёки ноширлик иши билан шуғулланган Ибратнинг ўғли Аббосхон томонидан 1910 йили тузилган баёзга Ибратнинг 17 шеъри билан бирга бошқа ижодкорларнинг шеърлари киритилган. Айрим Б.лар муаллифларнинг ўз қўли билан ҳам тартибланган. Мас., шоир Нодим ўз қўли билан тузган «Баёзи Нодим» қўлёзмаси бизгача етиб келган бўлиб, унга мумтоз шеъриятнинг деярли барча жанрларида ёзилган шеърлар киритилган. Баёзчилик аъъанаси кейинги йилларда ҳам давом эттирилди. Жумладан, Ғ.Ғулом ташаббуси билан 1938 йили Муқимий асарларидан таркибланган «Муқимий баёзи» нашр этилди. Шунингдек, ҳозирда турли принциплар асосида (мас., муайян ҳудудда яшовчи шоирлар, ижодкор ўқитувчилар, жангчи-шоирлар, талаба ёшлар тўпламлари ёки муайян мавзу бўйича) тартибланган шеърий мажмуаларга ҳам баёзчилик аъъанасининг давоми сифатида қараш мумкин.

**БАЙТ** (ар. *بيت* – уй) – шарқ шеъриятидаги икки мисрали банд тури. Ҳар қандай икки мисра шеърнинг, гарчи амалиётда шундай ҳол кузатилса-да, Б. деб аталиши тўғри эмас. Чунки Б. ритмик-интонацион ва мазмун жиҳатидан нисбий мустақиллик касб этиши, яъни банд мақомига эга бўлиши позим. Шунга кўра, Б. атамасининг банд маъносида қасида, ғазал, қитъа жанрларига нисбатан ишлатилиши, Шарқ шеъриятидаги бошқа жанрларнинг икки мисрали бандларига нисбатан эса *маснавий* атамасини қўллаш тўғрироқ бўлади (қ. *банд*).

**БАЛЛАДА** (фр. *ballade* – рақсбоп кўшиқ) – 1) ўрта асрлар француз адабиётидаги қатъий шеърий шакл, бир хил қофияланиш тартибидаги (ababbcb) ҳар бири саккиз мисрадан ташкил топган учта банд, банднинг охири мисраси таржеъ сифатида такрорланадиган, ўқувчига мурожаат қилинган ярим банд (тўрт мисралик – bcbcb) билан яқунланувчи шеър; 2) кейинги даврлар Европа адабиётларида кенг тарқалган Б. инглиз-шотланд халқ шеъриятдан келиб чиқади. Агар француз Б.си қатъий шеърий шакл бўлса, инглиз Б.сида шаклий талаблар анча эркин (қофияланиш тартиби қатъий эмас, таржеънинг бўлиши шарт қилинмайди), у бир хил, одатда, тўрт мисрали бандлардан ташкил топади. Инглиз Б.сининг белгилловчи хусусиятлари сифатида тарихий, тарихий-афсонавий, баъзан эса маиший мавзуда ёзилиши, кичик воқеабанд сюжет асосига қурилган эпик характердаги шеърий асарлигини кўрсатиш мумкин. Худди шу хусусиятлар ёзма адабиётдаги Б.ларга ҳам хосдир. Уруш йилларида ёзилган М.Шайхзоданинг «Капитан Гастелло», Ҳ.Олимжоннинг «Жангчи Турсун» хаби асарлари Б.нинг ўзбек адабиётидаги яхши намуналари саналади.

**БАНД** – шеърнинг ритмик-интонацион ва мазмуний жиҳатдан нисбий мустақилликка эга бўлаги. Шеър ритмик қурилишидаги Б.нинг роли ва аҳамияти гапнинг матндаги роли ва аҳамиятига ўхшаш. Шунинг учун аксар ҳолларда банд синтактик жиҳатдан гапга тенг (кўп ҳолларда бандни битта гап шаклига солиш мумкин) келади. Б.нинг ниҳоясида туроқ (руқ) ёки мисрадан кейинги паузага қараганда яққол сезиладиган ритмик паузанинг мавжудлиги, одатда, унинг бошланишида юксалувчи, охирида эса пасаявчи интонация бўлиши; шеърдаги ҳар бир бандни ажратиб турадиган такрорланувчи қофияланиш тартиби, баъзан эса таржеъ ёки радиф сингари кўшимча воситаларнинг борлиги – буларнинг бари Б.ни ритмик-интонацион жиҳатдан алоҳида бутунликка айлантиради. *Изометрия*га асосланган мумтоз шеъриятда (нафақат Шарқ, балки Ғарб шеъриятида ҳам) Б. шакллари



катъий бўлиб, улар шеърий асарнинг композицион қурилишида ҳал қилувчи роль ўйнаган, кўп ҳолларда жанрни белгилувчи омил бўлиб хизмат қилган. Б. турлари кўпроқ ундаги мисралар сонидан келиб чиқиб белгиланган: иккилик (*маснавий, байт, дистих*), учлик (*мусаллас, төрцет*), тўртлик (*мурабба, катрен*) ва ҳ. Айрим ҳолларда Б. турларини ажратишда мисра сонидан бошқа белгилар ҳам эътиборга олинган. Мас., икки мисрали банд тури бўлган *байт* (ab, cb, db, eb...) билан *маснавий* (aa, bb, cc, dd...) қофияланиш тартибига кўра, *элегик дистих* (биринчи мисраси *гекзаметр*, яъни 6 стопали, иккинчиси *пентаметр* – 5 стопали) билан *александр дистихи* (12 бўгинли, 6-бўгиндан сўнг цезура билан бўлинган, 6- ва 12-бўгини урғули) вазн хусусиятларига кўра фарқланади. Жаҳон шеъриятида ҳажм эътибори билан 2 тадан 16 тагача мисрани бирлаштирган Б. турлари мавжуд (қаранг: *мусаммат*) бўлса-да, ҳажми кичикроқ (айниқса, 2, 4, 5 мисрали) бандлар кенг истифода этилган.

Мумтоз шеъриятда изометрияга, жумладан, шеърий асарда Б.ларнинг бир хил (мисра сони, ўлчови, қофияланиш тартиби) бўлишига қатъий амал қилинган бўлса, кейинги давр шеъриятида (Ғарбда романтизм давридан, ўзбек шеъриятида XX асрдан) бу қоидадан чекиниш одатий ҳолга айланди. Натижада *астрофик* (бандларидаги мисралар сони турлича) шеърлар, гетрометрик (ўлчови турлича мисралардан таркиб топган бандли) шеърлар ҳам оммалашди.

**БАРМОҚ** – туркий халқлар шеъриятида кенг тарқалган шеърий вазнлар тизими, сўзлашувда ва илмий муомала амалиётида «бармоқ», «бармоқ вазни», «бармоқ системаси», *бармоқ тизими* каби шаклларда ҳам ишлатилади. Б. туркий тилларнинг табиати, фонетик хусусиятларига тўла мос келади. Шу сабабли ҳам Б. туркий шеъриятда қадимдан қўлланган: халқ оғзаки ижодидаги шеърий асарларнинг, асосан, Б.да яратилгани бунинг ёрқин далилидир. Шуларни назарда тутган ҳолда Фитрат Б.ни «миллий вазн» деб атайди. Кўп ҳолларда Б. – миқдорий шеър тизими, унда изометрия мисралардаги бўгинлар сонининг тенглиги ҳисобига таъминланади дейиш билан чекланилади. Бироқ Б.да ёзилган шеърнинг ритмик хусусиятларини бўгинлар сонининг тенглигига белгиламайди, бунда мисраларда бўгинларнинг қай тартибда туруқланиши (гуруҳланиши) ҳам катта аҳамиятга эга. Дейлик, мисраларида бўгинлар 7+7 (*Мен бу чўллар кўйида / туғилиб топдим камол, // Кўҳна сардобаларда / кўмилиб қолди дардим. А.Орипов*) билан 3+4 / 4+3 (*Қуш бўлиб / қочар бўлсанг, // тирпон бўлиб / қувгайман, /// Тогларда / шар-*

*шарадек // губорингни / ювгайман. Миртемир*) тарзида гуруҳланиб такрорлангани иккита ўн тўрт бўгинли шеърнинг интонацияси бир хил эмас, чунки ўша интонацияга асос бўлаётган ўлчовни битта деб бўлмайди. Демак, Б. мисралардаги бўгинлар сонининг тенглиги ва бир хил тартибда гуруҳланиб такрорланишига асосланувчи шеър тизими экан. Бироқ амалиётда кўпинча буни эътиборга олмай, Б.да ёзилган конкрет шеър вазни «етти бўгинли бармоқ», «тўққиз бўгинли бармоқ», «ўн бир бўгинли бармоқ» тарзида аталадики, бу унчалик тўғри эмас. Негаки бу ҳолда шеър ўлчови чала белгиланган бўлади. Агар шу хил ёндашилса, Б. бор-йўғи 10 – 15 та шеърий вазндангина таркиб топган, ўта қашшоқ тизим бўлиши керак эди. Ҳолбуки, Б. юзлаб вазнларни ўз ичига олган шеър тизими бўлиб, унинг ритмик интонацион имкониятлари жуда кенгдир. Мас., биргина «ўн тўрт бўгинли» вазннинг ичида ўнлаб вариантлар (7+7; 5+5+4; 5+4+5; 4+5+5; 4+4+6; 4+6+4 ва ҳ.) мавжудки, уларнинг ҳар бири шеърга ўзига хос оҳанг бахш эта олади.

**БАРОККО** (итал. barocco – ғаройиб, ғалати) – XVI – XVIII асрлар Европада халқлари адабиёти ва санъатида майдонга чиққан (ҳар бирида пайдо бўлиш вақти, намоён бўлиши ва мавқеи турлича бўлган) бадиий йўналиш; манбаларда баъзан метод, баъзан эса услубий йўналиш деб ҳам кўрсатилади. Б.нинг юзага келиши Уйғониш даври ғояларининг инқирозга учраши билан изоҳлаб тушунирилади. Агар Уйғонишнинг бош омили Европада буржуазиянинг иқтисодий ва ижтимоий юксалиши бўлса, Б.нинг майдонга келиши XVI асрнинг иккинчи ярмидан кўзга ташланган турғунлик билан боғлиқдир. Мутахассислар Б.га хос айрим жиҳатлар Уйғониш даврининг Шекспир, Тассо, Монтень сингари улуг намоёндалари асарларида ҳам кўзга ташланишини таъкидлайдилар. Албатта, бу ўринда кўпроқ Б. дунёқарашига хос жиҳатлар назарда тутилади: Уйғониш даври оптимизми ўрнини эгаллай бошлаган инсонга, унинг эртанги кунига ишончсизлик ва бунинг натижаси ўлароқ юзага келган тушкунлик, мунг оҳанглари бевосита мавжуд ижтимоий зеришлишлар натижаси эди. Агар Уйғониш даври ижодкорлари ҳаётни сөвиш, ундан завқланиш, хузурланишни тарғиб этган эпикурча фалсафага асосланган бўлсалар, Б. намоёндалари онгини дунёнинг фонийлиги, жамики қадриятлар ўткинчилигини уқтирувчи стоиклар фалсафаси эгаллайди. Бундай фалсафа лирика ривожига рағбат бермайди: шеъриятда ҳис-туйғулар ўрнига уларни бўғувчи фикрий мушоҳадалар устуворлик қилади; фоний дунё гўё қимматга эга

эмас, у фақат рамзу мажозлар материали, кони, холос. Б. услуби кишини ҳайратга солишга, уни пол қилишга интилади: унга бирмунча жимжимадор, туманли ифода хосдир. Б. ифода воситалари орасида метафора хукмрон мавқени эгаллайди, метафориклик Б. услубининг белгиловчи хусусиятига айланади. Мутахассислар XVI аср охири – XVII аср бошларида майдонга келган испан адабиётидаги культуранизм ва концептизм, англизлардаги эвфуизм, итальян адабиётидаги маринизм, французлардаги прециоз адабиёт кабиларни Б. доирасидаги оқимлар сифатида кўрсатадилар.

Б. дастлаб испан ва итальян адабиётларида буй кўрсатди. Жумладан, Б. хусусиятларини ижодида мужассам этган испан шоири Гонгора (1561 – 1627) фикрни гўё пардалаб, англини қийинлаштирувчи жимжимадор ва гўзал услубни урфга киритди. Бундай услубни асосларкан, Гонгора шоир маданиятли кишилар учунгина ёзиши керак дейди (Гонгора ва унинг давомчиларини бирлаштирган оқим «гонгоризм» билан бир қаторда «культуранизм» деб номланиши шундан). Бу билан «культуранист»лар классицистларга яқин: иккаласи ҳам маданиятли кишилар учун ёзиш керак деб билади. Фарқи шуки, классицистлар маданиятли кишилар деб антик адабиётни биладиган ва унинг қоидаларини қабул қилган кишиларни, гонгористлар эса ирреалликни, онгости қатламларини идрок этишга қобил кишиларни биладилар. Уларга кўра, фақат авомгина ўзининг тўпори моддиюнлиги сабаб заминга боғлиқлигича қолади, чинакам шоир авомдан юксақ туради ва ундан ҳазар қилади, унинг кўшиқлари оз сонли хослар, нозиктаъб кишиларга аталгандир. Шунга ўхшаш ҳолни Б. ичидаги яна бир оқим – «концептизм»да ҳам кўриш мумкин. Бу оқим намояндалари ўз асарларида сўз ўйинлари, тушуниш ўта қийин кўчимларни қўллаганларки, бу кўчимлар кутилмаган қиёслар, мураккаб ассоциацияларга таянади. Натижада улар ўзига хос топишмоқ, интеллектуал жумбоққа айланади. Мухими, уларни идрок этиш учун ҳиссий эмас, чуқур ақлий мушоҳада юритиш талаб этилади. Яъни концептистларнинг асарлари ҳам хосларга – муайян тайёргарликка эга бўлган, зехни ўткир кишиларга мўлжалланади. Бошқача айтсак, концептистлар ўз асарларини ўқувчига ўткир зехнлилик машқи сифатида тақдим этишади, эстетик завқни жумбоқни енишда деб билишади. Маринизм оқимининг асосчиси Жамбаттиста Марино (1569 – 1625) ижодий-эстетик принциплари жиҳатидан Гонгорага яқин: шеърларидаги ҳиссий тўйинтирилганлик, дунёнинг фонийлиги ва шу билан боғлиқ пессимистик рух, услубдаги

жимжимадорлик, мураккаб ассоциацияларга асосланган кўчимлар ва ш.к. Марино ижодда поэзияни санъатнинг бошқа турлари билан синтезлаштириш тарафдори. У барча санъатлар ўзаро боғлиқ, улар асли битта, фақат ифода усулига кўра фарқланади деб билади. Марино рангасвирда жим турган шеърятни, шеърятда сўзлаётган рангасвирни кўради. Уларнинг мақсади ҳам битта – одамларга ҳузур бахш этиш, уларни маънан юксалтириш, қалбларини тозартиришдан иборат. Маринога кўра, рангасвир санъати ҳаммага, ҳатто омиларга ҳам тушунарли, поэзияни англашга эса фақат «ўқимишли, фозил кишилар» қобилдирлар. Марино санъатларнинг ўзаро таъсири, уларнинг бир-бирини бойитишини эътироф этгани ҳолда, уларнинг ичида поэзияни етакчи деб билади. Жумладан, у мусиқа ҳақида сўз юритаркан, «сўз ва фикрларни ифодаламаган ҳолда жаранглаётган нарса мусиқа деб аталишга лойиқ эмас» деб ҳисоблайди.

Юқоридаги оқимлар ўзларини «янги санъат», услубларини «замонавий услуб» (*stile moderno*) деб ҳисоблаганлар. Бадиий ижод амалиётидаги ўзгаришлар табиий равишда уларни назарий идрок этиш эҳтиёжини туғдиради. Италия ва Испанияда Бальтасар Грасиан, Эммануэль Тезауро, Маттео Перегрини каби Б. назарийчилари майдонга чиқадилар. Жумладан, бадиий ижодда янги услубни амалда қўллаб кўрган Б.Грасиан (1601 – 1658) назарий ишларида янги адабиётнинг қонуниятларини очишга интилади. Унга кўра, янги адабиёт «закийлик ёки тез идрок санъати»дир, унинг табиати ни англишга Уйғониш давридан бошлаб қатъий амал қилаётган Арасту «Поэтика»си оғиз, унинг учун файласуфнинг «Мантиқ» ёки «Поэтика»си эмас, «Риторика»си зарурроқ. Чунки, Грасианга кўра, эстетика мантиқдан тамом фарқли фан, Гўзаллик салтанати эса XVI аср назарийчилари излаган жойдан тамом бошқа жойдадир. Грасиан «дид» (*gusto*) терминини илк бор мантиқий мушоҳададан тамом фарқланувчи эстетик мушоҳада маъносида қўллайди. У «дид» деганда ақлнинг танқидий фикрлаш қобилиятини назарда тутдики, кейинчалик бу тушунча эстетика фанида кенг ўрин эгаллади. Грасианнинг ижодий интуицияни, «тез идрок»нинг бир-биридан тамом йироқ ҳодисалар моҳиятини илғаш ва бир зумда уларни бирлаштира олиш қобилиятини назарий ўрганиш зарурати ҳақидаги фикрлари ҳам илм-фан учун қимматли ва қизиқарли эди. Грасиан «тез идрок» (*agudeza*) деганда номаълум нарсанинг ғоят тез ҳаракатга келувчи интуиция ёрдамида англини тушунади. Унга кўра, бадиий билиш моҳиятан интуитив билиш бўлиб, у воқеликни идрок этиш-

нинг янги имкониятларини очади. Шулардан келиб чиқиб Грасиан антик риторика санъатнинг барча ҳодисаларини, дунёни эстетик идрок этиш хусусиятларини тўла қамраб ололмаслигини таъкидлайди. Зеро, қадимгилар мантиқий билиш қонунларини кашф этганлар, силлогизмлар тизимини ишлаб чиққанлар, бироқ улар «ўткир зеҳн» учун яроқли эмас. Қадимгилар «ўткир зеҳн» фақат даҳоларгагина хос деб ҳисоблаб, шу хусусият намён бўлганда ҳайратланишнигина билганлар, у амал қилувчи қонунларни белгиламаганлар. Ҳолбуки, агар мантиқий фикрлаш қонуниятларини ишлаб чиқиш мумкин бўлган экан, «ўткир зеҳн» қонуниятларини ишлаб чиқиш ҳам мумкин-дир. Э.Тезауро (1591 – 1675) ҳам янги санъат учун «Поэтика» эмас, «Риторика» муҳимроқ деб билади. Унга кўра, «тез идрок санъати» мантиқ ва мантиқий қурилмаларга боғлиқ эмас, тахайюл асосига қурилган поэтик олам ўзигагина хос, тафаккур қонуниятларидан тасом фарқли қонуниятларга таянади. У «тез идрок», закийлик ҳақида анча изчил таълимот яратади. Тезауро «янги санъат»ни вужудга келтирган Закийлик Онгининг кўринишларидан бири деб билади. Закийликнинг иккита асосий қирраси бор – Зеҳн ва Донолик. Зеҳн нарса-ҳодисалар ботинидаги моҳиятга кириб боради, донолик эса бир-биридан йироқ нарса-ҳодисалар моҳиятидаги ўхшашликлар, алоқаларни тез илғаб олади-да, биридан иккинчисини келтириб чиқаради, бирининг ўрнига иккинчисини кўяди. Бу ўринда гап образ – Метафоранинг юзага келиши ҳақида боради. Умуман, Тезауро поэтикаси метафорага асосланади, унга кўра, метафора «поэзиянинг онасидир». Метафора табиатини, унинг хил ва турларини ўрганиш учун Тезауро меъморлик, рассомлик, ҳайкалтарошлик каби санъатларга ҳам мурожаат этади. Жумладан, у меъморликдаги ташқи безаклар инсонни рамзий метафорани англашга ётақлайди деб билади. Умуман, кўзга ташланиб турган ҳар қандай тасвир қалбнинг турли ҳолатларини ифодалашга хизмат қилиши, онга эса янги муаммоларни очиши лозим. Шунга биноан, у инсон сезгиларига таъсир қилиш учун санъат безакдор, ёрқин, қутилмаганликларга бой бўлиши керак деб ўқтиради. Тезауро оламий рамз, Илоҳий Метафорани англашга олиб келадиган санъат назариясини ишлаб чиқишга интилади. Закийликни, иқтидорни у Худонинг яратувчилик қудратига мёнанд ҳодиса деб тушунади. Зеро, санъаткор йўқ нарсадан янги мавжудликни яратади, Холиқнинг ўзи каби образлар ва ирреал оламни яратади. Яратувчилик даҳоси инсонгагина берилган эмас, у табиатнинг ўзида-да мавжуд. Асрорга етган ҳослар ундаги белги-

ларда табиатнинг закий ниятини англай олади. Худонинг ўзи метафоралар, аналогиялар оламини яратганки, омиларга улар оддийгина безак бўлиб туюлади, ҳолбуки, гап оламнинг яратилиши ҳақида бораркан, уларнинг ҳеч бири бежиз, бемаъни эмас. Тезауро фикрни мажозий ифодалаш закийликнинг муҳим белгиси деб билади, зеро, закийлик фикрни тўғридан-тўғри эмас, балки мажозий йўл билан, қутилмаган йўсинда ифодалашда намён бўлади. Бундай ифода санъатга хос бўлиб, у ҳақиқат эмас, бироқ ҳақиқатга тақлид қилади. Шунингдек, Тезауро аҳамиятли ва қизиқарли, кўпчили ва қайғули жиҳатларни бирлаштира олишни ҳам закийлик белгиларидан деб ҳисоблайди. Унинг ўқтиришича, «шу даражадаги жиддий ё шу даражадаги қайғули ва ё шу даражадаги улуғвор ҳодиса йўқки, уни ҳам шаклан ва ҳам мазмунан ҳазилга айлантириб бўлмаса». Маълумки, антик қондаларга асосланган классицистлар бунга қарши турганига қарамай, ижод амалиётида у мавжуд эди, Тезауро эса биринчилардан бўлиб бунинг қонунчилигини асослашга жазм этади. Тезауро битта фикрни услубий жиҳатдан турфа шаклларда ифодалаш мумкинчилигини жонли мисолларда кўрсатаркан, бу хил турфалик фикрни закийлик билан шаклга солиш, метафорик йўлда айтиш имкони тўғрисида мавжудлигини таъкидлайди. Айни чоғда, у ифода шакли билан мазмун бир-бирига узвий боғлиқлигини, улардан бири ўзгарса, иккинчисининг ҳам муқаррар ўзгариши тақозо этилишини ўқтиради. Демак, ёзувчи ифода йўсинини танлар экан, унинг ўзи етказмоқчи бўлган мазмун, ҳиссий тоналликка қай даражада мослиги ҳақида жиддий бош қотириши лозим. Кўринадики, гарчи барокко адабиёти вакиллари услубидаги жимжимадорлик, ўринсиз мураккабликлар ўз вақтида (ва кейин ҳам) кўпплаб эътирозлар туғдирган бўлса-да, унинг етук намояндалари, хусусан, Тезауро сингари назарийчилари шакл-бозлиқдан, «шакл шакл учун» ақидасидан йироқ бўлганлар.

**БАСИТ** (ар. *بسيط* – ёйиқ) – аруз бахрларидан бири, *мустафъилун* (– – в –) ва *фоилун* (– в –) аслларининг такроридан ҳосил бўлади, мустафъилун рукни бошида икки сабаб (мус ва таф) ёйилиб тургани учун шу номни олган. Бундан ташқари, Б. баҳри вазнларининг аруз ва зарбида ҳаракатлар, яъни қисқа унлилар ёйилгани учун шундай номланган деган фикрлар ҳам бор. Б. баҳри араб шеъриятига хос бўлиб, ўзбек шеъриятида қўлланмайди. Навоийнинг «Мезон ул-авзон» асарида Б. баҳрининг бир вазни, Бобурнинг «Мухтасар» асарида саккиз вазни туркий тилда битилган махсус мисоллар билан келтирилган. Хусусан, Навоий:

*Ишқинг мени туну кун мажнуну зор айламиш,  
Кўнглумни зору ҳазин, жисмим низор айламиш, –*

байтини мисол қилган бўлиб, у *басити мусаммани солим* (– – v – / – v – / – – v – / – v –) вазнида ёзилган.

**БАҒИШЛОВ** (рус. посвящение – бағишлов) – 1) асарнинг бирон-бир шахсга бағишланганини ифода этувчи қисми, дебоча; меценатликнинг пайдо бўлиши билан боғлиқ ҳолда антик Римда урфга кирган, кейинчалик Европа адабиётларида анъанага айланган. Б. шеърий ёки насрий йўлда битилиб, асарнинг бошланиш қисмидан жой олган. Б.да ҳомийлик қилган меценат мадҳ этилган, миннатдорлик изҳори билан бирга уни янада кўпроқ ийдириш, ўз ижод маҳсули учун рағбат олиш мақсади кўзда тутилган. Шунга кўра, бундай Б.ларнинг услуби ҳам тантанавор, баландпарвоз бўлган (Шарқ адабиётида ҳам шунга ўхшаш анъана бўлган: «Қутадғу билиг»даги Буғрохон мадҳи, Хоразмий «Муҳаббатнома»сидаги Муҳаммадхожабек мадҳи моҳият эътибори билан Б.га яқин туради). Бироқ кейинчалик Б.дан кўзда тутилган мақсадлар доираси ва шунга мос ҳолда унинг мазмун-мундарижаси ҳам кенгайди. Мас., Мольер мутаассиб диндорлардан ҳимоя излаб «Тартюф» комедиясини қирол Людовик XIV га Б. билан бошлайди; Вольтер «Брут» трагедиясига ёзган Б.да ўзининг маърифатчилик театри ҳақидаги мулоҳазаларини баён қилади ва ш.к.; 2) замонавий адабиётда Б. – асарнинг муаллиф ҳурмати, эъзози, миннатдорлиги, муҳаббати ва ҳ. туйғулар ифодаси сифатида бирон-бир шахс, унинг хотираси, муайян бир жой, муассаса, воқеа-ҳодиса ва ш.к.ларга бағишланиши, шу ҳақдаги қайд. Одатда, Б. асар сарлавҳасидан кейиноқ қайд этиб кўйилади. Мас., А.Ориповнинг «Арслон чорлаганди...» шеърига «Э.Воҳидовга», «Қозоғистон» шеърига «Ўлжасга», «Отелло» шеърига «Аброр Ҳидоятлов хотирасига бағишлайман», «Маконда ломаконимсан, энди қайдан излагайдурман» мисраси билан бошланувчи шеърига «Онам вафотига» тарзида, Т.Муроднинг «Отамдан қолган далалар» романига эса «Бирлашган Миллатлар Ташкилоти аъзоси – озоод Ўзбекистон учун ёздим» тарзида Б. ёзилган; 3) лирик жанр, бирон-бир шахс (нарсга, жой ва ш.к.)га мурожаат шаклида ёзилиб, кўпроқ уни таърифлаш, унга муносабатни ифода-лашга қаратилган шеърий асар. А.Ориповнинг «Курсдошларимга», «Сергей Есенинга», «Денгизга», «Ҳамид Олимжон хотирасига», «Муножот»ни тинглаб», «Номаълум аёл» суратига каби шеърлари Б. жанрининг сара намуналари сифатида кўрсатилиши мумкин.

**БАҲР** (ар. بحر – денгиз) – арузда ёзилган шеърда руқнларнинг такрорланиш тартиби, конкрет шеърдаги ўлчов асоси. Арузда *ҳижо*, *руқн*, *мисра* ва *байт* (араб арузида *ҳарф*, *жузв*, *руқн*, *бахр*, *байт*) шеърнинг ўлчов бирликлари бўлиб, бунда байт конкрет шеърнинг ритмик жиҳатдан тугал бирлиги, бошқалари эса унинг таркибий қисмлари саналади. Б. мисра доирасида воқе бўлади, чунки илк мисрадаги руқнлар тартиби кейинги мисраларда айнан такрорланади. Яъни арузда 8 та руқн (*асл*)нинг муайян тартибдаги такроридан Б.лар ҳосил бўлади ва уларнинг ҳар бири ўз номига эга. А.Навоий «Мезон ул-авзон»да кўрсатишича, арузда 19 та баҳр мавжуд, Бобур эса «Мухтасар»да 21 та баҳрни кўрсатади. Б.ларнинг еттитаси (*мутақориб*, *мутадорик*, *ҳазаж*, *рамал*, *ражаз*, *комил* ва *вофир*) битта руқн такроридан (*мас.*, *мафойилгун* / *мафойилгун*... – *ҳазаж*; *фоилотун* / *фоилотун*... – *рамал*) ҳосил бўлади, биргина *мафъулоту* асли ўзи мустақил ҳолда Б. ҳосил қилмайди. Биттадан олинган иккита асл такроридан яна 8 та Б. (*музориъ*, *ҳафиф*, *мужтасс*, *мунсарих*, *муқтазаб*, *тавил*, *мадид* ва *басит*) ҳосил бўлади (*мас.*, *мафойилгун* / *фоилотун*... – *музориъ*; *фоилотун* / *мустафъилгун*... – *ҳафиф*). Иккита бир хил ва битта бошқа асл такроридан эса қолган 4 та Б. (*қариб*, *мушоқил*, *ғариб* ва *сарийъ*) ҳосил бўлади (*мас.*, *фоилотун* / *фоилотун* / *мустафъилгун* – *қариб*; *фоилотун* / *фоилотун* / *мафойилгун* – *мушоқил*). Ўзбек тили хусусиятлари билан боғлиқ ҳолда шеърятимизда Б.лар қўлланишдаги фаоллик даражасига кўра фарқланади: агар *ҳазаж*, *рамал*, *ражаз*, *музориъ*, *ҳафиф*, *мужтасс*, *мунсарих*, *сарийъ*, *мутақориб* Б.лари фаол қўлланган бўлса, *мутадорик*, *комил* *тавил* Б.лари жуда кам учрайди; *вофир*, *муқтазаб*, *мадид*, *басит*, *қариб*, *мушоқил*, *ғариб*, *ариз*, *амиқ* Б.лари эса шеърятимизда ишлатилмаган.

**БЕЛЛЕТРИСТИКА** (фр. belles lettres – сўз санъати, нафис сўз) – кенг маънода, умуман, сўз санъати, бадиий адабиёт маъносини берса-да, термин турлича маъноларда ишлатилади. 1) насрий йўлда ёзилган адабий асарларни билдиради; 2) сўз санъати маъносидаги адабиётга тааллуқли асарларни бадиий қимматига кўра даражалаш мақсадида классика билан оммавий адабиёт орасидаги ҳодиса маъносида қўлланади. Бу маънода Б. бадиий жиҳатдан мукамал *классик* асарларга ҳам, бадиий ночор оммавий адабиёт намуналарига ҳам қарши кўйилади. Шунга кўра, мавжуд адабий асарларнинг аксарияти (жумладан: саргузашт, детектив, фантастика кабилар) Б.га мансуб этилади. Мутахассислар Б.нинг пайдо бўлишини ёзувчиликнинг профессионал фаолият турига, касбга айланиши билан

боғлайдилар; 3) адабиёт тушунчаси қамраб олувчи асарларни табиатига кўра фарқлаш мақсадида ишлатилади. Бунда *адабий асарларни Б. деб атаб, улар адабий-бадий асарларга қарши қўйилади*. Яъни бу маънода Б. бадий образ воситасида фикрламайдиган адабий асарларни билдиради ва бир қатор адабий жанрларни қамраб олади: очерк, сафарнома, эссе, мемуарлар, мактублар, афористика ва б.; 4) адабиётнинг яхши намуналарига қарши қўйилувчи «енгил адабиёт» маъносига қўлланади. Бу маънода Б. дейилганда ҳозирги кунда матбуотда тижорий мақсадни кўзлаб чоп этилаётган енгил-елпи битиклар, *оммавий адабиёт* тушунилади.

**БЕСТСЕЛЛЕР** (ингл. best – энг яхши, sell – сотилмоқ) – ноширликнинг тижорий томони билан боғлиқ ҳолда юзага келган термин, катта тиражда чоп этилган ва тез тарқалиб кетган, тижорий нуқтаи назардан муваффақият қозонган китоб. Шундан келиб чиқиб Б. термини китобхонлар томонидан қизгин кутиб олинган ва қўлма-қўл бўлиб кетган асарларга нисбатан ҳам қўлланади. Бироқ муайян асарнинг Б.га айланиши унинг бадий мукамаллик даражасини белгилай олмайди, чунки асар бадииятга алоқаси бўлмаган турли омиллар (қизгин реклама, айни ўз вақтида ёзилганлик, кенг омманинг дид ва талабларига мослик ва б.) натижасида Б.га айланиши мумкин. Албатта, чинакам сўз санъатига дахлдор асарлар ҳам Б.га айланиши мумкин (мас., Г.Маркес, П.Козльо асарлари), бироқ амалда бу кўпроқ оммавий адабиёт намуналари (детектив, саргузашт, фантастика, жангари асарлар ва ш.к.)га насиб этади. Бу ўринда усталик билан, омманинг қизиқишлари ва руҳиятини ҳисобга олган ҳолда амалга оширилган реклама, турли тақдимотлар муҳим аҳамият касб этади. Шунингдек, ноширлик ишлари тижорий асосга қўйилган Ғарб мамлакатларида чоп этилган асарларнинг тиражи, сотилиши каби кўрсаткичлар бўйича рейтинглари ҳам мунтазам эълон қилиб борилади.

**БИБЛИОГРАФИЯ** (юн. biblion – китоб, grapho – ёзмоқ) – 1) китоблар, вақтли нашрларда эълон қилинган асарлар рўйхатини тузиш, уларни тематик ёки бошқа (фан соҳалари бўйича, муаллифлар исм-шарифи бўйича ва ҳ.) жиҳатларга кўра таснифлаш, қисқача аннотациялар ёзиш каби вазифаларни ўз олдига қўювчи илмий-амалий соҳа; 2) адабиётшуносликнинг ёрдамчи соҳаси. Адабиётшунослик Б.си адабиётшунослик бўйича тадқиқот ишлари олиб бориш учун зарур маълумотларни – бадий асарлар, адабиётшуносликка оид китоблар, мақолалар, илмий тадқиқотлар рўйхатларини тузиш, муайян тематик йўналишдаги ёки хронологик асосдаги библиографик кўр-

саткичлар тайёрлаш билан шугулланади. Бундай кўрсаткичлар бирон-бир мавзу бўйича изланаётган тадқиқотчининг вақтини тежайди, илмий фаолияти самарасини оширади, шу билан бирга, мавзу бўйича амалга оширилган ишлар билан тўлиқ танишиш имконини беради. демак, илмий хулосаларнинг объектив ва аҳамиятли бўлишига ҳам замин ҳозирлайди. Ўзбек адабиётшунослигида Б. соҳасида ҳам бирмунча ишлар амалга оширилган. Жумладан, ЎзР ФА Бош кутубхонаси ходимлари томонидан тайёрланган «Адабий ҳаёт» библиографик кўрсаткичи; Фитрат, А.Қодирий, Чўлпон, Ғ.Ғулом, А.Қаҳҳор каби ижодкорлар, М.Қўшжонов, О.Шарафиддинов, У.Норматов, Н.Каримов каби қатор олимлар фаолиятини ёритувчи библиографик кўрсаткичларни бунга мисол қилиб келтириш мумкин.

**БИОГРАФИК МЕТОД** (юн. bios – ҳаёт, grapho – ёзмоқ) – адабиётшуносликдаги контекстуал таҳлил методларидан бири. Ушбу метод XIX асрнинг иккинчи ярмида шаклланган бўлиб, асосчиси сифатида француз олими Ш.Сент-Бёв эътироф этилади. Б.м. бадий асарни муаллифининг ҳаёт йўли контекстида ўрганишни назарда тутди. Зеро, бадий асарда ижодкор шахсияти аксланади, шундай экан, унинг кўп қирралари муаллиф биографияси контекстида англашилади. Бошқача айтганда, Б.м. асарга муаллиф юклаган мазмунни англашда етакчи аҳамият касб этади. Мас., А.Қаҳҳорнинг «Даҳшат» (1960) ҳикояси ўтмишдан баҳс юритади, бироқ уни биографик контекстда олинса, ҳикояда адиб асар яратилган давр муаммоларини бадий идрок этаркан, ўз руҳиятида ва қарашларида рўй берган бурилишни акс эттирганини кўриш мумкин. Б.м.нинг қанчалик самарали бўлиши кўп жиҳатдан тадқиқотчи қўл остидаги биографик материалга боғлиқдир. Тадқиқотчи ихтиёридаги биографик материал асар генезиси (яратилишига туртки бўлган омиллар, образлар ва сюжет чизиқларининг реал илдизлари, унда ифодаланган ғоялар моҳияти ва ш.к.)ни ўрганиш имконини беради. Биографик материал (ёзувчи ҳаёти ва фаолияти билан боғлиқ ҳужжатлар, у ҳаракат қилган муҳит ва шу муҳит кишилари билан ўзаро алоқалари ҳақидаги маълумотлар, унинг ёзишмалари, у ҳақдаги хотиралар ва б.) қанча бой бўлса, методни қўллаш шунча самарали натижалар беради. Албатта, биографик материал мутлақ тўлиқ бўлмайди, яъни ёзувчининг ҳаётини кунма-кун ҳужжатли асосда тиклаш маҳол. Шунинг учун Б.м. муаллиф ҳаётига оид фактларни жонлантириш, етишмаган ўринларни тўлдиришни ҳам тақозо этадики, бу ҳол унга *гипотетик* унсурларни ҳам олиб киради. Мас., Чўлпоннинг «Қаландар ишқи» шеъри био-

график контекстда олиб қаралса, унинг янги-янги мазмун қирралари очилади. Шеър 1920 йили ёзилган. Чўлпон ўсмир пайтидан бошлаб февраль инқилоби юзага келтирган шароитда «юртим учун демократик йўл билан озодликка эришиш имкони туғилди» деган ишонч билан қайноқ ижтимоий фаолиятга шўнғиган бўлса, кейинроқ бу йўлдаги ҳаракатлари зое кетиб, умидлари чилпарчин бўлди. Яъни шеър Чўлпон «асрлик тош янглиг бу хатарли йўлда қотган», умидсизликка тушган даврда ёзилган. Шоир кайфияти «Карашма денгизин кўрдим на нозлик тўлкини бордир, Ҳалокат бўлгусин билмай қулочни катта отдим-ку», «Қаландардек юриб дунёни кездим топмайин ёрни, Яна кулбамга қайгулар, аламлар бирла қайтдим-ку» каби сатрларда ўз ифодасини топади. Шеърдаги «Бу дунё деб у дунёни баҳосиз пулга сотдим-ку» мисраси шоир изтиробларининг чўққисини ифода этадики, унинг мазмунини биографик контекстан ташқарида англаш қийин. Аввало, ўзбек тили учун ғализроқ «баҳосиз пул» бирикмасига эътибор қилиш керак. Шеър ёзилган давр кишиларига «баҳосиз пул» деганда Керенский ҳукумати муомалага қиритган ва тезда ўта қадрсизланган пул назарда тутилгани аниқ бўлган. Шундан келиб чиқсақ, Чўлпон бу билан февраль инқилобига ишониб «у дунёни баҳосиз пулга сотдим-ку» дея изтироб чекаётгани англашилади. Изтиробнинг асоси шўқи, таҳликали замонда шоирнинг отасини ўглининг сиёсий фаоллиги ташвишлантирган, табиийки, у ёлғиз ўглининг ўз ёнида, хавф-хатардан йироқ бўлишини истади. Бироқ «карашма денгизи»га ошуфта ўғил отани ташвишга қўйиб, норозилантириб бўлса-да ўз билганидан қолмайди. Яъни миллий руҳда тарбия топган Чўлпон энди отасини норозилантирганига ўқинади, бу ҳолни «у дунёни баҳосиз пулга сотмоқ» деб билади.

Адабий асар таҳлилида Б.м. нечоғлик муҳим бўлмасин, уни мутлақлаштириш тўғри эмас. Бу ҳол адабиётшунослик тарихида кузатилган. Жумладан, XX аср бошларида Б.м.ни соф ҳолда (яъни ёзувчи биографиясини даврнинг ижтимоий, маданий, маърифий шарт-шароитларидан узиб) қўллаш, ижодкор қалбининг суратини яратишга интилиш (француз олими Р.де Гурмон, рус олими Ю.Айхенвальд) кузатилади. Табиийки, бу бадий ижод табиатини жўнлаштириш бўлиб, муқаррар равишда бир ёқламалikka олиб келади. Адабий асар таҳлиliga комплекс ёндашиш, Б.м.ни бошқа методлар билан алоқада қўллаш илмий жиҳатдан тўғрироқ бўлиши ва яхшироқ самара беришини унутмаслик лозим.

## В

**ВАЗН** (ар. *وزن* – ўлчов) – конкрет шеърда юзага чикувчи ритмик ҳодиса, метр, ўлчов. Сўзлашув амалиётида «аруз вазни», «бармоқ вазни» тарзида ишлатиш кузатиладики, назарий жиҳатдан бу тўғри эмас. Чунки, аслида, аруз ҳам, бармоқ ҳам кўплаб вазнларни ўз ичига олган шеър тизимларидир. В. шеър тизими қонуниятига асосланган ҳолда аниқ бир шеърнинг ўлчовини билдиради. Мас., аруз тизими қисқа ва чўзиқ ҳижолаҳнинг муайян тартибда такрорланишига асосланади, В. эса такрорланишининг конкрет шеърдаги тартибини белгилаётган ўлчовни билдиради. Агар «ғазал рамали мусаддаси солим вазнида ёзилган» дейилса, унинг бир байтида 6 та, ҳар бир мисрасида учтадан руқн, ҳар бир руқнда 4 тадан ҳижо борлиги, ҳижолаҳ «чўзиқ-қисқа-чўзиқ-чўзиқ» тартибда гуруҳлангани англашилади. Яъни бу ғазал ритми шу ўлчов асосида тартибга солинган, унинг барча мисра ва байтлари ритмик жиҳатдан мазкур ўлчовга мосдир.

**ВАРВАРИЗМ** (лот. *barbaris* – ўзга юртники) – ўзга тилдан ўзлаштирилган сўз ёки жумла. Бадий асар матнига кўпроқ қаҳрамонлар нуқтини индивидуаллаштириш, давр ёки муҳит колоритини акс эттириш каби мақсадларда киритилади. Ўзлаштириш қайси тилдан амалга ошганига қараб баъзан В.нинг *грецизм*, *латинизм*, *германизм*, *галлицизм*, *полонизм*, *азианизм* каби кўринишлари ҳам ажратилади. Ўзбек адабиётида В.нинг араб, форс, рус тилларидан олинган кўринишлари кўпроқ учрайди. Хусусан, мактаб ва мадраса таълимида араб ва форс тилларининг ўрни катта бўлгани сабабли, XX аср бошларигача улардан олинган сўзлар жуда кўп қўлланган. Мас., А.Қодирий «Меҳробдан чаён»да ёзади: «Худоёр муҳр босиш асноси ёзилган ёрлиг ва номаларни ўхутуб эшитар, муншиларнинг эшитилмаган араб ва форс сўзлари орқалиқ тўқуған ярим туркий жумлаларига аксар вақт тушунмас: «Эналаринг арапқа текканма?» деб мирзо, муфтиларни койир эди». Худоёрхоннинг койиши бежиз эмас, А.Қодирий бунинг сабабини изоҳлаш учун улар иншо этган

ёрлиқни келтирадики, ундан бир парча будир: «Адойи ҳадама асноси биз амири вазифа мутла-қалъинон дорус-салтананинг ҳаққи шаръийсиға хиёнат қилишдин ижтиноб, адолатимиз ойинасини данонат губороти бирлан халадор айлашдин парҳез, арзи доди фуқаромиз суръати истимоъида ихмол ва сустилик кўрсатмай интишори адолатимиз кўшишида субҳи шом машғул ва мабзул, диққат ва эътибори қилгай деб ва яна мазкур исмиға ёрлиг мактуб бўлмиш итоатиға афроди девонхонамиз маъмурлар деб, муҳри шоҳонамиз бирлан таъкид ва тақрир этдик». Ёзувчининг ўзи сатр ости изоҳида ёрлиқнинг учдан бирини ташкил этувчи мазкур парчадаги 11 та сўз (жами 21 та) таржимасини берган. Ҳолбуки, уларнинг сони бундан кўпроқни ташкил қилиши ҳам мумкин эди. XX асрдан бошлаб эса тилимизда рус (ва рус тили орқали бошқа тиллардан кириб келган) сўзларнинг фаоллашуви кузатиладики, жонли сўзлашувдаги бу ҳол адабиётда ҳам ўз аксини топади. Жумладан, А.Қодирий яратган Қалвак махзум ва Тошпўлат тажанг, Фитрат яратган Почамир каби машҳур персонажлар нутқида араб-форс сўзлари қатори яккам-дуккам русча сўзлар ҳам қўлланади, бу эса давр жонли сўзлашув тилига хос хусусиятларни тасаввур этиш имконини беради. Ўтган асрнинг 30-йилларига келиб шеърятимизда русча сўзларни қўллаш «мода»си пайдо бўлдики, бу ҳол, хусусан, куннинг долзарб мавзуларида яратилган публицистик руҳдаги шеърларда кўп учрайди. Мас., Ғ.Фуллом бир шеърда ёзади:

*Биз куйчилар, пролетар –  
Мозолланган қўлларнинг  
Кўз нурлари.*

Шоир ўзбекча қилиб «қадоқ», «қадоқли» ёки «қадоқ босган» дейиш ўрнига «мозолланган» сўзини ишлатади. Бу ўринда В.нинг қўлланиши муайян бадиий-эстетик вазифа бажармайди, демак, у оддийгина модага эргашишдан бошқа нарса эмас. XX аср 80-йиллари насрида персонажлар нутқида В.ларнинг қўлланиши уларнинг маънавий-ахлоқий қиёфасини очиш, улар ҳаракатлана-ётган муҳит хусусиятларини акс эттиришга хизмат қилди, манкуртлашаётган тоифага, даврнинг оғриқли муаммоларига муносабатни ифодалаш воситаларидан бири сифатида кенг фойдаланилди (М.М.Дустов «Истеъфо», Э.Аъзам. «Байрамдан бошқа кунлар» ва б.)

**ВАСЛ** (ар. *وصل* – уланиш, қўшилиш) – 1) арузда ёзилган шеърларда айрим ёпиқ ҳижола охиридаги ундошни вазн талаби билан ўзидан кейинги унли билан бошланган сўзнинг биринчи ҳижосига қўшиб ўқиш ҳодисаси. Мас., Машрабнинг:

*Сажда айлар зоҳид ул меҳробига,  
Ман қилурман сажда эзма қошима, –*

байтидаги «зоҳид ул» (– – –) бирикмаси В. қондасига кўра «зо-ҳидул» (– v –) тарзида ўқилиши лозим, акс ҳолда, шеър вазни бузилади. Чунки байт рамали мусаддаси мақсур (фоилотун, фоилотун, фоилун) вазнида бўлиб, агар В. қондасига риоя қилинмаса, биринчи мисра *хашвида*ги иккинчи ҳижо қисқа бўлмай қолади, натижада вазнда бузилиш юзага келади; 2) *мутлақ қофия* (к.) унсури.

**ВАСФ** (ар. *وصف* – тавсифлаш, тасвирлаш, сифатлаш) – бирор нарса, ҳодиса ёки шахсни мақташ, мадҳ этиш, чиройли ўхшатишлар, мажозий иборалар билан таърифлу тавсиф бериш. В. алоҳида жанр эмас, балки тавсифий характердаги қатор жанрлар (*қасида*, *мадҳия*, *фаҳрия* ва б.)га хос ифода йўсини, усулидир. В. характеридаги шеърлар қасидадан ажралиб чиққан бўлиб, жоҳилият даври араб шеърятинида шоирлар ўз туяси, оти ёки бошқа ваҳший ҳайвонларни, саҳродаги турли ҳодисаларни В. қилиб шеърлар битган бўлса, кейинчалик унинг мавзу кўлами кенгайди: бирор шахс, шаҳар, бино, йил фасллари, ой, қалам ёки қаламдон, бошқа бирор буюм, зеб-зийнат ва ш.к.ларни тавсифлаш мақсадида шеърлар битилди. Кўринадики, В.нинг мавзуси чекланган эмас. Шунга қарамай, мумтоз шеърятимизда маъшуқа ёки унинг бирор узвини тавсифлашга бағишланган шеърлар (мас., «Кокулинг», «Сочларинг», «Қошларинг», «Суратинг» радифли ғазаллар) кўпроқ учрайди. Одатда, шоир бирор нарсани В. қилар экан, унинг жамиятдаги ёки ўз ҳаётидаги ўрни, аҳамиятига баҳо беради, унга ўзининг муносабатини ифодалайди.

**БАТАД** (ар. *وظف* – қоziқча) – сокин ва мутаҳаррик ҳарфларнинг муайян тартибда бирикишидан ҳосил бўлувчи ритмик бирлик, жузе (к.). Ҳарфларнинг қай тартибда бирикишидан келиб чиқиб В.нинг икки тури фарқланади: В.и *мажмуъ* (ёки мақрун) ва В.и *мафруқ*. Аввал келган икки мутаҳаррикка бир сокин ҳарфнинг қўшилишидан В.и мажмуъ ҳосил бўлади: «самар», «башар», «қамар» каби сўзлар шу вазнга мосдир. Мас., «қамар»: мутаҳаррик (қа) + мутаҳаррик (ма) = сокин (р). В.и *мафруқ*да эса икки мутаҳаррик орасида бир сокин

харф жойлашади: «нола», «лола», «зора» каби сўзлар шу вазнга мосдир. Мас., «нола»: мутаҳаррик (но) + сокин (л) + мутаҳаррик (а).

**ВЕРЛИБР** (фр. vers – шеър, libre – озод, эркин) – муайян ўлчов асосидаги вазн ва қатъий қофияланиш тартибига эга бўлмаган шеър. В. насрдан фақат муайян нутқий бўлак (мисра)ларга бўлингани билан фарқланиб, бўлиниш ёзувда ҳар бир мисрани алоҳида сатрга ёзиш, талаффузда эса интонация (ритмик пауза ва ритмик акцентлар) ҳисобига таъкидланади. Европа халқлари шеърлятига В. ўрта асрлардаги *литургик шеърлят*, диний маросимларда ижро этилган қўшиқлар орқали яхши таниш бўлган. В.нинг дунёвий адабиётга кириб келиши немис романтизми билан, фаоллашуви эса француз символист шоирлари ижоди билан боғлиқ. XX асрда В. жаҳон шеърлятида, жумладан, ўзбек шеърлятида ҳам кенг оммалашди (қ. *сарбаст*).

**ВОДЕВИЛЬ** (фр. Нормандиядаги Vau de Vire деган жой номидан) – драматик жанр, кўпроқ маиший мавзудаги, қизиқарли интрига асосига қурилган, ўйноқи қўшиқ-куплетлар ва шўх рақсларни ўз ичига олган пьеса. Аввалига, XVIII асрнинг 1-ярмида ярмарка сайилларида ижро этилган комедиялар таркибидаги қўшиқ-куплетлар В. деб аталган. XVIII аср охирларига келиб В. мустақил жанр сифатида шаклланган, кўнгилочар драматургик жанр сифатида бутун Европага тарқалган. XIX асрнинг 2-ярмида В. фаол истеъмолдан чиққан, унга хос хусусиятлар бошқа драматик жанрларга, хусусан, опереттага сингиб кетган.

**ВОФИР** (ар. *وافر* – мўл) – аруз баҳрларидан бири, ҳаракати, яъни қисқа унлилари кўп бўлгани учун шундай ном берилган. *Мафоилатун* аслининг (v – v v –) такроридан ҳосил бўлади. В. араб шеърлятига хос баҳр бўлиб, ўзбек ва форс шеърлятида қўлланмаган. Фақат Навоий ўзининг «Мезон ул-авзон» асарида В. баҳрининг икки вазнига, Бобур эса «Мухтасар»да йигирма бир вазнига тўхталиб, уларга махсус байтлар битганлар ва мисол сифатида келтирилганлар. Хусусан, «Мухтасар»да:

*Кел, эй қаро кўз, манга гузар эт,  
Будур санга сўз, манга назар эт, –*

байти *вофири мураббаъи солим* (v – v v – \ v – v v –) вазнига мисол қилиб келтирилган.

**ВОҚЕАБАНД ЛИРИКА** – лирик кечинмани воқеанинг ихчам тасвири асосида ифодаловчи шеърлар, замонавий шеърлятда кенг

тарқалган жанр. В.л.да воқеани тасвирлаш мақсад эмас, балки бир восита, лирик кечинмани ифодалаш воситасидир. Шунга кўра, В.л.да воқеа тўлақонли тасвирланмайди, балки пунктирлар билан чизилади: унинг энг муҳим деталларини олиш, энг қизгин, кульминацион нуқталарига ургу бериш билан кифояланилади. Тасвир кўлами, бир томондан, ўша воқеа таъсирида юзага келган ҳис-туйғуни ифодалаш, иккинчи томондан, ўқувчининг уни тасаввур қила олиши, лирик кечинмага туртки бўлган асосни ҳис эга билиши учун етарли бўлиши билан белгиланади. Мас., Х.Давроннинг «1941 йил. 22 июнь. Пешин» шеъри:

*Уларни кўйишди жар ёқасида...  
Отасин қўлини ушлаган гўдак  
Чор атрофга қараб шўх, олазарак,  
Сўради: «Ўқ тегса оғирми, дада?»  
Унинг овозини босди гулдирак...  
Баҳорда жарликни қоплар ўт-ўлан,  
Ўтлар узра сузиб ўтар оқ булут  
Ва шунда гийҳлар аччиқ дард билан  
Шивирлар-шивирлар: «Оғиркан, дада!»  
Бу нола ҳеч қачон бўлмайди унут...*

Шоир урушга муносабатини ифода этиш учун конкрет воқеани олади, лекин уни изчил тасвирламайди, унинг энг муҳим нуқтасини жонлантириш билан чекланади: кўзлаган мақсади учун шунинг ўзи етарли. Бу жиҳати билан шеър рангтасвир полотносига монанд, унда воқеанинг муайян лаҳзаси қотириб қўйилган. Худди рангтасвир асарини томоша қилаётган киши каби ўқувчи ўша лаҳзагача ва ундан сўнг бўлган ҳолатни тасаввурда жонлантира олади (душманнинг кўққисдан ҳужум қилиши, ота-боланинг бу пайтдаги ҳолати, уларнинг бошқалар билан бирга қўлга олиниши ва х.). Агар булар бари батафсил тасвирланганида, лирик эмас, балки воқеабанд эпик асар яратилган бўлур эди. Шу жиҳатдан В.л. билан шеърлий йўлда ёзилган эпик асарни фарқлаш зарур. Мас., А.Ориповнинг «Шарқ ҳикояси», «Ҳангома» шеърлари В.л. намунаси эмас, балки шеърлий йўлда ёзилган кичик ҳикоятлар, яъни моҳиятан эпик характердаги асарлардир.

**ВУЛЬГАРИЗМ** (лот. vulgaris – кўпол, дарағ) – нафосат талаби билан бадий адабиётда ишлатиш расм бўлмаган кўпол сўз ва



бирикмалар. Персонажлар нутқини индивидуаллаштириш, уларга эмоционал-ҳиссий муносабатни ифодалаш, конкрет эпизоддаги руҳий ҳолатини кўрсатиш каби мақсадларда ишлатилади. Мас., «Ўткан кунлар»да Отабек «Ич муни, ич, жалаби!» дея заҳарланган аталани Зайнабга отади. Ушбу ўринда ишлатилган В. на Отабекнинг табиатига, на нафосат талабларига мувофиқ, лекин персонажнинг айна дамдаги руҳий ҳолатини бўрттириб тасвирлаш мақсадида жуда ўринли ишлатилган. Кўпинча В.лар матнда келтирилмайди, уларнинг ўрни кўп нукта билан тўлдирилади. Бу ҳол, аввало, нафосат талаби билан, иккинчидан, В.ларнинг ўз ичида даражаланиши, улардан айримларининг бадиий матнда қўлланишини ҳеч бир ғоявий-бадиий мақсад оқлай олмаслиги билан изоҳланади. Зеро, ҳаётда учрагани ҳолда, бундай В.лар миллий маънавиятимизга, миллий ахлоқ нормаларига тамомила зиддир. Мас., Тоғай Муроднинг «От кишнаган оқшом» қиссасида шундай эпизод бор:

«– Ўчир-е ...

– Катта, энамни сўкманг. У бечора ичкарида неварасига қараб ўтирибди. Сизга бундайин беповшна гаплар эп бўлмайди.

– Ўчир дейман-е ...

– Эса, мен ҳам сизнинг ...»

Ўтган асрнинг 20 – 30-йилларида оммалашган *инвектива* (қ.) руҳидаги шеърларда В.лардан мухолифларга ўта салбий муносабатни ифодалаш учун ҳам кенг фойдаланилган. Мас., Ф.Фулум шеърдан олинган куйидаги:

Ким у –

Буюк узилиш –

Иркит қўлларда

Қай лагерьда қавм?

Ўртоқ,

Ўйла, кўр,

Мана у душман –

Номард ўлумтик

Кўк кўйлак билан ўз ичимизда, –

парчада ғоявий душманларга муносабатни ифодалаш учун «иркит», «ўлумтик» каби В.лар қўлланган. Бундан ташқари, айрим манбаларда персонажлар нутқидаги услубий жиҳатдан ўта ғализ жумлалар талаффузи бузилган сўзлар ҳам В. саналади.

**ВУЛЬГАР СОЦИОЛОГИЗМ** – XX асрнинг 20 – 30-йиллари шўро адабиётшунослигида кузатилган қарашлар тизими, адабиётга ёндашув тамойили. В.с. марксча «базис-устқурма» ақидасини, адабиёт ва санъат ижтимоий-иқтисодий базиснинг устқурмаси, улар мафқура соҳаси сифатида синфий табиатга эга деган қарашни мутлақлаштириш натижаси ўлароқ юзага келган. В.с. намояндалари фикрича, адабиёт ва санъат мавжуд ижтимоий муносабатларга, бадиий ижод эса ижодкорнинг синфий мансублигига бевосита боғлиқ бўлиб, худди шу нарса адабий асарнинг мазмун-мундарижасини белгилайди. Натижада бадиий адабиёт билан ижтимоий фанларнинг мазмун-мундарижаси, мақсади ва вазибалари орасида ҳеч бир фарқ кўрилмайди, бадиий адабиёт ижтимоий ҳаётнинг бадиий иллюстрациясига айлантириб қўйилади. В.с.нинг назарий асослари В.Фриче, В.Ф.Переверзев, В.А.Келтуяла сингари адабиётшуносларнинг асарларида, шунингдек, пролеткультчилар ҳамда ЛЕФчиларнинг назарий қарашларида ўз аксини топган. Шўро адабиётшунослигида В.с. кескин танқид қилинган, 30-йиллар матбуотида бу масалада мurosасиз баҳслар бўлиб ўтган. Жумладан, Ҳ.Олимжоннинг «Ўқиш ва ўрганиш қийинчиликлари тўғрисида», «Марксизм ниқоби остидаги меньшевизм» номли мақолаларида ҳам В.с., унинг назарийетчиси Переверзев ва унинг издошлари кескин танқид қилинган. Шунга қарамай, шўро адабиётшунослиги ўз фаолиятида В.с. таъсиридан буткул қутулолмади, чунки шўро адабиётшунослигида етакчилик қилган социологик метод билан В.с. чегараси жуда нозик, у томон оғиб кетиш ҳеч гап эмас.

## Г

**ГЕРМЕНЕВТИКА** (юн. *hermeneuo* – тушунтирмақ, талқин қилмоқ) – тушуниш назарияси, матнни талқин қилиш тамойиллари ҳақидаги таълимот, гуманитар фанларнинг методологик асоси. Г.нинг илдизлари қадим Ғарб ва Шарқ маданиятига бориб тақалсада, XIX асрга келибгина алоҳида фан соҳаси сифатида шаклланди. XIX асрга келибгина алоҳида фан соҳаси сифатида шаклланди, немис файласуфлари Ф.Шлейермахер ва В.Дильтейлар фаолияти билан боғлиқ. Таълимотнинг кейинги ривожиди М.Хайдеггер, Г.-Г.Гадамер, П.Рикёр, М.Бахтин сингари олимларнинг хизмати катта бўлди. Г.нинг марказида ТУШУНИШ масаласи туради. Жумладан, Ф.Шлейермахер Г.ни, умуман, ёзма манбаларни «тушуниш санъати ҳақидаги таълимот» деб билади. Унга кўра, ҳар қандай ёзма манба (матн) икки ёқлама табиатга эга: бир томондан, у тил тизимига нисбатан қисм, иккинчи томондан, муайян бир индивиднинг ижод маҳсулидир. Шунинг учун Г. олдида бир-бирига боғлиқ иккита вазифа туради: биринчиси – матндаги лисоний ифодани муайян тил тизимининг узви сифатида ўрганиш («грамматик» талқин), иккинчиси – унинг ортида турган бетакрор субъектни англаш («психологик» талқин). В.Дильтей ўзининг «ҳаёт фалсафаси»да Г.га билиш назариясининг хусусий томони эмас, балки гуманитар фанлар («руҳ ҳақидаги фанлар»)нинг асоси сифатида қаради. Зеро, унга кўра, тушуниш ҳаёт аталмиш бутунликни адекват ифодалашнинг ягона воситаси бўлиб, у туфайли ҳаётни идрок этиш мумкин бўлади. Дильтейнинг таъкидлашича, ҳар қандай индивиднинг ижод маҳсули ҳаётни объективлаштиришдан бошқа нарса эмас; инсон ўзга шахсда ҳам ўзида тушуна олган нарсани тушунади. Шу тариқа ҳаёт (тарихий-руҳоний олам) идрок этувчи (тушунаётган шахс)га нисбатан изоморфдир, монанддир.

Г.нинг фалсафага айланиши М.Хайдеггер номи билан боғлиқ бўлиб, у «тушуниш»ни билиш эмас, мавжудлик усули деб қаради. Унга кўра, тушуниш инсон мавжудлигининг асосий белгиларидан

бири; инсон мавжудлиги аввалбошдан тушуниш тақозо этиладиган ҳолат, шу ҳолатни тушунтириш Г.нинг вазифасидир. Унинг шогирди ва давомчиси Г.-Г.Гадамер учун ҳам «тушуниш» инсон мавжудлиги билан боғлиқ универсал категория; унинг нафақат муайян матнга, умуман, оламга муносабатининг асосида ҳам «тушуниш» ётади. Яъни у матнни талқин қилиш амалиёти ва назарияси бўлмиш Г.га экзистенционал феноменологияни пайвандлайди. Гадамерга кўра, матнни тушуниш жараёни билан ўқувчининг ўз-ўзини тушуниш жараёни бир-бирдан ажратиб бўлмайди, тушуниш кўп жиҳатдан ўқувчига боғлиқ. Бироқ бу матн талқини мутлақо эркин, ўқувчи маънавий-руҳий эҳтиёжларидан келиб чиқиб уни хоҳлаганидек тушуниши мумкин дегани эмас: талқин матнда моддийлашган мазмунни тушуниш демақдир. Шунинг учун Гадамер ўтмишда яратилган матнни «замона»лаштириб тушунишга, унга замона муаммоларини сингдиришга қарши. Унинг таълимотида тил асосий ўрин тутди, чунки тил туфайлигина анъана тирик, тил руҳиятида эса «ҳаракатдаги тарихий онг» воқе бўлади: тушунмоқчи бўлаётганимиз асар, у биздан тарихан қанчалик узоқ бўлмасин, биз билан диалогга киришади, шу асно ўша асар ҳам, биз амалга ошираётган талқин ҳам «анъана ҳодисаси»нинг узвига айланади. Бироқ бу фикрга Г. билан шуғулланувчи мутахассисларнинг бари ҳам қўшилмайди. Жумладан, Гадамердан фарқли ўлароқ, Э.Бетти ўзга шахснинг англанишида талқин қилувчи шахсияти, унинг ижодий фаоллиги ҳал қилувчи аҳамиятга эга деб билади. Умуман, ҳозирги вақтда Г. доирасида турлича йўналишлар, қатор баҳсли масалалар ҳам мавжуд. Француз олими П.Рикёр ҳозирги Г. доирасида иккита бир-бирига зид йўналиш борлигини айтиб, биринчисини *телеологик* Г., иккинчисини эса *археологик* Г. деб атайди. Анъанавий Г.ни телеологик деб атаркан, Рикёр унинг мақсадлилигидан, яъни асосий эътибори матннинг зоҳирий мазмуни ва унда акс этган шахс руҳини англашга қаратилганидан келиб чиқади. Иккинчи йўналиш эса археологик бўлиб, у матн (гап)нинг воқе бўлиш сабабини ва шундан келиб чиққан ҳолда ботиний мазмунини англашга қаратилгандир. Рикёр археологик Г.нинг илдизлари инсоннинг мавжудлик асосини иқтисодий манфаатда кўрган Маркс, ҳокимиятга интилишда деб билган Ницше ва жинсий майллардан излаган Фрейд таълимотларида деб ҳисоблайди. Унинг ўқитишича, инсон шафқатсиз дунёда ўзи-га овунч излайди, уни ўзи яратиб олган оламдан топадики, бу оламнинг ўз МАЪНОларидан иборатдир. Археологик Г. шу иллюзор

оламда воқе бўлган матн ортида турган одамнинг ўзи ҳам англамаган (онгсизлик) ёки атайин яширган маъноларни топиш, «фош этиш», билан шуғулланади. Шу сабабли ҳам Рикёр Гадамернинг лингвоцентрик қарашига қўшилмайди, унинг учун тил анъанаси эмас, балки символлар устувор аҳамият касб этади. Археологик Г.да тушунишнинг энг муҳим хусусияти – диалогикликка путур етади, бунда талқин қилувчи билан матн ортидаги шахс мулоқоти йўқ, матн ортидаги субъект ҳам объектга айланади.

Албатта, адабиётшунослик учун фалсафий Г.дан кўра анъанавий тушунчадаги, яъни матнни талқин қилиш («тушуниш») назарияси сифатидаги Г. муҳимроқ. Шу билан бирга, ноанъанавий Г.ни ҳам тўла инкор қилиб бўлмайди, аксинча, талқинда унинг усуллари қўллаш самарали натижа бериши мумкинлигини эътибордан соқит қилмаслик керак, зеро, улар талқин қилувчи билан матн ортидаги шахс мулоқоти (диалог)нинг янада жонлироқ бўлишига хизмат қилади.

**ГИМН** (юн. *hymnos* – мадҳия) – 1) қадимги юнон адабиётида илоҳларни улуғлаш, мақташ учун куйланган кўшиқ. Юнонлар Аполлонни мадҳ этиш учун *пван*, Дионис мадҳи учун *дифирамб* тўқиб куйлашган. Кейинчалик тарихий воқеалар, қаҳрамонлар мадҳ этилувчи тантанавор кўшиқлар ҳам Г. деб юритилган. Г.нинг илк намуналари Миср, Месопотамия, Ҳиндистон халқлари адабиётида учрайди. Г.га хос хусусиятлар сифатида тантанаворлик, фахр-ифтихор, руҳий кўтаринкиликнинг бўртиб туриши, маросим ва тантаналарда кўпчилик томонидан ижро этилиши кабиларни кўрсатиш мумкин; 2) мазмунан дастурий характердаги шеър асосидаги тантанавор кўшиқ, муайян ижтимоий ҳаракат, уюшма, муассаса, давлат ва ш.к.ларнинг атрибутларидан бири, мадҳияси. Мас., Ўзбекистон Республикаси Давлат мадҳияси, «Интернационал», «Жаҳон демократик ёшлари федерацияси гимни» ва Ҳ.

**ГИПЕРБОЛА** (юн. *hyperbole* – ўта катталаштириш, бўрттириш) – тасвирланаётган нарса ёки ҳодисанинг у ёки бу жиҳатини ўта бўрттириш, катталаштириш асосига қурилган бадий усул, стилистик фигура; кўпроқ халқ оғзаки ижоди, романтизм шеърини, сатирик асарларга хос (қ. *муболага*).

**ГОНГОРИЗМ** – испан шоири Л.де Гонгора-и-Арготе (1561 – 1627) номи билан боғлиқ ҳолда испан ва португал тилларидаги адабиётларда юзага келган барокко доирасидаги оқим (қ. *барокко*).

**ГОТИК РОМАН** – XVIII асрнинг иккинчи ярми – XIX асрнинг биринчи ярмида Европа ва Америка адабиётларида оммалашган тематик жиҳатдан фарқланувчи роман тури. Г.р.лар гайриоддий, дахшат ва сирларга тўлиқ воқеаларни қаламга олиши билан характерланади. Мутахассислар Г.р. маърифатчилик романларига хос рационализмнинг зидди ўлароқ майдонга чиққани, бадий адабиёт тараққиётида романтизмолди ҳодисаси сифатида воқе бўлгани ҳамда Европа ва Америка адабиётларида романтизмнинг қарор топишига сезиларли таъсир қилганини таъкидлайдилар. Г.р.нинг асосчилари ва йирик намояндалари сифатида инглиз адиблари Х.Уолпол, А.Радклиф, М.Льюис, француз адиби Ж.Казотлар эътироф этилади.

**ГРАДАЦИЯ** (лот. *gradatio* – изчил кучаймоқ) – мазмунни изчил кучайтириб боришга асосланган стилистик фигура. Г.нинг икки хил кўриниши мавжуд бўлиб, биринчиси нутқий бирликларни маъносига кўра белги-хусусият (ҳолат, ҳаракат ва б.)ни кучайтириш (*климакс*), иккинчиси эса сусайтириш (*антиклимакс*) тартибида кетма-кет келтириш орқали воқе бўлади. Мас., Иқбол Мирзо шеърдан олинган куйидаги парчада маънонинг кучайтирилган такрори кузатилади:

*Севгилим,  
дилсизлар дилларимизни  
тошбўрон қилсалар,  
вайрон қилсалар,  
тиконлар қопласа йўлларимизни...*

Бунда маъно «тошбўрон – вайрона – тиконзор» тарзида кучайтирилади: тошбўрон вайроналикка олиб келади, тиконзорга айланиш эса вайроналикнинг юқори даражаси. Бу ўринда Г. лирик қаҳрамон кечинмалари динамикасини ифодалайди, туйғуни кучайтириб, кечинмани чуқурлаштириб боради. Аксинча, Э.Шукур куйидаги шеърда худди шу самарага белги-хусусиятни сусайтириб борувчи нутқий бирликларни такрорлаш орқали эришади:

*Жаҳонга сизмасак, уйга сизмасак,  
Қайққа кетармиз, эй дил, қайққа?  
На-да гул бўлолдик, на ўт, на кесак  
Қайққа кетармиз, эй дил, қайққа?*

**ГРАФОМАНИЯ** (юн. *grapho* – ёзмок, *mania* – касаллик, дард) – иқтидори бўлмаган ҳолда ёзишга ружу қўймоқ. Г. ёзувчиликни жўн тушуниш, унга шуҳрат ва бойликка эришишнинг осон йўллари билан бири деб қараш, ўзининг ижодий имкониятларини реал баҳолай олмаслик оқибатида юзага келади. Китоб нашр этиш имкониятлари кенгайган ҳозирги кун шароитида Г. кенг тарқалган ҳодисага айланди. Г. маълум даражада касаллик саналиши («мания») психик касалликка нисбатан ишлатилади мумкин, чунки унга йўлиққан киши ўз битикларини танқидий баҳолашдан ожиз бўлиб қолади, ўзгалар фикрини қабул қилмайди, ўзини тан олинмаган даҳо деб билади, ҳар қандай йўл билан асар ёзиш ва чоп эттиришга интилади.

**ГРОТЕСК** (итал. *grotta* – ер остидаги уй) – бадиий адабиёт ва санъатдаги образлиқнинг фантастика, кулги ва муболагага асосланган бир тури, услуб, бадиий усул. Г.да реаллик ва хаёлот, гўзаллик ва хунуқлик, фожеавийлик ва комиклик каби бир-бирига зид жиҳатлар ғалати, ажабтовур бир тарзда бирикиб кетади. Бадиий шартлиқнинг бошқа турларидан фарқли равишда, Г. ҳамиша намойишкорона ошкоралиги билан ажралиб туради. Г. асосида яратилган бадиий воқелик нечоғлик ғайритабиий, мантиқсиз, ажабтовур бўлмасин, унинг мантиқий асосланиши талаб қилинмайди, зеро, унда реал воқелик эмас, ижодкор тасаввуридаги воқелик акс этади. Г. терминининг пайдо бўлиш тарихи ҳам қизиқ: шогирдлари билан Римдаги қазишмаларда иштирок этган машҳур рассом Рафаэль ер ости биноларида турфа безаклар, одамлар, жонивору ўсимликларнинг ғайритабиий суратлари солинган топилмаларга дуч келади. Шу топилмалардаги ўзига хос тасвир услуби кейинчалик Г. терминига асос бўлди. Г. образлиқнинг жуда кўҳна тури, архаик даврлардаги турли ғайритабиий махлуқлар (сфинкслар, кентаврлар, химералар ва б.) тасвири унинг илк намуналаридир. Бироқ қадим аждодлар учун Г. бадиий шартлиқ (усул, услуб ёки образлиқ тури) бўлмаган, улар бу нарсаларни ҳақиқатда мавжуд деб билишган. Кўпроқ мифология таъсирида Г.дан антик ижодкорлар асарларидаёқ бадиий усул сифатида фойдаланила бошланган, бироқ унинг адабиёт ва санъат арсеналидаги муҳим воситалардан бирига айланиши ўрта асрларга келиб амалга ошди. Энди Г. реалистик унсурлар билан уйғунлашиб, воқелиқни идрок қилиш, унга муносабатни ифодалашнинг беқиёс воситасига айланди. Уйғониш даврига келиб карнавал маданиятига хос Г. адабиётда ҳам ўз аксини топди, худди карнавалдаги каби

Г. кулгиси бир пайтнинг ўзида ҳам инкор, ҳам тасдиқдир. Худди шу жиҳатлари билан Ф.Раблининг «Гаргантюа ва Пантагрюэль» асари «гротеск реализми»нинг мумтоз намунаси бўлиб қолди. Г. имкониятларидан Ж.Свифт, В.Гюго, Гофман, Н.В.Гоголь, Салтиков-Шчедрин, М.Булгаков, Ф.Кафка сингари йирик сўз санъаткорлари унумли фойдаланганлар. Ўзбек адабиётидаги Г.нинг яхши намуналарини О.Мухтор («Минг бир қиёфа»), Х.Дўстмухаммад («Бозор») асарларида кўриш мумкин.

# Д

**ДАДАИЗМ** (фр. dada – ёғочдан ишланган ўйинчоқ от, кўчма маънода болаларга хос бетартиб нутқ) – Биринчи жаҳон уруши даври Европа адабиёти ва санъатидаги авангардистик оқим; Биринчи жаҳон урушида қатнашаётган юртлардан бегараф Швейцарияга келиб муҳожирликда яшаётган анархистик кайфиятдаги ижодий зиёлилар муҳитида шаклланган, Цюрихда чоп этилган «Кабаре Вольтер» (1916 – 1917) журнали теварагида уюшган. Д. моҳият эътибори билан урушга, жаҳон урушини келтириб чиқарган муҳитга қарши исён эди. Уларнинг исёни мавжуд тартиботларни инкор қилиш, уларни маънисиз (абсурд) деб ҳисоблашда, анархизмни бундай шароитда энг мақбул мавқе деб билишда намён бўлади. Шулардан келиб чиқиб Д.нинг санъат ва адабиётдаги исёнкорлик мавқеи белгиланган: улар бадий ижодда иррационализм тарафдори бўлганлар, адабий-бадий аъъаналарга нисбатан нигилистик антиэстетизм мавқеини эгаллаганлар. Уларнинг ижод амалиётидаги исёни адабиётда сўз ва товушларни маъносиз бириктириш, тасвирий санъатда нарса-ларни ўзаро мазмуний-мантқиқий алоқасиз, тасодифий тарзда жамлаб тасвирлаш қабиларда намён бўлади. Д. вакиллари адабиёт ва санъатнинг ижтимоий функцияларини инкор қилганлар, чинакам санъат ижтимоийликдан холи бўлади деб ҳисоблаганлар. Адабий-бадий оқим сифатида Д. узоқ яшамади: ўтган асрнинг 20-йиллари бошидаёқ барҳам топди, унинг қаторида бўлган ижодкорларнинг бир қисми сюрреалистлар, бошқа бир қисми эса экспрессионистлар сифини тўлдирди.

**ДЕВОН** (ар. دَوْن – ёзиш, рўйхатга олиш, тўплам) – Шарқ мумтоз адабиётидаги шеърий тўпламларнинг асосий тури. Д.га шоирларнинг ўзлари ёки бошқа шахслар (қотиблар, шогирдлар, мухлислар ва ш.к.) томонидан тартиб берилган. Шарқ адабиётда Д. тартиб берилган аъъанаси шаклланган бўлиб, бу аъъананага қатъий амал қилинган. Д.га киритилган шеърлар, бир томондан, жанрига кўра, иккинчи

томондан, алифбо (бу талаб, асосан, ғазалларни жойлаштиришга кўйилади) тартибига кўра жойлаштирилади. Д.лар, кўпинча, ғазал жанри билан, баъзан эса қасида билан бошланади. Навоийнинг «Ҳазойин ул-маоний» куллиёти таркибига кирувчи «Ғаройиб ус-сиғар» Д.га ғазал, мустазод, мухаммас, мусаддас, таржиъбанд, маснавий, қитъа, рубоий тарзида тартиб берилган бўлса, «Бадояъ ул-васат» Д.и ғазал, мустазод, мухаммас, мусаддас, таржиъбанд, қасида, қитъа, чистой, туюқ тарзида тартибланган. Кўриниб турганидек, шеърий мажмуанинг Д. саналиши учун унинг таркибига мумтоз лирикага хос барча жанрлардаги шеърларнинг кириши шарт эмас, адабиётимизда фақат ғазаллардан тартибланган Д.лар ҳам мавжуд (Навоий. «Наводир ун-нихоя»; Атойи Д.и.). Ғазаллар Д.дан қофияланувчи мисраларининг қайси ҳарф билан тугаётганига қараб ўрин эгаллайди.

**ДЕКАДЕНТЛИК** (лот. decadentia – таназзул, тушкунлик) – XIX аср охири – XX аср бошлари Европа халқлари бадий ва ижтимоий тафаккурида кузатилган тушкунлик (таназзул) ҳолатларини умумлаштириб ифодаловчи термин. Яъни Д. алоҳида бир адабий йўналиш ёки оқимга хос бўлмай, умуман, шу даврда ижод қилган санъаткорларга, ҳатто улкан иқтидор эгаси бўлган айрим реалистларга ҳам у ёки бу даражада хос бўлган кайфият, рўҳни англатади. Д. кайфияти эртанги кунга, инсоният келажагига умидсиз қараш, инсон ақл-заковати, куч-қудрати, унинг олий хилқат сифатидаги мавжудлигига ишончсизлик, мавжуд воқеликни қабул қилолмаслик қабиларда намён бўлади. Мазкур кайфиятнинг кенг тарқалиши унинг объектив тарзда, жамият ҳаётининг барча жабҳаларида кузатилган инқироз натижаси ўлароқ юзага келганидан далолат беради. Д. кайфияти илк бор француз символистлари (П.Верлен, А.Рембо, С.Малларме) ижодида, кейинроқ рус символистлари (Д.Мережковский, З.Гиппиус, Ф.Сологуб) фаолиятида, шунингдек, XX аср бошида оммалашган неонатуралистик проза (Л.Андреев, М.Арцибашев)да кенг кузатилади. Дунёқараш билан узвий боғлиқлиги ва бевосита ижодкорнинг воқеликка муносабати натижаси ўлароқ юзага келиши эътиборга олинса, Д. кайфиятининг кейинги давр модернистик адабиёт вакиллари ижодида тез-тез кўриниш бериб туриши ҳам табиий ва қонуний экани англашилади. Шу билан бирга, модомики, ижодкор дунё билан фаол муносабатда яшар экан, ҳаёти ва фаолиятининг муайян босқичида унинг онгию қалбида шундай кайфият устуворлик қилиб қолиши мумкинлигини ҳам инкор этиб бўлмайди.

**ДЕТАЛЬ** (фр. detail – тафсилот, майда-чуйда) – бадиий деталь; бадиий асарда муайян мазмун ифодаловчи, гоёвий-бадиий юк ташувчи тафсилот. Аввало, Д. бадиий воқеликни яратиш воситаси – ашёси бўлиб, у тасвирланаётган нарса-ҳодисани конкретлаштиради, уни ҳиссий идрок қилиш мумкин бўлган тарзда гавадантиради. Бошқача айтсак, Д. асарда тасвирланган образнинг кичик бир қисми (яъни у ҳамиша предметлиликни кўзда тутаяди), деталларнинг бирикуви натижасида ўша образ кўз олдимизда бутун ҳолда намоён бўлади. Бадиий Д. ортида маълум бир реалия мавжуд: маиший турмуш ёки жой тафсилотлари, портрет чизгилари ва ш.к. Шунингдек, персонажнинг имо-ишоралари (жест), тана ҳолати (поза), хатти-ҳаракати, гап-сўзлари ҳам Д. саналади, улар бари бирликда конкрет инсон образини гавадантиради. Яъни бадиий Д., аввало, бадиий воқеликни тўлақонли ва конкрет ҳис этиладиган даражада жонли тасвирлашга хизмат қилади. Бироқ бадиий асардаги Д.нинг функцияси шунинг ўзи билан чекланмайди. У бадиий воқелик ашёси бўлиши билан бирга бадиий умумлаштиришга интилади, ёзувчи фикрини аниқлаштириш, тўлдириш, кучайтириш мақсадларига ҳам хизмат қилади. Мас., А.Қаҳҳорнинг «Анор» ҳикояси куйидагича бошланади: «Туробжон эшиқдан ҳовлиқиб кирар экан, қалами яктагининг энги зулфинга илиниб тирсақкача йиртилди. Унинг шашти қайтди. Жўхори туяётган хотини унинг кўлидаги тугунчани кўриб келисопни келининг устига қўя чопди. Кели лапанглаб ағанади, чала туйилган жўхори ерга тўкилди». Ушбу парчанинг ўзида ҳаракат («ҳовлиқиб кирмоқ», «келисопни келининг устига қўя чопди»), портрет («қалами яктаю»), пейзаж («зулфин»), маиший турмуш («кели», «жўхори», «тугунча») Д.лари бўлиб, улар бирликда шу конкрет ҳаётий ҳолатни ўқувчи кўз олдида жонлантиради. Яъни бу уларнинг бирламчи функцияси. Бундан ташқари, мас., «зулфин» Д.и умумлаштириш функциясини бажаради: одам кирганида, энги зулфинга илиниб йиртилиши учун, эшик кичкина бўлиши керак, демак, ҳовли ҳам шу эшикка яраша. Кўринадики, биргина «зулфин» Д.и оиланинг яшаш шароити ҳақидаги информацияни умумлаштириб беради. Парчадаги иккинчи Д. – «тугунча» иккала персонажни бирдек ҳаяжонлантиради: «тугунчанинг олиб келигани» Туробжон учун ҳам, хотини учун ҳам ўта аҳамиятли (психологик функция), мазкур ҳол ўқувчи диққатини унга йўналтиради, ҳолатга беписанд қарамаслик кераклигига ишонтиради (рецептив установка бериш функцияси). Парчада бошқа Д.ларнинг ҳам шунга ўхшаш функциялари бор, бундан ташқари,

уларнинг функцияси шу парча доираси билан чекланмайди. Демак, бадиий Д. асар матнида полифункционал табиатга эга бўлади.

**ДЕТЕКТИВ АДАБИЁТ** (ингл. detective – изкувар) – саргузашт адабиётнинг бир тармоғи, сюжети асосида сирли жиноятларни очиш билан боғлиқ воқеалар ётувчи асарларнинг умумий номи. Д.а. турли жанрларга мансуб асарларни – ҳикоя, қисса, романларни ўз ичига оладики, бу унинг тематик жиҳатдан ажратилишини кўрсатади. Шу боис адабиётшуносликка оид айрим ишларда, муомала амалиётида мавзу жиҳатидан Д.а. га яқин бўлган ҳарбий разведка, турли махфий хизматлар фаолияти ҳақидаги, шунингдек, бошқа кўплаб ўткир сюжетли, лекин бевосита жиноят қидирув билан боғлиқ бўлмаган асарлар ҳам Д.а.га мансуб саналади. Д.а.нинг классик намуналари XIX аср Европа адабиётида яратилган бўлиб, асосчиси сифатида француз адиби Эдгар По эътироф этилади. Унинг «Морг кўчасидаги қотиллик» (1841) номли асарида илк бор ҳайратомуз мантиқий таҳлил қобилиятига эга изкувар образи яратилган, асар сюжети тўлалигича жиноятни очиш билан боғлиқ воқеалар силсиласидан иборат. Д.а. тараққиётида А.Конан Дойл, Г.Честертон, Ж.Сименон, А.Кристи, Ю.Семенов каби ижодкорларнинг катта хизматлари бор. Қизиқарли авантюрага бой сюжет, ўқишлилик Д.а.нинг кенг оммалашиб боришига асос бўлди. XX асрга келиб оммавий ахборот воситалари имкониятларининг кенгайиши, кино ва телевидениенинг ривожланиши билан боғлиқ ҳолда Д.а.га талаб янада кучайди. Энди кенг омма талабига мос Д.а. намуналари – Жеймс Бонд типидagi жосуслар, Фантомас типидagi ақлли жиноятчилар, мафия ичида ҳуфия иш юритаётган ёки жиноят оламига қарши яқка курашаётган полициячию махфий хизмат ходимлари ва ш.к.лар ҳақидаги олди-қочдиларга тўла асарлар кўпайди.

**ДИАЛЕКТИЗМ** (юн. dialektos – шева, лаҳжа) – маълум бир ҳудудда яшовчи кишилар тилига хос лексик бирликлар, фонетик, морфологик, синтактик хусусиятлар жами. Д.лар адабий асарларда тасвирланаётган жой колоритини беришда, маълум ҳудуд кишиларига хос турмуш тарзини тафсилли жонлантириш, персонажларнинг индивидуаллаштиришда муҳим аҳамият касб этади. Шу боис Д.лар қўлланиши жиҳатидан анча фаол. Мас., Т.Мурод асарларида Сурхондарё воҳаси кишиларига хос шева элементлари кўплаб учрайдики, улар воҳа кишилари ҳаёти, ўзига хос феъл-атвори, руҳиятининг ҳаққоний ва тўлақонли тасвирланишига замин яратган. Хусусан, «От кишнаган оқшом» қиссасидан олинган куйидаги парча-

ларда тилнинг турли сатҳларидаги Д.ларни кўриш мумкин: «Кўплари мени етиб келди, улоққа узалди»; «Шунда Тарлон бирдан ... сойга қараб зинкийди»; «Тарлон бир-бир босиб оёк илди»; «Мен араб урицини яхши кўраман»; «Шунда узанги йўлдошларимга юз солдим»; «Губалакда бингак нишидай захар ниш бўлади»; «Ажабо, бундайчикин қилиги йўқ эди» «хамсоямиз Қулмат полвон бозорлаб келди», «Кимнинг ули бўласан?» ва бошқ. Тил ўзида халқ руҳини мужассамлаши Т.Муроднинг полвонлар, улоқчилар ҳаётдан ҳикоя қилувчи қиссаларида, айниқса, яққол намоён бўлади. Персонажларнинг ўзига хос нутқи воҳа кишиларига хос турмуш тарзи, урф-одат, инонч-этиқодларни жонли тасвирлашга хизмат қилади. Мас., «От кишнаган оқшом» қиссасида шундай эпизод бор:

«– Чақалоқли уйга бемаҳалда келиб бўлмайди. Мабодо биров билмасдан келиб қолса, ундан улгу олиб қолиш лозим бўлади.

– Қаердан оласан?

– Бизга барибир. Ўнгиригизнинг учидан майдагина бир ип бўлса-да майли. Аёллар чақалоқли уйда ипни исирикқа кўшиб тутатдилар».

Д.лар, одатда, кўпроқ персонажлар нутқига киритилади. Уларнинг қўлланиши адабий тилни бойитувчи омиллардан саналади, шунга қарамай, бунда муайян меъёрни сақлаш талаб қилинади.

**ДИАЛОГ** (юн. dialogos – гаплашиш, суҳбат) – 1) икки ёки ундан ортиқ кишининг нутқий мулоқоти, суҳбат; 2) адабий-бадиий матн компоненти, асардаги персонажларнинг нутқий мулоқоти берилган ўринлар. Ҳозирги замон прозаси *ривоя*, *тавсиф* ва *диалогдан* таркиб топади; замонавий эпик асарларда диалог салмоғининг ортиши кузатиладики, бунга турлараро синтезлашув, бадиий адабиётнинг бошқа санъатлар билан ўзаро алоқаси натижаси сифатида қараш мумкин; 3) фалсафий-публицистик мазмун йўналишидаги жанр, унда кўйилган масала бир неча кишининг суҳбати шаклида муҳокама этилади. Д. жанрига антик даврнинг Суқрот, Афлотун сингари мутафаккирлари асос солганлар. Кейинчалик ўрта асрлар, Уйғониш даври ва Европа маърифатчилик адабиётида ҳам Д. жанри анча фаол бўлган. Ўзбек адабиётида Д.нинг илдизлари *мунозара* жанрига бориб тақалади. XX аср бошлари ўзбек адабиётида Д. жанри, унга хос унсурлардан маърифатчилик гояларини оммалаштиришда самарали фойдаланилди. Жумладан, Фитратнинг «Мунозара», «Бедил» асарларини Д. жанри намунаси санаш мумкин.

**ДИДАКТИК АДАБИЁТ** (юн. didaktikos – ўргатувчи, таълимий) – муайян таълимий, тарбиявий мақсадларда яратилган адабий асарларнинг умумий номи. Адабиётнинг таълимий-тарбиявий имкониятлари жуда катта бўлиб, унга қадимдаёқ эътибор қаратилган. Жумладан, антик давр юнон файласуфи Афлотун «Давлат» номли асаридан бу имкониятлардан қандай фойдаланиш масаласини атрофлича муҳокама қилади. Д.а. намуналари мавзу эътибори билан турлича, улар нимани ўргатишни мақсад қилгани жиҳатидан бир-бирдан фарқланади. Мас., Д.а.нинг бир қисми *илмий шеърият* деб ҳам юритилади ва маълум бир илм соҳасини оммалаштириш мақсадини кўзлайди: зироатчилик (Гесиод. «Меҳнат ва кунлар»), дунёнинг тузилиши (Лукреций Кар. «Нарсалар табиати ҳақида»), тиббиёт (Ибн Сино. «Тиб илми»), поэзия санъати (Н.Буало. «Шеър санъати») ва б. Шарқда ҳам адабиётнинг дидактик имкониятларидан кенг фойдаланилган. Шарқ мумтоз адабиётидаги Д.а.нинг яхши намуналари сифатида Саъдийнинг «Гулистон» ва «Бўстон», Кайковуснинг «Қобуснома», Юсуф Хос Ҳожибнинг «Қутадғу билиг», Аҳмад Югнакийнинг «Ҳибат ул-ҳақойиқ», Алишер Навоийнинг «Ҳайрат ул-аброр», Бобурнинг «Мубаййин» каби *ланднома* руҳидаги асарларини кўрсатиш мумкин. Мазкур асарлар мазмун-мундарижаси жиҳатидан универсал бўлиб, турли даражадаги ижтимоий муносабатлар, инсоннинг бурчи ва вазифалари, дунё ва охира, эътиқод, одоб-ахлоқ, илмнинг аҳамияти каби ҳаётда зарур турфа масалалардан баҳс юритади. Шунингдек, Шарқда диний маърифатни тарғиб этувчи асарлар ҳам Д.а.нинг муҳим бир тармоғини ташкил этади: «Девони хикмат» (А.Яссавий), «Сирож ул-муслимин» (А.Навоий), «Сабот ул-ожизин» (Сўфи Оллоёр) каби кўплаб асарлар диний-дидактик адабиёт намуналаридир. XX аср бошларига келиб жаҳид маърифатчилик ҳаракати билан боғлиқ ҳолда ўзбек адабиётида дидактиклик тамойили яна устуворлик касб этади. Янги усул мактабларини услубий таъминлаш мақсадида яратилган А.Авлонийнинг «Туркий Гулистон ёхуд ахлоқ», Ҳамзанинг «Енгил адабиёт» каби асарлари том маънодаги Д.а. намуналари бўлса, жаҳид маърифатчиларининг деярли барча асарларида *дидактиклик*, *гоявий-маърифий дидактика* етакчи хусусият бўлиб қолди. Адабиёт тараққиётининг кейинги босқичларида соф дидактик характердаги асарлар камайиб, асосан, болалар адабиёти доирасида кузатилади, энди *ошкор дидактиклик* камчилик сифатида тушунилади, сўз санъати ўзининг *дидактик функциясини* сездирмасдан, баркамол бадиий образлар воситасида амалга ошириш йўлини тутати.

**ДИЛОГИЯ** (юн. di – қўшма сўзларда «икки», logos – сўз, ҳикоя, ривоят) – композицион жиҳатдан нисбий мустақилликка эга икки асардан ташкил топган асар. **Д.** таркибидаги икки асарни ижодий ниятнинг яхлитлиги, бир-бирини давом эттирувчи умумий сюжет чизиқлари, умумий персонажларга эгалик бир бутунга айлантиради. Шунинг учун, мас., Чўлпоннинг «Кеча ва кундуз» романи **Д.** сифатида режалаштирилган бўлиб, муаллиф ижодий нияти **Д.** бутунлигида амалга ошиши лозим эди. **Д.**нинг «Кундуз» номли иккинчи қисми йўқолгани сабабли, унинг биринчи қисми – «Кеча» тугалланмаган асар деган таассурот қолдиради. Ёзувчи М.Исмоилийнинг «Фаргона тонг отгунча» романини **Д.**га мисол сифатида кўрсатиш мумкин.

**ДОСТОН** – 1) туркий халқлар оғзаки ижодидаги эпик жанр. Халқ оғзаки ижодидаги **Д.**лар воқеабанд сюжет асосига қурилган йирик ҳажмли асарлар бўлиб, улар бахши (оқин, жиров, манасчи)лар томонидан мусиқа (дўмбира, кўбиз ва б.) жўрлигида ижро қилинган, оғиздан-оғизга ўтиб бизгача етиб келган. Бу жараёнда ҳар бир ижрочи ўзидан нимадир қўшган, ниманидир тушириб қолдирган ва шу тариқа **Д.**лар сайқалланиб борган. Халқ ижодидаги **Д.**нинг матний қурилиши ижрога мос – унда насрий ва шеърий парчалар алмаши-ниб туради: ривоя, асосан, насрда амалга оширилса, қахрамонлар орасидаги энг муҳим диалоглар, уларнинг руҳий ҳолатлари, таъриф-фу тавсифлар, ижрочи муносабати ва ш.к. кўпроқ шеърий йўлда берилади; 2) мумтоз адабиётимиздаги йирик ҳажмли, одатда, мас-навий шаклида ва арузнинг маълум бир вазнида ёзилувчи шеърий асар. Мумтоз адабиётимиздаги **Д.**ларнинг аксариятини яхлит воқеа асосидаги сюжетга қурилган (мас., «Фарҳод ва Ширин», «Лайли ва Мажнун») эпик асарлар ташкил қилади. Шу билан бирга, сюжет-ти изчил ва яхлит бўлмаган (мас., «Ҳайрат ул-аброр») ёки умуман воқеабанд сюжетсиз (мас., «Ҳибат ул-ҳақойиқ») **Д.**лар ҳам мавжуд-ки, улар турли ижтимоий-маънавий, ахлоқий-таълимий масалалардан баҳс юритувчи лиро-эпик характердаги фалсафий-таълимий ёки дидактик асарлардир; 3) замонавий адабиётда кенг тарқалган йирик ҳажмли шеърий асар, унга синоним тарзида поэма атамаси ҳам қўлланади. Ҳозирги адабиётда **Д.**лар битта умумий ном билан аталса-да, жанр хусусиятларига кўра улар турличадир. Шунинг учун амалиётда лирик достон, эпик достон, драматик достон каби аниқлаштирувчи атамалар қўлланади. Муайян **Д.**ни булардан бирига мансублигини белгилашда уша достон структурасида лирик, эпик ёки драматик элементлардан қай бирининг етакчи мақомга эгали-

гидан келиб чиқилади. Мас., шеърий ривоя – воқеани ҳикоя қилиш устувор «Ўч» (Ойбек), «Ойгул билан Бахтиёр» (Ҳ.Олимжон) каби асарлар эпик достон, воқеа лирик кечинмани ифодалаш воситаси бўлган «Сурат» (Миртемир), «Рух билан суҳбат» (С.Зуннунова), «Нидо» (Э.Воҳидов) каби асарлар лирик достон, воқеа драматик кўринишларда кўрсатиловчи «Маҳмуд Торобий» (Ойбек), «Жаннатга йўл» (А.Орипов) каби асарлар эса драматик достон тарзида фарқланади. Адабиётшунослиқда **Д.** (поэма)ларнинг ҳаммасини бирдек лиро-эпик жанр ҳисоблаш ҳоллари ҳам борки, юқоридагилардан келиб чиқилса, бу унчалик тўғри эмас. **Д.**ни лиро-эпик жанр деб атаркан, унинг «баён қилинаётган эпик воқеани лирик қахрамон муносабати орқали ифодалаш» хусусияти асос қилиб олинади. Ҳолбуки, биринчидан, **Д.**ларнинг ҳаммасида ҳам «воқеа лирик қахрамон муносабати орқали» берилмайди, иккинчидан, ҳар қандай асарда, у хоҳ эпик, хоҳ драматик асар бўлсин, тасвирланаётган воқеага муаллиф муносабати у ёки бу тарзда мавжуд. Шундай экан, лиро-эпик жанрга барча **Д.**ларни эмас, структурасида эпик ва драматик унсурлар маъқеи бир хил мақом тутган **Д.**ларнигина (мас., «Рухлар исёни») киритган тўғрироқ бўлади.

**ДОХИЛ** (ар. داخل – кирувчи, кирган) – қаранг: муқайяд қофия

**ДРАМА** (юн. drama – ҳаракат) – 1) бадиий адабиётнинг учта асосий туридан бири. **Д.**нинг тасвир предмети – ҳаракат, у, Арасту таърифича, «барча тасвирланаётган шахсларни ҳаракат қилаётган, фаолиятдаги кишилар сифатида тақдим этади». **Д.** объектнинг пластик образини яратади, унда субъект – ижодкор шахси ҳам объектга синдириб юборилади. **Д.** адабиётга ҳам, театр санъатига ҳам бирдек тааллуқли: уни ўқиб ҳам қабул қилиш мумкин, айна чоғда, у театр асари – спектаклнинг асоси. Бошданоқ саҳнага мўлжаллаб ёзилиши драматик асарнинг қурилиши, поэтик ўзига хослигини белгиловчи энг муҳим омилдир. Чунки у саҳна ижросини ҳам кўзда тутиши зарур. Бу нарса **Д.**нинг ташқи қурилишидаёқ кўринади (парда ва кўринишларга бўлинганлик, ремаркаларнинг ижрони кўзда тутган ҳолда берилиши). Ижрога мўлжалланганлик **Д.**нинг ички структурасини ҳам белгилайди. Жумладан, **Д.**даги ҳаракат – сюжет воқеалари макон ва замонда чекланган, ижро вақтига сиғиш учун сюжетнинг кескин конфликт асосида шиддат билан ривожланиши тақозо этилади. **Д.**да концентрик сюжет типи етакчилик қилади, сюжет воқеалари сабаб-натижа муносабатлари асосида бир марказга уюштирилади. Сабаб-натижа муносабати воқеаларнинг юз бериш жойи ва вақти жиҳатидан яқин



бўлишини талаб қилади. Яъни драматург асарни яратаётганидаёки сюжет воқеаларининг ижро вақтига сизиши ҳақида қайгуриши, сюжет воқеаларини кескин конфликтлар асосида шиддат билан ривожлантириши заруратта айланади. Д.да сюжет воқеалари юз берадиган макон ҳам чекланган: биринчидан, воқеалар кечадиган жойни саҳнада шартли қайта яратиш (жой иллюзиясини ҳосил қила оладиган декорациялар ёрдамида) мумкин бўлиши лозим; иккинчидан, воқеалар маконий ўзгаришлар жиҳатидан ҳам чекланган, яъни улар кўпи билан тўрт-беш жойдагина кечиши мумкин. Бир парда давомида содир бўлувчи воқеаларнинг битта жойда кечиши, сюжет воқеалари шу жой билан боғлиқ ривожланиши эътиборга олинса, Д.нинг сюжет қурилишига ижро имкониятлари кучли таъсир қилиши аён бўлади.

Драматург асарда жонлантормоқчи бўлган ҳаёт материалининг айрим унсурларини саҳнада қайта яратиш имкони йўқлигидан, Д.нинг «шартлилиқ» даражаси жуда юқори бўлади. Чунки муаллиф ишоралар ёрдамида уларни ҳам томошабин (ўқувчи) тасаввурда уйғотиши, саҳнада бевосита жонлантирилиши мумкин бўлган воқеаларни тўлдириши зарур бўлади. Мас., муаллиф ремаркаларида «саҳна ортида отлар дупури, қиличлар жаранги», «саҳна ортидан кескин тўхтаган машина овози эшитилади» қабилдаги ишоралар берилади, уларнинг ёрдамида саҳнада жонланмаган нарса шартли (яъни ўқувчи тасаввурдагина) жонлантирилади. Д.да сюжетга киритиш имкони бўлмаган воқеа ёки тафсилотларнинг персонажлар тилидан мухтасар берилиши ҳам шартлилиқнинг бир кўриниши бўлиб, у персонаж нутқиға таъсир қилади. Чунки бу воқеа ва тафсилотлар персонажларга маълум (жонли мулоқотда уларни эслатиш шарт эмас), бироқ улар ўқувчи (томошабин)да тасаввур ҳосил қилиш учун зарур ва шу зарурат туфайли суҳбат табиийлиқдан чиқиб, шартлилиқ касб этади. Яъни тафсилотларни шу йўсин (персонажлар тилидан) бериш мажбурияти драматик асар персонажлари нутқининг бироз «сунъий», «саҳнавий» бўлишига олиб келади. Д.нинг асосий нутқ шакли – диалог. Унда қўлланувчи монологик нутқ ҳам шартлилиқ кўринишидир. Монологик нутқ шаклида персонажларнинг мушоҳадалари берилдики, овоз чиқариб ўйлаш ҳам шартлилиқнинг бир кўринишидир. Айни пайтда, Д.даги монологик нутқ қурилиши ўзига хос: у кўпроқ персонажнинг ўзи билан ўзи ёки ҳаёлидаги ким биландир суҳбати, баҳси, кимгадир мурожаати тарзида қурилади. Яъни битта персонаж тилидан айтилгани ҳолда ҳам драмадаги монологик нутқ диалогик асосга эгадир.

Драматик асарнинг ўқилиши ва саҳна талқинида бир қатор ўзига хосликлар мавжуд. Д.ни ўқиётган ўқувчининг ижодий фаоллиги билан шу асар асосидаги спектаклни томоша қилаётган томошабиннинг ижодий фаоллиги бир хил эмас. Ўқувчи ўқиш жараёнида «режиссёр» вазифасини зиммасига олади, драмани тасаввурдаги саҳнада жонлантиради; айни пайтда, у «актёр» сифатида ҳар бир персонаж ролини ўйнаши ҳам керак. Д.да объектив ибтидонинг устуворлиги унинг турли ўқувчилар тасаввурда турлича «саҳналаштирилиши»га асос бўлади. Саҳналаштирилган драматик асарда бадиний мулоқот занжири узаяди: томошабин ва драматург орасида режиссёр (актёрлар, рассом, бастакор ва ҳ.) ўрин олади. Бошқача айтсак, саҳналаштирилган драматик асар сўз санъати доирасидан чиқиб синтетиклик касб этади, сабабки, энди унда театр, рассомлик, мусиқа санъатлари уйғунлашиб кетади. Аён бўладики, драма бошқа санъат турлари билан ўзаро алоқада яшайди ва ривожланади. Зеро, драманинг табиати, яъни ижро учун мўлжаллангани унинг шу санъат турлари билан узвий алоқада бўлишини тақозо этади.

Д.нинг асосий жанрлари сифатида *трагедия*, *комедия* ва *драма* (жанр маъносида) кўрсатилади. Драматик асарларни жанрларга ажратишда уларнинг асосий эстетик белгиларига таянилади. Трагедиянинг асосий эстетик белгиси трагиклик, комедиянинг асосий эстетик белгиси комиклик, драманинг асосий эстетик белгиси эса драматиклик саналади. Бундан ташқари, кичик драматургик жанрлар, шунингдек, турли жанр модификациялари ҳам мавжуд. Жумладан, жанр модификацияси сифатида *мусиқали драма*, *мусиқали комедия*лар кўрсатилиши мумкин. Мусиқа жўрлигида ижро этишга мўлжаллангани, диалог ва монологлар ўрнини қисман вокал (ария ва дуэтлар) эгаллаши уларнинг ўзига хослигини, синтетик санъат намунаси эканлигини кўрсатади. Айрим санъат турларининг, оммавий ахборот воситаларининг ривожланиши натижасида драматургиянинг янги жанрлари пайдо бўлди, борлари фаоллашди. Мас., эстрада санъатининг ривож натижасида, *монолог* (бир актёр театри) жанри дунёга келди, кўғирчоқ театрлари ривож ва модернизацияси унинг учун ёзилдиган пьесаларни фаоллаштирди, телевидениенинг ривож *миниатюраларни*, турли маданий-маърифий тадбирларнинг оммалашуви эса *интермедия* жанрини фаоллаштирди; 2) драматик турнинг учта асосий жанридан бири, тарихий тараққиёт жараёнида драматик турнинг қадимда пайдо бўлган трагедия ва комедия жанрларига бир-бирининг зидди деб қаралган

бўлса, Д. уларнинг синтези сифатида XVIII асрга келиб майдонга чиққан. Синтезлашув, айниқса, Д.нинг мустақил жанр сифатидаги илк шаклланиш даврида яққол кўринади. Жумладан, комедия сингари Д. ҳам одамларнинг шахсий ҳаётини тасвирлайди, бироқ ундан фарқли равишда камчилигу нуқсонлардан кулишни эмас, балки жамият билан мураккаб муносабатлардаги шахсни тасвирлашни мақсад қилади. Трагедиядаги каби ўткир зиддият ва тўқнашувлар қаламга олингани ҳолда, Д.даги конфликт муайян ечимга эга, у ёки бу даражада ижобий ҳал қилиниши мумкин бўлган конфликтдир. Трагедия қаҳрамонлари фавқулудда кучли шахслар (бунга зид равишда комедияда тубан табақа кишилари) бўлиши талаб этилса, Д. қаҳрамонига бу хил талаблар қўйилмайди – унинг қаҳрамони ҳаётини роқ. Реализм босқичига яқинлашган сари драматургияда трагедия ўрнини, етакчилик мавқеини Д. эгаллай бошлайди. Чунки Д. реалликдан олинувчи турли мавзуларни, характер ва зиддиятларни бадиий талқин қилишга кенг имкониятлар очиши, худди ҳаётнинг ўзидаги каби трагизм ва комизм элементларини уйғунлаштири олиши, реал ҳаётга яқинлиги билан драматик жанрлар орасида алоҳида ўрин тутадиги, унинг реалистик адабиётда етакчи мавқе эгаллаши шу билан изоҳланади.

**ДРАМАТИЗМ** – бадиийлик модуси. Драматиклик модус сифатида идиллия, элегия билан бир гуруҳни ташкил этади (қ. *бадиийлик модуслари*). Драматик «мен» ўзлигини бошқа бир «мен» билан ўзаро муносабатдагина англайди ва намоён этади. Унинг учун дунё олам тартиботи эмас, балки ўзганинг (ёки ўзгаларнинг – жамиятнинг) ҳаёти сифатида идрок этилади. Драматик шахс ўзга билан муносабатда ўзлигини намоён этиш имкониятларининг чегараланганлигидан қийналади. Мас., «Ўткан кунлар»даги Отабек трагик қаҳрамон сингари олам тартиботига қарши тураётгани йўқ, балки ўзгалар нуқтаи назарига (маиший ҳаёт доирасида эскича урф-одатларга, ижтимоий доирада эскича идора тизимига) қарши туради. Трагизмда олам тартиботи қадриятлар, анъаналар кўринишида қаҳрамон онгида унинг шахсий майл ва истаклари, интилишлари билан зиддиятни юзага келтиради. Драматик қаҳрамон эса ўзига қарши турган кучларнинг қадриятларини ўзганинг қадрияти сифатида англайди ва уларни қабул қилолмайди (мас., «Ўткан кунлар»да Отабек, «Даҳшат»да Унсин). Шунга кўра, драматик конфликт трагик конфликт каби келиштириб бўлмас зиддият эмас, ундан ҳал этиш имкониятларининг мавжудлиги билан фарқланади. Драматизмда

айб ва хато трагизмдаги каби ўнглаб бўлмас фожеа, жиноят сифатида тушунилмайди. Драматизмда хато ва айблар, қаҳрамон бошдан кечирган можаролар сабоқ чиқариш учун ҳам зарур. Шунинг учун драматизмда муаллиф қаҳрамонни кўпинча янги йўл бошида қолдиради (мас., «Диёнат»да Отақўзи Умаровнинг Нормурод домла қабри тепасидаги ўйлари, «Даҳшат»да Нодирмоҳобегимнинг додхо хонадонидан бош олиб кетиши). Демак, драматик конфликт характерига кўра шахснинг ўзлигини намоён этишини чегаралаётган ташқи кучлар билан зиддиятидир. Драматик қаҳрамон ҳаётда ўзига белгиланган ролнинг ижро чегараларига сиймайди, драматизмнинг юзага келиши учун элегиявий узлатнишинликни енгиш талаб этилади. Яъни элегиявий қаҳрамондан фарқли ўлароқ, драматик қаҳрамон ўзининг ташқи, ўзгалар билан алоқадаги ҳаёти учун масъулликни ҳис қиладиган шахсдир. Элегиявийликдаги каби мавжудликнинг драматизмга хос кўриниши ҳам ёлғизлик, бироқ бу элегиявийликдаги иложсиз ёлғизлик эмас, балки ўзга «мен» билан биргаликдаги ёлғизлик. Негаки драматик вазият ўзига хос «мен» билан ўзига хос «сен»нинг ўзаро муттасил алмашиниб турувчи яқинлашиш ва узоқлашиш жараёнидир (Нормурод Шомуродов – Отақўзи).

# Е

**ЕЧИМ** – сюжет унсури; эпик ёки драматик асар асосида ётган асосий воқеалар ривожининг якуни, уларнинг ниҳоясида қаҳрамонлар руҳиятида, тақдирида юзага келган ҳолатни, персонажлар орасидаги конфликтнинг ечимини баён этувчи сюжет қисми. Е.да конфликтли ҳолат, қаҳрамонлар орасидаги зиддиятлар ўзининг бадий ечимини топади. Бироқ бу қатъий қоида эмас. Кўплаб асарларда Е.дан сўнг ҳам зиддиятлар, қаҳрамонлар тақдиридаги чигалликлар ҳал қилинмаганича қолаверадики, бу ўқувчини ўйлашга, мушоҳада қилишга ундайди. Яъни том маънодаги Е.нинг мавжуд эмаслиги асарнинг таъсир кучини, ўқувчининг ижодий фаоллигини оширишга хизмат қилувчи усулга айланади. Мас., П.Қодировнинг «Эрк», О.Ёқубовнинг «Матлуба», «Қанот жуфт бўлади», Х.Султоновнинг «Саодат соҳили» каби қиссаларида шундай. Демак, Е.ни асардаги конфликт (ва у орқали қўйилган проблема)нинг ечими сифатида эмас, балки ундаги воқеалар ривожининг якуни, натижаси сифатида тушуниш тўғрироқдир. Е. турли типдаги сюжетларда турли даражада намоён бўлади. Арасту таъбирича, «бошланиши, ўртаси ва охири» бўлган *концентрик* (қ. *сюжет*) *сюжетли*, тугундан Е.га томон ривожланиб боровчи ўзаро сабаб-натижа муносабати асосида боғланган воқеалар силсиласидан иборат сюжет асосига қурилган асарларда Е., яъни «тугуннинг ечими» бўлган воқеанинг охири яққол кўзга ташланади. Айни пайтда, адабиётда *хроникали* (қ. *сюжет*), Арасту таъбирича, *эпизодик* сюжетта қурилган асарлар ҳам кенг тарқалган бўлиб, уларда Е. яққол кўзга ташланмайди. Аниқроғи, бундай асардаги ҳар бир эпизод ўз Е.ига эга бўлади, эпизодлар орасида эса сабаб-натижа муносабати эмас, даврий муносабат ётади. Мас., «Ўткан кунлар» романида биринчи эпизоднинг Е.и – Отабекнинг уйланиши, иккинчи эпизодники – Отабекнинг ганимларини ер билан яксон қилиши, учинчи эпизоднинг Е.и – Кумушнинг ўлими. Асарда сюжетнинг хроникалилик даражаси ортгани сари, сюжет Е.и хиралашиб боради, яъни энди ундаги «тугуннинг ечими» маъноси йўқолиб, «воқеаларнинг охири» маъноси бўртади. Мас., П.Қодировнинг «Юлдузли тунлар» романи.

# Ж

**ЖАНР** (фр. genre – жинс, тур, хил) – адабий жанр, адабий асарларнинг тарихан шаклланувчи типи, муайян давр миллий ёки жаҳон адабиётида умумий хусусиятлари билан турли кўламдаги гуруҳларни ташкил қилувчи асарларни англатувчи тушунча. Ж. терминининг кўпланишида турличалик кузатилади: айрим манбаларда Ж. термини адабий тур (эпос, лирика, драма) маъносида ишлатилса, бошқа бирларида анча тор маънода (эпос – тур, роман – хил, тарихий роман – жанр) қўлланади. Шунга қарамай, Ж. терминининг бир адабий тур доирасидаги умумий хусусиятлари билан фарқланувчи асарлар гуруҳи (мас., эпос – адабий тур, хикоя, қисса, роман – Ж) маъносида қўлланиши кенгроқ оммалашган. Тарихий категория сифатида адабий Ж.лар системаси муттасил ҳаракатда яшайди: янги Ж.лар вужудга келади, такомиллашади, истеъмолдан чиқади; ҳар бир алоҳида Ж.да ҳам муттасил сифат ўзгаришлари кузатилади, бадий ижод амалиёти унинг шаклий ва мазмуний хусусиятларига муттасил ўзгартиришлар киритиб боради. Иккинчи томондан, янги давр адабиётида XVIII асрдан бошлаб бадий ижодда индивид ролининг муттасил ортиб бориши баробарида, аънавий Ж. канонлари ҳам емирилиб боради: эндиликда муайян ижодкорнинг у ёки бу Ж.да яратган асари ҳам қатор ўзига хосликларни, яъни конкрет асарга хос Ж. хусусиятларини намоён этаверади. Яна бир жиҳати, ҳар бир давр адабиётидаги Ж.лар тизими адабий аънаваларнинг давоми ва адабий алоқалар натижаси ўлароқ янада ранг-баранг тус олади: фаол Ж.лар билан бир қаторда аънавий ва хорижий адабиётлардан ўзлашган Ж.лар ҳам истеъмолда бўлади. Демак, ҳар бир давр адабиётининг Ж.лар тизимини синхрония/диахрония аспектиларида ўрганиш тақозо этилади. Айтилганларнинг бари, албатта, Ж. назариясини ишлаб чиқишда қийинчилик туғдиради, ҳали бу борада умумэтироф этилган, тугалланган таълимот ёхуд тизимли тарзда амалга оширилган Ж.лар таснифининг мавжуд эмаслиги шундан. Бу табиий ҳам, чунки, биринчидан, Ж.лар системаси муттасил ўзгаришда экан, у ҳақдаги назарий қараш ҳам адабиёт

тараққийетининг ўтиб бўлинган муайян босқичига нисбатангина тугал бўлиши мумкин. Иккинчидан, ижод амалиётида индивидуалликнинг роли ортган шароитда Ж. канонларини қатъий белгилаб бўлмайди, шу боис таъриф ва таснифда ҳар бир Ж.га хос энг умумий белгиларни асосга олиш билан қаноатланишга тўғри келади. Бундай умумий белгилар сифатида конкрет асарнинг адабий турга мансублиги, асосий эстетик белгиси, композицион хусусиятлари, тасвир кўлами, бадиий нутқ шакли ва табиати кабилар кўрсатилиши мумкин. Мас., асосий эстетик белгисига кўра драматик жанрлар (комедия, трагедия, драма), ҳаётни қамраб олиш кўламига кўра эпик жанрлар (ҳикоя, қисса, роман) бир-биридан яққол фарқланади. Яъни бу белгиларни дастлабки асос қилиб олгач, зътиборни Ж.нинг бошқа белгиларига қаратиш мумкин бўлади. Мас., трагедиянинг асосий эстетик белгиси трагиклик бўлса, бу Ж.га мансуб этилиши учун асарда яна трагик ҳолат, трагик конфликт ва трагик қахрамон бўлиши ҳам тақозо этилади. Ёки ҳикоя, асосан, қахрамон ҳаётидаги битта воқеани қаламга олади, бу – жанрнинг асосий белгиси. Лекин битта воқеа қисса, ҳатто романга ҳам материал бериши мумкин. Демак, асарни ҳикоя жанрига мансуб этиш учун яна унинг ҳажман кичик бўлиши, характернинг тайёр ҳолда берилиши, сюжет асосида «воқеалар ривожини» эмас, балки «воқеанинг ички ривожини» (яъни воқеадан-воқеага тарзида эмас, воқеанинг эпизодидан-эпизодга тарзидаги ривожланиш) ётиши талаб этилади. Бундан кўринадик, Ж.лар тизими муттасил ўзгаришда бўлса ёки конкрет асар ўзига хос Ж. хусусиятларини намоён этса-да, ҳар бир адабий Ж.да юқоридаги каби муайян даражада тургун хусусиятлар ҳам мавжуд экан. Бу эса Ж.ни поэтик матрица деб ҳисоблаш имконини беради. Поэтик матрица бадиий воқеликни ташкиллаш принциплари бўлиб, асарларда бадиий воқеликларнинг турфалигига қарамай, ўзида уларнинг бари учун умумий жиҳатларни жамлайди. Поэтик матрицани бадиий ёки кундалик мулоқот нутқидаги клише (қолип, синтактик конструкция) ларга қиёсан тушуниш қулай. Нутқий мулоқотга киришаётган инсон тил воситаларидан фойдаланган ҳолда информация етказиш, унга муносабатини ифодалаш ва тингловчига муайян таъсир кўрсатиш мақсадларини кўзлайди. Бунинг учун у онгида мавжуд тайёр клишеларга тил материали (сўзлар)ни муайян алоқа ва муносабатда жойлаштириши лозим. Шуниси муҳимки, бир томондан, клишеларнинг тилдан фойдаланувчиларнинг бари учун умумий эканлиги ўзаро бир-бирини тушунишнинг асоси, иккинчи томондан, умумий клише-

лардан фойдаланган ҳолда ҳар бир сўзловчи нутқи индивидуал хусусиятларини ҳам намоён этаверади. Шунга ўхшаб поэтик матрицалар ҳам моҳиятан юқоридаги даражадаги клишелар бўлиб, улар бадиий хотирада мавжуд, улар воситасида ижодкор бадиий воқеликни яратди, яъни ҳаёт материални муайян бадиий информацияни етказадиган, унга муносабатини ифодалайдиган ва ўқувчига муайян таъсир ўтказадиган тарзда жойлаштиради.

**ЖАРҒОН** (фр. *jarçon* – бетона, тушунарсиз тил) – муайян ижтимоий қатлам, кичик гуруҳга хос «шева», умумхалқ тилидан фарқланиб, асосан, шу «шева» вакилларига тушунарли бўлган ун-сурлардан таркиб топади. Ж., асосан, лексик ва фразеологик бирликлар ҳисобига юзага келади, шунинг учун у тилнинг лексик ва фразеологик сатҳларида воқе бўлувчи ҳодиса сифатида таърифланади. Бироқ амалда Ж. кўпинча бу икки сатҳ чегарасидан чиқади, яъни бутун бошли гап ҳам Ж. саналиши мумкин. Шунинг учун терминнинг кенгрок – «шева» сифатида тушунилиши тўғрироқ бўлади. Ж. бадиий асарда персонажлар нутқини индивидуаллаштириш, муҳит колоритини бериш мақсадида, асосан, персонажлар нутқида қўлланади.

**ЖИМ ҚОЛИШ** – стилистик фигуралардан бири, шеърини мисраларда ифодаланаётган фикр ифодасини атайин тугатмай қолдириш. Ж.да фикр охиригача ифодаланмаса-да, унинг аниқ англашилиб туриши шарт, бунинг учун эса аввалги мисраларда пухта замин ҳозирланиши лозим. Мас.:

*Мен сендан кетмоқ истайман  
Ёмғирдек эмас, –  
Ёмғир яна қайтиб келади,  
Мен сендан кетмоқ истайман  
Шамолдек эмас, –  
Шамол яна қайтиб елади,  
Мен сендан кетмоқ истайман  
Муҳаббат каби... (Х.Даврон)*

Шеърнинг дастлабки икки сатри учинчи мисра билан, кейинги икки сатри олтинчи мисра билан изоҳланса, сўнгги икки сатрда шоир бу йўлдан бормайди – жим қолади, изоҳни шеърхоннинг ўзи ўзича шакллантириши зарур бўлади. Бунга матнда ётарли асос бор: шеърнинг биринчи ва иккинчи уч мисрали бандлари синтактик (строфик) параллелизм усулида қурилган бўлиб, учинчи мисралар дастлаб-

ки икки мисрани изоҳлайди, яъни «нега ёмғирдек эмас? – чунки у қайтиб келади», «нега шамолдек эмас? – чунки у қайтиб келади». Сўнги мисрадаги «каби» билан аввалги мисралардаги «эмас»нинг эйдлиги охиригача ифодаланмаган фикрни «муҳаббат каби – чунки у қайтиб келмайди» тарзида тушунишга асос бўлади.

**ЖОМИЪ УЛ-ҲУРУФ** (ар. **جامع الحروف** – ҳарфларни жамловчи, ўз ичига қамраб олувчи) – мумтоз адабиётдаги шеърий санъат, алифбодаги барча ҳарфларни такрорсиз қўллаган ҳолда байт айтиш. Яъни Ж.ҳ. асосида ёзилган байтда алифбодаги барча ҳарфлар иштирок этиши ва уларнинг ҳеч бири иккинчи ўринда такрорланмаслиги талаб этилади. Ўз-ўзидан аёнки, мазкур талабни уддалаш ғоят мушкул. Бир томондан, юзага келтириш имконининг жуда ҳам чеклангани, иккинчи томондан, кўпроқ шаклбозликка мойил бўлганидан шеъриятда у қадар оммалашмаган.

**ЖОНЛАНТИРИШ** – кенг маънода метафоранинг бир кўриниши, жонсиз нарсаларга инсон, умуман, жонли мавжудотга хос сифатларнинг берилиши. Шунингдек, жониворларга инсонга хос сифатларнинг берилиши ҳам Ж.нинг бир кўриниши (*антропоморфизм*) саналади. Ж. бадий асарда турли даражада воқе бўлади: 1) стилистик фигура. Инсон тафаккурига хос аналогиялар асосида (метафорик) фикрлаш, тил аъаналари билан боглиқ ҳолда ва муайян гоёвий-эстетик мақсадни кўзлаб бадий нутқда нарсаларга жонли мавжудотларга хос хусусиятлар берилади. Мас., «Ҳовлиқма жилғалар чопар безга» (А.Орипов) сатрида инсонга хос сифат («ҳовлиқма») ва ҳаракат тарзи («чопмоқ») жилғаларга берилмоқдаки, бу билан манзаранинг жонли, таъсирчан чиқишига эришилмоқда. Стилистик фигура сифатидаги яна бир кўриниши эса *апострофа*дир (қ.); 2) бадий усул. Муайян бир мақсадни кўзлаган ҳолда нарсалар буюмлар инсон каби ҳаракатлантирилади: улар ўйлайди, изтироб чекади, қувонади ва ш.к. Мас., «Ўткан кунлар»даги Кумушнинг ҳуснига маҳлиё ариқ суви, Х.Султоновнинг «Ёзнинг ёлғиз ёдгори» қиссасидаги милтиқ; 3) образлилик тури. Кўп ҳолларда Ж. асосида рамзий ва аллегорик образлар яратилади. Жумладан, мумтоз адабиётдаги *ташхис* санъати (қ. *ташхис*) бунга мисол бўла олади. Образлиликнинг мазкур тури ҳозирги адабиётда ҳам фаол қўлланади.

**ЖУЗВ** (ар. **جزو** – бўлак, қисм, парча, бутун эмас) – арузда сокин ва мутаҳаррик ҳарфларнинг муайян тартибда бирикишидан ҳосил бўлувчи ритмик бирлик, ҳарф билан *руkn* орасидаги ритмик бўлак. Ҳозирги адабиётшунослиқда Ж. термини кўпроқ мазкур маънода

қўлланса-да, мумтоз арузшунослиқда ушбу тушунча баъзан *руkn* (Қайс Розий, Ҳусайний, Навоий), баъзан эса *асл* (Тарозий) деб юрилган. Ж. термини араб арузига татбиқан фаол, туркий арузга нисбатан эса кам қўлланади, чунки туркий арузда *ҳижо* термини ҳарф ва *жузв* маъноларини аксар ўзига қамраб олади. Шу боис Фитратдан кейинги ўзбек арузшунослигида бу икки термин ўрнига *ҳижо* терминини қўллаш кўпроқ оммалашган. Ж. мутаҳаррик (чўзгили) ва сокин (чўзгисиз) ҳарфларнинг муайян тартибда бирикишидан ҳосил бўлади ва шундан келиб чиқиб Ж.нинг уч хили ажратилади: *сабаб*, *ва-тад*, *фосила* (қ.).

## З

**ЗАРБ** (ар. ضرب – урмоқ, зарба бермоқ; иккинчи мисранинг сўнгги бўлагини зарб билан, ургу билан айтиш) – қаранг: **ТАҚТИЪ**

**ЗИҲОФ** (ар. زحاف – ўзгарган, аслидан узоқлашган, четлашган, жойидан кўзголган) – аруз шеър тизими асосини ташкил қилувчи 8 аслнинг сифат ёки миқдор жиҳатидан турли ўзгаришларга учраши. Аслларнинг 3.га учраши натижасида уларнинг турли тармоқлари – фуруълар ҳосил бўлади. Асллар уч хил йўл билан 3.га учраши мумкин: 1) ҳижоларнинг миқдор жиҳатдан ўзгариши. Бунда рукн таркибидаги ҳижолар сони ўзгаради, яъни, асосан, рукн таркибидан бир ёки бир неча ҳижо тушиб қолади. Мас., фоиллун аслининг ҳазф 3.ига учраши натижасида охириги чўзиқ ҳижо (лун) тушиб қолади ва фоилун (маҳзуф) фуруъси ҳосил бўлади; 2) ҳижоларнинг сифат жиҳатдан ўзгариши. Бунда рукн таркибидаги ҳижолар сифати ўзгаради, яъни чўзиқ ҳижо қисқа ёки ўта чўзиқ ҳижога, қисқа ҳижо чўзиқ ёки ўта чўзиқ ҳижога, ўта чўзиқ ҳижо қисқа ёки чўзиқ ҳижога айланади. Мас., мафоийлун аслининг кафф 3.ига учраши натижасида, охириги чўзиқ ҳижо (лун) қисқа ҳижога айланади ва мафоийлу фуруъси (мақфуф) ҳосил бўлади; 3) рукн таркибидаги ҳижолар бир пайтининг ўзидан ҳам миқдор, ҳам сифат жиҳатдан ўзгаришга учрайди, яъни рукн таркибидаги бир ёки бир неча ҳижо туширилиб, қолган ҳижолардан бирида сифат ўзгариши юз беради. Мас., мафоийлун аслининг қаср 3.ига учраши натижасида, охириги чўзиқ ҳижо (лун) туширилиб, ундан олдинги чўзиқ ҳижо (ий) ўта чўзиқ ҳижога (ийл) айланади ва мафоийл фуруъси (мақсур) ҳосил бўлади.

**ЗУЛҚАВОФИЪ** (ар. ذوالقوافي – уч ва ундан ортиқ қофияли) – қофия билан боғлиқ шеър санъатларидан бири, байт таркибида уч ёки ундан ортиқ қофиядош сўзлар жуфтлигини келтириш. 3. ритмни айрича таъкидлаш орқали байтга ўзига хос мусиқийлик, хушоҳанглик бахш этади. Навоийнинг «Лайли ва Мажнун» достонидан олинган куйидаги байт 3.га яхши мисол:

Ҳар қиссада шуқр сол тилимга,  
Ҳар ғуссада сабр бер илимга.

Маъжур байтда «тилимга – илимга» жуфтлиги асосий қофия бўлса, «шуқр – сабр» ва «қисса – ғусса» жуфтликлари ҳам ўзаро қофияланиб келмоқда. 3.ни тарсеъдан фарқлаш керак (қ. тарсеъ). Яъни тарсеъда мисралардаги барча сўзлар ўзаро қофиядош бўлади, 3.да эса келтирилган байтдаги каби (сол – бер) бир ёки бир неча қофиядош бўлмаган жуфтликлар қолиши мумкин.

**ЗУЛҚОФИЯТАЙН** (ар. ذوالقافيتين – икки қофияли) – қофия билан боғлиқ шеър санъатларидан бири, байт таркибида асосий қофиядан ташқари яна битта қофиядош сўзлар жуфтлигини келтириш, яъни 3. байтда қофиядош сўзлар жуфтлиги иккита бўлишини тақозо қилади. Навоийнинг «Лайли ва Мажнун» достонидан олинган куйидаги байт 3.га мисол бўлади:

Жола қадаҳини тошқа урдунг,  
Жола гуҳарини бошқа урдунг.

## И

**ИБТИДО** (ар. ابتداء – бошланиш) – қаранг: **тақтиъ**

**ИБХОМ** (ар. ابهام – ёпиқ сўзлаш, ёпиб ўтмоқ, беркитмоқ) – мумтоз адабиётдаги шеърий санъатлардан бири. И.да гап бўлаклари (асосан, бош бўлақлар) шундай жойлаштириладики, уларнинг синтактик вазифасини турлича (эгани кесим, кесимни эга тарзида) тушуниш мумкин бўлади ва шу асосда бошқа бир маъно келиб чиқади. Яъни И. қўлланган байт (мисра)даги гап бўлақларининг ўрнини алмаштириб шунга мос ургу ва оҳангда ўқилса, байтнинг иккинчи маъноси келиб чиқади. Мас., «Висолинг шавқидан кун бўлди тун» мисрасида «тун» эга деб тушунилса, «тун ёришди» маъноси; «кун» эга деб тушунилганда, «кун тунга айланди, куннинг ўтгани билинмай қолди» маъноси англашилиши мумкин. «Қутадғу билиг»даги:

*Баъзиси золимдан чекади влам,  
Баъзига йўқчилик келтиради ғам, –*

байтида «йўқчилик келтиради ғам» жумласини «йўқчилик кишига ғам келтиради, киши йўқчилик туфайли ғам чекади» тарзида ҳам, «ғам инсонга йўқчилик келтиради, ғам чеккан инсон йўқчиликка учраши мумкин» тарзида ҳам тушуниш мумкин. И. санъати мумтоз шеъриятда у қадар фаол қўлланмаса ҳам, ўзига хослиги билан ҳаммиша ижодкорлар қизиқишига сабаб бўлиб келган. Шу боис ҳозирги шеъриятда ҳам И. санъатининг яхши намуналарини учратиш мумкин. Мас., Эркин Воҳидовнинг:

*Аслида ким қарарди ётганда хор сурма,  
Бўлди азиз кўзига суртганда ёр сурма, –*

матлаъсидаги иккинчи мисрани «ёр кўзига суртгани учун сурма азиз бўлди» тарзида ҳам, «кўзига сурма суртгани учун ёр азиз бўлди» тарзида ҳам тушуниш мумкин.

**ИДЕАЛ, ЭСТЕТИК ИДЕАЛ** (юн. idea сўзидан фр. ideal – тасаввур, тушунча) – эстетика, жумладан, адабиётшуносликнинг муҳим илмий категорияларидан бири, гўзаллик, эстетик мукамалликнинг юксак даражаси ҳақидаги ҳис этиладагидан конкрет-тимсолий шаклда акс этувчи тасаввурлар жами. Жамиятда яшаётган ҳар бир инсон онгида мукамал жамият, мукамал ижтимоий муносабатлар, мукамал инсон ҳақидаги тасаввурлар мавжуд бўлиб, буларнинг бари И.ни ташкил қилади ва унинг воқеликка муносабатини белгилайди. Умуман олганда, эстетик И. ҳам шунинг бир қирраси, конкрет-тимсолий шаклда воқе бўлувчи гўзаллик тасаввуридир. Ҳақиқатда И.нинг қирралари бутуннинг қисми бўлиб, уларни бир-биридан ажратиб бўлмайди. Шунинг учун мутахассислар И.нинг серқирралигини, унинг моҳияти: онг соҳасида *ҳақиқат*, ахлоқ соҳасида *эзгулик*, эстетика соҳасида *гўзаллик*дан иборат эканлигини таъкидлайдилар. Албатта, бу қирраларнинг ҳар бири ўзининг муайян меъёрларига эга бўлиб, улар давр ўтиши билан ўзгариб, конкретлашиб боради. Мас., тасаввуф адабиётининг И.ига кўра, ҳақиқат – Ҳақ, Аллоҳ; эзгулик – Ҳақнинг буюрганини қилиш ва у қайтарганини қилмаслик; гўзаллик – шу иккисига мувофиқликда, нимаики буларга мувофиқ эмас, у гўзалликдан айро тушади. Инсоннинг ижтимоийлашуви билан боғлиқ ҳолда И. ҳам ҳаётга яқинлашади, у ижтимоий-сиёсий мундарижа касб этади. Мас., жадид адабиётининг И.га кўра, ҳақиқат – миллат тараққийси (эркин ва адолатли жамият, маърифат, муносиб миллий турмуш, миллий озодлик ва б.); эзгулик – миллат тараққийсига хизмат қилувчи амал; гўзаллик – шу иккисига мувофиқлик. Давр билан боғлиқ ўзгаргани ҳолда, И.ни замонга буткул боғлаб қўйиш хато бўлур эди. Негаки И. ижтимоий характерга эга, у жуда қадим замонлардан шаклланиб, тўлишиб, конкретлашиб келади ва, айни чоғда, у моҳиятан ҳаммиша келажакда бўлиб, бу ҳол уни вақт ҳукмидан холи этади. Худди шу нарса санъат асарининг боқийлигини таъминловчи асосий омилдир, чунки санъат олам ва одамни И. асосида акс эттиради, И. асосида баҳолайди. Яъни ижод онларидаги санъаткор И. оламида яшайди, воқеликни унинг нури билан ёритади. Зеро, фақат шундагина ижодкор шахс том маънодаги маънавий-руҳий бутунликка эга бўлади. Маънавий-руҳий бутунлик эса шахс интилган И.нинг мавжудлиги ва унинг ҳаётий принциплари ўша И.дан келиб чиқиши демакдир. Шунга кўра, бутунлик муайян хусусиятларни ўзида жам этган инсоннинг тургун ҳолати эмас, балки узлуксиз ва адоқсиз бир жараён. Негаки реаллик билан тўқнашув ҳар вақт шахс-

нинг маънавий-руҳий бутунлиги – моҳияти ва мавжудлиги орасида зиддиятлар келтириб чиқараверади. Мана шу зиддиятларни И.дан руҳ олган ҳолда бартараф этиш орқали мавжудлигини моҳиятига мувофиқлаштириб бориш, шу асно қадам-бақадам И.га яқинлашиб, янги-янги маъноларни кашф этиш ва уларни ўз ҳаётига, жамият ҳаётига татбиқ этиб бориш ижоднинг бош шартидир. Бу жиҳатдан том маънодаги ижодкор ҲАҚ йўлига кирган сўфийга монанд: сўфий ҲАҚқа яқинлашгани сари мавжудликнинг моҳиятини теранроқ идрок қилганидек, ижодкор И.га яқинлашгани сари ҳаётнинг, инсоннинг моҳиятини теранроқ илғайди. Сўфийлик йўлининг ибтидоси ҳам, интиҳоси ҳам ҲАҚ бўлганидек, ижодкор фаолиятининг *мотиви* (сабаб) ҳам, *мақсади* (натижа) ҳам И.дир.

**ИДИЛЛИЯ** (юн. *eidyllion* – кичик манзара, унча катта бўлмаган асар) – шаклий тузилишга кўра турлича, мазмун хусусиятларига кўра таснифланувчи поэтик жанр. И. дастлаб Қадимги Юнонистонда чўпон кўшиги сифатида юзага келган. Антик юнон шоири Феоокритнинг аксар асарлари И. деб аталган. Шаклан турлича бўлган Феоокрит И.лари мазмун жиҳатидан умумийликка эга: уларни инсоннинг кундалик ҳаёти, интим туйғулари, табиатга қизиқиш бирлаштириб туради, шоир эътибори кўпроқ кишиларнинг гам-ташвишдан холи, осойишта ҳаётига қаратилади. И.да табиатдаги уйғунлик ва гўзаллик мутлақлаштирилади, уларга дахлсиз ва ўзгармас ҳодисалар сифатида қаралади. И. жанр сифатида, айниқса, XVII – XVIII асрларда Европа, XVIII аср ўрталарида эса рус шеърлятида кенг оммалашди ва ривожландики, бу кўп жиҳатдан сентименталистларнинг «табиий инсон» ғояси билан боғлиқдир. Кўчма маънода И. тинчлик ҳолати, ички ва ташқи уйғунлик, осойишталик ва хотиржамликни ифодалайди.

**ИДИЛЛИЯВИЙЛИК** (русчадан калька «идиллическое») – бадиийлик модуси. И. модус сифатида элегия, драматизм билан биргаликда қаҳрамонлик, сатира ва трагизмдан фарқланадиган гуруҳни ташкил этади. Яъни И.да дунё мутлақ тартибот сифатида эмас, балки шахс бевосита муносабатда бўладиган борлиқ (яъни конкрет инсон ҳаракатланаётган муҳит) сифатида идрок этилади. Идиллиявий «мен» ўзини ташқи олам билан бирликда ҳис қилиши нуқтаи назаридан қаҳрамонликка (қ.) яқин, бироқ ундан фарқли равишда И.да кишилик жамияти, мамлакат тақдири билан боғлиқ муаммо қўйилмайди. Идиллиявий «мен» ўзи бевосита муносабатда бўлаётган муҳит қадриятларини сўзсиз қабул қилади ва ўзлигини уларга

оғишмай амал қилиш, муҳит билан бирлашиб, уйғунлашиб кетиш орқали намоён этади. Идиллиявий қаҳрамон бутун олам тартиботи олдидаги эмас, ўзгалар (ва улар ташиётган анъана, қадриятлар) олдидаги масъулият ҳисси билан яшайди (мас., Т.Мурод. «Юлдузлар мангу ёнади»). Шунинг учун идиллиявий модус қаҳрамони кўпинча маиший турмуш доирасидагина ҳаракатланади. У ўзини борлиқнинг ажралмас қисми сифатида идрок этади, ўзини қуршаган муҳит (табиат, маиший турмуш) стихиясига берилади. Идиллиявий модусга «ос асосий хронотоп – аждодлар билан авлодларни бирлаштириб турувчи «қадрдон уй», «қадрдон гўша». Авлодлар ўртасидаги ворилик, инсон ҳаётининг авлодларда давом этиши – идиллиявий қаҳрамон мавжудлигининг асоси, унинг учун ҳаётнинг мазмун-моҳияти шунда. Айни шундай қараш идиллиявий қаҳрамонга ўлимнинг муқаррарлигидан келувчи изтироб ва тушкунликни енгишга куч беради, И.ни элегиявийликдан фарқлайди.

**ИЖОДИЙ НИЯТ, МУАЛЛИФ НИЯТИ** – бадиий ижод жараёнидаги илк босқич. И.н. санъаткорнинг воқелик билан муносабати, воқеликни ўЗИЧА (ўзининг эстетик идеали, дунёқараш, сажияси, маданий-маърифий даражаси, ҳаётий ва ижодий тажрибаси, тугма истеъдоди қуввати асосида) қабул қилиши ва идрок этиши натижаси ўлароқ юзага келади. И.н.да яратилажак асарнинг асосий чизгилари, биров хирарок тарзда бўлса-да, кўзга ташланиб туради, бошқача айтсак, И.н. асарнинг санъаткор онгидаги хомаки эскизидир. Бадиий ижод жараёнининг ўзига хослиги шундаки, санъаткор И.н.даёқ ўқувчига муайян таъсир қилишни кўзда тутаяди, яъни мақсад ижрога таъсир қилади, ниёт ва ижро бирлашади. Зеро, санъаткорнинг эстетик идеали билан мавжуд воқелик орасидаги номувофиқлик бадиий ижодга ундовчи мотив бўлса, идеалга яқинлашиш унинг мақсадидир. Демак, И.н. билан унинг ижроси, ижод мотиви билан мақсадининг бирлиги бадиий ижод жараёнини яхлит, бутун ҳодисага айлантиради. Шунга кўра, ижод И.н.ни амалга ошириш, санъаткорнинг ўй-фикрлари, баҳоси, бадиий концепциясини бадиий образлар тизими воситасида моддийлаштириш жараёни демакдир. Албатта, И.н. тургун тушунча эмас, яъни у ижод жараёнининг бошида пайдо бўлганича қолмайди, аксинча, бевосита ижод жараёнида сайқалланиб, конкретлашиб боради, муайян ўзгаришларга учрайди. Яна бир томони, И.н. турли даражада амалга ошириш қатор омиллар (муаллифнинг ижодий тажрибаси, бадиий маҳорати, конкрет давр шароити ва ш.к.) билан боғлиқдир.



**ИЖРОВИЙ ЛИРИКА** (русчадан калька: «ролевая лирика») – лириканинг субъектив шакллантирилишига кўра фарқланувчи кўринишларидан бири, лирик кечинма ўзга шахс тилидан ифода этилувчи шеър. Яъни бунда шоир гўё ўзга шахсга эврилади, унинг «роли»ни ижро қилади, натижада И.л. қахрамони лирик кечинманинг ягона субъекти бўлиб қолади. И.л.нинг илдизлари кўртак ҳолида халқ оғзаки ижодида (мас., келин тилидан, етим тилидан, хўкиз тилидан), мумтоз шеърятимизда кузатилса-да, унинг кенг оммалашиши ХХ асрга тўғри келади. Жумладан, Чўлпоннинг «Мен ва бошқалар» шеъри И.л.нинг янги ўзбек шеърятдаги илк ва сара намуналаридан бири сифатида кўрсатилиши мумкин. Ўтган асрнинг 20 – 30-йилларида кенг тарқалган «Кўшчи кўшиги», «Колхозчи қиз кўшиги», «Сувчи кўшиги» тарзида яратилган шеърларнинг аксарияти И.л.га мансуб этилиши мумкин. Шеърнинг бу кўриниши 60-йиллардан бошлаб, айниқса, кенг тарқалди: «Ҳамза» (А.Орипов), «Абдулла Набиев» (Э.Воҳидов). 70 – 80-йиллар шеърятда янада фаоллашган И.л.нинг асосий қахрамонлари тарихий шахслар бўлиб қолди: мавжудликнинг мангу муаммолари, миллат ва юрт тақдири масалалари, жамиятнинг жорий ҳолати уларнинг кўзи билан кўрилди ва баҳоланди. Х.Давроннинг «Тўмариснинг кўзлари» шеърий тўллами, У.Азимнинг «Тушларингизга кирадиган кўзлар» туркуми аксар шундай шеърлардан таркиб топган бўлиб, улар миллий ўзлиқни англаш жараёнида муҳим аҳамият касб этди.

**ИЗДИВОЖ** (ар. ازواج – жуфтлашмоқ, уйланиш) – мумтоз адабиётдаги шеърий санъатлардан бири, байт мисрасида икки ёки ундан ортиқ сўзнинг ёнма-ён ёхуд бир-бирига яқин ҳолда оҳангдош (ўзаро қофиядош) бўлиб келиши. Манбаларда И.ни *тазмини муздаваж* деб ҳам атайдилар. Мас., Нодиранинг:

Қилмагил зинҳор изҳор эҳтиёж  
Ким, азиз элни қилур хор эҳтиёж, –

байтида «зинҳор» ва «изҳор» сўзларининг ёнма-ён келиб ўзаро оҳангдош бўлиши И.ни юзага чиқармоқда.

**ИЗОМЕТРИЯ** (юн. *isometria* – тенг ўлчовлилиқ) – шеърий нутқни ташкил қилувчи бўлак (мисра)ларнинг тенг ўлчовлилиги. И. туфайли шеърдаги нутқий бўлақларнинг ҳар бири талаффузда ажралади ва шунинг ҳисобига ритмиклик яққол ҳис этилади. И. метрик шеър тизимида ритмик бўлақлар талаффуз вақтининг тенглиги (*изохронизм*),

силлабик шеър тизимида бўгинлар сонининг тенглиги (*изосиллабизм*), тоник шеърятда эса ургулар миқдорининг тенглиги (*изотонизм*) ҳисобига таъминланади.

**ИЙЖОЗ** (ар. *ايجاز* – қисқа, лўнда) – оз сўз (лафз) билан кўп маъно ифода этиш. Айрим манбаларда И. ҳам санъатлар сирасида саналса-да, аслида, у санъатга нисбатан кенгроқ тушунча бўлиб, умуман, нутқ услубига хос хусусиятни англатади. Нутқдаги И.га зид бўлган хусусият, яъни оз маънони кўп сўз билан ифода этиш *итноб* (ёки *баст*), маъно кўлами ва сарф этилаётган сўз миқдорининг мувофиқлиги эса *мусовот* деб юритилади. Мавжуд шеърий санъатларнинг бир қисми (*ташбеҳ*, *истиора*, *талмех* ва б.) И.ни юзага чиқаради, чунки улар ёрдамида, одатда, аслида тушунтириш учун кўпроқ сўз сарф этиладиган нарса-ҳодиса, тушунчаларга оз сўз билан ишора қилинади, шу ишора туфайли байт ёки мисра мазмуни сўз билан ифодаланганига нисбатан беқиёс даражада кенгайди. Зеро, ишора ўқувчини матндан ташқаридаги контекстга (воқелик, тарихий воқеа, бошқа бир асар ва ш.к.) йўналтиради, натижада матн мазмуни ўша контекст мазмуни билан бойийди. Аксинча, бир қатор санъатлар (*тафсир*, *такрир*, *жам*, *тақсим*, *тафриъ* каби) маънони ифодалаш учун кўп сўз сарфлашишига, яъни итнобга олиб келади. Мас., *тафсир* (қ.) санъати байтда ифодаланган фикрнинг кейинги байтларда шарҳланишини тақозо этади, маъно кўлами ўзгармагани ҳолда, матн кенгайди. Шунинг учун илми балоғада И. ва мусовотнинг маънога халал бермаслиги, фойдасиз итнобдан сақланиш талаб этилади. Яъни барча ҳолларда ҳам меъёрни сақлаш зарур: оз сўз билан кўп маъно ифодалаш ёки сўз ҳажмининг маънога мувофиқ бўлишини кўзлаб мазмунни хиралаштириш ҳам, шу билан бирга, ортиқча ва фойдасиз итноб ҳам маъқул эмас.

**ИЙҲОМ** (ар. *ايهام* – шубҳага солиш, адаштириш) – мумтоз адабиётдаги шеърий санъатлардан бири, шеърда (баъзан насрда ҳам) бир сўзни бир жойнинг ўзида икки маънода ишлатиш. И.да матндаги сўзнинг бир қарашда англашилиб турган яқин маъносидан ташқари яна бир узокроқ маъноси мавжуд бўлади ва шу узок маъно шоирнинг асл мудароиси ҳисобланади. Икки турли маънода ишлатилган биргина сўз бутун бошли байтни икки хил тушуниш имконини беради. Атоуллоҳ Хусайний И. санъати «*таврия*», «*тахийил*», «*тасевия*» номлари билан ҳам юритилишини қайд этган. Мас., Навоийнинг:

*Лабингни сўргали муҳри сукут оғзима тушимиш  
Ки, ул шаққар била эрним бири бирига ёпушимиш, –*

байтидаги «сўргали» сўзининг яқин маъноси «сўрамоқ» бўлса, узоқ маъноси «сўрмоқ», яъни «бўса олмоқ»дир. Ушбу сўзнинг икки хил маъносига таяниб Бобур ҳам қуйидаги машҳур байтида И. санъатини моҳирона қўллаган:

*Лабинг бағримни қон қилди, кўзимдин қон равон қилди,  
Нега ҳолим ёмон қилди, мен андин бир сўрорим бор.*

**ИЛМИ АРУЗ** (ар. علم العروض – аруз илми) – мумтоз адабиётшуносликнинг таркибий қисми, аруз шеър тизимининг ўзига хос қонуниятларини ўрганувчи соҳа, арузшунослик. И.а.нинг асосчиси сифатида IX асрда яшаган араб олими Халил ибн Аҳмад эътироф этилади. Араб адабиёти заминидида пайдо бўлган аруз шеър тизими ўтган асрлар давомида махсус ўрганилиб, алоҳида илм сифатида такомиллашиб борди, аруз назариясига доир кўплаб тадқиқотлар яратилди. Халил ибн Аҳмаддан кейин араб арузшунослигида Ибн Усмон Мазиний, Имом Аҳмад ибн Абдураббих, Ибн ал-Хатиб ат-Табризий; форс арузшунослигида Мавлоно Юсуф Нишобурий, Рашидиддин Вотвот, Шамс Қайс, Носириддин Тусий, Салмон Савожий, Абдурахмон Жомий; туркий арузшуносликда Алишер Навоий, Заҳириддин Муҳаммад Бобур, Шайх Аҳмад Худойдод Тарозий каби олимлар яратган асарлар И.а.нинг ривожига улкан ҳисса бўлиб қўшилган. Бундан ташқари, Абу Наср Фаробий, Абу Али ибн Сино, Абул Қосим Замахшарий, Абу Яъқуб Юсуф ибн Абубакр Саққокий каби алломаларнинг бошқа масалаларга бағишланган рисолаларида ҳам арузга оид қимматли фикр-мулоҳазалар билдирилганки, И.а. ривожидида уларнинг ҳам сезиларли улуши борлиги эътироф этилади. Ҳозирги ўзбек адабиётшунослигида ҳам аруз масалалари атрофлича тадқиқ этилган: ўтган асрнинг 20-йилларида Фитрат бошлаб берган арузшунослик бобидаги изланишларни кейинчалик С.Мирзаев, А.Рустамов, У.Тўйчиев, С.Ҳасанов, А.Ҳожаҳмедов, А.Аъзамов каби кўплаб олимлар муваффақиятли давом эттирдилар.

**ИЛМИ БАДИЪ** (ар. علم البديع – чиройли сўзлаш, гўзал, нафис, нодир, ажойиб; бадийят илми) – мумтоз адабиётшуносликнинг таркибий қисми, нутққа безак берувчи санъатлар, уларнинг ўзига хос

жиҳатлари, таснифланиши, асар бадийятини белгилаш, эстетик функциясини ошириш, фикрни гўзал ва мазмунли ифодалашдаги ўрни каби масалаларни ўрганувчи соҳа. И.б.нинг ўрганиш объекти булган нутқни гўзал қилувчи бадийий усул ва воситалар умумий ном билан *санойиъ* (қ.) деб юритилади. Атоуллоҳ Хусайний нутқни гўзал қилувчи воситаларни икки турга – *зотий гўзалликлар* ва *оризий гўзалликларга* бўлади. *Зотий гўзалликлар* деганда нутқнинг табиий гўзаллиги тушунилиб, Атоуллоҳ Хусайний таърифига кўра, улар «дилбарларнинг табиий ҳусни янглигидир». Яъни бунда нутққа атайин безак берилмайди, нутқни безаш учун ишлатилаётган воситалар (сўз, ибора, тасвирий ифода ва ш.к.)дан табиий ҳолича фойдаланилади. Улардан фарқли ўлароқ, *оризий гўзалликлар* нутқни безаш учун атайин ҳосил қилинади. Атоуллоҳ Хусайний нутқ гўзалликларининг биринчи тури *илми балоғанинг*, иккинчи тури эса *илми бадийнинг* объекти жанлигини таъкидлайди. Шунингдек, лирик жанрларнинг ўзига хос жиҳатларини тадқиқ қилиш ҳам И.б.нинг вазифаси ҳисобланган. Шуни ҳам айтиш керакки, И.б.га оид рисолаларда объект доим ҳам қатъий чеклаб олинмайди: уларда кўпинча *илми балоға*, *илми қофия*, *илми аруз* масалалари ҳам ёритилаверади (мас., А.Хусайний. «Бадойи ус-санойиъ»).

И.б.га оид дастлабки асарлар араб тилида яратилган бўлиб, улар сирасига IX – X асрларга мансуб Наср бинни Ҳасаннинг «Маҳосин ул-калом», Ибн Мўътазнинг «Китоб ул-бадеъ», Қудама ибн Жаъфарнинг «Нақд уш-шеър» каби рисолалари киради. Кейинроқ XI асрдан бошлаб форс тилида И.б.га оид қатор асарлар яратилдики, унинг кейинги ривожини форс адабиёти билан боғлиқ ҳолда кечди. Жумладан, Умар Родуёнийнинг «Таржимон ул-балоға», Рашидиддин Вотвотнинг «Ҳадойиқ ус-сехр», Қайс Розийнинг «Ал-мўъжам», Атоуллоҳ Хусайнийнинг «Бадойи ус-санойиъ», Воҳид Табризийнинг «Жамъи мухтасар» каби асарлари И.б. ривожидида муҳим ўрин тутган мўътабар манбалар саналади. Туркий тилдаги И.б.га оид илк асар сифатида Шайх Аҳмад Худойдод Тарозийнинг XV асрда яратилган «Фунун ул-балоға» рисоласи эътироф этилади. XX асрдан ўзбек адабиётшунослигида И.б.га оид масалалар кенг кўламда, тарихий-назарий аспектда атрофлича тадқиқ қилина бошлади. Ўтган асрнинг 20-йилларида Фитрат, А.Саъдий каби адабиётшуносларнинг бу борада бошлаган ишлари А.Ҳайитметов, А.Рустамов, Ё.Исҳоқов, Б.Саримсоқов, В.Раҳмонов, А.Ҳожаҳмедов каби кўплаб олимлар томонидан давом эттирилди ва сезиларли ютуқларга эришилди.

**ИЛМИ ҚОФИЯ** (ар. علم القافية – қофия илми) – мумтоз адабиёт-шуносликнинг таркибий қисми, қофия ва унинг турлари, тузилиши, унинг бадиий санъатлар ва вазн билан муносабати, шеърнинг оҳангдорлигида қофиянинг тутган ўрни каби масалаларни тадқиқ этувчи соҳа. Шарқ адабиётшунослигида И.қ.га оид махсус рисола-лар (мас., Абулхасан Али Сарахсий Бахромий. «Канз ул-қофия»; Абдурахмон Жомий. «Рисолаи қофия»; Атоуллоҳ Хусайний. «Қофия илми қоидалари ҳақида рисола» ва б.) яратиш билан бирга, илми бадиёга оид рисола-ларнинг аксариятида ҳам И.қ. масалаларини ёритиш учун алоҳида боблар ажратилган. Мас., Шайх Аҳмад Тарозийнинг «Фунун ул-балога» асари уч бобдан иборат: «аҳли табъга қофия илмин билмак муҳимдир» деб билган муаллиф рисо-ланинг «Ал-фанну-с соний фи қофия ва-р-радиф» (Иккинчи фан қофия ва радиф хусусида) номли иккинчи бобида И.қ. масалалари-дан баҳс юритади.

**ИЛТИФОТ** (ар. الطفات – алангламоқ, бир ҳолатдан иккинчи ҳолатга ўтмоқ) – мумтоз адабиётдаги шеърий санъат, байтда бир шахсдан бошқа бир шахсга кўчиш, яъни I шахсдан II ёки III шахсга, II шахсдан I ёки III шахсга, III шахсдан I ёки II шахсга кўринишда кўчиш. Шайх Аҳмад Худойдод Тарозий И.ни «мухотабадин муғойибага бормоқ ё ғайбдин хитобқа келмоқ» деб таърифлаган. Яъни хитоб қилинувчи (II шахс)дан нутқ сўзланиб турган вазиятда мавжуд бўлмаган III шахс (муғойиба – ғайб)га кўчиш И. дейилади. Мас., Атойининг:

*Эл тирик дерлар мени, кўнглимда фикр этсам вале,*

*Бу тирикликда бўлур юз минг бало сизсиз менга, –*

байтида аввал III шахс (Эл тирик дерлар) ҳақида сўз боради, ундан I шахсга (фикр этсам), сўнг эса II шахсга (сизсиз менга) кўчилади.

**ИЛҲОМ** (ар. الهمام – едирмоқ, руҳлантирмоқ) – санъаткор руҳиятида юзага келувчи ижодий-руҳий ҳолат, ижодий фаолият-нинг юксак завқ билан, кўнгли ва енгил кечишини таъмин этув-чи кўтаринки ишчан кайфият. Ижодкор кишиларда кузатилувчи мазкур ҳолат одамларга қадимдаёқ маълум бўлганки, уни турлича изоҳлашга ҳаракат қилганлар. Жумладан, қадимги юнонлар И. му-залар – аёл қиёфасидаги илоҳий мавжудотлар томонидан берилади деб ҳисоблаганлар, Шарқда ҳам И.ни ғайбдан дейишга мойиллик кучли бўлган: ҳозирда ҳам тез-тез тилга олинадиган «илҳом париси»

қаблидаги гаплар шунинг изларидир. Албатта, И. онларини, унинг юзага келишини мантиқий изчилликда тушунтириб бериш қийин. Бироқ шуниси аниқки, И. ижодий қобилиятга эга шахснинг ижодий-руҳий фаолиятидаги муайян бир босқич бўлиб, ушбу онларда бунга қадар пишиб-етилиб келган жараён тезлашади; ижодкорнинг умумий руҳий куввати ортади: ақлий ва ҳиссий мушоҳада тезлиги ошади, хотира максимал жонланади, нарса-ҳодисалар орасидаги ассоциа-тив алоқаларни илғай олиш қобилияти, нигоҳ ўткирлиги, таъсирчан-лик кучаяди, ижодий тасаввур кўлами кенгаяди. Айни шу дамлар-да ижодий жараён кўнгли, осон ва маҳсулдор кечади – асар гўё «қуйилиб» келади. Демак, И.ни ғайбдан келган нарса сифатидаги-на эмас, балки санъаткор онгию қалбида кечган ижодий-руҳий жа-раённинг энг юксак нуқтаси, тўғма имкониятлари ўта кучайган, бир нуқтага йиғилган ҳолда эстетик объектга йўналган палла сифатида ҳам тушуниш мумкин. ◀

**ИМПРЕССИОНИЗМ** (фр. impression – таассурот) – XIX асрнинг сўнги чорагида дастлаб рангтасвир санъатида пайдо бўлиб, кейин-чалик бошқа санъатларга ҳам сезиларли таъсир ўтказган йўналиш. Адабиётта татбиқан И. термини кенг ва тор маъноларда қўлланади. Кенг маънода И.га турли ижодий методлар доирасида кузатилган услуб ходисаси сифатида қаралади. Жумладан, импрессионистик услуб реалист санъаткорлар (Ги де Мопассан, А.П.Чехов, И.А.Бунин ва б.)ижодидида ҳам кузатилиб, реалистик тасвир имкониятларини кенгайтиришга хизмат қилган. И. услуби оламни янгича кўришга ин-тилиш маҳсулидир, унинг дастлаб рангтасвирда қарор топгани ҳам шундан. Бу услубда тасвирланган нарса реалликдагига монанд аниқ ва мукамал шакл касб этмайди: у гўё штрихлар билан чизилади ва ҳар бир штрих ўзида ўша нарсадан олинган оний таассуротни акс эттиради. Шунга қарамай, бу штрихлар бутун таркибида бир-бири билан узвий алоқадор, таассуротлар бирлиги ўша нарса ҳақидаги яхлит тасаввурни бераверади. Шунга ўхшаб сўз билан амалга оши-рилган импрессионистик тасвирда ҳам оний таассурот қайд эти-лади: гўё воқеядаги нарса-ҳодисалар маълум мақсаддан келиб чиққан ҳолда сайлаб эмас, таассуротлар асосида тасодифий тарз-да тасвирдан жой олади. Натижада реалистик тасвирга хос муҳим деталларни мақсадли танлаш («сахнада милтиқ бўлса, у отилиши керак») ва шундан келиб чиқувчи барча деталларнинг бир-бирига боғлиқлиги тамойили бузилади, тасвирланган нарса тасаввурда ях-лит шакл-шамойили билан жонланмайди. Лекин деталларнинг ASSO-

циатив алоқалари бутунликни ҳосил қилаверади, чунки тасвир битта субъект нигоҳи орқали берилган, фақат бу нигоҳ оламни фотоаппарат объективи каби эмас, чин маънода «қалбдан ўтказиб» кўради. Бу эса тасвирга сержилолик, кўпмаънолилик, эмоционал тўйинтирилганлик бахш этади, унинг эстетик таъсир кучини оширади. Шу жиҳатлари туфайли импрессионистик услуб хусусиятлари *реализм, натурализм, неоромантизм, символизм* сингари турли ижодий таъмоилларга таянган адабий йўналиш ва оқимларга мансуб ижодкорлар эътиборини тортди, услубининг таркибий қисмига айланди.

Мазкур хусусиятларни мутлақлаштириш, уларни услуб ҳодисаси эмас, дунёни янгича кўриш ва идрок этиш деб билиш оқибатида ХХ аср бўсағасига келиб И. алоҳида йўналиш, ижодий метод сифатида шаклланди. Бу метод инсон онгининг оний ҳолатларида ҳосил бўлувчи, фақат ҳис этилиши мумкин бўлган тутқич бермас таассуротларнигина ҳақиқий деб билди. Шунга кўра, у сирли ишораларга асосланган образлар яратади, уларнинг ёрдамида инсон онгининг чуқур пучмоқларига назар солмоқчи бўлади. Айни шу жиҳатлари билан у «онг оқими» адабиётига асос яратди. Алоҳида адабий йўналиш (ижодий метод) сифатидаги И. ХХ аср ўрталарига келиб барҳам топди.

**ИМПРОВИЗАЦИЯ** (лот. *improvisus* – қутилмаган, бирдан) – бадиий ижоднинг алоҳида бир кўриниши бўлиб, бунда асар бевосита ижро жараёнида яратилади. И. кўпроқ ижро билан боғлиқ санъат турлари (музыка, рақс, театр санъати)да, шунингдек, шеърятда кузатилади. И.нинг илдишлари фольклордан сув ичади. Халқ бахшилари (аздлар, бардлар, қубизчилар, оқинлар, ошиқлар ва б.) фольклор намуналарини ижро қилиш жараёнида И. йўли билан уларга янгиликлар қўшиб боришган, шу йўл билан янги асарлар яратишган. Жумладан, термаларни ижро қилиш, айтишувларда И.нинг роли ва улуши сезиларли бўлган. И. фольклордан ёзма адабиётга, хусусан, шеърятга кўчган. Ўтмишда мунтазам ўтказиб турилган нафис мажлислардаги шеърхонликнинг ижро билан боғлиқлиги бунга асос бўлган. Шеърятдаги И.нинг ўзига хослиги аввалдан муайян мавзу белгилаб қўйилиши, яъни маълум шарт асосида воқе бўлишидир (қ. *бадиҳа, экспромт*).

**ИНВЕКТИВА** (лот. *invehor* – ташланмоқ, хужум қилмоқ) – бирон шахс, ижтимоий гуруҳ ёки ҳодисани кескин танқид қилиш, фош этиш, қоралашга қаратилган нутқ. Жанрларни мазмун жиҳатидан таснифлаган ҳолда баъзан И.ни алоҳида лирик жанр деб кўрсатиш ҳоллари

ҳам учрайди. Бироқ бу унчалик тўғри эмас. Чунки И. турли адабий шакллар, турли жанрларда намоён бўлади. Мас., антик Римдаги айблов нутқлари (Цицерон. «Филиппикалар»), айрим *эпиграмма*лар, *памфлетлар, хатлар* И. намунаси саналиши мумкин. ХХ аср ўзбек шеърятига И. руҳида кўллаб шеърлар яратилган. Жумладан, Чўлпоннинг «Улуғ Британиянинг бу кунги ҳукуматига», «Кўзголиш», Ғафур Ғуломнинг «Шараф қўлёзмаси» каби шеърлари И.га мисол бўла олади.

**ИНВЕРСИЯ** (лот. *inversion* – ағдариш, ўрнини алмаштириш) – гап бўлақларининг одатдаги тартибини ўзгартириш асосида юзага келувчи синтактик усул, стилистик фигура. И. гапдаги бирон-бир сўз ёки сўз бирикмаси (гапнинг бир қисми)ни эмфатик ёки мантиқан ажратиш, шеърый нутқни ритмик-интонацион жиҳатдан ташкил этиш (қофияланувчи сўзни керак ўринга ўтказиш) каби мақсадларда қўлланади. И. шеърый нутқда энг кўп қўлланувчи, деярли барча шеърларда учрайдиган синтактик усулдир. И. маъно ургуси тушаётган сўзни таъкидлаб кўрсатиш, уни мисрадаги ургули позиция – кўпроқ мисра охирига суриш имконини беради. Мас., А.Ориповнинг «Улуғвор бир қудрат билан Чайқалади чўнг денгиз» сатрлари синтактик сатҳдаги нормадан оғиш бўлмаган ҳолда «Чўнг денгиз улуғвор қудрат билан чайқалади» тарзида берилиши керак. И. ҳодисасининг юз бериши натижасида, «қудрат билан» сўз қўшилмаси ва «денгиз» сўзи мисраларда ургули позицияга ўтади, айни шу сўзларга маъно ургусининг тушиши муаллиф ижодий ниятига, шеър мазмуни ва эмоционал тоналлигига мувофиқ келади. Шеърнинг кейинги сатрлари – «Қанча оғир харсанг тошлар Тубда унга чўккан тиз» – И.нинг ритмик-интонацион функциялари ҳам борлигини кўрсатади. Одатдаги тартибда бу мисралар «Тубда унга қанча оғир тошлар тиз чўккан» шаклида бўлиши лозим эди. Инверсия натижасида, биринчидан, ифодалаш кўзланган мазмун учун энг муҳим сўзлар («харсанг тошлар», «тиз чўккан») ургули позицияга ўтказилади, иккинчидан, «денгиз» ва «тиз» сўзлари қофияланади. Ўхшашлик асосида синтактик И. билан бир қаторда баъзан композицион И. ҳақида ҳам гапириладики, бунда сюжетда воқеаларнинг юз бериш тартибига мос бўлмаган тарзда жойлашиши (яъни даврий жиҳатдан аввал юз берган воқеанинг кейин тасвирланиши) назарда тутилади.

**ИНСЦЕНИРОВКА** (лот. *in* – га, *scena* – сахна) – аслида сахнага мўлжаллаб ёзилмаган асарларни (кўпроқ, эпик асарларни) сахналаштириш учун қайта ишлаш. И. сахналаштирилиши мўлжал-

ланган асарнинг гоёвий-бадий хусусиятларини (асосий мазмуни, сюжети, услуги ва ш.к) қайта яратишни тақозо этади. Бу эса, оригиналга нечоғлик боғланган бўлмасин, И. қилувчидан маълум даражадаги ижодийликни ҳам талаб этиши шубҳасиз, чунки асарни саҳнага мослаштириш ундан ниманидир олиш, нималарнидир қўшишни тақозо этади. Яъни И. қилинган асар оригиналнинг асосий мазмуни, муҳим сюжет чизиқларини сақласа ҳам, унга тенг бўлмайди, моҳиятан у тамом бошқа асардир. Худди шу ҳол кўплаб ижодкорлар, талабчан ўқувчиларнинг И.га нисбатан салбий муносабатини келтириб чиқаради. Радио ва телевидениенинг ривожланиши билан боғлиқ ҳолда И.нинг *радиоинсценировка*, *телеинсценировка* каби кўринишлари пайдо бўлди.

**ИНТЕРМЕДИЯ** (лот. *intermedius* – ўртада жойлашган, ичидаги) –

1) ўрта асрлар театрларида ўйналаётган асосий спектаклнинг парда ораларидаги танаффус пайти ижро этилган маиший мавзудаги кичик ҳажвий саҳна кўриниши; 2) эстрада санъати ва телевидениенинг ривожланиши билан боғлиқ ҳолда фаоллашган комик характердаги кичик драматургик жанр, баъзан миниатюра номи билан ҳам юритилади. Ўзбек адабиётида С.Аҳмад, Алп Жамол каби ижодкорларнинг «Телевизион миниатюралар театри» учун ёзилган И.лари халқимиз орасида шухрат топган. Шунингдек, ҳозирги вақтда турли маданий-маърифий тадбирларда (кўриқлар, қувноқлар ва зукколар баҳси ва ҳ.) ижро этилаётган маиший мавзулардаги саҳна кўринишларини ҳам И. санаш мумкин. Ушбу саҳна кўринишларини ҳаваскорларнинг (кўпинча коллектив тарзда) ўзлари ёзиши эътиборга олинса, уларни замонавий фольклор намунаси дейиш мумкин.

**ИНТЕРПРЕТАЦИЯ** (лот. *interpretation* – тушунтирма) – талқин; адабий асар мазмунини идрок қилиш, унинг мазмуни, бадий концепциясини англаш, тушуниш. Кенг маънода И. ўзга томонидан айтилган гап, ёзилган асар (илмий, фалсафий, диний, бадий ва ҳ.) мазмунини бир бутун сифатида тушуниш ва тушунтириб бериш маъносини билдиради. Бадий И. турли кўринишларда, жумладан, бадий мазмунни, яъни асардаги «образлар тили»ни мантиқий тушунчалар тилига (танқид, адабиётшунослик), лирик-публицистик (эссе-чилик) ёки бошқа бир «бадий тил» тизимига (рассомлик, кино, театр ва б.) ўгириш орқали амалга ошади. И. адабиётшунос фаолиятида етакчи ўрин тутадиган бирламчи амал, чунки адабий асар ҳақида фикр билдириш ва баҳолаш учун, аввало, уни бир бутун сифатида

тушуниш талаб қилинади. Шунинг учун И. бадий таҳлил жараёнида ҳар вақт ҳозир бўлган муҳим ва белгиловчи амал ҳисобланади (қ. *бадий таҳлил*).

**ИНТЕРТЕКСТУАЛЛИК** (лот. *inter* – аро, *textum* – тўқима, мато, матн) – фанга француз филологи Ю.Кристева киритган термин. Унга кўра, ҳар қандай матн аввал мавжуд бўлган матнларни трансформация қилган ҳолда ўзига сингдирган цитаталар мажмуидир. Мутахассислар И. концепцияси рус олими М.Бахтин қарашларини ривожлантириш, бошқача айтганда, қайта идрок этиш асосида вужудга келганини таъкидлайдилар. М.Бахтин адабиётнинг мавжудлик қонуниятлари ҳақида тўхталиб, ҳар қандай асар ўзида ижодкор воқелигини акс эттиргани ҳолда, ўзидан аввалги ва ўзига замондош адабиёт билан мунтазам диалогик алоқада бўлади, яъни адабиётнинг мавжудлиги интерсубъектив характерга эга деб билади. М.Бахтин таълимотининг формал томониغا ургу берган Ю.Кристева эса диалогни матнлар доираси билан чеклаб, *интерсубъективлик* ўрнига *интертекстуаллик*ни олдинги планга чиқаради. И. тушунчаси структурализм ва постструктурализм йўналишидаги адабиётшуносликда жуда тез оммалашди. Жумладан, француз адабиётшуноси Р.Барт ҳам И.ни кўллаб-қувватлайди, ҳар қандай матн «қўштирноқсиз цитата» деб билади. Яъни, унга кўра, ҳар қандай матн моҳиятан интертекст бўлиб, унда аввалги ва жорий маданиятга оид матнлар у ёки бу даражада таниб олиш мумкин бўлган алфозда мавжуддир. Албатта, адабий асар ўзидан олдинги ва жорий замондош адабиёт билан диалогик алоқада экан, унда бошқа матнларнинг излари сезилиши (қ. *реминисценция*) табиий. Бироқ постструктуралистлар бу ҳолни мутлақлаштирадилар, уни бадий асар табиатини белгиловчи қонуният мақомига кўтардилар. Аввало, улар матнни гоёят кенг тушунишади: адабиёт, маданият, жамият, тарих, инсон – буларнинг бари матн, бари матн тарзида ўқилиши ва ўқилиши мумкин. Шундан келиб чиқиб инсоният маданияти тўлалигича битта интертекст сифатида тушунилдики, у янги яратилаётган ҳар қандай матнга асос (подтекст) бўлиб хизмат қилади. Демак, янги яратилаётган матн субъекти маданиятнинг улкан интертекстини ташкил қилаётган саноксиз матнларга сингиб кетади, йўқолади. Шу тариқа матн муаллифи интертекстуал ўйин проекция қилинадиган бўшлиқ деб тушунилади, матнга эса индивиднинг мақсадли фаолияти эмас, онгсиз тарзда амалга ошувчи «интертекстуал ўйин» маҳсули сифатида қаралади. Бу эса бадий ижодда индивидуалликни инкор этиб,

табий равишда, «субъект ўлими» (Фуко), «автор ўлими» (Р.Барто) концепцияларига боғланади.

**ИНТИМ ЛИРИКА** (лот. Intimus сўздан фр. intime – ички, ўта шахсий) – лириканинг тематик жиҳатдан таснифлаш асосидан ажратилувчи бир тури, лирик қаҳрамоннинг ишқий кечинмаларни тасвирланган лирик асарлар. Муҳаббат қадимданоқ шеърятнинг диққат марказида турган ва ҳануз интенсив ишланиб келаётган «мангу мавзу»ларидан бири саналади. Ижтимоий-сиёсий лирика ҳар жиҳатдан рағбатлантирилган шўро даврида И.л.га менсимасдан, ижтимоий аҳамиятга молик бўлмаган ҳодиса сифатида паст назар билан қаралган. Ҳолбуки, ижтимоий ҳодиса бўлмиш инсоннинг қалби муҳаббат туфайли тозаради, муҳаббат уни маънан юксалтиради: муҳаббат кўтарган юксалиқдан туриб тоза қалб билан боққанда, оламнинг гўзаллиги ҳам, ҳикматлари ҳам яққол кўринади; ёрга муҳаббат билангина лиммо-лим тўлгандек кўринган қалб оламни тўласича қамрашга қодир. Шу боис жаҳон адабиёти И.л.нинг гўзал ва бетакрор намуналарини бера олганки, улар инсониятнинг бебаҳо маънавий мулкига айланган. Жумладан, Ҳофиз ва Навоий, Петрарка ва Шекспир, Пушкин ва А.Блок, Чўлпон ва Миртемир каби кўплаб шоирлар яратган И.л. намуналари ҳануз севиб ўқилади, юксак қадрланади, зеро, улар муҳаббатнинг ўзи каби боқийдир.

**ИНТОНАЦИЯ** (лот. intone – кучли талаффуз этаман) – жонли нутқнинг ифодавийлигини таъминловчи асосий омил, тилнинг фонетик воситалари (товуш тони, талаффуз темпи, тембр, паузалар, мелодика, мантиқий ва эмфатик ургулар) мажмуи. И. жумла мазмунининг реаллашувида (яъни сўзловчи юклаётган мазмун, хабар қилинаётган нарсага модал муносабат, суҳбатдошга муносабат ва ш.к.ларнинг ифодаланишида) ҳал қилувчи аҳамиятга эга ёзма нутқда И. жумла қурилиши, шунингдек, тиниш белгилари, график воситалар (маълум сўз ёки бўлакни остига чизиб, курсив, қорайтириш ёки бош ҳарфлар билан ёзиб таъкидлаш; сўзларни ўзгача тарзда, мас., бўгинларга ажратиб, айрим товушларни иккилан-тириб ва б.) орқали берилади. Бироқ мазкур воситалар ҳам жонли нутқ И.сини тўлиқ беришга қодир эмас, ёзма нутқ И.си «ички қулоқ» билан ҳис қилинади, демакки, бунгача у хаёлан «талаффуз этилади». Нутқ ҳодисаси саналувчи бадиий асар мазмунини ифодалаш ўқувчига ғоявий-эмоционал муносабатни юқтириш ва шу асосда унга муайян эстетик таъсир ўтказишда И.нинг жуда катта роли

борки, у шеърин нутқда, айниқса, муҳимдир. Адабиётшуносликда поэтик И. ҳақида гап кетганда кўпроқ шеърин нутқ назарда тутилиши ҳам шундан. Шеърин нутқнинг туроқ, мисра ва бандларга бўлиниши, уларнинг ҳар бири турли узунликдаги паузалар билан ажратилиши, поэтик синтаксиснинг ўзига хослиги шеър ритмик-интонацион қурилишини белгилайди. Ёзувда шеър И.сини таъкидлаб кўрсатиш, уни ўзига хос тарзда кодлаштиришда эмфатик ургулар, қофияланиш тартиби, мисрадаги сўзларнинг алоҳида қаторга чиқарилиши, турли сатҳдаги (товуш, сўз, мисра) такрорлар, синтактик параллелизмлар, турли график воситалар ҳам муҳим аҳамият касб этади. Кўринадики, шеър И.си унинг синтактик қурилиши, график ифодаланиши билан бевосита боғлиқ экан. Бунгача, асосан, шеърнинг шаклий томони ҳақида гапирилди. Бироқ шунинг ўзи билан қофияланиш камлик қилади, чунки И.ни белгилашда тил воситалари орқали ифодаланаётган мазмун ҳам катта аҳамият касб этади. Зеро, аслида, шеърнинг илк мисрасидаги сўзлар, унинг жумла қурилиши бизга И.дан дарак беради. Мас., «Тарихингдир минг асрлар ичра пинҳон, ўзбегим» (Э.Воҳидов) ёки «Юртим, сенга шеър битдим бугун» (А.Орипов) мисралари ўқувчини тантанавор, ифтихор билан тўлиқ И.га; «Олти ойким, шеър ёзмайман, юрагим зада» (А.Орипов) ёки «Дўстим, дилда не бор сўзлайин сенга» (Р.Парфи) мисралари ўйчан, фалсафий мушоҳадага мойил И.га созлайди. Демак, шеър И.си унинг синтактик-семантик қурилиши, ритмик ташкилланиши, график ифодаланиши орқали юзага чиқади дейилса, тўғрироқ бўлади.

**ИНТОҚ** (ар. انطاق – сўзлатиш, гапиртириш) – мумтоз адабиётдаги шеърин санъат, бадиий асарда ҳайвонлар, қушлар ва жонсиз нарсаларни худди инсонлар каби сўзлатиш. И. шоирга ўзининг кечинмалари, борлиққа муносабати, ҳаёт ҳақидаги фалсафий мушоҳадаларини билвосита ифодалаш имконини беради. И. санъатининг илдизлари қадимги асотир ва афсоналар, эртак ва достонларга бориб тақалади. Кейинчалик ушбу усул ёзма адабиётда ҳам кенг қўлланилган. Жумладан, ёзма адабиётдаги мунозара, масал каби жанрлар, асосан, И. санъати асосида яратилган. Адабиёт тарихида мазкур санъат асосида «Мантиқ ут-тайр», «Лисон ут-тайр» каби йирик асарлар ҳам ёзилган. И. фаол қўлланувчи бадиий усуллардан бўлиб, унинг гўзал намуналари даярли барча мумтоз шоирларимиз ижодида, шунингдек, ҳозирги шеърятда ҳам кўплаб учрайди. Мас., А.Ориповнинг:

*Шевирлаб гуллар деди: «Кирма бу боққа, эй йигит,  
Бунга кирганлар кирурлар сочини қор этгали», –*

байтида И. санъати моҳирона қўлланган.

**ИНТРИГА** (лот. *intrico*, фр. *intrigue* – чалкаштираман) – воқеабанд асар персонажларининг ўз олдига қўйган мақсадларига эришиш йўлидаги мураккаб, тобора чигаллашиб боровчи хатти-ҳаракатларининг ҳақиқий мақсадини яширган ҳолда ишлатган турфа хийла-найранглари. Одатда, бундай хатти-ҳаракатлардан қарши томон бехабар қолади, бу эса сюжет воқеаларининг қизиқарли, асарнинг ўқишли бўлишига хизмат қилади. Шунга кўра, И. саргузашт типидеги, авантюра сюжет асосига қўрилган асарларда, айниқса, кенг қўлланилади. И. асар воқеаларини, қаҳрамонлар тақдирини чалкаштириб юборади, тўқнашувларни кучайтиради, сюжетнинг у ёки бу томон ривожланишига тўртки беради. «Ўткан кунлар» романидаги Ҳомиднинг Қумушга эришиш йўлидаги хатти-ҳаракатлари (чақув, сохта талоқ хати, рақибини маҳв этишга интилиш, Қумушни олиб қочиш режаси) И.нинг ёрқин намунаси бўла олади.

**ИРОНИЯ** (юн. *eironia* – айнан, ўзини гўлликча солиш) – қаранг: киноя

**ИРСОЛ УЛ-МАСАЛ** (ар. *ارسال المثل* – мақол, масал келтириш) – мумтоз адабиётдаги шеърини санъатлардан бири, шеърда маълум бир поэтик мақсадда машҳур мақол, матал ёки ҳикматли сўз келтириш. Шоир бирор фикрни ўртага ташлар экан, ўз фикрининг исботи, изоҳи, тасдиғи учун халқ мақоллари, ҳикматли ибораларни тамсил йўли билан келтиради. Бу уч хил кўринишда амалга ошиши мумкин:

1) мақол ёки матал «масалдурким», «масалким», «дерлар», «айтадиларки», «элда бор шундай масал» каби ишоралар билан келтирилади:

*Касб этар шоҳи Бухоро ҳазрати Хондин камол,*

*Бу масалдур: «Ой этар хуршиддин нур иқтибос» (Нодира).*

2) мақол ёки матал ҳеч қандай ишораларсиз айнан келтирилади:

*Ерга кирсам кошки, чун етмас ул ойга илик,*

*Мушқул аҳволе тушубдур: «Ер қатик-у, кўк йироқ» (Лутфий).*

3) мазмуни байт ёки мисра ичига сингдириб юборилгани ҳолда, мақол ёки матал ўз шаклини бутунлай йўқотиши, бир оз ўзгартириши ёки янгича шаклга келиши мумкин:

*Севги дардидан менинг ҳам бўлди рангим қаҳрабо,  
Йўқ илож, не наф ўкинмак бўлмаса кўзгуда аёб (Э.Воҳидов).*

Маъжур байтда «Юзинг қийшиқ бўлса, ойнадан ўлқалама» мақоли ўзгарган шаклда берилляпти.

Агар байтда ишлатилаётган мақол ёки маталлар сони икки ёки ундан ортиқ бўлса, *ирсол ул-масалайн* дейилади. Мас., Атойининг:

*Бўлди бағрим су гамингдин, яхшилик қил сол суға,*

*Охир, эй гул, хирманни, албатта, ҳар эккан ўрар, –*

байтида «яхшилик қил, суғга от» ва «ҳар ким экканини ўради» мақоллари сингдириб юборилган.

**ИРСОЛ УЛ-МАСАЛАЙН** (ар. *ارسال لمثلين* – мақоллар, масаллар келтириш) – қаранг: **ирсол ул-масал**

**ИСТИДРОК** (ар. *استدراك* – англамок) – мумтоз адабиётдаги шеърини санъат, ҳажв йўли билан бирор фикрни айтиб, сўнг ундан кетгандай, ҳажвани мадҳга айлантириш. Бунинг моҳияти шундан иборатки, тўғри шоир аввал ўзи билмай йўл қўйган хатосини, келтирган нотўғри ташбеҳини англаб, сўнг хатони тўғрилаш учун ундан кучлироқ ташбеҳ келтиради. Айни шу жиҳати билан И. ружуъга яқин туради, шунинг учун илми бадиъга оид айрим манбаларда унга ружуъ(к.)нинг бир кўриниши сифатида қаралади. Уларнинг фарқи шундан иборатки, И.да аввалги фикрнинг ҳажв йўли билан айтилиши шарт қилинади. Шу туфайли ҳам кўпчилик алломалар (мас., Рашидиддин Ватвот) И. қўлланган ўринларда «ўқувчи ёки тингловчи келтирилган ҳажв билан чалғиб, кейинги ташбеҳдан лаззат топа олмайди» деган ваъж билан уни маъқул кўрмаганлар.

**ИСТИОРА** (ар. *استعارة* – вақтинча омонатга, ориятга олмоқ) – мумтоз адабиётдаги шеърини санъат, бир сўз шаклини вақтинча «омонатга олиб», бошқа, яъни кўчма маънода ишлатиш. И.да сўзни ўз маъносидан бошқа маънода ишлатиш ўхшашлик асосида амалга ошади. А.Ҳусайний таъкидича, И.ни «ажам шуароси санойий» қабилдан, араб фусаҳоси эса каломнинг зотий гўзалликларидан деб ҳисоблаганларки, бунда муайян асос бор. Ҳақиқатан ҳам тил ҳодисасига айланиб бўлган (мас., «кун ботди», «хўроз» ва ҳ.) И. билан ҳали тил ҳодисасига айланиб улгурмаган (яъни санъаткорона нигоҳ билан кўрилган ўхшашлик асосидаги образли ифода) И. бадиий-эстетик қиммат жиҳатидан тенг эмас, уларнинг биринчиси зотий гўзалликларга, иккинчиси оризий гўзалликларга (қ. *санойий*) мансуб этилиши тўғри бўлади. Мас., Навоийнинг:

*Ул ой авсофини аҳли замондин  
Эшитур эрди бал яхши-ямондин, –*

байтидаги «ой» сўзи «ернинг табиий йўлдоши» маъносидан «омонатта олиниб», «ёр» маъносида ишлатилган ва ўзига хос образли ифода юзага келган. Бир қарашда ой сўзини маъшуқа, ёр маъноларида ишлатиш нотабиийдек туюлса-да, нур таратиб турган ой билан ёрнинг нурли жамоли ўртасидаги ўхшашлик мана шу нотабиийликни табиий, гўзал ифодага айлантиради. Бу эса «фасоҳату балогат ар-боби қршинда ҳақиқаттин яхшироқдир» (А.Хусайний). Илми бадийга оид манбаларда И. билан ташбеҳи киноятга берилган таърифлар ўртасида фарқ сезилмайди. Бу бежиз эмас, чунки моҳиятан И. биргина *мушаббихун биҳ* иштирок этган *ташбеҳдир* (к.).

**ИСТИФҲОМ** (ар. *استفهام* – сўрамоқ) – иншо йўлларида бири, фикрни ифодалаш усули, ўй-фикр, ҳис-туйғу, кечинмаларнинг савол шаклида баён этилиши. И. да савол беришдан мақсад бирор ноаниқ нарсага аниқлик киритиш эмас, балки сўроқ шаклида чиройли ташбеҳ қўллаш, ўз кечинмаларини баён этиш, ҳаётини хулосаларини айтишдир. Бошқа томони, *тажохули ориф* (қ.)дан фарқли равишда, И.даги сўроқ риторик характерда бўлмайди, яъни у мазмунан сўроқ гапдир. Мас., Лутфийнинг:

*Кўкарди чаман, гулузорим қани?  
Сихи сарв бўйлуқ нигорим қани? –*

байтидаги савол орқали ҳукм ифодаланаётгани йўқ, балки савол шаклида маъшуқа таъсиф этилмоқда ва шу орқали лирик қаҳрамон дилидаги ҳижрон, соғинч ҳислари ифодаланмоқда.

**ИСТИҲРОЖ** (ар. *استخراج* – келтириб чиқармоқ) – мумтоз адабиётдаги шеърий санъат, байтда қўлланаётган ташбеҳларда араб ҳарфларини *мушаббихун биҳ* вазифасида келтириб, уларнинг йиғиндисидан бирор сўз чиқариш. И. санъатини юзага келтиришда араб ҳарфларининг турли шакллари билан бирор нарса (кўпроқ ёрнинг бирор аъзоси) ўртасидаги ўхшашлик асос бўлади. Мас., Навоийнинг машҳур «Жонимдаги жим...» деб бошланган рубойида сочининг гажаги билан «жим» (ج) ҳарфи, тик қомат билан «алиф» (ا), эгилган қош билан «нун» (ن) ҳарфи, кўз қорачиғи билан «жим» ва «нун»нинг нуктаси ўртасидаги ўхшашликдан фойдаланиб

«жон» (جان) сўзи келтириб чиқарилган. Оғаҳийнинг «Устина» ра-дифли ғазали матлаъсида «нас» (نص) – «ҳукм» сўзининг келтириб чиқарилиши ҳам И.нинг яхши намунаси. Яна бир мисол, Сўфи Оллоёрнинг:

*Калиди ганжи маъниким забондур,  
Анга бир нуқта кўп бўлса зиён-дур, –*

байтида муҳим ахлоқий масала ўртага ташланиб, «забон» – (زبان) сўзига битта ортиқча нуқта қўйиш орқали «зиён» – (زيان) сўзи келтириб чиқарилмоқда. Муҳими, мазкур мисоллардаги сўз ўйинлари мазмунни гўзал поэтик шаклда, ўқувчи шуурида муҳрланиб қоладиган тарзда ифодалашга хизмат қилади.

**ИТНОБ** (ар. *اطناب* – қўп сўз, оз маъно) – қаранг: **ийжоз**

**ИТТИФОҚ** (ар. *اتفاق* – ўзаро мувофиқлашиш) – мумтоз адабиётдаги шеърий санъат, шеърда шоир таҳаллусининг ҳам лугавий маъносида, ҳам таҳаллус сифатида ишлатилиши. Яъни шоир мақтаъда ўз таҳаллусини келтираётган бўлса-да, байт мазмуни уни лугавий маънода ҳам тушунишни тақозо этади. И. санъати қўлланган байтларни Гадоий, Бобур, Феруз, Фурқат, Чўлпон, Э.Воҳидов каби шоирлар ижодида кўплаб учратиш мумкин. Мас., Бобурнинг:

*Оёғим етганча Бобурдек кетар эрдим вале,  
Сочининг савдоси тушди бошимга боштин яна, –*

байтида Бобур сўзини шоир номи маъносидан кўра лугавий маънода, яъни «шердек қайтмас бўлиб кетардим» маъносида англаш ўқувчига кўпроқ эстетик завқ беради. Қуйидаги байтларда ҳам И. санъатидан моҳирона фойдаланилган:

*Гарчи эрурман толеи Феруз ила оламга шоҳ,  
Лек ул парилар сарвари олдидадурман қул букун (Феруз).*

*Муҳаббат осмонида гўзал Чўлпон эдим, дўстлар,  
Қуёшнинг нурига тоқат қилолмай ерга ботдим-ку (Чўлпон).*

*Санга ўн тўртта боғландим, ҳануз Эркин бўлполмас дил,  
Ўзим доғман, ақл кирмас, тўзимсиз ўттизимдан ҳам (Э.Воҳидов).*



*Дамлар шиквасига учма, Омон бўл,  
Фазлу камопингни эл билса бўлди (Омон Матжон).*

**ИФРОТ** (ар. *افراط* – ҳаддан ошиш, ошириш) – қаранг: **муболага**  
**ИЧКИ МОНОЛОГ** – персонажнинг моддийлашмаган, ўзига қаратилган ва ичидагина кечувчи нутқи; бадиий психологизмнинг бевосита шакли. И.м. шартли равишда инсон онгида кечаётган ўйлов (ҳис этиш) жараёни сифатида қабул қилинади. Персонаж руҳиятини тасвирлаш воситаси сифатида И.м. антик драматургиядаёқ маълум бўлган, уйғониш давридан, айниқса, кенг қўлланила бошлаган. Драматик асарлардаги И.м.ларда «икки қарра шартлилик» кузатилади. Чунки драмадаги И.м. моддийлашади – талаффуз этилади, лекин персонаж сахнада ёлғизлиги ва нутқининг ўзига қаратилгани шартлилик асосида бу гапларни ҳақиқатда воқе бўлмаган, балки унинг онгида кечган жараён имитацияси деб қабул қилишни тақозо этади. Шунга ўхшаб персонажнинг бошқа персонажлар билан мулоқот чоғида «четга» гапириши ҳам ҳақиқатда гапирилмаган деб қабул қилинади. Янги давр ривожий эпик асарларида ҳам И.м. сахनावийлик хусусиятини сақлаб қолади: унинг воситасида персонаж юз бераётган воқеаларни мушоҳада қилади, изланади, ўзини тафтиш қилади, изҳор этади, иқдор қилади ва ҳ. – шу тарзда унинг руҳияти драматиклаштирилади. Инсон ички олами, унинг туйғу-кечинмаларини биринчи ўринга қўйган сентиментализм адабиёти И.м.ни кенг истифода этиш билан бирга унинг имкониятларини кенгайтиришга ҳам катта ҳисса қўшди. Реалистик адабиёт эса И.м.ни инсон онгида кечувчи жараёнларга яқинлаштиришга интилди. Гап шундаки, реализмга қадар И.м. грамматик жиҳатдан тартибга солинади, унда мантиқий изчиллик кузатилади. Ҳақиқатда эса инсон онгидаги ўйлов (ҳис этиш) жараёни бундай батартиб кечмайди: унга зиддиятлар, парадокслар, чалғишлар, узилишлар ва ш.к.лар ҳам хосдир. Реалистик адабиёт, бир томондан, ўйлов жараёнини тартибга солишни мукамаллаштирди, иккинчи томондан, унинг мураккаб томонларини ҳам акс эттиришга интилгани учун И.м.га ўрни билан грамматик ва мантиқий жиҳатдан изчил тартибга солинмаган унсурларни ҳам киритди. Хусусан, Л.Н.Толстой ва Ф.М.Достоевский асарларида И.м. персонаж онгида ёзувчи аралашувисиз кечаётган жараён тасвири сифатида берилиб, онг ва онгости қатламлари фаолиятини бутун мураккаблиги, зиддиятлари билан тасвирлашга ҳаракат кузатилади. Бу икки адаб. тажрибалари асосида И.м.ни буткул эркин

кечаётган психик жараён сифатида тасвирлаш, худди шундай эффект ҳосил қилишга интилиш кучайди ва бунинг натижаси сифатида XIX – XX асрлар чегарасида И.м.нинг «онг оқими» шакли вужудга келди (қ. *онг оқими*).

Ҳозирги адабиётда ҳам И.м. персонаж руҳиятини тасвирлашнинг энг муҳим воситаларидан бири бўлиб, унинг асрлар давомида сайқалланган турли шаклларида персонаж руҳиятини очиб беришда кенг фойдаланилмоқда.

**ИШБО** (ар. *اشباع* – тўйдириш) – қаранг: **муқайяд қофия**

**ИШТИҚОҚ** (ар. *اشتقاق* – ёриш, бўлиш, сўздан сўзни ажратмоқ) – мумтоз адабиётдаги шеърий санъат, шеър ёки насрда бир ўзакдан ташкил топган сўзларни ишлатиш. И. санъатида насрда бир жумла ичида, шеъриятда бир байт, рубоий, туюқ, ғазал ёки қасида доирасида ўзакдош сўзлар икки ёки ундан ортиқ ўринда келтирилади. И.дан мурод ўзакдош сўзларни шунчаки келтириб шеърга безак бериш эмас, бунда ўзакдош сўзлар орасидаги маъно алоқадорлиги асосида мазмунни тиниқ ва тётан, хушоҳанг ифода-лаш каби муҳим эстетик самаралар кўзланади. Мас., Навоийнинг:

*Фигонким, кўнглим олгон дилбарим дилдорлиғ билмас,  
Билур ошиқни ғамгин қилмоқу ғамхорлик билмас, –*

байтида «дилбар – дилдор», «ғамгин – ғамхорлик» ўзакдош жуфтликлари бир-бирига қарши қўйилади ва шу асосда ошиқнинг изтироблари ёрқин ифода этилади. Айрим ҳолларда И. *тақрир* (ёки *радд*)га ўхшаса-да, уларни фарқлаш жоиз. Мас., Навоийнинг:

*Сарвинозим гул чоғи гулшанга кирди, эй насим,  
Ҳам они елпи-ю, ҳам гул яфроғин бошига соч, –*

байтида «гул чоғи», «гулшан», «гул яфроғи» қаторидаги сўзлар ўзакдош эмасдек, бу ўринда шеърий санъат ўзакдош сўзларни эмас, балки «гул» сўзи такрори асосида юзага чиқаётгандек туюлиши ва бу ўринда И. эмас, *тақрир* санъати қўлланган деган янглиш хулосага келиб қолиш мумкин. Ҳолбуки, «гул чоғи» маълум бир пайтни (гуллаш вақтини), «гул яфроғи» эса нарсани («гулбарг») англатувчи қўшма сўзлар бўлиб, улар морфологик усулда ясалган «гулшан» сўзи билан ўзакдошдир.

**ИҚТИБОС** (ар. *اقتباس* – илм ўзлаштирмақ, ўзаро фойдаланмоқ) – мумтоз адабиётдаги шеърий санъат. Кенг маънода И. «бир сўз ёки ёзувни бўлгани каби ё қисқартириб олмоқ. Биридан илман истифода этмоқ... Сўз орасида Қуръони Каримдан ёхуд Ҳадиси Шарифдан ё бошқа мақбул асарлардан бир жумланинг тўлиқ ёки қисман оз тасарруф ила ёхуд тасарруфсиз олиниси»ни англатади ва бу маъносида И. *цитата* (к.) билан синонимдир. Шеърий санъат сифатида эса И. «Қуръон ё ҳадисдин бир нимани анинг Қуръон ёки ҳадисдин олинганига ишора бўлмаган тарзда қаломга киритмақтин ибораттур» (Атоулло Ҳусайний). Яъни И. санъати Қуръон ва ҳадис илми билан боғлиқ бўлиб, ижодкорнинг ўз фикрини шу икки мўтабар манбага таяниб асослашини англатади. И. санъати мумтоз адабиётимизда кенг қўлланган бўлиб, унинг икки нави мавжуд. Биринчи навида оят ёки ҳадис айнан келтирилади ва «дәрж» деб юритилади. Оят ёки ҳадисни айнан эмас, балки таржимаси ёки мазмунини келтириш эса «ҳалл» деб аталади. Демак, умумлаштириб айтиш мумкинки, байтда оят ёки ҳадисни ҳеч қандай ишорасиз айнан келтириш ҳам, байтга оят ёки ҳадиснинг мазмунини сингдириб юбориш ҳам И. саналади. Оят ёки ҳадисни байтга киритишдан мурод шунчаки бозак бериш эмас, балки муайян ғоявий-эстетик мақсад (фикрни тасдиқлаш, қувватлантириш, кучайтириш ва ш.к.) билан амалга ошади ва лирик қаҳрамон фикр-кечинмаларини ёрқин ифодалашга хизмат қилади. Мас., Ҳазинийнинг:

*Худовандо, Ҳазинийнинг гуноҳин мағфират айлаб  
Ки, дохили жаннат «мин тахтиҳ-ал-анҳар» бўлгайму? –*

байтидаги «мин тахтиҳ-ал-анҳар» («остиларидан дарёлар оқиб турувчи») жумласи Қуръони Каримнинг «Бақара» сураси 25-оятдан олинган. Мазкур оят (таржимаси)да шундай дейилади: *«Иймон келтириб, яхши амал қилган зотларга хушхабар беринг-ки, улар учун остиларидан дарёлар оқиб турувчи боғлар. Қачон ўша боғларнинг бирор меъвасидан баҳраманд бўлсалар, «Илгари тоғтиб кўрган нарсамиз-ку», – дейишади. Зеро, уларга сурати бир-бирига ўхшаган мевалар берилади. Ва улар учун жаннатда покиза жуфтлар бордур. У зотлар жаннатда абадий қолажақлар»*. Яъни бу ўринда И. лирик қаҳрамоннинг айни дамдаги руҳий ҳолатини ёрқин ифодалайди. Худога илтижо этаётган лирик қаҳрамон ўзининг осий банда эканини билади, шунга қарамай, умидворлик би-

лан яшайди, чунки Аллоҳнинг қарами кенглигига инонади, ундан мағфират тилаб, ўзини севимли бандалари, жаннатда абадий қолувчи зотлар қаторига қўшишидан умидвор бўлади. Албатта, шоир байтда айтмоқчи бўлган фикрлар, унинг айни дамдаги ўй-ҳислари И. орқали ишора қилинган манбадан хабардор кишиларга кўпроқ тушунарлидир.

**ИҒРОҚ** (ар. *اغراق* – чўктирмақ, чуқурлаштирмақ) – қаранг: **мубо-лаға**

# К

**КАЛОМИ ЖОМИЪ** (ар. *كلام* *сўз*, *جامع* – жамловчи, умумлаштирувчи) – мумтоз адабиётдаги шеърий санъат, шеърга ёки байтга панд-насихат, ўғит, ахлоқ-одобга оид ҳикмат, замондан ёки замондошлардан нолиш маъноларини сингдириш. Яъни К.ж. маънавий санъат бўлиб, у байт ёки шеърнинг маъно-мазмун томони билан белгиланади. Сираси, мумтоз шеъриятдаги деярли барча асарларда ё панд-насихат, ё бир ҳаётий ҳикмат, ё замондан, дўст-биродарлардан шикоят мазмуни мавжуд. Шу жиҳатдан қаралса, К.ж.нинг санъат саналишида муайян даражада шартлилик, анъанавийлик таъсири бор. Демак, мумтоз шоирларимизнинг минг-минглаб асарларини, байтларини бемаъл К.ж.га мисол сифатида келтириш мумкин. Мас., Навоийнинг «Топмадим», «Аввалгиларга ўхшамас», Бобурнинг «Қолдиму» радифли ғазаллари, қатор рубоийларида замондан, ёр-биродарлардан нолиш кузатилса, кўплаб асарларида панд-насихат, ахлоқ-одобга оид ҳикматлар акс этган. Дидактик йўналишда ижод қилган Яссавий, Сўфи Оллоёр, Ҳувайдо, Ҳазиний каби кўплаб шоирларнинг асарларида эса панд-насихат мазмуни устувордир. Мас., Яссавийнинг:

*Бедор бўлгил, эй мўъмин, саҳар вақти ичинда,  
Кутқор ўзунгни ўтдин саҳар вақти ичинда;*

Сўфи Оллоёрнинг:

*Уялма маърифатни ўрганурдин  
Жойинг танур бўлур, қолсанг танурдин;*

Ҳувайдонинг:

*Хоки пойи яхшилар бўл хок бўлмасдан бурун,  
Бу қаро ер кўйни сенга чок бўлмасдан бурун;*

Ҳазинийнинг:

*Худонинг ёди бирла йиғлагил шому саҳарларда,  
Яқонгни чок этиб, сан йиғлагил шому саҳарларда, –*

мисраларида мана шундай ҳолатни кузатишимиз мумкин.

**КАТАРСИС** (юн. *katharsis* – халос бўлиш, покланиш) – адабиётшуносликка Арасту томонидан киритилган термин. Арастуга кўра, томошабин трагедияни кўриш асносида ҳамдardлик ва кўркув туйғуларини ўзидаги шундай аффектлар (ҳис-туйғулар)дан тозаланади. Яъни К. эстетик кечинманинг моҳиятини ташкил қилиб, қахрамоннинг кечинмаларини қалбда қайта кечириш асосида воқе бўлади. Арасту даврдан буён ушбу термин турлича, баъзан ҳатто бир-бирига зид талқинларга учради. Шунга қарамай, ҳозирги адабиётшуносликда кўпроқ икки маънода фаол ишлатилади: 1) томошабиннинг драматик асар, айниқса, трагедия қахрамони билан у *катастрофа* (қ.га учраган онлардаги эмоционал алоқаси; 2) ҳар қандай адабий асарни ўқиш асносида юзага келадиган қахрамон, ўқувчи ва муаллиф онларининг учрашуви, асарнинг мазмун (маънавий) доирасини белгилаб, унга эстетик объект сифатидаги тугаллик бахш этувчи муҳим омил. Яъни бу маънода К. терминининг, гарчи у кўпроқ *трагизм* билан боғлиқ ҳолда тушунилса-да, доираси кенгайди, трагик К. билан бир қаторда унинг бошқа кўринишлари (мас., комик К.) ҳақида ҳам гапириш мумкин бўлади. Албатта, адабиётшунослик ва эстетикада бадиий асарни қабул қилиш (бадиий рецепция) муаммоларини ўрганиш чуқурлашиб боргани сари, К.нинг маъно диапазони кенгайиб, талқинлар турличалиги ҳам ортиб боради, шунга қарамай, термин ўзининг ўзак маъносини сақлаб қолмоқда.

**КАТАСТРОФА** (юн. *katastrophe* – бурилиш, тўнтариш) – трагедия ёки драма қахрамони ҳаётида кескин бурилиш юз берувчи ҳолат, ташқи ҳаракат динамикасига асосланган сюжетларда *перипетия* ўткир намоён бўлувчи нуқта, аксар ҳолларда *өчим* билан ҳам мос тушади. Мас., М.Шайхзоданинг «Мирзо Улуғбек» трагедиясида Улуғбекнинг тахтдан кечиши ва охири фармонни бериши ёки Уйғуннинг «Имон» драмасидаги ҳақиқат ошкор бўлган сахнани К.га мисол қилиб кўрсатиш мумкин. К. термини антик даврларда илмий муомалага киритилган бўлиб, ҳозирги адабиётшуносликда қўлланиши жиҳатидан пассив ҳисобланади.

**КИНОЯ** – 1) мумтоз адабиётшуносликда мажоз (кўчим)нинг бир тури. Атоулпоҳ Ҳусайний К.нинг лугавий маъносини «бир нимани

дерлар, лекин андин ўзга нимани ирода қилурлар» тарзида ифода-лайдики, бу таъриф кўчим термини маъносига яқин келади. Бироқ бошқа бир ўринда у фикрини қуйидагича аниқлаштиради: «...андин ибораттурким, бир маънони анга лозиму табиъ маъно учун ясолгон лафз ила ул тарзда таъбир қилурларким, агар ул лафзнинг ўз ясоғин ирода қилсалар ҳам раво бўлур...» Мазкур таърифга «фазл арби қошига кўп бориб келмак анга лозиму тобиъ бўлган кўп кафш йиртмоқ била таъбир этилиятур...» мисолининг келтирилганидан К. алоқадорлик асосидаги кўчим деб тушунилгани англашилади. Ҳозирда кўчимнинг бу тури *метонимия* (қ.) деб юритилади; 2) ҳозирги адабиётшуносликда *ирония* терминининг муқобили сифатида фаол қўлланади. Кўчим тури сифатида К. сўз ёки бирикмани асл маъносидан бошқа, тескари маънода қўллаш демакдир. Метафора ҳамда метонимияга кўчимнинг асосий турлари сифатида қараб, бошқа кўчим турларининг улардан келиб чиққани назарда тутилса, К.ни метафора типидagi кўчим, яъни «тескари ўхшатиш» асосидаги маъно кўчиши дейиш мумкин. Мас., А.Қодирий Қалвак махзумнинг бадбашаралигига ишора қилиб уни «хусни Юсуф» деб атайдики, бу моҳиятан тескари ўхшатишдир. Бироқ К.га фақат кўчим турларидан бири сифатидагина қараш мунозарали масала. Жумладан, К.нинг ўхшатиш объектисиз ҳам намоён бўла олиши уни бошқа кўчим турларидан фарқлайди. Оддийгина «яхши» деган сўзни тескари маънода қўллаш учун оҳангини ўзгартириб айтиш кифоя. Ёки «Лолазор» (М.Муҳаммад Дўст) романида собиқ Иттифоқ раҳбари «КАТТА ПАХТАКОР» деб аталадики, бунда *аллюзия* (қ.) орқали маъно кўчирилади. Кўчим сўз ёки сўз бирикмасини кўчма маънода ишлатишни назарда тутати, К. эса модаллик ифодаси сифатида тилнинг барча сатҳларида ва шу сатҳ унсурлари (товуш, интонация, сўз, жумла ва ҳ.) воситасида ифодаланиши мумкин. Мас., К. нафақат сўзни тескари маънода қўллаш, балки жумлани киноявий маъно ифода-пайдиган тартибда тузиш ва шунга мос оҳанг ёрдамида ҳам юзата чиқарилиши мумкин. Бу ҳолда стилистик фигура сифатидаги К. қақда гапириладики, унинг бир кўриниши сифатида *антифразис* (қ.) кўрсатилиши мумкин.

**КИНОЯВИЙЛИК** – 1) комиклик кўринишларидан бири, воқеликка оявий-ҳиссий муносабат тури. Бу ҳолда муаллиф бутун асар юқелигига ёки унинг бир қисмига (айрим характерларга) нисбатан киноявий муносабатда бўлади, асар композицияси киноявий нуқтаи назарни ифодалашга мос равишда қурилади. Киноявий муносабат

идеал ва воқелик ўртасидаги кескин номувофиқликни англашдан туғилади. Шунга кўра, К.нинг мақсади фақат кулги ҳосил қилишгина бўлиб қолмай, вазиятнинг қанчалик жиддийлиги ва ҳатто фожеийлигини ҳам таъкидлаб кўрсатишдан иборат бўлади. К.да тасдиқ орқали инкор ёки инкор орқали тасдиқ маъноси ифодаланади. К. комикликнинг алоҳида тури сифатида юмор ва сатирадан субъектив ибтидо-нинг етакчилиги билан фарқланади, яъни объектдаги комик зиддият кўпроқ муаллиф муносабати орқали юзата чиқарилади. Г.Поспеловга кўра, киноя ва унинг юқориюқ даражаси бўлган сарказм комикликнинг асосий турлари – юмор ва сатиранинг субъектив томонини ташкил этади. Яъни воқеликни маънавий-ахлоқий (юмор) ёки ижтимоий (сатира) мавқадан идрок этиш жараёнида муаллифда киноя ёки сарказм туйғуси туғилади. Кўп ҳолларда К.га юмор ва сатиранинг фонида, юмористик ва сатирик асарларнинг ёрдамчи воситаси деб қаралади. Бироқ К. юмористик ёки сатирик бўлмаган асарларда ҳам кузатилиши мумкин (мас., Ф. де Ларошфуко максималари, Умар Хайём рубойлари). Объект танламаслиги, субъект кайфиятидан келиб чиқиб ҳар қандай объектга ҳам қаратилиши мумкинлиги туфайли, Г.Поспелов унга пафос турларидан бири сифатида қарамайди. Шундай бўлса-да, К.га *муаллиф эмоционаллиги* типларидан бири (В.Хализев) сифатида қараш зарур; 2) бадиийлик модуси. Сўнги давр жаҳон адабиёти тараққиёти давомида киноявий муносабатнинг бутун асар тузилишини белгилашдаги аҳамияти ортди. Агарда илгари киноявий муносабат фақат кичик жанрлардаги асарлар (мас., ҳалқ латифалари, Умар Хайём рубойлари, Ф. де Ларошфуко максималари) структурасини белгилаган бўлса, XX аср адабиётида, хусусан, 80-йиллар ўзбек насрида (М.Муҳаммад Дўст. «Лолазор») бошдан-оёқ киноявийликка асосланган асарлар яратилдики, уларни айни модус хусусиятларини эътиборга олган ҳолдагина бадиийга дохил асарлар ҳисоблаш мумкин бўлади. Киноявийлик бадиийлик модуси сифатида «ўзим учун мен»нинг «бошқалар учун мен»дан кескин ажралиши (фарқланиши) натижасида юзата келади. Киноявий «мен» ташки борликка ичдан алоқасизлиги, у билан муносабатда бўлмаслиги билан характерланади. Киноявий асар муаллифи масалани ахлоқийлаштирмайди (бу, айни пайтда, ахлоққа зид нуқтаи назар эмас), муаллиф қаҳрамон ва воқеликни баҳолаб экан, ҳатто ана шу баҳо принципларидан ҳам четлашиб, уларга бошқа тарафдан назар ташлайди. Зеро, К. сатира ва юмордаги каби реалликни баҳолаш билангина чекланмайди, шу боис воқелик ва бадиий

асардаги ҳар қандай ижтимоий-маънавий (баъзан эстетик) идеал ёки гоёвий-ҳиссий муносабат киноянинг объекти бўла олади. Шу маънода киноя «ҳукм устидан ҳукмдир». Киноявий нуқтаи назар субъекти ҳамма нарсадан – нафақат қаҳрамон, балки, умуман, воқелиқдан четлашган, узилган ҳолда уларни юқоридан кузатади, қаҳрамоннинг ожизлиги, у тушиб қолган вазиятнинг абсурд – маънисизлигини гўё ўта ҳиссизлик, бепарқлик билан кузатар, тасвирлар экан, бундай маънисиз вазиятга муаллиф ҳам, китобхон ҳам тушиб қолиши мумкинлигини англаб туради. Шунга кўра, киноявий нуқтаи назар эгаси нафақат объектдан, балки ўз-ўзидан ҳам четлашган бўлади. Бу эса, ўз навбатида, китобхондан ҳам ўзидан, маънавий-ахлоқий принципларидан, эътиқод ва аъмолидан четлаша олиш (воз кечиш эмас), уларга четдан назар ташлай билишни талаб қиладики, бусиз ўқувчи киноявий модусдаги асар бадииятини тушунолмайди, унда *катарсис* рўй бермайди. Шунинг учун киноявий адабиёт китобхонларни кескин ажратиб қўяди. Яъни киноявий асарнинг қабул қилиниши, киноявий бадииятнинг юзага чиқишида муаллиф-объект-адресат учлигидаги адресатнинг аҳамияти янада ортади.

**КИРИТМА ҲИКОЯ** – воқеабанд сюжетли асар таркибига киритилган мустақил ҳикоя. К.х., одатда, асар сюжети билан бевосита боғланмайди, ўзининг мустақил сюжетига эга бўлиб, асар бутунлигига мазмуний жиҳатдан боғланади ва бадиий концепцияни ифодалашга хизмат қиладики, шу жиҳатлари билан у моҳиятан гап таркибидаги киритма конструкцияларга ўхшашдир. Мас., «Ўткан кунлар»даги уста Олим ҳикояси роман асосий сюжетига бевосита боғлиқ эмас: у бош қаҳрамон билан тасодифан учрашиб қолган кишининг ҳикояси сифатида берилади. Лекин айна шу ҳикоя асарда бир қатор бадиий-эстетик функцияларни бажаради: Отабек билан уста Олимни қалбан яқинлаштиради, уларнинг қиёматлик дўст бўлиб қолишини асослайди; Отабек шу дўстлик туфайли душманини танийди, ғанимлари режасидан воқиф бўлади – яъни К.х. билвосита сюжетнинг кейинги ривожини асослайди; адибга икки типдаги одам (янгича фикрлайдиган Отабек ва эскича фикрлайдиган уста Олим)ни қиёслаш ва шу асосда ўзининг бадиий фалсафасини янада ёрқин ифодалаш имконини беради. Ёзувчининг олам, одам ва замон концепцияси – бадиий фалсафасини шакллантириш ва ифодалашда К.х. нечоғлик муҳим унсур экани «Асрга татиғулик кун» (Ч.Айтматов) романи мисолида яққол кўринади. Романга киритилган «Найман она ҳикояси» адиб-

га асар ёзилган даврда ўта долзарблашган манкуртлик фожиаси, Чингизхон ҳаётидан нақл этувчи «Сариўзақдаги қатл» ҳикояси чекланмаган мустақил тузум моҳияти ва у инсониятга келтириши мумкин бўлган фожиалар, Раймали оға ҳақидаги ҳикоя эса шахс эрки ва унинг дахлсизлиги масалаларини бадиий мушоҳада этиш имконини беради. Асар тўқимасига сингдириб юборилган мазкур К.х.лар асосий сюжет воқеалари билан яхлит мазмуний бутунликни ташкил қилади ва айна шу бутунлик адибнинг олам, одам ва замон ҳақидаги бадиий концепциясини ифодалайди. К.х.лар ҳажми, жанр хусусиятларига кўра турлича (киритма эпизод, ривоят, афсона, латифа, ҳикоя, қисса) бўлиши, уларнинг асар структурасига киритилиши турлича усуллар (персонаж ҳикояси, бировнинг қўлёзмаси ва б.) билан асосланиши ёки асосий сюжетга параллел тарада бериб борилиши (мас., У.Ҳамдам. «Исён ва итоат») мумкин.

**КИТОБАТ** (ар. *کتابت* – ёзув, ёзиш, кўчириб ёзиш, хат ёзиш) – мумтоз адабиётдаги шеърий санъат, байтда араб ҳарфлари воситасида ўзига хос ташбеҳ яратиш. Яъни К. санъатида араб ҳарфлари мушаббихун биҳ вазифасини ўтайди: ушбу санъат араб ҳарфларининг ёзувдаги шакли билан бирор нарса-ҳодиса, ҳолат (кўпроқ ёрнинг аъзолари, ошиқнинг эгилган қадди ва ш.к.) ўртасидаги ўхшашлик асосида воқе бўлади. Шунинг учун К.ни алоҳида санъат эмас, ташбеҳнинг бир кўриниши сифатида тушуниш тўғрироқ бўлади. Мас., Эркин Воҳидовнинг:

*Ҳажрда қаддимни дол эттинг десам, бергай жавоб:  
Ким қўйибди севгини қадди букилган чол учун, –*

байтида ошиқнинг ҳижрон азобидан эгилган қадди – мушаббих, «дол» (د) ҳарфи эса мушаббихун биҳдир.

**КЛАССИКА** (лот. *classicus* – намунали, мумтоз) – энг яхши, намунали, мумтоз дея эътироф этилганлик. Яъни, аслида, К. термини ўзида баҳо муносабатини ифодалайди. Шунга қарамай, К. сўзининг муомала амалиёти ва адабиётшуносликдаги қўлланишида турличалик мавжуд. Жумладан, у конкрет асар («Хамса», «Ўткан кунлар», «Анор» ва ҳ.), муайян бир ижодкор (А.Навоий, А.Қодирий, А.Қаҳҳор) ёки бутун бир даврга (Ўзбек классик адабиёти) нисбатан ҳам қўлланаверади. Мазкур ҳолатларнинг биринчисида баҳо муносабати тўлиқ сақланади, чунки бу ўринда ҳар жиҳатдан намунали

бахс этувчи кўллаб асарлар яратилган, жумладан, Н.Буалонинг «Шеърый санъат» асарида К.нинг адабий-эстетик қарашлари муфассал ифодасини топган.

**КОЛЛИЗИЯ** (лот. *collisio* – тўқнашув) – бадиий асарда тасвирланган воқеа асосида ётувчи персонажлар орасидаги тўқнашувлар, зиддиятлар. Илмга Гегель томонидан киритилган К. термини адабиётшуносликда баъзан *конфликт*нинг синоними сифатида қўлланади. Шунга қарамай, уларни сезиларли фарқ билан қўллаш амалиёти ҳам мавжуд. Жумладан, зиддиятларни ўткирлик жиҳатидан даражаллаган ҳолда К.ни ўткир зиддият маъносида тушуниш; кўлам жиҳатидан даражаллаган ҳолда тарихан глобал характердаги тўқнашувларни К. деб аташ; шунингдек, К.ни конфликтга нисбатан торроқ кўламда қўллаб, конфликтнинг бир кўриниши, асосан, эпик асарлар воқеа ривожидagi бир ҳолат – *ситуация*даги (қ.) персонажлар зиддияти сифатида ҳам тушунилади. Кейинги давр адабиётшунослигида К.ни сўнги маънода, яъни тасвир предмети сифатидаги зиддият (конфликт) эмас, унинг таркибий қисми – ички структуранинг элементи сифатида тушуниш кенгрок оммалашмоқда.

**КОМЕДИЯ** (юн. *komos* – қувноқ маросим, *ode* – қўшиқ) – драматик турнинг учта асосий жанридан бири, антик даврдаёқ жанр сифатида шаклланган. К. драматик турнинг комикликка асосланган жанри бўлиб, унда характерлар, ҳолат ва воқеалар кулгили тарзда, комикликка йўғрилган ҳолда тақдим этилади. Антик замонлардан то классицизм даврига қадар К.да трагедиянинг зидди кўрилган (трагедия фожиали яқун топади – К. бахтли; трагедия фавқуллодда кучли шахслар – К. да қуйи табақа кишилари; трагедия тарихий воқеага асосланади – К.да тўқима ва ҳ.), адабиётшуносликка оид рисола-ларда трагедияга юксак, К.га эса тубан жанр сифатида қаралган. Мазкур ҳол XVIII асргача, маърифатчилик адабиётида оралиқ жанр сифатида *драма* пайдо бўлгунга қадар давом этган. Кейинги икки аср давомида К. муттасил ривожланди, турфа жанр хусусиятларини касб этиб, имкониятлари кенгайди.

К.нинг асосида ётувчи ижобий куч – кулги, у жамият ҳаётида, кишилар феъл-атворида мавжуд камчиликлар, идеалга номувофик жиҳатларга қаратилган бўлади. К.нинг марказида комик характерлар туради. Одатда, комик характер деганда ўзида идеалга тамоман зид иллатларни жамловчи ёки улардан айримларини намоён этувчи персонажлар назарда тутилади. Бу ўринда асосий шартлардан бири

шуки, комик персонаж ўзининг мавжуд ҳолатини идрок этмайди, ўзига реал баҳо беришга ожиз. Аксинча, у ўзини бор ҳолига нисбатан тамоман тескари баҳолашга мойил: гирт тентак бўлгани ҳолда ўзини ақлли санади, маънан тубан бўлгани ҳолда ўзини лоқдомон билади – ўзини ўзгаларга шундай сифатларда тақдим этишга чиранади. Мас., Уйғуннинг «Парвона»сидаги Ўткурий маънан тубан, ахлоқан бузуқ, оддий маҳмаданаю фирибгар бўлгани ҳолда ўзини ақлли, сўзсоз, уддабурон, яшашни биладиган ва ҳ. фазилатлар эгаси деб ҳисоблайди, шундай кўринишга уринади. Худди шу нарса – характернинг моҳияти билан мавжудлиги орасидаги номутаносиблик комикликни, характер комиклигини юзага чиқаради. К. ҳолат комиклиги асосига ҳам қурилади. Мас., С.Аҳмаднинг «Келинлар кўзголини», «Қуёв» асарларида ҳолат комиклиги устувор мавқега эга. Аслида, бу хил фарқлашда шартлилик бор, чунки К.да характер комиклиги билан ҳолат комиклиги уйғунлашиб келади, улар бир-бирини тўлдиради, бири иккинчисини намоён этади.

К. сатирик ёки юмористик руҳда бўлиши мумкин, ҳар икки ҳолда ҳам у гоъвий-ҳиссий инкор қилади: сатирик руҳдаги комедия қаламга олинган характер ёки ҳолатни тўла инкор қилса, юмористик руҳдаги комедия характер ёки ҳолатдаги айрим жиҳатларни қисман инкор қилади. Мас., А.Қаҳҳорнинг «Тобутдан товуш», «Оғриқ тишлар» К.лари сатирик руҳдаги асарлар саналса, Э.Воҳидовнинг «Олтин девор» асарида юмористик руҳ устуворлик қилади. К.даги кулгини жўн тушунмаслик лозим, чунки чинакам комиклик ижтимоий аҳамиятга молик кулгини тақозо этади, бундай кулги кишини ўйлатади, кулдириб куйдиради, йиғлатади. Шу маънода, ҳар қандай кулгили сахна асарини К. санаш хато бўлур эди. Чинакам комизм билан йўғрилган драматик турнинг бу жанрини кўпроқ ташқи сахна эффектлари орқали кулдиришга қаратилган фарс, қувноқ кулги кўзгатувчи водевиль ёки халқ сайилларида ижро этилувчи қизиқчи-масхарабоз томошаларидан фарқлаш керак.

**КОМИКЛИК** (юнон. *komikos* – кулгили, қувноқ) – ҳаётдаги ва санъатдаги кулгилилиқ; бадиий асарда ижодкор идеалига зид характер ва ҳодисаларнинг кулги йўли билан инкор этилиши. К. умумэстетик категория саналиб, бадиий санъатларнинг барида (меъморликдан ташқари) кузатилиши мумкин. Ҳар қандай кулги ҳам К. саналавермайди, бу ўринда ижтимоий аҳамиятга молик кулги назарда тутилади. Яъни К. муайян тарихий шароитда жамият тараққиётининг мавжуд ҳолати, ундаги тараққийпарвар кучлар, илғор идеаллар

га номувофиқ бўлиб қолган ижтимоий фактлар (воқеа-ҳодисалар, гоаялар, урф-одатлар, турмуш тарзи, ижтимоий муносабатлар; инсонларнинг хатти-ҳаракатлари, маънавий-ахлоқий қиёфаси ва ш.к.) устидан кулиш сифатида кўзга ташланади. Яъни К. объект ва субъект бирлигида намоён бўлади: унинг юзага келиши учун объектдаги номувофиқликни кўра оладиган ва идеал нуқтаи назаридан баҳолай биладиган субъектнинг бўлиши шарт қилинади. Шу билан бирга, К.нинг турли кўринишларида объектив ва субъектив ибтидолар нисбати, К.нинг юзага чиқиш йўсини бир хил бўлмайди. Мас., *сатира* (қ.) ва *юморда* (қ.) субъект муносабати кўпроқ объектдаги зиддиятни бўрттириб кўрсатиш орқали намоён бўлса, *киноя* (қ.) ва *сарказмда* (қ.) объектдаги зиддият, асосан, муаллиф муносабати орқали юзага чиқарилади. Шунинг учун сарказм ва киноя объектда номувофиқлик яққол кўзга ташланмайди, улар кўп жиҳатдан контекст билан боғлиқ бўлади. Комик муносабат объекти ўзида идеалга тамоман зид иллатларни ёки улардан айримларини намоён этадики, шу жиҳатдан сатира ва юмор кўринишлари фарқланади. Сатира объектда идеалга мутлақо зид, жамиятнинг жорий ҳолати нуқтаи назаридан тўла инкор қилинувчи зиддиятларни акс эттирса, юморда объектдаги айрим жиҳатларнигина инкор қилиш кўзда тутилади. Адабиётнинг бадиий арсеналида К.ни юзага чиқарувчи қатор бадиий усул ва воситалар мавжуд бўлиб, уларга *гротеск*, *карикатура*, *пародия*, *каламбур*, *закийлик*, *эзоп тили*, *комик контраст* каби қатор воситаларни мисол қилиш мумкин. Ушбу воситаларнинг бир қисми объектни деформацияланган тарзда тасвирлашга, бошқа бир қисми эса субъектив муносабатни турли йўсин ва даражада ифодалашга хизмат қилади.

**КОМИЛ** (ар. *كامل* – етук, мукамал) – аруз баҳрларидан бири, ҳаракатининг (унлиларининг) кўплиги жиҳатидан вофирга нисбатан етукроқ, мукамалроқ бўлгани учун шундай номланган. *Мутафоилун* (vv – v –) аслининг такроридан ҳосил бўлади. К., асосан, араб шеъриятига хос бўлиб, ўзбек шеъриятида жуда кам қўлланган баҳрлардан биридир. Навоийнинг «Мезон ул-авзон»ида К. баҳрининг биргина *комили мусаммани солим* вазни, Бобурнинг «Мухтасар»ида эса унинг йигирма икки вазни мисоллар билан келтирилган. К. баҳри ўзбек шеъриятига илк бор Навоий ижоди орқали кириб келган, ундан кейин Мунис, Огаҳий, Увайсий, Муқимий, Ҳабибий каби шоирлар ҳам мазкур баҳрда шеърлар битганлар. Мас., Навоийнинг:

*Не бало змиш сенинг ул хиром ила қоматинг,  
Гаҳи суръатинг, гаҳи ноз бирла иқоматинг, –*

байти *комили мусаддаси солим* (v v – v – / v v – v – / v v – v –) вазнида ёзилган.

**КОМПАРАТИВИЗМ** (лот. comparatives – қиёс, қиёсий) – 1) кенг ва кўпчилик томонидан истифода этиладиган маънода *қиёсий адабиётшунослик* (қ.), адабиёт тарихининг миллий адабиётлар тараққиётидаги ўзаро муштарак ва фарқли томонлар, миллий адабиётларнинг ўзаро алоқалари ва таъсири масалаларини ўрганувчи бўлими; 2) тор маънода қиёсий адабиётшуносликнинг шаклланиш давридаги бир босқич, адабий фактлардаги ташқи ўхшашликларни (тарихий шарт-шароит, адабий анъана, ижодкор дунёқараши, услуби каби контекстлар билан боғламаган ҳолда) қиёслаш билан чекланилган давр.

**КОМПОЗИЦИЯ** (лот. composition – тузиш, бириктириш) – бадиий асар қисмларини яхлит бадиий ният (муайян концепцияни шакллантириш ва ифодалаш, кўзланган гоаявий-эстетик таъсир) ижроси учун энг оптимал ҳолда жойлаштириш, бадиий система (асар)даги унсурларни ўзаро алоқа ва муносабатлари равшан англашиладиган тарзда бутунликка бириктириш. Яъни композиция бадиий шаклнинг унсури эмас, у, аввало, шакл компонентларини бадиий мазмунни шакллантириш ва ифодалаш учун энг қулай тарзда уюштиришга қаратилган амал, шуни амалга ошириш принципларидир. Айни амал туфайли асар унсурлари шундай уюштириладики, натижада унда биронта ҳам ортиқча унсур бўлмайди, ҳар бир унсур бутун таркибда ўз функциясига эга бўлади ва муайян гоаявий-бадиий юк ташийди. К. тушунчаси бадиий асарнинг барча сатҳларига бирдек тааллуқли, унинг қайси сатҳи ҳақида гап кетмасин, қурилишининг айни шу аспекти диққат марказида туради: матн қурилиши (боб, сарлавҳа, асосий ва ёндош матн), бадиий нутқ шакллари (ҳикоялаш, тавсиф, диалог), ривоя субъектлари (муаллиф, персонаж, ўзга шахс), нуқтаи назар (ровий ёки персонаж нигоҳи орқали кўриш)ларнинг мақсадли алмашилиб туриши, персонажлар системаси (бош, иккинчи даражали ва ёрдамчи персонажлар тарзида даражаланиши, уларнинг шунга мос ўзаро муносабатдорликда жойлаштирилиши), сюжет қурилиши (воқеаларнинг замон ёки сабаб-натижа муносабати асосидаги алоқадорлиги, юз бериш ва ҳикоя қилиниш вақти, турли макон ва замонда кечаётган воқеаларнинг ўзаро боғлиқлиги, маконий

ва замоний ўзгаришларнинг асосланиши ва б.) – буларнинг бари К. билан боғлиқ тушунчаларнинг бир қисминигина ташкил қилади. К. бадиий асарнинг чинакам система, яъни қисмлардан таркиб топган, лекин барча қисмлари ўзаро мустаҳкам алоқадаги бутунликка айланишини таъминлайди. Бунинг учун эса қисмларнинг ҳар бири ўз ўрни ва ўз меъёрида, бутун билан мустаҳкам алоқада бўладиган ва бу алоқалар англанадиган тарзда жойлаштирилиши муҳим. Яъни ижодий ниятдаёқ ўқиш жараёни назарда тутиладики, айти шу нарса ижод жараёнига ҳам таъсир қилади, яратилажак асар К.сининг қандай бўлишини белгилайди. Ўқувчи К. жиҳатидан яхши ташкилланган асардан то сўнги нуқтага қадар янги-янги мазмун қирраларини кашф этиб боради, ўқиш давомида турфа хиссий ҳолатларни қалбдан кечиради, ақлий ёхуд руҳий толиқиш, зериқиш ҳисларидан фориғ бўлади. Демак, бадиий асар К.си нафақат асарнинг барча компонентларини уюштириб, унинг шаклий ва мазмуний бутунлигини таъминлайдиган, балки унинг ўқилиши, уқилиши ва китобхонга гоёвий-эстетик таъсирини бошқарадиган, хуллас, асарни чинакам санъат ҳодисасига айлантирадиган энг муҳим унсур экан. Шунинг учун К.га бадиий шаклнинг гултожи сифатида қаралади, муайян асар бадиияти ҳақида гап кетганда унинг композицион хусусиятларига, бадиий маҳорат ҳақида сўз борганда шу борадаги маҳоратга айрича эътибор берилади. Зеро, бадиий асарда ҳаёт муайян бадиий шаклга солинган ҳолда акс эттирилади, унда янги реаллик – бадиий воқелик яратилади. Яъни санъаткор бир бутунликдан иккинчи бир бутунликни – воқеликнинг бадиий моделини яратиши, ҳаёт материали (диспозиция)ни бадиий асар (композиция)га айлантириши зарур бўлади. Шу боис диспозицияни К.га айлантира олиш иқтидори ижодкор шахснинг туғма имкониятлари сирасида энг муҳими саналиб, истеъдод кучи шу иқтидорнинг қай даражада эканлиги билан белгиланади.

**КОНТЕКСТ** (лот. *con* – бирга, *textus* – мато, тўқилган) – 1) алоҳида сўз (матн бирлиги)ни қуршаб турган ва унинг маъноси тушунилишига асос бўлувчи матн, уни ташкил этаётган сўзларнинг бевосита лугавий маъносидан кенг бўлган маъно тизими. К. нутқий бўлакнинг шаклий ифодаси билан мазмунининг уйғун бирлигини таъминлайди, ундаги турфа маъно жилваларининг реаллашуви, сўзловчининг етказилаётган информацияга муносабатини ифодалашда муҳим аҳамият касб этади. Шу билан бирга, илмда К.ни фақат матн (оғзаки ёки ёзма) доираси билан чекламай, кенгроқ тушуниш ама-

лиёти ҳам мавжуд бўлиб, бунда нутқ моменти, мулоқот субъектлари, мулоқотнинг умумий мавзуси кабиларга ҳам К. сифатида қаралади. Яъни бундай ёндашишда К. кенгайиб бориш хусусиятига эга бўлади; 2) адабий асар – сўзлардан таркиб топган матн. Бадиий матнни ташкил этаётган унсурлар бир-бири билан қисм – бутун (текст – контекст) муносабатида бўлиб, қисмнинг мазмуни бутун ичида, бутуннинг мазмуни эса қисм орқали реаллашади. Агар асарнинг тўлиқ матнини К. деб олсак, у ўз ичида кичикроқ К.ларга (бўлим, боб, абзац, жумла) ажралади. Булар асарнинг ички алоқаларигагина оид бўлиб, аслида, адабий асар матн (текст) сифатида ўзидан ташқаридаги бошқа К.лар доирасига ҳам киради. Бадиий асар санъаткорнинг яратиш онларидаги ижодий-руҳий ҳолати маҳсули сифатида, аввало, айти шу ҳолат К.ига киради, ўз навбатида, бу К. ҳам кенгайиб боради: муаллифнинг асарни яратиш пайтидаги ижодий-руҳий ҳолати – муаллиф биографияси – давр ҳаёти – миллат тарихи. Иккинчи томондан, конкрет асар миллий адабиёт тараққиётининг муайян бир босқичи маҳсули сифатида давр адабиёти К.ига киради ва у ҳам кенгайиб боради: ижодкор мансуб адабий авлод – давр адабиёти – миллий адабий аънаналар – жаҳон адабиёти аънаналари. Мазкур К.ларнинг ҳар бири асарнинг у ёки бу қиррасини англаш, очиб беришга хизмат қилади.

**КОНТРАСТ** (фр. *contraste* – кескин қарама-қарши қўйиш) – бадиий адабиёт ва санъатнинг бошқа турларида тасвирланаётган нарсаларни бир-бирига кескин қарши қўйишга асосланган бадиий усул. К. тасвирланаётган нарсани бўрттириб, қабартириб кўрсатиш имконини беради, бадиий усул сифатида қадимдан қўлланиб келади. К. бадиий асарнинг барча сатҳларида (тил, сюжет, характер ва шароит, композиция) намоён бўлиши, унда зидлаш ошқора ёки пинҳона амалга оширилиши мумкин. Жумладан, К. тил сатҳида *антитеза* (ёки *тавод*) кўринишида, сюжет сатҳида бир воқеа (ёки ҳолат)нинг иккинчи воқеа (ёки ҳолат)га қарши қўйилиши (мас., «Зумрад ва Қиммат») тарзида, композиция сатҳида эса асарнинг бир қисмини иккинчи қисмига қарши қўйиш (мас., Чўлпон. «Новвой киз») орқали намоён бўлади.

**КОНФЛИКТ** (лот. *conflictus* – тўқнашув) – персонажларнинг асар сюжетида бадиий ифодасини топадиган ўзаро тўқнашув ва курашлари, қаҳрамон билан муҳит орасида ёки унинг руҳиятида кечувчи зиддиятлар, қарама-қаршиликлар. К. термини аънавий тарзда кўпроқ эпик ва драматик асарларга нисбатан қўлланади.



Чунки улар воқеабанд сюжетга эга бўлиб, тасвирий-динамик санъат турлари саналади, яъни уларда ривожланиб борувчи воқеалар силсиласи – макон ва замонда кечувчи ҳаракат қаламга олинади. Сюжет воқеалардан, воқеалар эса персонажларнинг хатти-ҳаракатлари, ўзаро мураккаб муносабатлари, зиддиятларидан таркиб топгани сабабли ҳам, ҳаёт зиддиятларини умумлаштирувчи воқеалар тизими сифатида таърифланади. Сюжет билан К. орасида иккиёқлама алоқа кузатилади: бир томондан, сюжет К.ларни умумлаштириб намоён қилади; иккинчи томондан, К. сюжетни ҳаракатга келтирувчи асосий куч бўлиб, сюжетнинг асосий босқичларини белгилайди: К.нинг қўйилиши – *тугун*, К. кескинлашган энг юксак нуқта – *кульминация*, К.нинг у ёки бу тарзда ҳал этилиши – *ечим*.

Бадиий асар воқеликни акс эттиргани, унинг марказида инсон образи тургани учун ҳам, инсоннинг реал ҳаётида мавжуд конфликтларнинг бари унда бадиий инъикос этади. Шу нуқтаи назардан бадиий К.нинг учта турини фарқлаш мумкин: 1) характерлараро; 2) қаҳрамон ва муҳит; 3) ички (психологик). К.нинг мазкур турлари бадиий асарда аралаш ҳолда зуҳур қилади ва ўзаро узвий алоқада бўлади: бири иккинчисига ўтади, бири иккинчисини келтириб чиқаради, бири иккинчиси орқали ифодаланади ва ҳ. Мас., Чўлпоннинг «Кеча» романидаги Мирёқубнинг муҳит билан зиддияти унинг Акбарали билан ўзаро зиддиятли муносабатлари фонида етилади, шу муносабатлар қаҳрамон руҳиятидаги мураккаб жараёнга – ўй-фикрлар курашига туртки беради. К.нинг барча турлари ҳам қаҳрамонни муайян бир ҳаракатга ундайди, бу эса уни сюжетни юргизувчи куч дейишга асос беради: Акбарали билан очиқ тўқнашув даражасига етмаган зиддияти Мирёқубни ҳаракатга – ўзини валинеъмати билан қиёслаш асосида ўзининг кимлигини, ҳаётдаги ўрнини англашга ундадики, унинг руҳиятида мураккаб ўйлов жараёни («ички ҳаракат») бошланди; ўйловлар натижасида у ўзини ижтимоий шахс сифатида танишга, ўзининг ижтимоий мақомини англашга келдики, бу энди уни фаол ижтимоий ҳаракат («ташқи ҳаракат»)га ундаши табиий (унинг жадидларга хайрихоҳ мавқени эгаллаши романнинг иккинчи китобида Мирёқуб ижтимоий фаолиятда тасвирланиши мумкин эди деган тахминни пайдо қилади). Демак, К. персонажнинг қай йўсин ҳаракат қилишини белгилаб, сюжет воқеаларининг қай тарзда ривожланишига ҳам таъсир қилади. Мас., «Ўткан кунлар»даги Отабек руҳиятидаги зиддият шуки, у замонасининг илғор зиёлиси сифатида

инсон шахсини ҳурмат қилади ва, айни чоғда, ўз даври, муҳити таъсиридан буткул холи ҳам эмас. Натижада Отабек муҳит билан К.да (ота-онаси уни иккинчи бор уйлантиришга жазм қилганда, қарши тургани моҳиятан қаҳрамон-муҳит К.и, фақат бу нарса ота-она билан муносабат орқали ифодаланади) ён берди: «бир бечорага кўрабила туриб жабр ҳам хиёнат...» бўлаётганини, Зайнаб «қаршисида бир жонсиз ҳайкал» бўлишини билатуриб уйланишга розилик берди. Яъни Отабек руҳиятидаги эскилик ва янгилик курашида аввалгиси ўстун келди: у ўша дамда Зайнаб шахсини, унинг ҳуқуқини ҳимоя қилолмади. Кейинроқ, Зайнабнинг ўзига нисбатан муҳаббатини билгач, Отабек айбини чуқур ҳис қилди, шу боис Кумушнинг қатъий талабларига қарамасдан, унинг жавобини беришга журъат этолмади, натижада ўзи истамагани ҳолда фожиага йўл очиб берди. Қўринадики, қаҳрамон руҳиятидаги зиддиятлар унинг муҳит ва шу муҳитдаги кишилар билан зиддияти асосида юзага келади, айни пайтда, уларга фаол таъсир ҳам қилади – сюжетнинг у ёки бу тарзда ривожланишини белгилайди. Бу эса К. сюжетни ҳаракатлантирувчи куч эканлигини кўрсатувчи яна бир ёрқин далилдир. Айтилганлардан К.нинг яна бир муҳим функцияси аён бўлади: у шакл унсури сифатида бадиий концепцияни ифодалашда муҳим ўрин тутди, К. мазмун компоненти бўлмиш *проблема* билан бевосита боғлиқдир. Бошқача айтсак, К. *проблематиканинг* жавҳарини ташкил этса, уни ҳал қилиш йўсини ва йўналиши бадиий концепциянинг ўзагини ташкил этади. Зеро, ҳар бир конфликтли ҳолат турлича ҳал этилиши, демак, воқеалар ривожини ҳам шунга боғлиқ сифат кўринишига эга бўлиши, бу эса мос равишда ғоявий-ҳиссий муносабатни ўзгартириши ва пировард натижада бадиий концепциянинг ўзгаришига олиб келиши табиийдир.

Адабиётшуносликда К. билан боғлиқ ҳали тугал тўхтамаган келинмаган, баҳсли масалалар ҳам бор. Жумладан, лирик асардаги К. масаласи. Албатта, бу ўринда мураккаблик кўп жиҳатдан лирик асарларда воқеабанд сюжетнинг йўқлиги, адабиётшуносликда лирик асарга сюжетсиз деб қарашнинг мавжудлиги билан боғлиқ. Модомики, лирик асарда ҳам ҳаракат – ҳис-туйғу, ўй-кечинмалар ривожини, сюжетнинг специфик кўриниши бор экан, уни ҳам К. ҳаракатга келтиради. Фақат лирикада К.нинг намоён бўлиши ўзига хос, элик ва драматик асардаги каби очиқ кўзга ташланмайди. Лирик қаҳрамон ҳис-туйғуларини ҳаракатлантираётган К. характерлараро, қаҳрамон ва муҳит орасидаги кўринишлари кўп ҳолларда асар-

дан ташқарида қолса ҳам, у лирик ҳолатдан (қарама-қарши ҳис-туйғулар, зид қўйилган деталлар, тасаввурдаги объектга мурожаат; ҳаёт ва ўлим, савоб ва гуноҳ, вафо ва хиёнат, ўтмиш ва ҳозир син-гари тематик антиномияларни келтириш ва ш.к. бошқа унсурлар ёр-дамида) ҳар вақт англашилиб туради. Яъни лирик асардаги К. доим ҳам тасвирда бўртиб турмайди, лекин ҳар вақт ҳис этилади. Бу эса ҳар қандай бадиий асарда К. бор, муайян бир адабий турга мансуб асарда бадиий К.нинг муайян бир тури етакчилик қилади детани-дир. Драматик асарларда характерлараро К., лирик асарларда ички К. (асарда акс этиши жиҳатидан) етакчилик қилса, эпик асарларда К.нинг ҳар учала тури қоришиқ ҳолда намоён бўла олади. Негаки турлича намоён бўлгани ҳолда, ҳар қандай бадиий асарда, унинг қайси турга мансублигидан қатъи назар, К.нинг ҳар учала нави мав-жуд; улар ўзаро алоқада бўлиб, бири иккинчисини юзага чиқаради, бири орқали иккинчиси ифодаланади.

**КУЛЬМИНАЦИЯ** (лот. *culmen* – чўққи) – бадиий асарда воқеалар ривожининг энг юксак нуқтаси, сюжетнинг зиддиятлар кескинлашиб, конфликт яққол намоён бўладиган ўрни. К. воқеабанд сюжетнинг муҳим ва зарурий компоненти саналиб, ечимнинг йўналишларини белгилайди, шу боис ечим бўлмаган ҳолларда ҳам асар тугаллик, эстетик бутунлик касб эта олади. Асарнинг сюжет-композицион ху-сусиятлари билан боғлиқ ҳолда К. турли даражада ва турли сифат кўринишида бўлиши мумкин: концентрик сюжетларда К. бўртиб (мас., «Мехробдан чаён»: Анварнинг хон билан тўқнашуви) кўзга ташланса, хроникали сюжетларда у қадар очиқ кўзга ташланмайди; йирик эпик асарларда К. бутун бошли воқеани ўз ичига олса, кичик эпик шакл-ларда жажоки эпизод (мас., «Ўғри»: Қобил Бобо билан амин суҳбати) ёки биргина деталь (мас., «Анор»: «Ажаб қилдим, жигарларинг эзи-либ кетсин!») кўринишида бўлади; одатда, асар финалига яқин жой олса, баъзан муайян гоёвий-бадиий мақсад билан бошланишдаёқ (мас., «Даҳшат»: Унсиннинг додхоҳ билан шарт боғлаши) берилади ва ҳ. Мураккаб сюжет қурилишига эга эпик асарларда ҳар бир сю-жет линиясининг ўз К.си мавжуд (мас., «Кеча»: Зеби сюжет линияси-нинг К.си – тўй арафаси; Мирёкуб линиясиники – ноиб билан суҳбат; Акбарали линиясиники – Кумариқ воқеалари) бўлиб, улар асарнинг бош К.сига (мас., «Кеча»да – суд жараёни) бўйсундирилади. К.нинг муҳим хусусияти шуки, у персонажлар тақдири, қарашлари, ўзаро муносабатларида сезиларли сифат ўзгаришларига олиб келади, воқеалар оқимини ўзгартиради. Демак, К. деганда воқеалар кескин-

лашган ҳар қандай нуқтани эмас, юқоридаги талабларга жавоб бе-радиган нуқтани тушуниш керак.

**КУНДАЛИКЛАР** – кўрган-кечирганларни кунма-кун, одатда, сана-сини қайд этган ҳолда ёзиб бориш; адабиётдаги шу тарзда амалга оширилган ривоя шакли. Маиший-шахсий жанр сифатида К. анча кенг тарқалган бўлиб, турли соҳа кишилари томонидан юритилган К.ни бирлаштирувчи қатор умумий хусусиятлар мавжуд. Аввало, К.да му-аллифнинг кўрган-кечирганлари, ҳис қилганлари билан уларнинг қайд этилиши орасида вақт масофаси йўқ ҳисобида, яъни олинган таассур-ротлар совимасиданоқ қайд этиладигани, шу жиҳати билан улар мемуар-лардан фарқланади. Иккинчи муҳим хусусият шуки, К. бировларнинг ўқиши учун мўлжалланмайди, улар муаллифнинг ўзи учун ёзилади. Шу туфайли К.даги муаллиф ўй-фикрлари баёни, изҳорларида сами-мият, муносабат ва баҳо ифодасида ҳаққонийлик (яъни муаллифнинг ўйидагини яширмай-нетмай, ҳеч бир истиҳоласиз ёзиши) кузатилади. Худди шу нарса уларга қарийб ҳужжат даражасидаги ишонарлилик-ни бахш этади. Одатда, К.да кўпроқ муаллифнинг шахсий реаллиги, унинг ўзи билан бевосита боғлиқ воқеалар акс этади, бироқ шулардан келиб чиққан ҳолда уларда олам ва одам, ҳаётнинг моҳияти, бирон-бир конкрет ҳаётий масала юзасидан умумий тарздаги мушоҳадалар ҳам ифода этилаверади.

Мазкур хусусиятлари туфайли ёзувчи-шоирлар юритган К. ада-биётшунослик учун, айниқса, биографик йўналишдаги тадқиқотлар учун беқиёс манбага айланади. Бундан ташқари, К.га ҳос хусусият-лар айрим ҳолларда бадиий ният ижроси учун жуда қулай имконият-лар яратади. Шунинг учун адабиётда К. шаклида қурилган асарлар ҳам, К. шакли муҳим композицион унсур сифатида истифода этил-ган асарлар ҳам кўплаб учрайди.

**КЎРИНИШ** – драматик асарнинг энг кичик таркибий қисми. Одатда, пардалар К.ларга бўлиниб, улар шу сахна эпизодидаги иштирокчилар таркиби билан белгиланади; К.лар бир-биридан пер-сонажлардан бирининг сахнадан кетиши ёки бошқа персонажнинг келиб қўшилиши билан ажратилади. Антик Рим адабиётидаёқ дра-матик асар матнида К.лар алоҳида ажратилиб, рақамлаб кўрсатил-ган. Драматургияда узоқ вақт ҳукм сурган бу анъанадан XIX аср охири – XX аср бошларидан чекинла бошланган. Ҳозирда ҳам драматик асарда парда ичидаги К.лар фарқланиб туради, лекин матнда буни доим ҳам таъкидлаб, алоҳида ажратиш шарт қилинмайди.

**КҮЧИМ, ТРОП** – сўзнинг одатий маъносидан ўзга маънода қўлланиши, муайян бадиий-эстетик мақсадни кўзлаган ҳолда воқе бўлувчи семантик сатҳдаги нормадан огиш. Кўчма маънода қўлланган сўзлар *троп* деган умумий ном билан ҳам юритилади. Маъно кўчишининг асосига таянган ҳолда, К.нинг *метафора*, *метонимия*, *синекдоха*, *киноя*, *перифраза*, *аллегория* (*мажоз*), *рамэ* (*символ*) каби бир қатор кўринишлари ажратилади. Айтиш керакки, К.нинг турлари адабиётшуносликка оид манбаларда турлича кўрсатилади. Жумладан, баъзан К.лар сирасига *эпитет*, *оксиморон*, *питомта*, *муболага* кабиларни ҳам қўшиш ҳолларига дуч келиш мумкин. Албатта, бундай қилишга асос бера оладиган айрим мисоллар борлиги, умуман, бу воситаларда ҳам К.га яқин хусусиятлар кузатилиши бор гап. Лекин К. деганда бадиий матнда муайян бир асосга (нарсаси-ҳодисалар орасидаги ўхшашлик, алоқадорлик, вазифадошлик ва ҳ. жиҳатидан муштарақликка) таянган ҳолда сўз (баъзан бирикма)нинг ўз маъносидан бошқа маънода қўлланишини тушуниш керакки, шунда чалкашликлар ўз-ўзидан барҳам топади. Бадиий асарда қўлланилувчи К.лар ўзларининг ишлатилиш кўлами, бадиий бўёқдорлиги, таъсирдорлик даражаси каби жиҳатларига кўра бир-биридан жиддий фарқланади: а) уларнинг бир қисми аллақачон тил ҳодисасига айланиб улгурган. Мас., «кун ботди», «соат юряпти» каби бирикмаларда сўз маъноси кўчганлиги аниқ, бироқ биз уларга шу даражада кўникиб кетганмизки, ҳозирда уларга К. сифатида қарамаймиз ҳам. Бадиий асар матнида мазкур К.лар қўлланганида, табиийки, муаллиф муайян бадиий-эстетик мақсад билан семантик сатҳда огишга йўл қўйган деёлмаймиз, зеро, улар ёзувчи томонидан тайёр ҳолда олинган ва матнда эстетик функция бажармайди. Демак, уларни бадиият ҳодисаси сифатида тушуниб бўлмайди; б) асар матнида бадиий адабиётда анъанавий тарзда ишлатилиб келаётган К.лар ҳам кўп учрайди. Мас., «шакар лаб», «гул юз», «булбул», «сарв қомат», «қоши камон», «нарғис кўз» ва ҳ. Бу хил К.лар ҳам юқоридагилар сингари тайёр ҳолда олинади, бироқ, улардан фарқли ўлароқ, матнда эстетик функция ҳам бажаради: тасвирийликни, ифодавийликни кучайтиради. Шунга қарамай, уларнинг қабул қилинишида кўникиб қолганлик оқибатида ҳосил бўлган «автоматизм» кузатиладигани, бу уларнинг эстетик таъсир кучини сусайтиради; в) бадиий-эстетик функциядорлиги, тасвирийлик ва ифодавийликни кучайтириши жиҳатидан муайян матндагина кўчма маънода қўлланган, муаллифнинг ассоциатив фикрлаши маҳсули ўлароқ дунёга келган

К.лар алоҳида ўрин тутаяди. Уларни шартли равишда «хусусий муаллиф кўчимлари» деб аташимиз мумкин. Шу хилдаги К.ларгина ёзувчининг муайян бадиий-эстетик мақсадни кўзлаб йўл қўйган семантик сатҳдаги огиши натижасидирки, бадиий тил маҳорати хусусида гап борганда, аввало, шу хил К.ларни эътиборга олиш позим.

# Л

**ЛАКОНИЗМ** (юн. lakonismos – лаконикача) – фикрни ихчам шаклда, лўнда ва аниқ ифодалаш. Бу хусусият антик Юнонистоннинг Лакония вилояти ҳудудида жойлашган Спартада юксак қадрланган, спарталиклар оз сўз билан кўп маъно ифодалашга интилишган, шу билан боглиқ ҳолда «лаконикача нутқ», «лаконизм» тушунчалари оммалашган. Л. афористика, мақол ва маталлар учун муҳим, айтиш мумкинки, белгиловчи хусусият саналади. Шунингдек, Л. термини айрим ижодкорлар услубига хос хусусият маъносиди ҳам ишлатилади. Мас., баъзан А.Қаҳҳор услуби ҳақида гап борганда, ундаги ўзига хос жумла қурилиши, сиқикликни назарда тутиб Л. термини қўлланади.

**ЛАТИФА** (ар. لطيف – нозик, ёқимли, зариф, мулойим) – Яқин ва Ўрта Шарқ, жумладан, Марказий Осиё халқлари оғзаки ижоди ва ёзма адабиётида кенг тарқалган жанр; ихчам ҳикояча, анекдот. Халқ оғзаки ижодида Л.лар тематик жиҳатдан турли-туман, марказида кўпроқ кулгили воқеа ётади, аксар ҳолларда воқеа биргина эпизод билан чекланиб, ҳажвий-юмористик руҳ билан йўғрилган бўлади. Умумий қаҳрамонга эгаллик оғзаки Л.ларнинг яна бир хусусиятидир. Жумладан, ўзбек фольклорига – Насриддин Афанди (қисман, Машраб, Қал), тожикларда Мушфиқий, қозоқларда Алдарқўса, туркманларда Камина Л.ларнинг умумий қаҳрамони сифатида ҳаракатланадилар. Фольклорга хос вариантлилиқ Л.ларда ҳам кузатилади, жумладан, битта Л.нинг турли қаҳрамонлар билан боғланиш ҳоллари кўп учрайди. Ёзма адабиётдаги Л.лар кўпроқ ибратли мазмундаги, ўзгалар учун ибрат бўла оладиган шахслар ҳақидаги мўъжаз ҳикоячалар шаклида учрайди. Агар Л.ни жанр сифатида белгиловчи хусусиятлар (ихчамлик, сюжетнинг биргина ҳаёттий эпизод асосига қурилиши, тасвирланган воқеанинг кулгили ёки ибратли бўлиши, қаҳрамонларига топқирлигу закийлик хослиги) эътиборга олинса, Шарқ мумтоз адабиётидаги Саъдийнинг «Гулистон» ва «Бўстон», Жомийнинг «Баҳористон», Навоийнинг қатор асарлари

ёки Хожа ҳикоятлари, шунингдек, Восифийнинг «Бадоеъ ул-вақоеъ» типдаги қатор тарихий асарлар таркибига Л. жанрига мансуб асарлар киргани аён бўлади. Л. жанри замонавий фольклорда ҳам анча фалол: истеъдодли замондошларимиз томонидан бугунги ҳаётимиз билан боглиқ турфа мазмундаги Л.лар яратилиб, оммалашмоқда, бу – жанрнинг барҳаётлиги белгиси. Шунингдек, ахборот алмашиш жараёнини тезлашган, информацион глобаллашув шароитида бошқа халқлардан ўзлаштирилиб, миллий ҳаётимиз ва менталитетимизга мослаштирилган Л.лар – *анекдотлар* ҳам кўплаб пайдо бўлмоқдаки, бу фольклоршунослар учун алоҳида мавзудир.

**ЛАФЗИЙ САНЪАТЛАР** – қаранг: *санойиъ*

**ЛАФФ ВА НАШР** (ар. لف و نشر – йиғмоқ ва ёймоқ) – мумтоз адабиётдаги шеърый санъат. Л.н. санъатида бир неча нарса-тушунча номи саналиб, кейин уларга ўхшаш, алоқадор, тааллуқли ёки мувофиқ келадиган бошқа нарса-тушунча номлари келтирилади. Л.н. санъати бир мисра доирасида ҳам воқе бўлиши мумкин, шунга қарамай, унинг байт доирасида воқе бўлиши, яъни биринчи мисрада саналган нарса-тушунчаларга ўхшаш, алоқадор, тааллуқли ёки мувофиқ келадиган бошқа нарса-тушунчалар номининг кейинги мисрада келтирилиши кўпроқ учрайди. Бунда саналаётган нарса-тушунчалар бир-бирига очик ўхшатилмайдиган, уларнинг бир-бири билан боглиқ ёки алоқадор эканлиги ҳам очик айтилмайдиган, улар ўртасидаги ўхшашлик ёки мувофиқликни идрок этиб олиш ўхшашнинг ўзига ҳавола қилинади. Л.н.нинг икки нави мавжуд: 1) мураббаъ, яъни тартибли Л.н. Бунда ҳар иккала гуруҳдаги саналаётган нарса-тушунчалар тартиби бир-бирига мос бўлади, яъни биринчи мисрада саналаётган нарса-тушунчалар қандай тартибда берилса, кейинги мисрада нарса-тушунчалар шунга мувофиқ тартибда саналади. Мас., Навоийнинг:

*Чун ўлармөн чин дейин ишқи бузуг кўнглимдадур,  
Мен ўлиб, ул ганж бу вайронда пинҳон қолмасун, –*

Байти биринчи мисрасида «ишқ» ва «кўнғил» сўзлари саналиб, кейинги мисрада «ишқ» «ганж»га, «кўнғил» «вайрона»га киёсланмоқда. Байтда қўлланган Л.н.да саналаётган тушунчалар тартиби бир-биринга мос (биринчи мисрада аввал «ишқ», кейин «кўнғил», иккинчи мисрада аввал «ганж», кейин «вайрона») бўлгани учун *мураббаъ* хисобланади; 2) мушавваъ, яъни тартибсиз ёки номураббаъ Л.н. Бунда саналаётган нарса-тушунчалар тартиби бузилган бўлади,

яъни биринчи мисрадаги нарса-тушунчаларни бериш тартиби кейинги мисрада бузилади, иккала мисрадаги санок тартиби бир-бирига мос келмайди. Мас., Навоийнинг:

*Доми зулфунг ичра хуштур, баски, кўналум тойири,  
Жаврдур бу қушга, эй сайёд, озод айламак, —*

байти биринчи мисрасидаги «доми зулф», «кўнглум тойири» тушунчаларига иккинчи мисрадаги «қуш» ва «сайёд» тушунчалари мувофиқ, лекин иккинчи мисрада санок тартиби ўзгарган (биринчи мисрада «доми зулф ... кўнгил тойири», кейингисида «қуш ... сайёд» тартибида берилган, ҳолбуки, «доми зулф» «сайёд»га, «кўнгил тойири» эса «қуш»га алоқадор, яъни биринчи мисрада аввал саналган тушунча иккинчи мисрада кейин келган тушунчага, кейин келгани эса аввал келганига алоқадордир). Баъзи манбаларда *мушавваш* Л.н. ўз ичида яна икки турга ажратилади: биринчи тури «маъкус ут-тартиб» деб номланиб, унда кейин саналаётган нарса-тушунчалар аввал саналганларига акс тартибда (яъни 1, 2, 3, 4 – 4, 3, 2, 1 тартибда) берилади; иккинчи тури «мухталит ут-тартиб» деб аталади, унда тартиб ўзгарган-у, санокда акс тартиб сақланмайди, чалкаш берилверади (мас., 1, 2, 3, 4 – 2, 4, 1, 3 каби).

**ЛЕЙТМОТИВ** (нем. leitmotiv – етакчи мотив) – мусикадан ўзлаштирилган термин бўлиб, кенг маънода муаллиф томонидан илгари сурилатилган асосий гоянинг бутун асар давомида таъкидлаб ўтказилиши бўлиб, шу маънода *гоявий лейтмотив* атамаси ҳам ишлатилади. Мас., А.Ориповнинг «Мен нечун севаман Ўзбекистонни» шеърида ватанга бегараз муҳаббат, «ватанга муҳаббат моҳиятан халққа муҳаббат» деган асосий гоя Л. сифатида бутун шеър матнидан сизиб ўтади. Кенгроқ қаралса, шоирнинг «Ўзбекистон», «Қарши қўшиғи», «Саратон» каби ўнлаб шеърларида ҳам худди шу гоя устуворки, бу ўринда алоҳида шеър Л.и билан бир қаторда, шоир ижодининг Л.и ҳақида ҳам гапириш имкони юзага келади. Шунга ўхшаб баъзан муайян адабий йўналиш, оқим ёки мактабга хос Л. ҳақида ҳам гапириш мумкин бўлади. Мас., жадид адиблари ижодининг Л.и маърифат ва тараққийдир. Адабиётшунослиқда Л. термини тоғ маънода ҳам қўлланиб, бунда асарда илгари сурилган муҳим гоя, ҳис-туйғу, характер ҳолати ва ш.к.ларни ифода этаётган образ ёки нутқий унсур (сўз бирикмаси, жумла, мисра ва ш.к.)нинг қайта-қайта такрорланиши назарда тутилади.

**ЛИБРЕТТО** (итал. libretto – китобча) – 1) театрда ижро этиладиган опера, оперетта ва балет спектаклларининг қисқача баёни берилган китобча. XVII аср охиридан театрда келган томошабинларга шундай китобчалар тақдим этилган, терминнинг пайдо бўлиши ҳам шу билан боғлиқ; 2) опера спектаклининг матний асоси, шунингдек, балет спектаклининг адабий сценарийси. Ҳар икки ҳолда ҳам асарни сахнада ижро қилиш учун асос бўлиб хизмат қилади. Л. махсус, яъни янги мавзудаги оригинал асар сифатида яратилиши ҳам, мавжуд асарни мослаштириш, опера ёки опереттага мос инсценировка қилиш йўли билан ҳам ёзилиши мумкин.

**ЛИРИКА** (юн. lyra – мусика асбоби, қадимда шеърлар унинг жўрлигида ўқилган) – бадиий адабиётнинг учта асосий туридан бири. Л.да воқелик лирик субъект ҳис-туйғулари орқали аксланади, унинг учун бадиий нутқ объекти эмас, субъекти бирламчидир. Л.нинг ўзи-га хос хусусиятлари қадимдаёқ таъкидлаб ўтилган. Жумладан, поэзияни тақлид деб билган Афлотун поэзиянинг бу тури «тўлалигича шоирнинг айтганларидан иборат» деса, Арасту фикрича, поэзиянинг бу турида «тақлид қилувчи қиёфасини ўзгартирмаган ҳолда» тақлидни амалга оширади. Немис файласуфи Гегель Л.нинг турга хос хусусияти сифатида унда объект ва субъектнинг битта шахсда уйғунлашиши, лирик асар учун муаллифнинг ўзи, унинг ички олами мавзу бўлиб қолишини кўрсатади. Шунга кўра, Л.нинг тасвир предмети ҳис-туйғу, кечинма бўлиб қолади. Яъни эпос ва драмадан фарқли ўлароқ, Л. воқеликни тасвирламайди, унинг учун воқелик лирик субъект руҳий кечинмаларининг асоси, уларга туртки берадиган омил сифатидагина аҳамиятлидир. Шу боис лирик асарда воқелик лирик қаҳрамон қалб призмаси орқали ифодаланади, яна ҳам аниқроғи, Л.да воқеликнинг кечинмани тасвирлаш учун етарли миқдордаги «ларчалари», деталларгина олинади. Ҳатто лирик асарда субъект яққол кўзга кўринмай, унда бирон-бир объектив нарса тавсифланган ёки тасвирланган ҳоллар (манзара шеърлар, воқеабанд шеърлар) да ҳам у асосий эмас, асосийси – шу тавсиф ёки тасвир замиридаги лирик субъект, унинг кечинмалари. Л.да субъектнинг воқелик таъсирида юзага келган оний кечинмалари мангуга муҳрлаб қўйилади. Бу кечинмалар алоҳида шахсга тегишли бўлган ҳолда умумбашарий мазмун ва қимматга эга бўлаверади, шеърхон ундан ўз дардини, ўз кечинмаларини топади, зеро, ўзгарувчан дунёда тугилувчи инсонга хос туйғу-кечинмаларнинг нисбий барқарор асоси, жавҳари мавжуддир.

Юқоридагилардан келиб чиққан ҳолда Л.нинг адабий тур сифатидаги айрим ўзига хос хусусиятларини санаб ўтиш мумкин. Аввало, оний кечинмани тасвирловчи лирик асарлар, одатда, ҳажман кичик бўлади. Ҳис-туйғу ва кечинмани ифодаловчи Л.да шунга ҳар жиҳатдан мос – эмоционал тўйинтирилган ва ритмик жиҳатдан тартибга солингани боис, ифодаланаётган ҳис-туйғуга мувофиқ оҳангда жаранг топадиган шеърый нутқ шакли устуворлик қилади. Шу билан бирга, насрий йўлда ёзилган лирик асарлар ҳам, кам бўлса-да, бор. Алоҳида субъект кечинмаларини ифодалагани учун Л.да монологик нутқ шакли устувор, унда учрайдиган диалогик нутқ кўринишлари эса монологик нутқнинг таркибий элементига айланади. Оний кечинмани тасвирловчи Л.нинг бадиий вақти ҳаминша – «ҳозир»: у айна ҳозир кўнгилда кечаётган ҳис-туйғуларни тасвирлайди, шеър қачон ёзилганидан қатъи назар, шеърхон уни ҳозир кўнгилда кечаётган туйғу каби қабул қилади.

Лирик асарларни жанр жиҳатидан таснифлашда маълум мураккабликлар мавжуд бўлиб, адабиёт тараққиётининг турли босқичларида жанрларга ажратиш асоси турлича бўлган. Жумладан, халқ оғзаки ижодидаги лирик асарлар кўпроқ функцияси, яъни ижро этилиш вақти, жойи муносабатига (мавсум, маросим, меҳнат кўшиқлари) кўра; антик шеърятда ижро этилиш тарзи (хор кўшиқлари, соло)га кўра; кейинги даврларда асосий эстетик белгиси (ода, дифирамб, элегия), қатъий шакл кўрсаткичлари (сонет, октава), тематик хусусиятлари (интим, граждонлик, фалсафий, сиёсий, интеллектуал) ва ҳ. жиҳатлардан жанрларга ажратилган. Мураккаблик шундаки, тарихий категория сифатида ўз фаоллик даврини ўтиб бўлган жанрлар ҳам шеърятда анъанавий тарзда қўлланаверади. Мас., ҳозирги ўзбек шеърятинида халқ оғзаки ижодидаги жанрлар (лапар, ёр-ёр) ҳам, мумтоз шеърят жанрлари (ғазал, мухаммас) ҳам, хорижий адабиётлардан ўзлашган жанрлар (сонет, хокку, танка) ҳам, ҳозирда фаоллашган жанр кўринишлари ҳам мавжуд. Шу сабабли лирик жанрлар масаласига синхрония/диахрония аспектида ёндашиш талаб қилинади.

**ЛИРИК ҚАҲРАМОН** (рус. калька: «лирический герой») – лирик қадаги субъект кўринишларидан бири, муаллифнинг қалб кечинмаларини, ўй-туйғуларини ифодалаш шакли (к. лирик субъект). Терминнинг ўзиёқ, яъни «қахрамон» дейилиши Л.қ. шоирнинг реал «мен»и эмас, балки унинг асосида яратилган «мен» эканлигини аниқлатади. Термин фанга илк бор Ю.Тиньянов томонидан рус шоири

А.Блок ижодига татбиқан киритилган бўлиб, бунда шоирнинг лирик образ, тасаввур қилинадиган ШАХС назарда тутилади. Шунга кўра, Л.қ. ҳақида гапириш учун у бир қадар бутунлик (мавзу-муаммолар доираси, ўй-қарашлар бирлиги, барқарор рухий-психологик белгилар, биографик чизгилар) касб этиши, алоҳида бир ШАХС (қалб)ни тасаввур эттира олиши лозим. Л.қ. ва муаллиф муносабати масаласи ҳануз баҳслилигича қолмоқда. Бу масалада кўпчилик эътироф этган қараш шуки, шоир ва Л.қ. орасига тенглик аломати кўйиб бўлмайди, айна чоғда, Л.қ.ни шоирдан мутлақо бошқа ҳодиса ҳисоблаш ҳам тўғри эмас: у шоир шахси билан боғлиқликда идрок этилади. Шундай бўлганда ҳам, Л.қ. шоирнинг айнан ўзи эмас: у «мен»дан яратилган бошқа бир «мен»дирки, кўп ҳолларда Л.қ. ва шоир муносабати прототип ва характер муносабатига қиёсан тўшунтирилади. Яъни Л.қ. билан шоирни бир-бирдан буткул ажратиш ҳам, тамом кўшиб юбориш ҳам мумкин эмас, улар «ажралмас кўшилмаслик»дир. Зеро, Л.қ. эпос ёки драмадаги характер сингари объектга айланмайди, у воқеликка нисбатан ҳам, ўзига нисбатан ҳам субъектликча қолади.

**ЛИРИК ЧЕКИНИШ** (рус. калька: «лирическое отступление») – муаллиф нутқининг кўринишларидан бири, эпик ёки лиро-эпик асарларда учрайдиган композицион унсур. Л.ч. дейилишининг сабаби шуки, унда сюжет воқеаларини ҳикоя қилиш тўхтаиб қўйилади ва муаллиф уларга муносабатни ошкор тарзда ифодалашга ўтади, яъни асосий воқеадан чекинади. Моҳият эътибори билан Л.ч. тап таркибидаги модал сўз ва конструкцияларга ўхшашдир. Л.ч. муаллиф айтмоқчи бўлган фикрни янада таъкидлаш, қабул қилиш жараёнини йўналтириш, эмоционал муносабатни юқтириш каби бадиий-эстетик мақсадларга хизмат қилади. Л.ч.ларнинг нутқий қурилиши ҳам, одатда, шунга мос бўлади: ҳиссий тўйинтирилганлик, ўқувчига бевосита мурожаат қилиш, турли даражадаги такрорлар ва ундовларнинг бўлиши, нутқ бўлагининг насрий асарда ҳам айрича ритмикликка эгаллиги ва ш.к. Шу хусусиятларнинг барини «Кеча» романидаги бир Л.ч.да кўриш мумкин. Романнинг бошланишида Чўлпон қизларнинг сафарга рухсат олиш йўлидаги саъй-ҳаракатлари, Зеби кўнглидаги умид ва умидсизлик курашини батафсил тасвирлайди. Сафар орзусида ёнган Зеби билан Саптанат тамом умидсизликка тушаётганларида, Курвонбинининг устмонлиги сабаб Раззоқ сўфи рухсат бериб юборди. Қизларнинг туриш-турмушини бунгача бир қафас сифатида кўрсатган Чўлпон уларнинг беадад шодликларини

тасвирлашга ўтиш учун куйидагича кўприк солади: «Қафаснинг даричаси очилди! Энди қушларга қанотларини ростлаб туриб «пир!» эта учмоқдан, кенг кўкларга, фазоларга парвоз қилмоқдан бошқа нарса қолмади. Паранжини ёпиниб ўтирмасдан, шундоқ бош устига ташлаб, чимматни «хўжа кўрсин»га тутган бўлиб югуриш керак, холос. Фақат, унда даричанинг очилганига ким севинади? Шодликни ким қилади? Эркинликнинг лаззатини ким тотийди? Шу қадар қайсар бир одамни бу қадар усталик билан йўлга солган онанинг хурматини ким ўрнига келтиради? Уни ким қучоқлаб, ким ўпади?»

Шуни ҳам таъкидлаш жоизки, Л.ч.ларни қўллашда муайян меъёрни сақлаш зарур, акс ҳолда, асар ортиқча сентименталлик, ошкор дидактиклик каби хусусиятлар касб этиши ва бу охир-оқибатда бадий жиҳатдан ютқиизликка айланиши мумкин. Адабиётшуносликда *лирик муқаддима*, *лирик хотима* тушунчалари ҳам мавжуд бўлиб, улар моҳият эътибори билан Л.ч.нинг ўзи, фақат асарда жойлашиш ўрни ва шу билан боғлиқ бадий-эстетик вазифалари жиҳатидан бирмунча фарқланади. Жумладан, *лирик кириш* ўқувчида тасвирланажак воқени қабул қилишга мос эмоционал ҳолатни юзага келтириш, *лирик хотима* эса асар воқеаларига эмоционал муносабатни яхлит ифодалаш ва шу орқали ўқувчи таассуротини мустаҳкамлаш каби мақсадларни ҳам кўзлайди.

**ЛИТОТА** (юн. *litotes* – соддалик) – 1) нарса-ҳодисага хос хусусиятни унинг аксини инкор қилиш орқали ифодалашга асосланган услубий фигура, моҳиятан кинояга яқин туради. Л. кундалик мулоқотда ҳам анча фаол қўлланади. Мас., «бу кишим ҳам аҳмоқ эмас» – ақли-хуши жойида; «уям шаҳар кўрмаганмас» – содда эмас, ишига пишиқ ва ҳ.; 2) тасвирланаётган нарса-ҳодиса, унга хос белгиларни ўта кичрайтиришга асосланувчи бадий усул, стилистик фигура; *гиперболанинг* зидди, мумтоз адабиётшунослигимизда *тафрит* (қ. *тафрит*) деб юритилади. Жаҳон халқлари оғзаки ижодида Л. усулида қатор образлар яратилган: Нўхатполвон, Ёртиқулоқ, Бармоқча бола («мальчик-спальник»), Дюймовочка ва б. Стилистик фигура сифатида қўлланган Л. нарса-ҳодисани ўта кичрайтириш орқали қиёсан тасвирланаётган нарса-ҳодисанинг маҳобатию улугворлигини, муайян бир сифатда беқиёслигини таъкидлаб кўрсатади.

**ЛУҒЗ** (ар. *لغز* – топишмоқ, сир, махфий) – шеърий топишмоқ, нарса-тушунчанинг номини айтмаган ҳолда ўхшашлик ёки алоқадорлик асосидаги белгиларини тавсифлашга асосланган жанр. Яъни Л.да шоир нарса-тушунчага ишора қилади, тингловчи (ўқувчи) эса зикр

этилган белгиларга таяниб яширилган номни топиши лозим бўлади. Шу жиҳати билан Л. ўқувчида теран фикрлаш, қузатувчанлик, ҳозиржавоблик каби кўникмаларни шакллантиради. Л. халқ оғзаки ижодида қадимдан мавжуд бўлган, кейинчалик ёзма адабиётга ҳам хириб келди. Л. жанри форс-тожик адабиётида X – XII асрлардан, ўзбек адабиётида эса XV асрдан бошлаб кенг оммалашган. Хусусан, ўзбек адабиётида Л. жанрининг илк намуналари Навоий ижодида учрайди, Увайсийнинг ушбу жанрдаги асарлари (мас., «Анор») машҳур бўлган. Шунингдек, Л.нинг яхши намуналари Шавқий, Дилафгор, Муаззам, Мунис, Огаҳий, Фақирий каби шоирлар ижодида ҳам учрайди. Илми бадиъга оид айрим манбаларда Л. мустақил жанр сифатида таърифланса, бошқаларида (мас., А.Хусайний. «Бадойиъ ус-санойиъ»)да у шеърий санъатлардан бири сифатида кўрсатилади. Л.нинг яна бир номи *чистон*, бу жанрнинг форс адабиётидаги номланиши бўлиб, ўзбек адабиётшунослигида иккала термин ҳам ишлатилади.

# М

**МАВЗУ** (ар. *موضوع* – қўйилган, тартибга солинган) – бадиий мазмун компоненти, асарда қўйилган ижтимоий, фалсафий, маънавий-ахлоқий ва ҳ. муаммоларни бадиий идрок этиш учун танлаб олинган ва тасвирланган ҳаёт материали; тема. Адабиётшунослиқда М. (тема) термини икки маънода ишлатилади: 1) асарда тасвирланаётган ҳаёт материали; 2) асарда бадиий идрок этиш учун қўйилган ижтимоий, маънавий-ахлоқий, фалсафий ва бошқа проблемалар мажмуи. Табиийки, иккита тушунчанинг битта термин билан юритилиши муайян чалкашликларни келтириб чиқаради. Шунинг учун уларнинг *мавзу* ва *проблема* тарзида икки хил номлангани маъқул. Агар бадиий ижод табиатидан келиб чиқиб бадиий мазмун компонентлари ижод жараёни ва унинг бадиий асарда намоён бўлиши нуқтаи назаридан фарқланса, шуниси тўғрироқ экани кўринади. Бадиий асар ижодкорнинг борлиқ билан муносабати маҳсули ўлароқ воқе бўлади. Яъни борлиқда яшаётган индивид сифатида ижодкорни муайян муаммолар ўйлатади, ташвишга солади. Ижодкор учун ўша муаммони идрок этиш ички эҳтиёжга айлангани сабабли ҳам асарга қўл уради. Шу маънода бадиий асар «эҳтиёж фарзанди» (А.Орипов) саналади. Ижодкор ўзини қийнаган муаммоларни бадиий идрок этиш учун кенг ва қулай имкон берувчи ҳаёт материални танлайди ва тасвирлайдики, бу бадиий асар М.си (темаси)дир.

**МАДАНИЙ-ТАРИХИЙ МАКТАБ** – Европа адабиётшунослигида XIX аср ўрталарида шаклланган илмий йўналиш, мактаб. М.-т.м. немис маърифатчилари (И.Гердер), француз романтизми тарихшунослари (Ф.Гизо, О.Тьери) ва қисман адабиётшунослиқдаги биографик методни (Ш.Сент-Бёв) ижодий ривожлантириш натижаси ўлароқ вужудга келган бўлиб, назарий асосларини белгилашда О.Контнинг позитивистик фалсафаси муҳим аҳамият касб этган. М.-т.м. ўз фаолиятида тарихийлик тамойилига таянади, уни асосий тадқиқ методи сифатида қабул қилади. Бу эса адабиётшунослиқдаги муҳим ўзга-

риш эди. Агар М.-т.м.га қадар адабиёт норматив поэтикалар асосида тадқиқ этилиб, уларнинг меъёрларига мос келадиганлари «тўғри» ёки «етук», мос келмайдиганлари эса «нотўғри» ёки «ёввойи» адабиёт сифатида баҳоланган бўлса, тарихийлик принципи адабиёт тарихига, миллий адабиётларга ўзгача ёндашиш имконини берди. М.-т.м. адабиётни миллат ҳаётининг муайян тарихий босқичидаги халқ руҳининг ифодаси деб билди ва шундан келиб чиққан ҳолда барча адабиётлар (миллий мансублиги, қайси даврда ёки услубда яратилганидан қатъи назар) тенг ҳуқуқли, тенг қимматга эга деган қарашни олдинга сурди. М.-т.м. асосчиларидан бири И.Тэн адабий асарни юзага келтирувчи омиллар сифатида миллатга хос туғма сажия («ирқ»), ўша миллат яшаётган табиий, иқлимий ва ижтимоий шарт-шароитлар («муҳит») ҳамда айна вақтдаги маданий савия ва анъаналар («давр»)ни таъкидлаб кўрсатади. Тэнга кўра, худди шу омиллар адабий ҳодиба генезисини эмпирик ўрганиш имконини беради ва шу асосда чиқарилган хулосаларгина чинакам илмий бўлади. Албатта, олимнинг мазкур қарашлари асосли, булар адабиётни илмий ўрганиш йўлида олдинга ташланган дадил қадам эканлигини ҳам эътироф этиш лозим. Бироқ буларни мутлақлаштириш оқибатида бир ёқламалик келиб чиқади: М.-т.м. вакилларига эмпирик билишни устувор ҳисоблаш, гуманитар билим соҳаларига табиий фанларда қўлланувчи методларни татбиқ этишга интилиш, улардан ҳам худди табиий фанлардаги каби конкрет фактларга асосланган илмий хулосалар чиқаришни талаб қилиш ҳам хос эди. Табиийки, бу гуманитар соҳаларнинг ўзига хослигини инкор этиш бўлиб, шу даврда табиий фанлар эришган ютуқларга маҳлиёллик ва позитивистик фалсафанинг салбий таъсиридан бошқа нарса эмасди. Жумладан, адабий асар билан биологик организм орасида аналогиялар ўтказилиши, адабиёт тарихини эволюциялар назарияси асосида ўрганишга уриниш бунинг ёрқин мисолидир. Натижада М.-т.м.нинг айрим вакиллари учун адабиёт ўз ҳолича, санъат ҳодисаси сифатида эмас, балки ўз даври ҳаётини акс эттиргани билан аҳамиятли; адабиёт тарихи эса ижтимоий тафаккур тараққиёти тарихидан бошқа нарса бўлмай қолди. Бу эса адабиётнинг ижтимоий ҳаётдаги аҳамиятини пасайтириш, унинг воқелик билан алоқаси икки ёқлама эканлигини, ижтимоий ҳаётга таъсирини инкор қилишга олиб келади. Албатта, М.-т.м.нинг бундай қарашлари ўз давридаёқ асосли танқидга учради (қ. *руҳий-тарихий мактаб*). Мазкур бир ёқламалик оқибатидаги йўқотишларга қарамай, М.-т.м. адабиётшунослик ривожига муҳим



из қолдирди: у қатор мамлакатларда адабиёт тарихини илмий ўрганишни бошлаб берди, тарихий-генетик тадқиқот методологиясига асос солди; тарихий-қиёсий адабиётшунослик, психологик мактаб ва социологик методнинг пайдо бўлиши учун замин ҳозирлади.

**МАДИД** (ар. *مديد* – чўзиқ) – аруз баҳрларидан бири, *фоилотун* (–v –) ва *фоилун* (–v –) аслларининг кетма-кет такроридан ҳосил бўлади, *фоилотун*даги сабаблар – фо ва тун орасидаги масофа чўзиқ бўлгани учун шундай номланади. М. баҳри араб шеърлятига хос бўлиб, ўзбек шеърлятида қўлланмайди. Навоийнинг «Мезон ул-авзон», Бобурнинг «Мухтасар» асарларида М. баҳрининг айрим вазнлари келтирилиб, уларга мисол қилиш учун муаллифлар махсус байтлар битганлар. Хусусан, «Мухтасар»да *мадиди мусаммани солим* (–v – / –v – / –v – / –v –) вазнига:

*Неча тортай ҳажридин сенсизин озормен,  
Келки, ҳижронингда мен умрдин безормен, –*

байти мисол сифатида келтирилган.

**МАЖОЗ** (ар. *مجاز* – кўчма маънодаги сўз) – 1) мумтоз адабиётшуносликда сўзни ўз маъносида эмас, бошқа бир кўчма маънода ишлатиш, кўчмининг умумий номи; Атоуллоҳ Хусайний М.га «...лафзни ўз ясоғидин ўзга маънода ясоғу пафзу ўшул маъно орасиндаги бирор алоқаю муносабатқа асосланароқ қўлламоқтин иборатдур, ўз ясоғида тушунмакка монёъ бўлғучи жумладошин келтирмак шарти била» дея таъриф беради. Яъни сўзнинг кўчма маъноси доим матн ичида, у боғланиб келаётган бошқа (ўз ясоғида тушунмакка монёъ бўлғучи жумладош) сўз орқали англашилади. Сўзнинг матндан ташқарида англаган маъноси эса ўз маъноси ҳисобланади. Мас., «хона тинчланди» жумласида «хона» сўзи кўчма маънода, унинг кўчма маънода эканлиги эса «тинчланди» сўзига боғланаётганидан англашилади. Бошқача айтсак, «хона» сўзини ўз маъносида тушунишимизга «тинчланди» сўзи монёъ бўлмоқда, шунинг учун уни «хонадаги одамлар» маъносида тушунамиз. Бу ўринда сўзнинг кўчма маънода тушунилишига унинг ўз маъноси (хона – жой) ва матндан келиб чиқиб англаётган маъно (шу жойдаги кишилар) орасидаги алоқадорлик асос бўлмоқда. Демак, сўзнинг кўчма маънода ишлатилишига унинг ўз маъноси билан кўчма маъноси ўртасида бирор боғлиқлик, ўхшашлик ёки алоқадорлик бўлиши шарт қилиб қўйилади. Шу жиҳатдан қаралса, истиора, киноя (метонимия), синекдоха, рамз

қабилар М.нинг турли асосларга таянувчи навларидир. Ҳозирда М. атамасини бу маънода қўллаш пассивлашган; 2) ҳозирги адабиётшуносликда М. атамасини кўчм турларидан бири, яъни *аллегория* (қ.) сифатида қўллаш кенгроқ оммалашган.

**МАЖРО** (ар. *مجرأ* – сув йўли, ўзан) – қаранг: **мутлақ қофия**

**МАЗИД** (ар. *مزید* – орттирилган) – қаранг: **мутлақ қофия**

**МАЗҲАБИ КАЛОМИЙ** (ар. *مذهب كلامي* – дахлдорлик, алоқадорлик) – мумтоз адабиётдаги шеърий санъат, шоирнинг ўз фикрини ҳақиқий, ҳаётий далил билан хулосалаш. М.к.да келтирилаётган далил *хусни таълил*даги (қ.) каби шунчаки шоирона, тўқима бўлмасдан, ҳақиқий, ҳаётий бўлмоғи ва унинг келтирилиши натижасида, шеър ўзига хос ҳикмат даражасига кўтарилиши талаб этилади. Мас., Паҳлавон Маҳмуднинг:

*Уч юз Кўҳи Кофни келида туймоқ,  
Дил қонидан бермоқ фалакка бўёқ  
Ёинки бир аср зиндонда ётмоқ  
Нодон суҳбатидан кўра яхшироқ, –*

рубойиси М.к.га яхши мисол бўла олади.

**МАКСИМА** (лот. *maxima regula* – олий тамойил) – афористика жанрларидан бири, мустақил жанр сифатида XVIII аср Европа адабиётида кенг истеъмолда бўлган; бу даврда яшаб ижод этган қатор ёзувчи, олим ва файласуфлар (Ф. де Ларошфуко, И.Гёте, Б.Паскаль, А.Шопенгауэр ва б.) қаламига мансуб М.лар машҳур бўлган. М.ларда маънавий-ахлоқий масалаларга тааллуқли қоидалар қатъий ифода этилиб, уларга қўшилиш ё амал қилиш лозим бўлади. Ифодадаги қатъият, маълум нормаларни ишлаб чиқиш, универсаллик даъвоси М.ларнинг айни шу даврда, яъни классицизм даврида фаоллашгани билан боғлиқдир.

**МАНБАШУНОСЛИК, АДАБИЙ МАНБАШУНОСЛИК** – адабиётшуносликнинг ёрдамчи соҳаларидан бири. М. адабиётга тааллуқли манбалар (асар қўлёзмалари, қораламалари, ижодкорларнинг кундаликлари, ёзишмалари, уларнинг ҳаёти ва фаолияти билан боғлиқ ҳужжатлар ва б.)ни излаб топиш, тавсифлаш, таснифлаш ва муайян тартибга солиш, илмий муомалага киритиш ҳамда тадқиқ этиш билан шуғулланади, бу ишларни амалга оширишнинг назарий тамойилларини ишлаб чиқади ва амалда қўллайди. М. фаолияти *адабиёт тарихи* ва *матншунослик* соҳасидаги тадқиқотлар учун муҳим аҳамиятга эга.

**МАРСИЯ** (ар. *مرثيه* – йигламоқ, аза тутмоқ, ачинмоқ) – бирор кишининг вафоти муносабати билан, унинг фазилатларини эътироф этиш, вафотидан афсусланиш мазмунида ёзиладиган лирик жанр. Адабиёт тарихида шоирнинг бирор яқин киши, қариндоши, оила аъзоси вафоти муносабати билан ёзилган М.лар билан бир қаторда шоҳлар ва бошқа амалдорлар, устозлар вафоти муносабати билан ёзилган М.лар ҳам кўп учрайди. Мас., Навоийнинг Абдурахмон Жомий вафотига бағишланган М.си. Асосан, мазмунга қўйиладиган талаб етакчи бўлгани учун, М.нинг ҳажми, қофияланиши билан боғлиқ талаблар қатъий белгиланган эмас. Шу боис М.лар ғазал, мухаммас, мусаддас каби лирик жанрларнинг шаклларида битилиши мумкин. Янги давр адабиётида ҳам Мақсуд Шайхзода, Миртемир, Абдулла Орипов, Рауф Парфи каби шоирлар ижодида М.нинг яхши намуналари бор.

**МАСАЛ** (ар. *مثنى* – ўхшамоқ) – сўз санъатидаги энг кўҳна ва қадимдан кенг оммалашган жанр, насрий ёки шеърий йўлда ёзилдиган мўъжаз ҳикоя; тарбиявий мақсаднинг устуворлиги ва ошқор дидактиклик хусусиятига эгалиги сабабли, М.га дидактик адабиёт жанри сифатида қаралади. М.нинг қурилиши унинг дидактик характерига мос: аввал мўъжаз ҳикояча берилади, сўнг «қиссадан ҳисса» шаклидаги хулоса билан унинг мажозий маъноси таъкидлаб кўрсатилади. М.нинг ҳикоя қисми эртақ ва латифаларга, «қиссадан ҳисса»си эса мақолларга яқинлашади. М.ларда образлар тизими ҳам дидактик мақсадга мос, ҳаётий ҳолат аллегорик образлар (жониворлар, дарахт ва ўсимликлар, нарса-ҳодисалар) орқали тасвирланади, шунинг учун улар универсаллик касб этади. Универсаллик шу маънодаки, М.да тасвирланган конкрет ҳолат ҳаётда учровчи турфа ҳолатлар учун ечим бўла олади. Адабиётшунослиқда аксар мақоллар М. асосида пайдо бўлган деган қараш ҳам бор. Яъни муайян М. шу даражада оммалашадикки, натижада хулоса қисмининг ўзи (албатта, кишилар тасаввурида ҳикоячани уйғотган ҳолда) ҳаётий ҳолатга ечим бўлиб хизмат қилади. Шу жиҳатдан қаралса, М.нинг қадимдан оммалашгани унинг инсонлар учун амалий аҳамият касб этгани, уларнинг ўзаро мулоқотида фикр ифодалаш учун тайёр ва самарали восита бўлгани билан изоҳланади. Зеро, М.ларда қадим аждодларнинг ҳаётий тажрибалари, турли маиший, ахлокий, сиёсий ва Ҳ. ҳолатларга оид ҳукм-хулосалари умумлашма ифодасини топган. Антик ритор (нотик)лар ва фойласуфларнинг М.ларга кўп му рожаат этганлари ҳам бунинг ёрқин далилидир. Шунинг учун барча

халқлар оғзаки ижодида ҳам, қадимги ёзма манбаларда ҳам М. ва моҳиятан унга яқин жанрлар кенг тарқалган. Жумладан, «масалнинг отаси» саналувчи Эзоп тахминан милоддан аввалги VI асрда яшаган ярим афсонавий шахс бўлиб, унга нисбат берилувчи М.ларнинг аксарияти унга қадар яратилган деб ҳисобланади. Қадимги ҳиндларда «Панчатантра» («Калила ва Димна») каби асарлар мавжудлиги ҳам юқоридаги фикрнинг далилидир. Ёзма адабиётда ҳам М. жанрида кўплаб гўзал асарлар яратилган. Жумладан, француз адиби Ж.Лафонтен, немис адиби Лессинг, рус масалчиси И.Криловларнинг М.лари дунёга машҳур.

**МАСНАВИЙ** (ар. *مثنوي* – иккилик) – иккита ўзаро қофияланган мисралардан таркиб топувчи банд тури, шундай бандлардан таркиб топувчи шеърий асар; шеър шакли. Мисраларининг ўзаро қофияланиши (аа, bb, cc, dd каби) М.ни воқеалар баёни учун жуда қулай шаклга айлантиради. Шунинг учун Шарқ адабиётида воқеабанд шеърлар ва дostonлар, асосан, М. шаклида яратилган бўлиб, улар бирдек М. деб юритилаверган. Хусусан, Бобур Навоий ҳақида: «Олти маснавий китоб назм қилибтур, беш «Хамса» жаво-бида, яна бир «Мантиқ ут-тайр» вазнида «Лисон ут-тайр» отлиқ»; Муҳаммад Солиҳ ҳақида эса: «Шайбонийхон отига бир туркий маснавий битибдур», – дейдики, ҳар икки ҳолда ҳам М. термини *дoston* маъносида қўлланаётир. Дарҳақиқат, ўзбек адабиётидаги ilk *дoston* «Қутадғу билиг», ундан кейин дунёга келган «Ҳибат ул-хақойиқ», «Муҳаббатнома», «Гул ва Наврўз», «Сухайл ва Гулдурсун» каби деярли барча *дoston*лар ҳам М. шаклида яратилган. Шунингдек, адабиётимизда турли (диний, фалсафий, маиший ва б.) мавзулардан баҳс юритувчи ёки воқеабанд характердаги ўрта ҳажмли кўплаб шеърлар ҳам М. шаклида ёзилган. Мас., Яссавийнинг айрим ҳикматлари, Ферузнинг диний-тасаввуфий руҳдаги катта ҳажмли шеърлари, Муқимийнинг «Танобчилар»и, Фурқатнинг «Илм хосияти», «Ақт мажлиси хусусида», «Нағма базми хусусида», «Виставка хусусида», «Суворов», «Сабога хитоб», Комилнинг «Ҳасби ҳол», Сиддиқий Ажзийнинг «Анжумани арвоҳ» («Рухлар йигини») асарлари шулар жумласидандир. Янги давр ўзбек шеъриятида ҳам М. шаклида шеър битиш анъанаси давом эттирилди (мас., Миртемир. «Бўлмаса»; Ҳ.Олимжон. «Ўзбекистон»; А.Орипов. «Маймуният», «Кўнгил»; Э.Воҳидов. «Оғриқли саволлар», «Ўзбекистон боғларига қайтиб келди булбуллар»; О.Матжон. «Қуш йўли» *дoston*и ва б.).

**МАТЛАЪ** (ар. *مطلع* – бошланиш, қуёш чиқиши) – газал ёки қасиданинг мисралари ўзаро қофияланган (а-а) биринчи байти, мабдаъ деб ҳам юритилади. Мумтоз шоирларимиз М.нинг шакл ва мазмун жиҳатидан мукаммал, *хусни матлаъ* (қ.) санъати талабларига мувофиқ бўлишига жиддий эътибор қаратганлар. М.да шоирнинг газал ёки қасидада айтмоқчи бўлган фикри ўртага ташланади, бу фикр кейинги байтларда ривожлантириб борилади, далилланади, асосланади ва мақтаъда хулосаланади. Мас., Хувайдонинг бир газали ушбу М. билан бошланади:

*Эй дило, ҳар кимга тегса дарди ишқ,  
Бўлгуси икки жаҳонда фарди ишқ, –*

ва шеър давомида ривожлантирилган мазкур фикр мақтаъда куйидагича хулосаланади:

*Дарди йўқ танни, Хувайдо, тан дема,  
Бўлмаса ул тан ичуда дарди ишқ.*

**МАТНШУНОСЛИК** – филология фанининг тармоғи, адабиётшуносликнинг ёрдамчи соҳаси. М. соҳасидаги илмий изланишларнинг натижаси адабиёт тарихи ва назарияси учун манбавий (матний) асос бўлиб хизмат қилади, шу сабабли унга адабиётшуносликнинг ёрдамчи соҳаларидан бири сифатида қараб келинади. Шунга қарамай, М.ни филологиянинг алоҳида тармоғи, мустақил бир соҳаси сифатида тушунишга асос берувчи жиҳатлар ҳам бор. Биринчидан, М. фаолияти адабиётшунослик, тилшунослик ва тарих фанлари кешишган нуқтада кечади; иккинчидан, М.нинг ўзи қатор ёрдамчи соҳалар (палеография, услубшунослик, археография ва ҳ.)га эга. М.нинг вазифаси адабий матнларни ўрганиш ва нашрга тайёрлашдир. М.нинг вазифаси қисқа ифодаланган бўлса-да, унинг амалга оширилиши жуда катта меҳнатни, чуқур билим ва тажрибани талаб қилади. Адабий матнни ўрганаётган матншунос олдида турли-туман илмий муаммолар кўндаланг бўлади. Дейлик, матншунос муаллифи номаълум асар (матн)га дуч келди. Бу ҳолда у асар муаллифини, матннинг ёши (ёзилган, кўчирилган вақти)ни аниқлаши зарур. Бунинг учун эса у адабиёт тарихи, тил тарихи, манбашунослик, услубшунослик каби соҳалардан яхши хабардор бўлиши ва уларга таянган ҳолда матнни тадқиқ этиши лозим бўлади. Ёки М.нинг бошқа бир

вазифаси – асарнинг илмий-танқидий нашрини тайёрлаш ҳам жуда машаққатли иш. Мас., Алишер Навоий асарларининг турли даврларда, турли котиблар томонидан кўчирилган қўлёзмалари мавжуд. Матншунос қаршисида уларни қиёсий ўрганиш, бирининг камчиликларини бошқалари билан тўлдириш ва шу асосда энг мукаммал – илмий-танқидий матнни тайёрлаш вазифаси туради. Тайёр бўлган илмий-танқидий матнни нашр эттириш учун матншунос уни изоҳлар, шарҳлар, луғатлар билан таъминлаши керак. «Мукаммал асарлар» ортидаги ҳар бир изоҳ, ҳар бир шарҳ ёки луғат бирлиги жуда катта меҳнат орқасида дунёга келади. Зеро, матнда учраган сўз маъносини топиш, ундаги бирор шахс, жой номи ва ш.к.ларга изоҳ бериш учун матншунос жуда кўп изланиши, кўплаб манбаларни кўриб, ўрганиб чиқиши зарур бўлади. Шу билан бирга, М. адабиётшуносликнинг айрим муаммоларини ҳал қилишда муҳим ёрдамчи соҳа, тадқиқот усули бўлиб ҳам хизмат қилади. Мас., унинг тадқиқ усуллари, тажрибаларидан ёзувчи ижодий лабораториясини, муайян асарнинг ижодий тарихини ўрганиш йўлидаги изланишларда кенг фойдаланилади.

**МАЪНАВИЙ САНЪАТЛАР** – қаранг: **санойиъ**

**МАЪРИФАТЧИЛИК, МАЪРИФАТЧИЛИК АДАБИЁТИ** – феодад асосларга қарши ўлароқ майдонга чиқиб, XVII – XVIII асрларда Гарбий Европа мамлакатлари ва Шимолий Америкада кенг ёйилган гоёвий-мафкуравий ҳаракат; шу ҳаракат гоёларини ўзига сингдирган ва тарғиб этган адабиёт. Европанинг турли мамлакатларида М.нинг майдонга келиши вақт жиҳатидан фарқланади: у дастлаб Англияда юзага келган бўлса, ижтимоий шарт-шароитларнинг етилиши баробарида, қитъанинг бошқа мамлакатларига ёйилган ва уларнинг ҳар бирида конкрет шарт-шароитлар билан боғлиқ тарзда кечган. Жумладан, Россияда М. анча кеч – XVIII асрнинг 2-ярмида майдонга чиққан; шунингдек, XIX аср охири – XX аср бошларида қатор Шарқ мамлакатлари, жумладан, Россия таркибидаги туркий халқлар яшовчи минтақалар (Крим, Татаристон, Озарбайжон, Туркистон)да кузатилган М. ҳаракатлари ҳам Европа М.и билан кўплаб муштарак жиҳатларга эгадир.

Мутахассислар М.ни «фалсафий, ижтимоий, ахлоқий концепция», янгича дунёқарашга асос бўлган МАФКУРА деб ҳисоблайдилар. Янги мафкуранинг ўзагини «инсон ақлу заковати дунёни ўзгартиради» деган қараш ташкил этади. М. ҳаракати буржуа демократияси, ижтимоий тараққиёт, ижтимоий тенглик ва адолат, шахс

эркинлиги каби гоёлар билан майдонга чиққан. Дунёқараш нуқтаи назаридан кўпроқ моддиончилик ва деизм мавқеида турган М. намояндалари феодал-монархик тартиботларга, унинг мафкуравий тиргаги бўлган черковга, илм-фандаги схоластикага қарши турди, табиий фанларни чуқур ўрганиш, техникани ривожлантириш каби вазибаларни долзарб билди. Ижтимоий соҳада «ақлга мувофиқ жамият» қуриш мақсадини кўйган М. бунга маърифат ёйиш (жумладан, уларнинг бир қисми «маърифатли монарх» гоёсига таянган), ташвиқот-тарғибот орқали зришиш мумкин деб ҳисоблади. М. ижтимоий онгнинг кейинги ривожига жиддий таъсир кўрсатди, жамият ҳаётининг барча соҳаларида, айниқса, адабиёт ва санъатда туб бурилишлар ясади. Европада М. гоёлари таъсирида янги эстетик принципларга таянган адабиёт шаклландики, унинг асосида «дунёни ва инсонни ўзгартиришга қодир гоёвий адабиёт керак» деган ақида ётади. Бошқача айтсак, М.нинг ижтимоий идеали – «инсон табиати ва «ақл»га мувофиқ жамият қуриш» М.а.нинг эстетик идеалига айланади. Бу эса адабиётнингда шунга мувофиқ ҳолда ўзгаришини тақозо қилди. Мазкур ўзгаришлар орасида энг муҳими идеалнинг «ерга тушгани»дирки, бунинг натижаси ўлароқ бадиият, ғўзаллик тушунчаларига ҳам жиддий таҳрирлар киритилди. М. адабиётда, аввало, ўқувчиларни тарбиялаш асосида ижтимоий ҳаётни ислоҳ қилиш воситасини кўрди, уни конкрет мақсадга зришиш воситаларидан бири деб билди. Шунинг учун М.а. намуналарида кўпинча қахрамонлар орасида очик гоёвий кураш кечади, уларнинг тилидан муайян гоёлар декларатив тарзда айтилади, қисқаси, гоё асарнинг бирламчи унсурига, уни ифодалаш муаллифнинг асосий мақсадига айланади. М. мақсадларини амалга ошириш учун қулай имкониятлар берувчи санъат турлари ва жанрларга айрича аҳамият берилди. Жумладан, М. театрни ўз гоёларини тарғиб этиш минбари деб билган, шу боис драматик жанрлар ривожлантирилган, улар оммалаштирган драматик жанрларда ҳаётга яқинлашиш (мешчанлик драмаси, оилавий драма), олам ва одам ҳақидаги яхлит бадиий концепцияни ифодалашга интилиш (фалсафий драма) кучаяди; М.нинг Дидро, Лессинг каби йирик намояндалари театр санъатига, драматургияга багишланган махсус тадқиқотлар яратишган. М.а.да бадиий проза, айниқса, ҳаётни атрофлича бадиий таҳлил этиш ва яхлит бадиий концепцияни ифодалаш имконини берувчи роман жанри гуркираб ривож топди; «эпистоляр роман» (О.Голдсмит, «Дунё фуқароси»; Ш.Монтескьё, «Форс хатлари»), «саёҳатнома роман»

(Ж.Свифт, «Гулливернинг саёҳатлари»), «тарбия романи» (Руссо, «Юлия ёки Янги Элоиза»), «фалсафий қисса» (Дидро, «Рамо жиян») каби қатор янги жанрлар ишлаб чиқилди; инсон характерини яратишнинг янги-янги имкониятлари кашф этилди, янги усулу воситалар жорий қилинди.

Қайд этиш лозимки, М.а. деганда маълум бир гоёвий ҳаракат адабиётини эмас, балки ижтимоий тафаккурда шу гоёлар устуворлик қилган давр – М. даври адабиётини тушунган тўғрироқ бўлади. Зеро, бу давр адабиётидаги *маърифатчилик классицизми, маърифатчилик реализми, сентиментализм* каби йўналиш ва оқимларнинг бари М. гоёлари таъсирида бўлган ва уларни тарғиб этган.

**МАЪРИФАТЧИЛИК РЕАЛИЗМИ** – маърифатчилик даври (қ. *маърифатчилик*) Европа адабиётидаги йўналишлардан бири, шу даврда ҳаётни бадиий акс эттиришнинг реалистик принципи (қ. *реализм*) асосида яратилган қатор асарларга хос умумий хусусиятлардан келиб чиқиб қўлланувчи атама. М.р. адабиётни ҳаётга яқинлаштирди, классицизмдан фаркли ўлароқ, оддий кишилар ҳаёти, уларнинг кундалик турмуши, орзу-интилишларини қаламга олди. М.р.нинг қахрамони – ўзининг фаоллиги, ақл-заковати ва ирода кучи билан жамиятда ўз ўрнини топиш, унда ўз мавқеини яхшилаш учун курашаётган шахс. Яъни бу қахрамон ўзида маърифатчиликка хос инсон концепциясини ифодалайди, инсон ўзининг ақл-заковати ва ирода кучи билан жамиятни ва ўз тақдирини ўзгартиришга қодир деган гоёга иллюстрация бўлиб хизмат қилади. Шу боис айрим адабиётшунослар «маърифатчилик реализми» атамасидан кўра «дидактик реализм» атамасини кўпроқ маъқул кўрадиларки, бунга етарли асос бор. Зеро, М.р., бир томондан, адабиётни ҳаётга яқинлаштирди, иккинчи томондан, унга тарбия воситаси сифатида қаради. Яна ҳам аниқроғи, адабиётни ҳаётга яқинлаштириш ҳам унинг тарбиявий кучини ошириш мақсади билан изоҳланиши мумкин. Яъни ҳаётни аслига монанд тасвирлаб, ундаги фожеа ва иллатларни ҳаққоний кўрсатгани ҳолда, М.р. шу реал воқелик фониде идеал қахрамонни ҳаракатлантирди, унинг жамиятдаги мавқеини яхшилаш, инсонлик шаънига муносиб турмуш учун курашини ибрат, намуна сифатида талкин қилди. Табиийки, М.р.да шунга мос адабий жанрлар («тарбия романи», «саёҳатнома роман», «саргузашт роман»; очерк, саёҳатнома, мешчанлик драмаси) кенг оммалашди ва ривожлантирилди. М.р.нинг йирик намояндалари сифатида эътироф этилувчи Д.Дефо, Г.Филдинг, Д.Дидро, Г.Лессинг каби адиблар-

нинг асарлари бадиий тафаккур ривожда, адабиётда реалистик тенденцияларнинг қарор топишида катта аҳамиятга эга бўлди. Европа М.р.га хос хусусиятлар XIX аср охири – XX аср бошида қатор Шарқ халқлари адабиётида, жумладан, ўзбек жадид адабиётида ҳам кузатилдики, бу, бир томондан, адабий алоқа ва таъсир, иккинчи томондан, уларни юзага келтирган шарт-шароитлардаги типологик умумийлик билан изоҳланади.

**МАҚТАЪ** (ар. *مقتع* – тугаш жойи, кесмоқ) – газал ёки қасиданинг охири, якунловчи байти. М.да шеър давомда билдирилган фикрлар, изҳор этилган ҳис-туйғулар хулосаланади, шоирнинг уларга муносабати ифода этилади. Мумтоз адабиётшунослиқда шеърни чиройли, таъсирли ва мазмундор қилиб якунлаш гоътада муҳим саналган, *ҳусни мақтаъга* (қ.) алоҳида эътибор берилган. Дарҳақиқат, охири байт шеър мазмун-моҳиятини ўзида мужассам ифода этиб, унинг бадиий савиясини белгиловчи муҳим омил бўла олади. Анъанага кўра, аксарият М.ларда шоир тахаллуси келтириладики, у шеър муаллифини кўрсатиб турувчи ўзига хос имзо, тамга вазифасини ўтайди. Мас.:

*Олими нуктадон манам, пири ҳидояхон манам,  
Шухрати шеър бобида Машраби муътабар ўзум.*

Бироқ М.да тахаллус келтириш қатъий қоида мақомига эга эмас. шеъриятимизда тахаллус келтирилмаган М.лар ҳам талайгина. Хусусан, тахаллус келтирилмаган М.лар Бобур ижодида кўплаб учрайди. Мас., Бобурнинг газалларидан бири қуйидаги М. билан якунланган:

*Бу маҳвашларга кўнгул бермагилким, асрай олмаслар,  
Кўнгулни асрагил, бўлғайки, бир дилдор топқайсен.*

**МАҲАЛЛИЙ КОЛОРИТ, ЖОЙ КОЛОРИТИ** – бадиий асарда муайян ҳудуд (минтақа, вилоят ва ҳ.)га хос турмуш тарзи, урф-одатлар, шева, пейзаж ва ш.к.ларни қайта яратиш. М.к. тасвирнинг ҳаққоний бўлишига хизмат қилиши билан бирга маърифий жиҳати билан ҳам аҳамиятли, чунки у муайян ҳудудда яшовчи кишилар ҳаёти билан яқиндан танишиш имконини яратади.

**МЕЛОДРАМА** (юн. *melos* – кўшиқ, *drama* – ҳаракат) – 1) драматургия жанрларидан бири. М.нинг характерли хусусиятлари сифа-

тида ўткир интрига асосига қурилган сюжетга эгалик, бир қадар бұрттирилган эмоционалликка йўғрилганлик, эзгулик билан ёвузликнинг кескин ва қабариқ тарзда зидлантирилиши, ахлоқий-тарбиявий йўналтирилганлик кабилар кўрсатилади. М. драматургия ва театр жанри сифатида XVIII аср охирида Францияда шаклланган, гуллаб-яшнаган даври эса XIX асрнинг иккинчи чорагига тўғри келади; 2) мусиқали драматик асар, унда персонажларнинг монолог ва диалоглари мусиқа жўрлигида ижро этилади; 3) ҳозирги адабиётшунослиқда ва кўпроқ сўзлашув амалиётида М.га хос (интригага бой сюжет, яхшилик билан ёмонлик кескин контрастда тасвирланувчи, ошқора кучайтирилган эмоционаллик ва б.) хусусиятларга эга, лекин бадиий жиҳатдан бўш, оммавий китобхон ёки томошабин савиясига мўлжаллаб ёзилган асарларга салбий баҳони ифодалайди. Терминнинг салбий маънода қўлланиши «оммавий санъат» билан боғлиқ бўлиб, унинг М.га хос юқоридагича хусусиятлардан ўқувчи (томошабин)ни ўзига осон жалб этувчи восита сифатида ўринли-ўринсиз фойдаланиш натижасида бадиий ночор асарлар пайдо бўлади, ўз ҳолича яхшигина бадиий усул ва воситалар сийқалашади.

**МЕМУАР** (фр. *memoires* – хотиралар, эсдаликлар) – муаллифнинг ўтмишда ўзи бевосита иштирок этган ёки шохиди бўлган воқеалар ҳақидаги хотиралари баён қилинувчи адабий асар. М. асарлар ўзининг баён йўсини, воқеаларнинг сюжетли тарзда берилмаслиги, вақт тартибига риоя қилиниши, фактографиклик хусусиятлари билан *кундалик*ларга, материалнинг ҳаққонийлиги ва тўқиманинг йўқлиги жиҳатидан *ҳужжатли-тарихий очерк*, *илмий биография*ларга яқин туради. Бироқ М.ни булардан фарқловчи қатор муҳим жиҳатлар ҳам бор. Жумладан, хотиранавис, умуман, воқеани эмас, унинг ўзи кўрган томонлари ва ундан бевосита олган таассуротлари ҳақида ёзади. Шундай экан, М. субъективликдан холи эмас, демак, фактик аниқлиги жиҳатидан ҳужжат санала олмайди. Бироқ бу субъективлик муаллифнинг жонли иштироки, таассуротларнинг табиий ва жонлилиги, шунингдек, ҳужжатларда доим ҳам акс этавермайдиган кўплаб тафсилотларни қамраши ҳисобига ювилиб кетади, шу жиҳатлари билан М. асар муайян воқеа (давр) ҳақида маълумот берувчи қимматли манба бўлиб қолади. М. асарлар ҳажми, ҳаётни қамраш кўлами, услубий хусусиятлари каби қатор жиҳатлари билан бир-бирдан фарқланади: айрим М. асарлар хронологик жиҳатдан чекланган (Н.Мухитдинов. «Кремлда ўтган кунларим») бўлса, бошқалари муаллиф онгли ҳаётини тўла қамраб олади («Бобурнома»); баъзила-

ри диққатни конкрет воқеага (О.Шарафиддинов. «Бир нутқ тарихи»), бошқалари жамият ҳаётидаги муҳим бир даврнинг қатор воқеаларига (М.Муҳаммаджонов. «Турмуш уринишлари») қаратади; *портрет*га яқин бўлган айрим М.лар бирон-бир шахс ҳаётини деярли тўласича (З.Саидносирова. «Ойбегим менинг») қаламга олса, бошқалари унинг ҳаётдан бир-икки эпизодни (С.Аҳмад. «Йўқотганларим ва топганларим») қамраш билан чекланади. Ёки айрим М.ларда «Бобурнома»даги каби турли тафсилотлар (этнографик, географик, флора ва фауна ва ҳ.)га кенг ўрин берилса, бошқаларида муаллифни қизиқтирган асосий мавзуга оид тафсилотларни қайд этиш билан чекланилади; баъзи М.ларда баён объектив тарзда (фактларни қайд этиш билан) олиб борилса, баъзан фактларни атрофлича мушоҳада қилиш, уларга гоёвий-ҳиссий муносабатни ошкор ифодалаш кузатилади. Яна бир жиҳати, М.лар ёзиш билан профессионал ёзувчиларгина эмас, бошқа соҳа кишилари (давлат арбоблари, санъаткорлар, спортчилар ва ҳ.) ҳам шугулланадилар.

**МЕТАФОРА** (юн. *metaphora* – кўчириш) – маъно кўчишининг кенг тарқалган турларидан бири, нарса-ҳодисалар орасидаги ўхшашликка асосланувчи кўчим тури, М. моҳиятан яширин ўхшатиш бўлиб, унда ўхшатилаётган нарса тилга олинмагани ҳолда, унинг маъносини ўхшаётган нарса (яъни уни ифодалаётган сўз) билдиради. Албатта, бу ўринда ўхшатилаётган нарса-ҳодисаларнинг айнан ўхшашлиги талаб қилинмайди, балки икки нарса-ҳодисага хос белгилардан бирортаси асос учун олинади. Дейлик, «олтин куз», «олтин давр» бирикмаларининг биринчисида ўхшатиш асоси учун «ранг», иккинчисида эса «қиммат» олинган. Бадиий матндаги М.нинг маъноси гоёят серқирра, чунки у контекстдаги бошқа сўзлар билан бирга мазмуний бутунлиқни ташкил қилар экан, улар билан алоқада ҳосил бўлган ассоциациялар туфайли маъно диапазонини кенгайтиради. Мас., матндан ажратиб олинган ҳолда «сув синди» бирикмасининг маъноси жуда хира, унинг М. эканлигини идрок қилиш учун ақлни зўриқтириш талаб этилади. Бироқ Р.Парфининг «Сув остида ялтирайди тош, Харсангларда *синади сувлар*» сатрларида бадиий матн контекстидаги бирикма маъноси ёрқин намоён. «Сув синиши» учун унинг ойнага ўхшатилиши зарур, лекин шеърда сув ойнага ўхшатиш эмас. Шунга қарамай, ассоциатив алоқалар асосида «остида ялтираган тош» кўринадиган даражада тиниқ сувни ойнага ўхшата оламиз ва шунинг учун унинг «синиши» табиий кўринадиган. Шоирнинг «Деразамга урилади қор, Жаранглайди жарангсиз кумуш» сатрла-

рида М.нинг маъно ассоциациялари янада кенгрок, Ранг ўхшашлиги асосида қорни кумушга ўхшатиш шеъриятда анча кенг қўлланади. Бироқ бу Р.Парфи учун таянч нуқта, холос, ундан тўртки олиб бошқа ассоциациялар уйғотилади: «жаранглайди, жарангсиз» сўзлари метонимик асосда «кумуш танга»ларни тасаввурга келтиради ва қор ёғиши «кумуш тангаларнинг сочилиши»га ўхшатилаётгани аён бўлади. Яъни лирик қаҳрамон наздида гўё кимдир хайр-аҳсон қилиб танга сочаётгандек. Лирик қаҳрамон «қор ёғиши тўқинлик, баракотдан нишона» деб билувчи халқ вақили экани эътиборга олинса, унинг айни дамдаги кечинмаларини ҳис этиш мумкин бўлади. Бу ўринда М.нинг воқе бўлишини таъминлаётган ассоциациялар занжирини мана бу тарзда ифодалаш мумкин: кумуш (қор, ранг ўхшашлиги) – жаранг (танга, алоқадорлик асосида) – «танга сочиш» (саховат) – қор ёғиши (Яратганнинг саховати, барака ёғилиши). Демак, лексик М.нинг маъноси бир сўз доирасида англашилиши мумкин ва у номинатив (аташ) функция бажаради, бадиий М.нинг функцияси эса аташдан анча кенг, у матндаги бошқа сўзларнинг маънолари таъсирида мазмунини кенгайтиради ва эстетик функция бажаради. Мас., лексик М. сифатида «баҳор» – ёшлик, «кузак» – етуклик, «куз» – кексалик маъноларида ишлатилиши мумкин, яъни учала ҳолда ҳам М. инсон умрининг бир босқичини бошқа сўз билан атайди, холос. И.Мирзанинг «Кузагимга хуш буй берган баҳорим» мисрасидаги М.лар алоҳида ҳолда эмас, бир бутунлигида муҳим: улар етуклик палласи навқирон сўзга кўнгиш кўйган киши кечинмаларини ифодалайди, образ яратади. Бу каби ҳолларда *ёйиқ* М. ҳақида гапирилади, яъни бутун бошли жумла ёки матннинг йирикроқ бўлаги доирасида воқе бўлувчи образ назарда тутилади. Албатта, бу ўринда М.ни энди кўчим тури деб бўлмайдиган, унга образлиқнинг бир кўриниши сифатида қараш тўғрироқ. Адабиётшунослиқда бир нарса-ҳодисанинг моҳиятини иккинчи бир нарса-ҳодиса орқали очиш *метафориклик*, шу асосга қурилган образни *метафорик образ* деб юритилади (қ. образ).

**МЕТОД** (юн. *methodos* – тадқиқ усули) – 1) ижодий метод; марксистик эстетиканинг асосий категорияларидан бири, XX асрнинг 20-йилларидан кенг оммалашган ва маъноси ўзгариб борган термин. 30 – 40-йиллар адабиётшунослигида адабиёт ва санъатдаги ҳаётни бадиий акс эттиришнинг асосий тамойиллари М. деб юритилиб, иккита – реалистик ва нореалистик ижодий методлар мавжуд деб ҳисобланган. Кейинроқ М. деганда бадиий асарнинг гоёвий мазмуни билан боғлиқ бўлган ҳаёт материални танлаш, бадиий идрок

этиш ва баҳолаш принциплари тушунила бошланган. Яъни бунда М. бадий тафаккур тарзи сифатида тушунилиб, ижодкор эътиборини воқеликнинг у ёки бу қирраларига қаратиши, типиклаштириши ва баҳолашида намоён бўлувчи ҳодиса саналган. Кейинги маъно кўчиши адабиётнинг мафкура қуролига айланишини илмий асослаш жараёнида амалга ошган ва мафкуралашган шўро адабиётшунослигида М. тушунчасига ўта муҳим аҳамият берилган. Терминнинг кейинги маънода қўлланиши бадий ижоддаги икки муҳим унсур – метод ва услубни алоҳида категориялар сифатида тушунишга имкон берган. Бунда бадий тафаккур тарзини англатувчи М.га гносеологик (яъни бадий билиш билан боғлиқ), услубга эса антропологик (яъни ижодкор шахси билан боғлиқ) категория сифатида қаралади (қ. услуб). Адабиётшуносликда М. терминини бу маънода қўллашда ҳам турличаликлар бор. Жумладан, *романтизм, реализм, танқидий реализм, социалистик реализм* кабилар ижодий М. сифатида кўрсатилса, *классицизм* баъзан М., баъзан эса адабий йўналиш сифатида кўрсатилади. Ҳолбуки, классицизмда ҳам ўзига хос ҳаёт материални танлаш, бадий идрок этиш ва баҳолаш принциплари мавжуд бўлиб, бу жиҳатдан у бемалол М. саналиши мумкин. Ҳозирги адабиётшуносликда ижодий М. термини қўлланишда пассивлашди. 2) тадқиқот усули. Бу маънода М. бадий асар ва адабий жараёни тадқиқ этиш тамойиллари ва усуллари билдиради: биографик метод, қиёсий метод, социологик метод ва Ҳ.

**МЕТОНИМИЯ** (юн. *metonymia* – қайта номлаш, бошқа нарса орқали аташ) – маъно кўчишининг кенг тарқалган турларидан бири, *кўчим*нинг нарса-ҳодисалар орасидаги алоқадорликка асосланувчи тури. Нарса-ҳодисалар орасидаги алоқадорлик турлича кўринишларда намоён бўлади: нарса-ҳодиса, ҳолат ёки ҳаракат билан улар эгаллаган жой («стадион ҳайқирди», «бутун шаҳар қатнашди»), вақт («огир кун», «омадли йил»); ҳаракат билан у амалга ошириладиган восита («аччиқ тил»); нарса ва унинг эгаси, яратувчиси («Фузулийни ўқимок»); нарса ва у ясалган модда, хом ашё («бармоқлари тўла тилла»); руҳий ҳолат, хусусият ва унинг ташқи белгиси («кўз юммоқ») ва Ҳ. Бадий адабиётда, айниқса, метафорик тафаккур етакчилиги қилаётган замонавий адабиётда М. метафорага нисбатан кам учрайди, зеро, эстетик функциядорлиги жиҳатидан у метафорадан куйроқ туради. Шундай бўлса-да, бадий матнда метафора билан ёндош қўлланган ҳолда у катта бадий самара беради, фикрни лўнда ва таъсирли ифодалашга хизмат қилади. Мас., А.Ориповнинг

«Фарёд чекканим йўқ эл ичра тақир, Ўч ҳам олганим йўқ на қаламимдан» сатрларида восита орқали жараён назарда тутилади ва у «ўч олмоқ» метафораси билан бирга қўлланади. Бу иккиси бирликда «бутун вужудим билан ижодга берилиб, гамларимни унутишга ҳаракат қилмадим» деган маънони ифодалайди ва, муҳими, шу мазмунни образли, таъсирли ифодалашга хизмат қилади. У.Азимнинг: «Кўзларини очиб-юмар Митти кушча – ярадор. Фалак, унга нажот юбор, Ўлим, бўлма харидор», – сатрларида жой М.си қўлланган: «фалак» сўзи тафаккуримизда ўринлашган ишонч асосида «Яратган»ни англатади. Баъзи ҳолларда метафора ва М.нинг қоришиқ ҳолда воқе бўлиши, биргина сўзнинг ҳам метонимик, ҳам метафорик асосдаги кўчма маънолари ишлатилиши мумкин. Мас., Ш.Раҳмоннинг куйидаги шеърида шу ҳол кузатилади:

*Хазонга айланди кунларим...  
Мотамда тургандай боқаман.  
Фасллар тўқнашган паҳзада  
хазонлар тўпини ёқаман.  
Кўзларим ачишар бехосдан  
юрагим, қўлларим титрайди.  
Аланга олмайди кунларим,  
тутайди, оҳ, мунча тутайди.*

Шеърнинг лирик қаҳрамони – кечмишини сарҳисоб қилаётган, ўтган кунларидан қониқмаслик ҳиссини туяётган одам: у «хазон»да метонимик асосда кузни (матнда йўқ «куз» сўзи «умр кузи»ига ҳам ишора қилади), метафорик асосда эса ўтган, ҳаёт дарахтидан гўё узилиб тушган кунларини кўради. Шеърнинг кайфиятини ҳис қилишда, уни тушунишда «хазон» етакчи аҳамият касб этади, гўё қалиғ вазифасини бажаради. Шунга ўхшаб Х.Давроннинг «Қаршида дераза сўйлайди эртак, Унда икки соя – бахтиёр малул» сатрларида ҳам ёлғиз аёл руҳиятини очишда М.дан моҳирона фойдаланилган ва унда ҳам М. метафора билан бирга қўлланган. Деразадаги «икки соя» – ёлғиз аёлга армон бўлган сокин оилавий ҳаёт ва шу армон туфайли дераза унга эртак сўйлаётгандек бўлади. Ҳар икки ҳолда ҳам адабиётшуносни М.нинг номинатив функцияси эмас, унинг бадий-эстетик функцияси – лирик субъектларнинг кечинмасини образли ифодалашга, уларнинг образини яратишга хизмат қилаётганини кизиқтириши лозим.

**МИГРАЦИЯЛАР НАЗАРИЯСИ** – қаранг: **сайёр сюжетлар назарияси**

**МИСТИФИКАЦИЯ, АДАБИЙ МИСТИФИКАЦИЯ** (юн. *mystes* – сирга ошно, *facio* – қиламан) – 1) асарнинг муаллиф томонидан атайин бошқа бир шахс (ё ҳақиқатда мавжуд, ё тўқима)га тегишли, ўзга шахс томонидан ёзилган қилиб кўрсатилиши. Муаллифнинг яширин қолишга интилиши жиҳатидан адабий М. аноним (имзасиз эълон қилинган ёки тарқалган асар) ва тахаллус қўллаш (яъни яширин қолиш мақсадида асарни тахаллус билан эълон қилиш)га яқин. Улардан фарқли томони шуки, адабий М.да асар нисбат берилмаётган муаллифнинг услуби, руҳияти, дунёқараши ва ш.к. индивидуал жиҳатларни яратиш орқали реал муаллифдан тамом ўзга *муаллиф образи* вужудга келтирилади. Мас., кейинги йиллар ўзбек матбуотида эълон қилинган Уста Гулмат ғазаллари бунинг ёрқин намунаси бўлиб, уларда ҳақиқий муаллиф А.Обиджондан тамом ўзга муаллиф образи – лирик қаҳрамон бўй кўрсатади. Уста Гулмат ғазалларидан бир туркумини «Шарқ юлдузи»да эълон қиларкан, ҳақиқий муаллиф унга мухтасар сўзбошини илова қилади. Унда, жумладан: «Аҳли шуарога маълум бўлгайким, Гулмат Шошийнинг сўнгги ғазалларини тиклаш ишлари ниҳоясига етди. Ғазалларнинг бу қисми 1916 ва 1917 йилнинг бошларига тўғри келади», – дейилади. Табиийки, ҳақиқий муаллиф туркумда нисбат берилган муаллифга хос услубни ҳам, ғазаллар нисбат берилмаётган даврга хос мазмун ва руҳни ҳам тиклайди, ҳеч жойда ўз номини келтирмайди; 2) ҳикояни асослаш (*мотивировка*) мақсадида қўлланувчи бадиий усул, эпик асарларда воқеаларнинг тасодифан ёзувчи қўлига тушиб қолган бировнинг хати, кундалик дафтари, қўлёзмаси ва ш.к. йўсинларда баён қилиш. Бироқ мазкур усул сифатидаги М.нинг дастлабки маънодаги М.дан фарқи шуки, биринчидан, бундай асарларда муаллиф яширин қолиш мақсадини кўзламайди, иккинчидан, уларда муаллиф образи у ёки бу тарзда (мас., кундалик, хат, қўлёзма ва ш.к.ларни топиб олган ва шунчаки эълон қилаётган шахс сифатида) ҳаммиша акс этади. Асар тўласича шу усул асосига қурилиши ҳам, М. йўсинидаги баён ривоянинг бир қисмини ташкил қилиши ҳам мумкин (мас., О.Ёқубов, «Кўҳна дунё» – Жузжоний кундаликлари; О.Мухтор, «Минг бир қиёфа» – Абдулла Ҳакимнинг машқ дафтари).

**МИФ** (юн. *mythos* – ривоят, ҳикоя, масал) – халқ оғзаки ижодининг энг қадим даврларида пайдо бўлган, воқелик (олам) ҳақидаги тасаввурларни конкрет образлар воситасида акс эттирувчи ривоявий

асарлар. М. ривоявий асарлар (олам ва одам ҳақидаги ҳикоялар) бўлса-да, уларни том маънода сўз санъати ҳодисаси деб бўлмайти. М.лар қадимги одамлар учун тафаккур шакли, улар М. воситасида олам сир-синаотлари (оламнинг ёки инсоннинг яратилиши, куёш чиқиши ва ботиши, шамол эсиши ва момагулдурак сабаби ва х.)ни билишга интилганлар, М.ларда уларнинг олам ҳақидаги билимлари ўз ифодасини топган. М.ларда яратилган образлар (маъбудлар, турли махлуқлар ва х.) улар учун ижодий тасаввур маҳсули эмас, аксинча, асл ҳақиқатдир. Дейлик, қадимги юнонлар чақмоқ чақишини Зевснинг, денгиздаги даҳшатли довулларни Посейдоннинг ғазаблангани билан изоҳлаганлар, инсон тақдиридаги турфа эврилишларда илоҳларнинг аралашувини кўрганлар. Кейинчалик, мифологиядан ижтимоий онгнинг дин, фан, санъат, адабиёт, сиёсат каби соҳалари ажралиб чиққанидан сўнг, М.лар уларнинг таркибига сингиб кетади. Буни адабиёт мисолида кўрадиган бўлсак, қадимги М.лар антик адабиётда ўзининг иккинчи умрини яшай бошлаганига амин бўлиш мумкин. Зеро, антик адабиётдаги кўплаб асарларга мифологик сюжетлар асос бўлгани, уларда мифологик унсурлардан кенг фойдаланилгани бунинг ёрқин далилидир.

**МИФОЛОГИК МАКТАБ** – XIX аср Европа адабиётшунослигида вужудга келган илмий йўналиш. М.м.нинг фалсафий негизини Ф.Шеллинг, А.Шлегель ва Ф.Шлегель каби мутафаккирлар таълимоти ташкил этади. Бу мутафаккирлар эстетикасида мифлар жуда катта ўрин тутади. Уларга кўра, адабиёт ва санъатнинг вужудга келишига мифлар асос бўлган, миф – поэзиянинг жавҳаридир. Маълумки, романтизм экзотикага мойиллик билан характерланади, айти шу нарса халқ оғзаки ижодига қизиқиш кучайганининг бош омили бўлди. Зеро, классицизм даври сифинган антик эталонлардан, маърифатчилик топинган ақл культидан безган романтизм вакиллари халқ оғзаки ижодида чинакам экзотика, битмас-туганмас хазинани кўрдилар. Шунинг учун халқ оғзаки ижоди намуналарини тўплаш ва нашр қилиш, уларни атрофлича тадқиқ этиш ишлари авж олди. Бунда немис олимлари ака-ука Гриммлар, айниқса, жонбозлик кўрсатдилар: 1812 йили улар тўплаган эртақларнинг илк жилди чоп этилди; фольклоршунослик соҳасидаги тадқиқотлари асосида «Немис мифологияси» (1835) асари яратилиб, унда М.м.нинг назарий қарашлари тугал шакллантирилди. Ака-укалар адабиётнинг пайдо бўлишини немис романтизм фалсафасидаги *халқ руҳи* тушунчаси билан боғлайдилар: гайбдан илҳомлан-тирилувчи *халқ руҳи* аввал



мифларни яратади, кейин эса мифлардан эпос, эртак, лирик кўшиқ ва ш.к. бошқа жанрлар туғилади; илоҳий илҳом туфайли яралгани учун ҳам фольклор – халқ руҳининг англалмаган ижод маҳсули, унинг шахсизлиги ҳам шу билан боғлиқдир. Ака-ука Гриммлар турли халқлар фольклорини қиёсий ўрганишади, уларда кузатилувчи ўхшашликларни эса, худди барча хинд-европа тиллари учун умумий бобо тил (санскрит) бўлгани каби, барча халқлар (хусусан, хинд-европа халқлари) учун умумий қадимги мифология мавжуд бўлгани билан изоҳлашади. Европанинг турли мамлакатларида кўплаб издошлари бўлган М.м.нинг илмий изланишлари, асосан, икки (этимологик ва аналогик) йўналишда кечди. Биринчи йўналиш (А.Кун, М.Мюллер, Ф.Буслаев ва б.) ўз олдига қадимги мифлар мазмунини тиклаш, уларнинг пайдо бўлиш сабабларини аниқлашни мақсад қилиб қўйса, иккинчиси (В.Шварц, В.Манхард ва б.) турли халқлар фольклорини қиёсий ўрганиш орқали ўхшашликларни аниқлаш йўлидан борди. М.м.нинг бир қатор қарашларини кейинги давр адабиётшунослиги инкор қилган бўлса-да, у адабий назарий тафаккур тараққиётида сезиларли из қолдирди. Жумладан, халқ оғзаки ижоди намуналарини ёзиб олиш ва чоп этиш ишларининг йўлга қўйилгани, мифология, фольклор ва ёзма адабиёт намуналарини қиёсий ўрганишнинг бошлаб берилгани бевосита М.м. фаолияти билан боғлиқдир. Шунингдек, М.м.нинг назарий қарашларини ижодий ривожлантириб (қ. *ритуал-мифологик танқид*) ёки инкор қилган ҳолда (қ. *сайёр сюжетлар назарияси*) янги йўналишларнинг майдонга чиққани ҳам унинг адабиётшунослик ривожига жиддий таъсир этганини кўрсатади.

**МОДЕРНИЗМ** (фр. *moderne* – энг янги, замонавий) – XIX аср охири – XX аср бошларида оммалашган термин, санъат ва адабиётда декадансдан кейин майдонга чиққан нореалистик оқимларнинг умумий номи сифатида тушунилади. Табиийки, адабиёт ва санъатда кенг тарқалган мазкур ҳодиса бўш жойда пайдо бўлган эмас, унинг куртаклари аввалдан мавжуд эди. Жумладан, илгарироқ вужудга келган «санъат восита эмас – мақсад», «санъат – ўзини ифодалаш», «соф санъат» қабалидаги назарий қарашлар, барокко доирасида саналувчи *маньеризм*, *гонгоризм*, *прециоз адабиёт* намояндаларининг ижод амалиётида М.га хос жиҳатларни кузатиш мумкин. Аслида, адабий жараёнда ҳаётни бадиий акс эттириш принциплари (реалистик ва нореалистик), адабиётнинг моҳияти, билиш имконлари, ва-зифаси ва ш.к. масалаларда зиддиятли қарашлар азалдан мавжуд

бўлгани эътиборга олинса, М. куртакларини жуда қадим замонлардан ҳам топиш мумкин бўлади. Яъни М.га реалистик ва нореалистик йўналишлар орасидаги зиддиятнинг муайян ижтимоий-тарихий шароитда қуюқлашиб, кескин намоён бўлиши, янгиланган назарий асосларга эга бўлиши ва оммалашishi сифатида қараш мумкин. М. ўтган аср охирларидан бошлаб майдонга чиққан, ижодий дастурлари ва ижод амалиёти жиҳатидан турли-туман адабий мактаб ва йўналишлар (*экспрессионизм*, *импрессионизм*, *символизм*, *акмеизм* ва б.) ўзига асос билган эстетик тизим, ижодий метод сифатида тушунилади. М. доирасидаги мактаб ва оқимлар нечоғлик турфа бўлмасин, уларни умумлаштирувчи қатор нуқталар мавжуд. Аввало, дунёқараш жиҳатидан улар нафақат XIX асрда оммалашган позитивизм, балки асрлар давомида шаклланган аъанавий христиан дунёқарашидан ҳам деярли узилиб, Ф.Ницше, З.Фрейд, А.Бергсон, У.Жеймс каби мутафаккирлар қарашларидан озикланади. Шунга мос тарзда М. йўналишидаги мактаб ва оқимларнинг аксарияти адабий-маданий аъаналарни ҳам турли даражада инкор қилади ва янги даврга мос янги адабиёт яратиш даъвосини олға суради. Янги адабиёт воқеликни реалистик тасвирлашдан воз кечиб, уни идрок қилиш мумкин эмас деб билади, инсоннинг ҳиссий билиш имконидан ташқаридаги моҳиятга интуитив тарзда яқинлашишни кўзлайди (қ. *символизм*); воқелиқда сабаб-натияжа асосидаги тартибот мавжудлигини қабул қилмайди (қ. *абсурд*), унда воқелик гоҳ бирдан пайдо бўлган оний таассуротлар йигиндиси (қ. *импрессионизм*), гоҳ таниб бўлмас даражада ўзгарган, тасодиф ва гаройиботга тўла макон (қ. *сюрреализм*) сифатида аксланади. М.га хос умумий хусусиятлардан бири шуки, у объектив воқеликнинг тасвири ўрнига унинг ижодкор тасаввуридаги бадиий моделини яратишни мақсад қилади. Яъни бу ўринда воқеликни акс эттириш эмас, ижодкорнинг ўз-ўзини ифодалаш (қ. *экспрессионизм*) устувор аҳамият касб этади. Ижодда субъективликнинг олдинги ўринга чиқарилиши, мантиқий билишдан интуитив билишнинг юқори қўйилиши, инсон ички оламида кечувчи тизгинсиз эврилишларга айрича эътибор берилиши (қ. *онг оқими*), ижодкор шахс ижодий тахайюли ва у акс эттирган воқеликнинг бетакрор ҳодиса сифатида тушунилиши, ўз ўй-ҳисларини ҳеч қандай (маънавий, ахлоқий, сиёсий ва ҳ.) чекловларсиз ифодалаш ҳуқуқининг эътироф этилиши ҳам М.га хос хусусиятлардандир. Ижодий эркинлик нафақат гоъвий-мазмуний, балки шаклий изланишларда ҳам мутлақо дахлсиз. М. асрлар давомида шаклланган адабий канонларни инкор қилади

ва ҳар қандай нормативликка қарши (қ. *футуризм*) туради. Бу ҳол М.даги бадий образ структураси, асарнинг субъектив ва объектив ташкилланиши, баён тарзи, сюжет-композицион қурилиши, тил хусусиятлари, ҳуллас, адабий асарнинг барча сатҳларида шаклий ўзига хосликларни юзага келтиради.

М. ўз ичига санъатнинг моҳияти ва мавжудлиги ҳақида бир-бирдан жиддий фарқланувчи қарашларга асосланган ва, айна чоғда, қатор муштарак жиҳатларга эга турфа оқим ва мактабларни бирлаштирган фалсафий-эстетик ҳодиса бўлиб, у XX аср адабиёти ва санъатида чуқур из қолдирди. У кўплаб улуг адиблар (мас., Ф.Кафка, Ж.Жойс ва б.) таянган ижодий тамойилларни белгиладигина эмас, яхлит олганда, реализм мавқеида турган қатор адиблар (М.Пруст, В.Вулф) ижодий йўсинига ҳам жиддий таъсир кўрсатди. Шу ўринда М.га берилган таърифларнинг фарқли экани, унинг юзага келиш вақти, даврлаштирилиши каби масалаларда билдирилган фикрларда жиддий тафовутлар борлиги, ниҳоят, унга муносабатнинг турличалигини ҳам таъкидлаб ўтмоқ жоиз. Жумладан, шўро даври адабиётшунослигида М.га салбий ҳодиса деб қаралди, буржуа мафқурасининг хизматчиси, капиталистик турмуш тарзи, ахлоқсизлик, индивидуализм ва ш.к. иллатларни тарғиб қилувчи адабий ҳодиса сифатида баҳоланди. Албатта, бу хил айбловларни буткул асоссиз дейиш ҳам адолатдан эмас. Бироқ шўро империясидан ташқаридаги жуда катта ҳудудга ёйилган, кўплаб мутараққий халқларнинг энг ёрқин истеъдодларини ўзига жалб этиб, адабиёт ва санъатига кучли таъсир ўтказган ҳодисани бундай бир ёқлама баҳолаш «мағзавага кўшиб чақалоқни ҳам тўкиб юбориш»нинг айна ўзи эди. Зеро, адабиёт тарихи реалистик ва нореалистик ижодий тамойиллар орасидаги кураш жараёни, айна чоғда, уларнинг бир-бирини тўлдириш, бойитиш жараёни ҳам бўлганини кўрсатади. Ҳатто шўроларнинг мафқуравий ихотаси ҳам бу табиий жараённинг кечишини батамом йўқ қилишга ожиз эди. Хусусан, рус адабиётида инқилобгача мавжуд бўлган М. адабиёти анъаналарининг таъсири шўро даврида ҳам қатор ижодкорлар асарларида сақланиб қолди; хориждаги рус адабиёти, шўро даври берган имкон даражасидаги Ғарб адабиётидаги янгиликлардан хабардорлик ҳам беиз кетмади. Бундан ташқари, шўро давлати таркибига 40-йилларда қўшилган Болтиқбўйи халқлари адабиёти, Иккинчи жаҳон урушидан кейин социалистик лагерни ташкил қилган ва ўзида демократик тамойилларни бир қадар сақлаб қололган мамлакатлар адабиётлари билан алоқалар

шўро адабиётининг М. адабиётидан буткул узилиб қолишига имкон бермади. Шу омиллар натижаси ўлароқ, 80-йилларга келиб ўзбек адабиётида М. га хос айрим хусусиятлар бавосита ижодий ўзлаштирилади бошлангани (М.М.Дўст, А.Аъзам, О.Мухтор, Ғ.Ҳотам ва б.), 90-йиллардан кейин эса кўпроқ модерн йўналишида ижод қилувчи қатор ёшлар (Н.Эшонкул, Т.Рустам, Б.Рўзимухаммад, Фахриёр ва б.) майдонга чиққани кузатилади. Ҳозирча ўзбек адабиётшунослигида мазкур ҳодисани ўрганиш «маъқуллаш – инкор қилиш» тарзидаги баҳслар доирасидан чиққанича йўқ, уни фундаментал асосда тадқиқ этиш эртанинг вазифаси бўлиб қолмоқда.

**МОДУС** (лот. *modus* – кўриниш, тур. *ўлчов, усул*) – қаранг: **бадийлик модуллари**

**МОНОЛОГ** (юн. *monos* – яқка, *logos* – сўз) – яқка шахснинг айна пайтада жавоб берилишини талаб қилмайдиган, ўзгалар репликалари билан бўлинмаган нутқи. М. оғзаки шаклда (турли йиғинлардаги нутқ, маъруза, ҳисоботлар) ҳам, ёзма шаклда (публицистика, мемуарлар ва ҳ.) ҳам кенг қўлланади. Бадий адабиётда М.лардан турли мақсадларда фойдаланилади. Айниқса, драматик асарларда М.ларнинг бадий-эстетик вазифалар доираси анча кенг. Жумладан, М. – драматик персонажнинг руҳий ҳолати, унинг онгио қалбида кечаётган жараёнларни тасвирлашнинг асосий шакли. Айна чоғда, шартли равишда тасвирланувчи бундай руҳий жараёнлар воқеаларга гоёвий-ҳиссий муносабатни ифодалаш, айрим муҳим тафсилотларни бериш, сюжет ривожини асослаш каби қатор муҳим функцияларни ҳам бажаради. М. лириканинг устувор нутқ шакли, лирик қахрамон кечинмалари, асосан, унинг М.и орқали ифодаланади. Бу нарса *ижровий лирика* намуналарида, айниқса, яққол кўзга ташланади, шунинг учун амалиётда бундай шеърлар *монолог* деб ҳам юритилади (А.Орипов. «Ҳамза»; Х.Даврон. «Абулхай сўзи»). Сифат жиҳатидан М.нинг турли кўринишлари мавжуд (қ. *бадий нутқ, ички монолог*).

**МОНТАЖ** (фр. *montage* – йиғмоқ) – кино санъатидан ўзлаштирилган термин, турли макон ва замонда кечган воқеалар тасвирининг бир-бирига тўғридан-тўғри уланишини англатади. Кинонинг ривожланиши, унинг сўз санъатига таъсири натижаси ўлароқ, М. адабиётда ҳам композицион усуллардан бири сифатида кенг қўллана бошлади. Аспида, М.га хос айрим хусусиятлар, жумладан, воқеабанд асарда турли макон ва замонда кечиш, бир-бирининг узвий давоми бўлмаган ва бир-бирига фақат мазмунангина боғланган воқеа

(эпизод)ларнинг тасвирланиши адабиётда эскидан мавжуд эди. Кино санъатида М. усули янада ривож топди, натижада сўз санъатида ҳам унинг имкониятларидан кенгроқ фойдаланила бошланди. Эндиликда эпик асарларда бир қарашда бир-бирига боғлиқ бўлмаган воқеа (эпизод)ларни алоҳида, ўз ҳолича мустақилдек жойлаштириш ҳам мумкин бўлаётирки, сирдан алоқасиздек кўринган бу парчалар бадиий ният, гоё асосида бир бутунликни ҳосил қилади. Ўзбек адабиётида М.нинг бу хили илк бор Ғ.Ғуломнинг «Нотай» қиссасида синаб кўрилган бўлса, унинг яхши намуналаридан бири сифатида Ч.Айтматовнинг «Қиёмат» романини кўрсатиш мумкин. Ҳар икки асарда ҳам қисмларнинг шаклий боғланиши шартли ва анча заиф, шунга қарамай, улар концептуал асосда бир бутунга бирикади.

**МОТИВ** (лот. *movео* – ҳаракатлантираман) – мусиқашуносликдан ўзлаштирилган термин. М. мусиқада асарнинг энг кичик шакл бирлиги саналиб, асар унинг айнан такрорланиши (шунингдек, ўзгартирилиши ёки зид М.лар киритиш) асосида ривожланади. Адабиётшуносликда М. термини турлича маъноларда қўлланади. Жумладан, воқеабанд асарларда М. сюжет схемаси (мас., қахрамон банди этилади, унга бирон-бир қиз ёрдам беради; ўғай она ва муштипар солиҳа қиз; қахрамон кимсасиз өтимликдан юксак мартабага етади; қахрамон отасини танимайди, фавкулудда вазиятда унга дуч келади ва ҳ.) ёки бирон-бир нарса (мас., кўзгу, тумор), ҳолат (мас., туш кўриш, арвоҳ билан суҳбат, ўзини танитмай юриш), образ (доно вазир, вафодор дўст, рақиб) каби қатор кўринишларда воқе бўлади. М.га хос муҳим жиҳатлардан бири муайян тургунликка эгалиқдир. Яъни М.лар ярим тайёр ҳолда олинади; мавжуд М.лар айнан эмас, ўзак сақлаб қолингани ҳолда ёзувчининг бадиий фантазия имконияти ва ижодий ниятидан келиб чиқиб турли вариантларда талқин этилади. Мас., «Алпомиш»даги Қоражон, «Фарҳод ва Ширин»даги Шопур, «Ўткан кунлар»даги уста Олим – бари *дўст* мотивининг турли вариантлари бўлиб, улар асар сюжетигади функциялари, бадиий концепцияни ифодалашда тутган ўрни жиҳатидан фарқланади. Лирикада ҳам М.лар кенг ўрин тутати. Хусусан, анъанавий тарзда ишлатилувчи «ошиқ – ёр – ағёр», «кутаётган ошиқ – келмаган ёр», «борлигини тутган ошиқ – бепарво ёр» сингари қатор лирик сюжет М.лари турли вариантларда қўлланиб, лирик қахрамоннинг турфа ўй-хисларини лўнда ва таъсирли ифодалашга хизмат қилади. Шунингдек, бир шоир ижоди ёки бир даврда яшаган шоирлар ижоди

доирасида такрорланувчи поэтик образлар М.-образлар саналади. Мас., Чўлпон шеърятда «йўлчи», «йўл», «юлдуз» поэтик образлари жуда кўп қўлланган бўлиб, улар Элбек, Боту, Ойбек, У.Носир асарларида ҳам тез-тез учрайди. Шу ўринда М.ларнинг тағмаънога ишора қилиш функциясини ҳам таъкидлаш жоиз. Жумладан, «йўл», «йўлчи», «юлдуз» мотивлари ижтимоий мазмунга («йўл» – кураш, «йўлчи» – курашчи, «юлдуз» – мақсад) ишора қилади. Поэтик М.лар мазмун жиҳатидан муайян «уя»ни ташкил қилади. «уя»даги М.лар матнда аксар ҳолларда бирга қўлланади ёки назарда тутилади (мас., «қуш» М.и ҳамиша «парвоз»ни назарда тутган ҳолда англанади). Тилдаги сўзлар каби М.лар маъно жиҳатидан кенгайиб ё торайиши, баъзан эса тамомила ўзгариб бориши мумкин. Мас., мумтоз шеърятда «ёр» – Ҳақ, «ошиқ» – Ҳақ йўлидаги сўфий, «висол» – Ҳаққа етиш маъноларини берган бўлса, Чўлпон шеърятда улар ижтимоий мазмун касб этади: «ёр» – эрк, истиқлол, «ошиқ» – эрк ва истиқлол йўлидаги курашчи, «висол» – мақсадга эришиш.

**МОТИВИРОВКА** (фр. *motiver* – асослаш, далиллаш) – адабий асарда тасвирланаётган воқеа-ҳодисалар, персонажларнинг хатти-ҳаракатлари, хис-туйғу ва гап-сўзларини бадиий асослаш. Адабиёт тараққиётининг илк босқичларида М.нинг зарурати бўлмаган, унда муайян ҳодисалар, қахрамонлар тақдиридаги бурилишлар, конкрет ҳаётий ҳолат ва ш.к.лар илоҳий, ғайритабиий кучлар аралашуви билан изоҳланган. Реалистик тенденциялар кучайиб борган сари, адабиётда М.нинг аҳамияти ҳам ортиб борган. Дунёни бадиий идрок этиш ва тушунтиришга интилган реалистик адабиётда М. ҳал қилувчи аҳамият касб этади: реалистик асардаги ҳар бир воқеа, персонажлар хатти-ҳаракати, хис-туйғу ёки гап-сўзлари бадиий асосланади, яъни ўзининг ижтимоий-тарихий, маънавий-психологик ва ш.к. омилларига эга бўлади ва шу боис уларни мантиқан изоҳлаш мумкин. Мас., Чўлпон «Қор қўйнида пола» ҳикоясида Самандар аканинг Эшон совчиларига «Бир қизимиз бўлса, ҳазрат эшонимизга тутдик...» дея жавоб беришини пухта далиллашга интилади. Бунинг учун аввал муаллиф характеристикасида «от чиқаргон савдогар» Самандар аканинг сингани ва эшонга қўл бериб «сўфи бўлиб қолгон»и, яъни персонаж ҳаётидаги бурилиш, омадсизлик унга кучли руҳий таъсир қилгани айтилади. Кейин «эшонникида катта ва қизгин зикр бўлган»и, назр-ниёз бериш маросимида Самандар ака ўзи тушиб қолган аҳволдан нечоғлик эзилгани, шу асно сўфининг «Ҳа, бой ака, назрдан дарак борми?» дея тағдор мазахлашидан оғринган нафс

тўлғонишлари, аламли ўйлари тасвирланади. Ниҳоят, уйига қайтиб, эшондан совчилар келганини эшитади ва «Бир қизимиз бўлса, ҳазрат эшонимизга тутдик...» деган қарорини беради. Мазкур қарор қатор омиллар асосида етилган, ёзувчи уларни очиб беради, яъни сабаб-натига алоқалари асосида бадиий асослайди ва шу туфайли ўқувчи персонаж айна шароитда худди шундай қарорга келишига ишонади. Бундан кўринадики, М. асар бутунлигида амалга ошади, бунини ҳис қилиш учун эса асардаги ҳеч бир унсурни эътибордан четда қолдирмаслик талаб этилади. Зеро, реалистик асарда қатор композицион унсурлар, усул ва воситалар (деталлар, муаллиф характеристикаси, персонажнинг олдинги тарихи, ретроспекция ва ш.к.) ўзининг бевосита функцияси билан бир қаторда бадиий далиллашга ҳам хизмат қилаверади. Кейинги давр адабиётида, хусусан, модернистик йўналишдаги асарларда М. ўзининг мавқеини йўқотган. Уларда ғайриоддий (қ. *сюрреализм*), сабаб-натига тараидаги ички алоқага эга бўлмаган воқеа ва ҳолатлар (мас., абсурд адабиёти), персонажларнинг доим ҳам мантиқан изоҳлаб бўлмайдиган кутилмаган хатти-ҳаракатлари, табиий кечаётган тизгинсиз ўй-ҳислари (қ. *онг оқими*)ни тасвирлаш одатий ҳол ҳисобланади.

**МУАЛЛИФ** (ар. *مؤلف* – тузувчи, тартиб берувчи) – адабий асарни яратган одам, *автор* терминида синоним сифатида ишлатилади. Замонавий адабиётшуносликда *биографик* М. билан бадиий матнда намоён бўлувчи М. (қ. *муаллиф образи*) фарқланади. Биографик М. – реал ҳаётда мавжуд бўлган, муайян асарнинг яратувчиси, унга нисбатан муаллифлик ҳуқуқига эга бўла оладиган шахс. Ҳозирги вақтда *биографик* М. фаолияти билан боғлиқ равишда *муаллифлик ҳуқуқи*, *муаллифлик шартномаси*, *муаллиф кўлөзмаси*, *муаллифлаштирилган матн*, *муаллиф таржимаси* каби қатор тушунчалар амалиётда фаол ишлатилади. Ҳолбуки, М. тушунчаси сўз санъатининг илк босқичларида – халқ оғзаки ижодида бўлмаган; адабиёт тарақиёти давомида, бадиий тафаккур ривожига алоҳида ижодкор шахс роли, унинг ижодий тажрибалари нечоғлик муҳим эканлиги англаниб бориши баробарида, М. тушунчаси ҳам қарор топиб, тобора катта аҳамият касб этиб борган.

**МУАЛЛИФ НУТҚИ** – адабий асардаги бевосита муаллиф тилидан берилган баён, тавсиф, изоҳ ва ш.к. ўринлар. Гарчи биз «бадиий асар тили» десак-да, аслида, гап «бадиий нутқ» ҳақида боради, чунки адабий асар тил унсурлари воситасида яратилган текст, яъни нутқ ҳодисасидир. Бадиий нутқ услубий жиҳатдан фарқланувчи ком-

понентларнинг бирикувидан ҳосил бўлади: унда М.н. билан персонажлар нутқи ажратилади. Мазкур фарқланиш, асосан, эпик ва лиро-эпик характердаги асарларга хос бўлиб, уларда воқеа, воқеа кечаётган жой ёки шароит тасвири, персонажларга берилаётган таъриф, муаллиф фикр-мулоҳазалари ва ш.к.лар бевосита муаллиф тилидан берилади. Муаллиф образи асарда тасвирланган ва тасаввуримизда жонланувчи бадиий воқеликни яхлитлаштирувчи субъектив асос бўлганидек, М.н. асарнинг моддий тарафини (тил унсурлари воситасида яратилган матнни) яхлитлаштирувчи унсурдир. М.н. грамматик жиҳатдан адабий тил нормаларига яқинлашади, бироқ унинг адабий тил нормаларига тўла мувофиқ келишини талаб қилиш хато бўлур эди. Зеро, ёзувчи ўзининг ҳис-кечинмаларини, ўй-фикрларини имкон қадар ёрқин ифодалашга интиларкан, баъзан адабий тил нормаларидан чекинади, бу билан миллий тил имкониятларини кенгайтиришга ҳисса қўшади, чунки айна шу чекинишларнинг вақти келиб адабий тил нормасига айланиши эҳтимолдан йироқ эмас.

**МУАЛЛИФ ОБРАЗИ** – бадиий асар матнида англашилиб турувчи муаллиф шахси. Муаллиф шахси асар бадиий воқелигига сингиб кетади, чунки бадиий воқелик ижодкор томонидан кўрилган ва идеал асосида ижодий қайта яратилган воқелиқдир. М.о.нинг намоён бўлиши конкрет асарнинг турга мансублиги, жанр хусусиятлари билан боғлиқ. Мас., драматик асарда М.о. йўқдек, лекин унда тасвирланаётган воқеани танлаган, уни у ёки бу тарзда тасвирлаган муаллифнинг қараши, нуқтаи назари, бадиий концепцияси барибир англашилиб тураверади. Лирик асарларда эса ҳис-туйғулар кўпроқ «мен» тилидан ифода этилгани учун лирик субъектни шоир деб билишга мойилмиз. Ҳолбуки, гарчи кечинмалар «мен» тилидан берилаётган бўлса ҳам, лирик субъект ҳамма вақт шоирнинг ўзи бўлмайди. Ёки ижровий лирика намуналарида шоир ролини ижро этаётган шахсга эврилади, унинг тилидан «мен» шаклида гапирарди (мас., А.Орипов. «Ҳамза»). Шунга ўхшаш, ривоя «мен» тилидан олиб борилган эпик асарлардаги ровий-муаллиф ҳам биографик муаллифга тенг эмас. Бошқача айтсақ, асардаги М.о.га биографик муаллифнинг кўп жиҳатлари синггани ҳолда, улар орасида маълум даражадаги прототип – бадиий образ муносабати мавжуд. Зеро, бадиий асарда биографик муаллиф идеал оламида яшаган ижод онларидаги бетақрор маънавий-руҳий ҳолат, унинг шу вақт мобайнида тасаввурдаги ўқувчиси билан мулоқоти акс этгандир. Шунга

кўра, реал муаллиф биографияси асарни тушуниш учун тўғридан-тўғри «калит» эмас, балки ўша бетакрор маънавий-руҳий ҳолатни ҳис этишимиз учун асосдир. Иккинчи томондан, М.о. асардаги бадиий воқеликни яхлитлаштирувчи композицион асос сифатида ҳам муҳим: ўқувчи бадиий воқеликни муаллиф орқали «кўради», «эшитди», «хис қилади». Ниҳоят, М.о. бадиий концепция нуктаи назаридан ҳам муҳим: муаллифнинг тасвир предметиға гоёвий-ҳиссий муносабати асарнинг ўқувчи томонидан муайян йўналишда тушунилишини бошқаради. Булар бари М.о. адабиётшуносликдаги муҳим илмий категориялардан бири эканини кўрсатади. Шунга қарамай, XX аср ўрталаридан бошлаб Ғарб адабиётшунослигида «муаллиф ўлими» концепцияси пайдо бўлди. Унга кўра, бадиий ижодда субъективлик излари йўқолади ва субъектдан мосуво бўлган матнгина қолади. Мазкур концепцияға қўшилиш шу жиҳатдан қийинки, адабий асар – нутқ ҳодисаси, нутқ эса субъектдан мосуво бўлолмайди.

**МУАЛЛИФ ЧЕКИНИШЛАРИ, АВТОР ЧЕКИНИШЛАРИ** – элик асарларнинг матний унсурларидан бири, сюжет воқеалари баёни (ривоя)ни тўхтатиб, муаллифнинг ўқувчига бевосита мурожат қилиши ёки фалсафий, публицистик, лирик, адабий-танқидий ва ш.к. масалаларда мушоҳадаға берилиши. Анъанавий тарзда қўлланувчи *лирик чекиниш* (қ.) термини мазкур тушунчанинг бир қисминигина қамраб олади. Яъни лирик чекинишлар ҳам моҳиятан М.ч.нинг бир кўринишидир. Мас., «Уткан кунлар»да муаллифнинг «Мен – ёзгувчи...» дея роман воқеаларини бобосидан кўп бор эшитгани ва кундош можароларини зерикарли бўлгани сабаб ташлаб кетмоқчилигини айтиши, «Наво куйи» бобида романда тасвирланган тарихий давр («Халқимиз таъбирича, бу замонлар мусулмонобод бўлса-да, бироқ бу тантаналик таъбирни бузиб қўятурган ишлар ҳам йўқ эмас эди») ҳақидаги мулоҳазалар; «Меҳробдан чаён»да Раъноға таъриф бериш асноси исм билан жисм мувофиқлигига тўхталиб, ўз ёшлигидан бир (Попа исмли қиз билан боғлиқ) воқеанинг муҳтасар ҳикоя қилиниши – буларнинг бари М.ч.дир. М.ч.нинг бадиий-эстетик функциялари турлича бўлиши мумкин. Жумладан, М.ч.нинг бир тури бўлмиш *лирик чекиниш*ларнинг бирламчи функцияси тасвир предметиға муносабатни ифодалаш, шунинг учун уларда ҳиссий бўёқдорлик, эмоционаллик кучли бўлиб, бу нарса нутқ қурилишида ҳам ўз аксини топади.

**МУАШШАР** (ар. *معشر* – ўнлик) – *мусаммаат* турларидан бири, ўн мисрали бандлардан таркиб топувчи шеър шакли; ўн мисрали

банд. Мусамматнинг бошқа турларидаги каби М. шеър шаклида ҳам дастлабки банд мисраларининг ўзаро (а-а-а-а-а-а-а-а-а) қофияланиши, кейинги бандларда аввалги тўққиз мисранинг ўзаро, охириги мисранинг эса биринчи банд билан (б-б-б-б-б-б-б-б-а, в-в-в-в-в-в-в-а ва ҳоқ.) қофияланиши кўзда тутилади. Шунингдек, М.да ҳам бир ёки икки мисра таржеъ сифатида такрорланиши мумкинки, бунда қофияланиш тартиби шунга мос бўлади. Худди *мутасса* (қ.) каби М. ҳам мумтоз шеърятимизда кам қўлланган шеър шаклларида саналади.

**МУАММО** (ар. *معنى* – кўр қилинган, кўрмайдиган) – мумтоз шеърятдаги топишмоқ жанрлардан бири, кўпроқ фард, яъни бир байтдан (2 – 3 байтлилари кам учрайди) ташкил топувчи шеърый асар. М.да бирор исм (ёки жой номи) яширинган бўлиб, уни топиш учун байтдаги бирор сўз (ёки бирикма) устида ишора қилинган амалларни бажариш лозим бўлади. Ушбу амаллар сўзнинг араб ёзувидаги шакли билан боғлиқ, гоҳ сўзни чаппа ўқиш, гоҳ бирон-бир ҳарфни тушириб қолдириш ёки қўшиш, гоҳ ҳарфлар ўрнини алмаштириш каби кўринишларда бўлади. Худди шу нарса М.ни нарса-ҳодисаға хос белгиларни васф этиш билангина жумбоқ ҳосил қилувчи луғз (қ.)дан фарқлаб турадиган ўзига хос хусусиятдир. Шунингдек, айрим манбаларда М.да бирор исмнинг яширилиши ҳам шундай хусусият сифатида кўрсатилади. Мас., Навоийнинг куйидаги муаммосини олайлик:

*Чок бағрим тарфин айладинг икки парканд,  
Бирини ташлабон охир, бирин эттинг пайванд.*

М. даги «бағир» сўзи араб ёзувида фақат ундошлар билан ифодаланади, яъни «бғр» (*بغیر*) тарзида ёзилади. «Бағир»ни «икки парканд» қилиб (парчалаб), улардан бирини охириға ташлаб пайвандлаш кераклигига ишора қилинмоқда. Шу шарт бажарилиб, «б» охириға олиб пайвандланса, «ғрб» (*غریب*) сўзи келиб чиқади. Демак, М.да «Ғариб» исми яширилган экан.

**МУБОЛАҒА** (ар. *مبالغه* – ошириш, орттириш) – мумтоз адабиётдаги шеърый санъат, нарса-ҳодисалар, инсонлар ва бошқа маъжудотларға хос хусусиятларни табиий ҳолиға нисбатан бўрттириб, катталаштириб ёки кичрайтириб тасвирлаш. М. халқ оғзаки ижодида ҳам, ёзма адабиётда ҳам жуда кенг қўлланган санъатлардан саналади. Илми бадиёға оид манбаларда М.ға берилган таърифларда

тафовутлар деярли бўлмаса-да, унинг турларга бўлинишида айрим фарқлар сезилади. Шунга қарамай, уларни умумлаштириб М.нинг куйидаги кўринишларини фарқлаш мумкин:

1. Тасвир объектини ўта кичрайтириши ёки ўта катталаштириши жиҳатидан М.нинг *тафрит* ва *ифрот* деб юритилувчи турлари ажратилади. *Тафрит* тасвир объектини ўта кичрайтириш, кучсизлантириш демакдир. Мас., Атойининг:

*Юрурда енг била оғзингни тутма,  
Нимаким, йўқтурур ёширмоғинг не? –*

байтида энги билан оғзини беркитган ёрга «Ўзи асли йўқ бўлган нарсани беркитиб нима қиласан?» дея мурожаат қилинадик, бундан ёрнинг оғзи йўқ даражада кичик деган маъно келиб чиқади. Оғзининг кичик бўлиши гўзаллик белгиларидан бири саналгани эътиборга олинса, шоир ёр гўзаллиги таърифида муболага қилаётгани аён бўлади.

*Тафрит*га зид ўлароқ, *ифрот* тасвир объектини ўта катталаштириш, кучайтиришни кўзда туттади. Мас., Навоийнинг куйидаги байти *ифрот*нинг яхши намунаси бўла олади:

*Не тушки, ҳажр балосин кўрарда сескансам,  
Ўқилдамоқ бирла қўшнени уйготур юрагим.*

Яъни тушида ёридан айрилиб, ҳижрон балосини ҳис қилган ошиқ сесканиб уйгонса, юраги шу қадар қаттиқ урар эканки, унинг «дук-дук»идан қўшнилари уйғониб кетаркан.

2. М.нинг даражаси, яъни М.ли тасвир (ҳолат, хусусият ва ш.к.) га ақлнинг ишониш ё ишонмаслиги, тасаввурга сиғдириш мумкин ё мумкин эмаслиги, унинг воқелиқда мавжуд бўлиш имкони бор ё йўқлигидан келиб чиқиб М.нинг *таблиғ*, *ифроқ*, *гулуве* деб юритилувчи турлари фарқланади. Албатта, муайян бир М.ни мазкур турлардан бирига тааллуқли этишда маълум даражада шартлилик бўлиши табиий, чунки ҳамманинг тасаввур имкониятлари, ҳаётий тажрибаси бир хил эмас. Демак, М.ни мазкур турлардан бирига киритганда буни назарда тутиш мақсадга мувофиқ бўлади.

Кишининг ақлан ишониши ва ҳаётда учраш эҳтимоли бўлган М.ли тасвир (ҳолат, хусусият ва ш.к.) *таблиғ* деб юритилади. Мас., Лутфийнинг машҳур:

*Аёқингга тушар ҳар лаҳза гесу,  
Масалдурким: «чароғ туби қаронгу», –*

матлаъсида ёр сочларининг узунлиги ҳақида бир қадар М. қилинаётгани шубҳасиз, бироқ бунга ақлан ишониш у қадар қийин эмас, зеро, ҳаётда сочи узун қизлар кўп. Яъни бу ўринда таблиғ мавжуд балги-хусусиятни бирмунча орттириб, бўрттириб тасвирлашда намоён бўлмоқда.

Ақлан ишониш, тасаввур қилиш мумкин-у, ҳақиқатда мавжуд бўлмайдиган М.ли тасвир *ифроқ* деб аталади. Мас., Навоийнинг:

*Фироқ иситмаси андоқ танимдан ўт чиқарур  
Ки, гар табиб илигим тутса, бормоғи қабарур, –*

байтидаги ҳолатни тасаввур қилиш мумкин, лекин ҳақиқатда иситманинг бу даражада, яъни бемор қўлини тутган табибнинг бармоғини куйдириб-қабартирадиган даражада бўлиши мумкин эмас.

Нихоят, ақлан ишониш ва тасаввур қилиш ҳам мушкул, ҳаётда мавжуд бўлиши ҳам истисно қилинадиган М.ли тасвир *гулуве* деб юритилади. Мас., Атойининг:

*Қилни икки ёрмиш-у, қилмиш азалда бир қалам,  
Белингиз тасвирини қилганда наққошинг, бегим, –*

байтида айтилишича, ёрнинг бели шу қадар ингичкаки, унинг тасвирини чизиш учун қилдан қалам қилинса, белнинг сурати йўгон бўлиб қолади, шу боис наққош қилни иккига ёриб, сўнг қалам қилиши лозим, гўё шундагина ёр белининг тасвири аслига монанд бўлади.

**МУВАШШАҲ** (ар. *موشع* – зийнатланган, безалган) – қаранг. **тав-ших**

**МУВОЗАНА** (ар. *موازنه* – вазндош) – мумтоз адабиётдаги шеърий санъат, байтнинг биринчи мисрасидаги барча сўзларнинг иккинчи мисрадаги ўз муқобилларига вазнда тенг бўлиши. Кўп ҳолларда М. санъати *тарсеъ* (қ.) билан қоришиқ ҳолда юзага келади, яъни битта байтнинг ўзи ҳам тарсеъга, ҳам М.га мисол бўлиши мумкин. Мас., Навоийнинг куйидаги фарди:

*Муруеват барча бермакдур емак йўқ,  
Футувват барча қилмакдур демак йўқ.*

Бироқ М. бўлиши учун мисралардаги муқобил сўзларнинг вазнда тенг бўлиши талаб этилади, лекин уларнинг қофиядош бўлиши шарт эмас, яъни тарсеъда қофиядошлик бирламчи бўлса, М.да вазнда тенглик бирламчи шартдир. Мас., «Хайрат ул-аброр»дан олинган қуйидаги:

*Барча хиёнатни диёнат билиб,  
Барча диёнатда хиёнат қилиб, –*

байт мисраларидаги муқобил сўзлар вазнда бир-бирига тенг, лекин хиёнатни-диёнатда жуфтлиги қофиядош эмас. Яъни бу ўринда М. санъати бор, лекин тарсеъ воқе бўлган эмас.

**МУЖТАСС** (ар. *مجتث* – илдизи билан юпинган) – аруз баҳрларидан бири, ҳафифдан юлиб олинганга ўхшаганлиги учун шундай номланади. *Мустафъилун* (– – v –) ва *фоилотун* (– v – –) аслларининг кетма-кет такроридан ҳосил бўлади. Ўзбек шеъриятида фаол қўлланадиган баҳрлардан бири. Навоийнинг «Мезон ул-авзон» асарида М. баҳрининг тўққиз вазни, Бобурнинг «Мухтасар»ида эса йигирма вазни мисоллар билан кўрсатиб берилган. Шеъриятимизда мазкур баҳрнинг, асосан, бешта вазндан фойдаланилган. Атоий, Саккокий, Гадоий, Лутфий, Мунис, Огахий, Нодира каби мумтоз шоирлар ижодида М. баҳрининг бир неча вазнида ёзилган шеърлар учрайди. Навоийнинг «Хазойин ул-маоний» куллиётида эса 348 та шеър (11 фоиз) М. баҳрида яратилган. М. нинг ўзига хос жиҳатларидан бири унинг кўп вазнли эканлигидир, яъни бир шеърда унинг бир неча вазнлари аралаш қўлланиши мумкин. Бу эса шеърга ўзига хос ўйноқи оҳанг бахш этади. Навоийнинг қуйидаги байти *мужтасси мусаммани махбуни мақсур* (v – v – / – v – – / v – v – / – v –) вазнида ёзилган:

*Кўнгул ҳароратин англатти оҳи дардолуд,  
Уй ичра ўт эканин злга зоҳир айлар дуд.*

Нодиранинг машҳур:  
*Нигори гулбаданамни тушимда кўрсам эдим,  
Лаби ширин шиканамни тушимда кўрсам эдим, –*

матлаъли ғазали эса *мужтасси мусаммани махбуни маҳзуф* (v – v – / v v – – / v – v – / v v –) вазнидадир.

**МУЗОРИЪ** (ар. *مزارع* – ўхшовчи) – аруз баҳрларидан бири, ҳазаж баҳрига ўхшагани учун шундай номланган. Мафоийлун (v – – –) ва фоилотун (– v – –) аслларининг кетма-кет такроридан ҳосил бўлади. М. шеъриятимизда анча кенг қўлланадиган баҳрлардан саналади. Навоийнинг «Мезон ул-авзон» асарида М.нинг ўн икки вазни, Бобурнинг «Мухтасар»ида йигирма тўрт вазни мисоллар билан кўрсатиб берилган. «Қисаси Рабгузий»дан бошлаб Атоий, Саккокий, Гадоий, Лутфий каби мумтоз шоирлар ижодида ҳам М. баҳрининг бир неча вазнларидан фойдаланилган. Хусусан, Навоийнинг «Хазойин ул-маоний» девонидаги 105 та турли жанрдаги шеърлар мана шу баҳрда яратилган. Мас., Навоий:

*Ишқу жунун эрурлар беихтиёр манда,  
Мендурману бу икки, ўзга не бор манда, –*

байтини *музориъи мусаммани ахраб* (– – v / – v – – / – – v / – v – –) вазнига мисол сифатида келтирган.

**МУКАРРАР** (ар. *مكرر* – такрорланган) – мумтоз адабиётдаги шеърий санъат, байт мисраларида жуфт ёки такрорий сўзларни қўллаш. Илми бадиъга оид манбаларда М.га берилган таърифлар бироз фарқланади: айримларида битта жуфт ёки такрорий сўзнинг икки ёки ундан ортиқ ўринда қўлланиши М. дейилса, бошқаларида байт таркибида ҳар қандай жуфт ёки такрорий сўз қўллаш М. саналади. Шу жиҳатдан, Навоийнинг:

*Гарчи келмай-келмай ўлтурдинг Навоийни, валеқ,  
Эй Масиҳ, анинг мазори бошига гоҳ-гоҳ кел, –*

байтида «келмай-келмай» ва «гоҳ-гоҳ» сўзларининг қўлланиши М. санъатини юзага келтирган.

**МУЛАММАЪ** (ар. *ملمع* – ярқироқ, ранг-баранг) – мумтоз адабиётдаги шеърий санъат, бир байтни икки ёки ундан ортиқ тилда ёзиш. Мумтоз шоирлар, асосан, араб ва форс, араб ва туркий (ўзбек), форс ва туркий (ўзбек), араб ва озарбайжон, кейинчалик ўзбек ва рус, тожик ва рус тилларида М. битганлар. М.нинг икки тилдан фойдаланилган тури *ширу-шакар*, уч тилдан фойдаланилган тури *шаҳду-ширу-шакар* деб аталади. Мас., Машрабнинг:

*Мендин саломе ба суйи жонон,  
Эй бод, еткур арзи гарибон*

ёки

*Аз дардми ту намонда сабрам,  
Эмди кетарман тахти Сулаймон, —*

байтлари ўзбек ва форс тилларида ёзилган бўлиб, улар *ширу-шакар* усулига мисол бўла олади. Фузулийнинг:

*Қад анорал-ишқа пил ушшоқи минҳожал худо  
Солиқи роҳи ҳақиқат ишқа айлар иқтидо, ~*

байти эса *шаҳду-ширу-шакар*га мисол бўлиб, у араб, форс ва туркий тилларда ёзилган.

**МУНАҚҚИД** (ар. *منقيد* — сараловчи, муҳокама қилувчи) — адабий танқид билан шугулланувчи шахс; *танқидчи* сўзига синоним тарзида қўлланади. Кенг маънода М. деганда адабий танқид билан профессионал тарзда шугулланувчи шахснигина эмас, балки бирон асарни муҳокама қилаётган, у ҳақда фикр билдираётган ҳар қандай одамни ҳам тушуниш мумкин.

**МУНСАРИҲ** (ар. *منسرح* — эркин) — аруз баҳрларидан бири, аруз ва зарбида эркинлик бўлгани учун шундай аталган. *Мустафъилун* (— v —) ва *мафъулоти* (— — — v) аслларининг кетма-кет такроридан ҳосил бўлади. Ўзбек шеъриятида анча фаол қўлланади. Навоийнинг «Мезон ул-авзон» асарида М. баҳрининг ўн бир вазни, Бобурнинг «Мухтасар»ида эса ўттиз тўрт вазни мисоллар билан кўрсатиб берилган. Шеъриятимизда М. баҳрининг, асосан, учта вазнидан фойдаланилади. Навоийга қадар М. баҳридан фойдаланилмаган. Унинг «Хазойин ул-маоний» девонига киритилган 12 та шеъри ўзбек шеъриятидаги М. баҳрида яратилган дастлабки асарлар саналади. Жумладан, Навоийнинг:

*Эй оразинг кўнглум коми, лаъли лабинг жон ороми,  
Васлинг кунин еткурғилки, жоним олур ҳажринг шоми, —*

байти мунсариҳи мусаммани солим (— v — / — — — v / — — v — / — — — v) вазнида ёзилган.

**МУРАББАЪ** (ар. *مربع* — тўртлик) — 1) *мусаммат* турларидан бири, тўрт мисрали бандлардан таркиб толувчи шеър шакли; тўрт мисрали банд. М. шеър шаклида дастлабки банд мисралари ўзаро қофияланади (а-а-а-а), кейинги бандларнинг дастлабки уч мисраси ўзаро, тўртинчи мисраси эса биринчи банд билан қофияланади (б-б-б-а; в-в-в-а ва ҳ.). Шунингдек, шеъриятимизда М.нинг сал ўзгачароқ (а-б-а-б, в-в-в-б, г-г-г-б ва ҳ.) қофияланувчи шакллари (мас., Машраб ижодида), биринчи банднинг охириги мисраси кейинги бандлар охирида таржеъ сифатида айнан такрорланиб келувчи шакллари (мас., Муқимий ижодида) ҳам кўп учрайди; таржеъли М. кўпинча б-б-б-а, в-в-в-а, г-г-г-а тарзида қофияланади. Ҳазалдаги каби М. охириги бандида *тахаллус* келтириш одат бўлган. М. шакли туркий халқлар оғзаки ижодидаги асосий шеър шакли бўлган, Маҳмуд Кошғарийнинг «Девону луғотит турк» асарида келтирилган халқ кўшиқларининг аксарияти М. шаклида экани шундай дейишга асос беради. А.Яссавий кенг оммага мўлжалланган ҳикматлари учун М. шаклини танлагани ҳам шундан, яъни халққа яқинлигидандир. Шунга қарамай, адабиётимизда М. шеър шаклининг фаоллашуви, асосан, XVII аср охириларида кузатилади: Машраб, Сўфи Оллоёр, Отаҳий, Хувайдо, Ҳазиний, Муқимий каби шоирлар ижодида М.нинг кўпплаб гўзал намуналари учрайди; 2) *арузда* рукннинг байтда тўрт марта такрорланишини билдирувчи ўлчов, М. вазн. Мас., агар *мафоиълун* рукни байтда ўзгаришсиз тўрт марта такрорланса, *ҳазажи мураббаи солим* деб аталади.

**МУСАББАЪ** (ар. *مربع* — еттилик) — *мусаммат* турларидан бири, етти мисрали бандлардан таркиб толувчи шеър шакли; етти мисрали банд. М. шеър шаклида дастлабки банд мисралари ўзаро қофияланади (а-а-а-а-а-а-а), кейинги бандларнинг дастлабки олти мисраси ўзаро, еттинчи мисраси эса биринчи банд билан қофияланади (б-б-б-б-б-б-а, в-в-в-в-в-в-а ва ҳ.). Шеъриятимизда М.нинг қофияланиш тартибига кўра бирмунча ўзгачароқ кўринишлари ҳам учрайдики, бунда дастлабки банд мисралари ўзаро (а-а-а-а-а-а-а) қофияланса, кейинги бандларнинг беш мисраси ўзаро, охириги икки мисраси эса биринчи бандга қофиядош бўлади (б-б-б-б-б-а-а, в-в-в-в-в-а-а). М.нинг бу хилида баъзан сўнгги икки мисра таржеъ сифатида такрорланиши ҳам кузатилади.

**МУСАДДАС** (ар. *مستدس* — оптилик) — 1) *мусаммат* турларидан бири, олти мисрали бандлардан таркиб толувчи шеър шакли; олти мисрали банд. М. шеър шаклида дастлабки банд мисралари ўза-



ро қофияланади (а-а-а-а-а), кейинги бандларининг аввалги беш мисраси ўзаро, охири мисраси эса биринчи банд билан (б-б-б-б-б-а, в-в-в-в-а ва ҳ.) қофияланади. Шеърятимизда М.нинг биринчи бандидаги охири икки мисра кейинги бандлар сўнгида таржеъ сифатида такрорланувчи хили ҳам учрайди, унинг қофияланиши а-а-а-а-а, б-б-б-б-а-а, в-в-в-в-а-а кўринишида бўлади (мас., Фурқат, «Сайдинг кўябер сайёд»). Ўзбек мумтоз адабиётида М. ёзиш, асосан, Навоий ижодидан бошланган, кейинчалик Машраб, Огаҳий, Нодири, Увайсий, Фурқат, Ҳазиний каби шоирлар ҳам жанр тараққиётига улкан ҳисса қўшганлар. Шунингдек, худди мухаммас каби М. мустақил ёки ўзга шоир газали асосида ёзилиши мумкин. М.нинг кейинги хили охири бандида газал муаллифи ва М. боғлаган шоир таҳаллуслари келтирилади. Мас., Навоийнинг Ҳусайний газали асосида ёзилган М.нинг охири банди қуйидагича:

*Чун Навоий жонини май орзуси куйдурур,  
Йўқ гадоликқа ажаб майхоналарда гар юрур,  
Журъаи дайр аҳли бергунча замоне телмурур,  
Шоҳ агар мундоқ гадони салтанатқа еткурур,  
Эй Ҳусайний, салтанатдин онча фахрим йўқтурур  
Ким, дегайлар кўйининг хайли гадосидин мени;*

2) арузда рукнининг байтда олти марта такрорланишини билдирувчи ўлчов, М. вазн. Мас., агар *фоцлотун* рукни байтда ўзгаришсиз олти марта такрорланса, *рамвали мусаддаси солим* деб аталади.

**МУСАЖОЖАЪ** (ар. *موسجع* – сажъли, қофияли) – мумтоз адабиётдаги қофия билан боғлиқ шеърини санъат. М. санъати асосида ёзилган байтлар бир-бири билан ҳажман тенг бўлган тўрт бўлакка бўлиниб, биринчи, иккинчи ва учинчи бўлақлар ўзаро қофиядош, тўртинчи бўлақ эса асосий қофия билан оҳангдош бўлади. М. санъати байтга ўзига хос оҳанг, мусиқийлик бахш этади. Навоий, Бобур, Машраб, Фурқат каби мумтоз шоирлар ижодида, шунингдек, Эркин Воҳидов шеъриятида М. санъатининг кўллаб гўзал намуналари учрайди. Мас., Бобурнинг қуйидаги байти М.га яхши намуна бўла олади:

*Даврон гамин барбод қил, ишрат уйин обод қил,  
Жону кўнгулни шод қил овозу чангу най била.*

Агар мазкур байтнинг ҳар бир бўлаги бир мисра кўринишига келтирилса, М. санъатини яхшироқ тасаввур қилиш мумкин бўлади:

*Даврон гамин барбод қил,  
ишрат уйин обод қил,  
Жону кўнгулни шод қил  
овозу чангу най била.*

**МУСАЛЛАС** (ар. *مثنى* – учлик) – *мусаммат* турларидан бири, уч мисрали бандлардан таркиб топувчи шеър шакли; уч мисрали банд. М. шеър шаклида дастлабки банд мисралари ўзаро қофияланади (а-а-а), кейинги бандларнинг дастлабки икки мисраси ўзаро, учинчи мисраси эса биринчи банд билан қофияланади. Худди шу шакл М.нинг каноник шакли саналади. Адабиётимизда М. шеър шаклининг ҳар бир бандидаги мисралари ўзаро (а-а-а, б-б-б, в-в-в...), ҳар бир банди ўрама (а-б-а, в-г-в, д-е-д...) тарзида мустақил қофияланувчи, шунингдек, бандлараро кесишган (а-б-а, б-в-б, в-г-в...) қофияланиш тартибидаги кўринишлари ҳам учрайди. А.Ҳусайний М.ни «устодлар шеърида камина назарига тушмаган» шеър шакллари қаторида санайди. Дарҳақиқат, М. шаклидан Атойи, Лutfий, Навоий, Бобур каби шоирларимиз фойдаланган эмаслар, М.нинг оммалашуви адабиётимизнинг кейинги даврларига тўғри келиб, унинг яхши намуналари Увайсий, Ҳамза (Ниҳоний) каби шоирлар ижодида учрайди. Шунингдек, учлик шеър шакли Ойбек, Мирмуҳсин, А.Мухтор, Шўҳрат, Ғ.Ғулом, Р.Парфи, О.Матжон, О.Ҳожиева, А.Обиджон каби шоирларнинг бармоқда ёзилган шеърларида ҳам қўлланган.

**МУСОВОТ** (ар. *مساوات* – тенглаштириш, тенглик) – қаранг. **ийжоз**

**МУСТАЗОД** (ар. *مستزاد* – орттирилган) – мумтоз адабиётдаги лирик жанр, ҳар бир мисрасидан кейин унинг иккита (биринчи ва охири) рукнига тенг ярим мисра орттирилувчи шеър. М.нинг асосий мисралари газал типидagi мустақил қофияланишни ҳосил қилса, ярим мисралари ҳам мустақил ҳолда шундай қофияланишга эга бўлади (А-а-А-а, Б-б-А-а, В-в-А-а, Г-г-А-а...). Ҳофиз Хоразмий шеърятимизда М. жанридаги илк шеърлар муаллифи сифатида эътироф этилса, кейинчалик Навоий, Машраб, Огаҳий, Аваз, Комил, Анбар Отин каби шоирлар ҳам М. жанрида самарали ижод қилганлар. А.Навоий «Мезон ул-авзон»да халқ орасида кўшиқ оҳангига мос «бир суруд» борлиги ва унинг М. деб аталишини айтади. Дарҳақиқат, М.нинг ўзига хос ритмик-интонацион қурилиши ўйноқи оҳангни юзага келтиради-

ки, у қўшиқ оҳангига мос ва куйлаш учун жуда қулайдир. М.ларнинг аксарияти қўшиқ қилиб куйлангани ҳам шундан. Хусусан, ўз шеърларини танбур ва сетор жўрлигида ижро этиб юрган Машраб ижодида М.ларнинг салмоқли ўрин тутиши ҳам шу билан изоҳланиши мумкин. Машрабнинг М.лари, мас.:

*Раҳм айла манга эмди, аё руҳи равоним, –  
Жон чиққали етти,  
Турди бу замон ишқ ўтида куйгани жоним, –  
Боқсанг манга нетти? –*

байти каби ўз мусиқаси билан жаранг топади, қўшиқдек эшитилади. Айрим ҳолларда М.нинг асосий мисрасидан сўнг битта эмас, иккита ярим мисра орттирилиши ҳам мумкинки, бу ҳолда М.даги мисралар газал типдаги учта мустақил қофияланиш тартибини ҳосил қилади. Мас.:

*Эй ёр, санга ушбу жаҳон боғи аро гул  
бир ошиқи хайрон,  
дийдоринга шайдо,  
Бир шейфтадур кокули мушкинига сунбул,  
ҳам ҳоли паришон,  
ҳам бошида савдо.*

**МУТАДОРИК** (ар. *متدارك* – орқадан келиб қўшилувчи) – аруз баҳрларидан бири, *фоилун асли* (– v –) такроридан ҳосил бўлади. М. баҳрининг номланиши Ҳалил ибн Аҳмад келтирган 15 та баҳр қаторига Абул Ҳасан Ахфаш томонидан қўшилгани билан изоҳланадики, унинг айрим манбаларда *бахри муҳдас* (янги топилган) ёки *ғариб* (четдан келган) деб юритилиши ҳам шунга далолат қилади. Манбаларда М. баҳри вазнларини ўзбек шеърлятига илқ бор олиб кирган шоир сифатида Алишер Навоий эътироф этилади. Унинг «Мезон ул-авзон» асарида М.нинг 7 вазни, Бобурнинг «Мухтасар»ида эса 26 вазни мисоллар билан кўрсатиб берилган. М. ўзбек шеърлятида кам қўлланган баҳрлардан саналади. Мас., Навоийнинг «Мезон ул-авзон»ида:

*Фурқатингда мани сўрмадинг,  
Раҳм кўзи билан кўрмадинг, –*

байти *мутадорик мусаддаси солим* (– v – / – v – / – v –) вазнига мисол сифатида келтирилган.

**МУТАССАЪ** (ар. *متسع* – тўққизлик) – *мусаммат* турларидан бири, тўққиз мисрали бандлардан таркиб толувчи шеър шакли; тўққиз мисрали банд. Мусамматнинг бошқа турларидаги каби М. шеър шаклида ҳам дастлабки банд мисраларининг ўзаро (а-а-а-а-а-а-а-а) қофияланиши, кейинги бандларда аввалги саккиз мисранинг ўзаро, охириги мисранинг эса биринчи банд билан (б-б-б-б-б-б-б-а, в-в-в-в-в-в-в-а ва ҳ.) қофияланиши кўзда тутилади. Шунингдек, М.да ҳам бир ёки икки мисранинг таржеъ сифатида такрорланиши мумкинки, бунда қофияланиш тартиби шунга мос бўлади. М. шеърлятда кам қўлланувчи шеър шакли саналади. Шу боис ўз вақтида А.Хусайний мусамматнинг бу хилига таъриф бермайди ва бунинг сабабини «устодлар шеърда камина назариға тушмади» дея изоҳлаш билан чекланади.

**МУТАҚОРИБ** (ар. *متقارب* – бир-бирига яқин) – аруз баҳрларидан бири, *фаулун асли* (v – –) такроридан ҳосил бўлади. М. деб номланиши баҳр чизмасида (v – – / v – – / v – – / v – –) ватадларнинг бир-бирига яқин туриши билан боғлиқ ҳолда изоҳланади. Чизмага эътибор берилса, унда ватад (v –)лар биргина сабаб (–)дан сўнг такрорланиб келаётганини кўриш мумкин. М. баҳри мумтоз ўзбек шеърлятида, хусусан, газалчиликда анча фаол қўлланган: А.Навоийнинг «Мезон ул-авзон»ида М.нинг ўн бир, Бобурнинг «Мухтасар»ида қирқдан зиёд вазн кўринишлари саналади, уларнинг ҳар бирига мисол сифатида байтлар келтирилади. Юсуф Хос Ҳожибнинг «Қутадғу билиг», Навоийнинг «Садди Искандарий» дostonлари ҳам шу баҳрда ёзилган. Мас., Лутфийнинг:

*Кўкарди чаман, гулузорим қани?  
Сиҳи сарв буйлуқ нигорим қани? –*

матлаъли газали ҳам *мутақороби мусаммани солим* (v – – / v – – / v – – / v – –) вазнида ёзилган.

**МУТЛАҚ ҚОФИЯ** (ар. *متلق* – шартсиз, бирор нарса билан чекланмаган, *қофия* – сўзнинг сўзга мос бўлиши) – илми қофияда қофиянинг тузилишига кўра фарқланувчи бир тури, равийдан кейинги унсурлар (хуруж, нафоз, нойира, мажро, мазид) ҳам иштирок этувчи, яъни равийдаёқ тўхтаб қолмайдиган қофия. Мас., Нодиранинг:

*Нигори гулбаданимни тушимда кўрсам эдим,  
Лаби ширин шиканнимни тушимда кўрсам эдим, –*

байтида М.қ. (баданнимни – шиканнимни) қўлланган бўлиб, унда равий – бадан ва шикан сўзларидаги охириги «н» ундошидан кейин ҳам оҳангдош товушлар иштирок этган. М.қ.да равийдан кейин келувчи ундош ёки чўзиқ унли *васл*, *васлдан* кейинги ундош ёки чўзиқ унли *хуруж*, *хуруждан* кейинги ундош ёки чўзиқ унли *мазид*, *мазиддан* кейинги ундош ёки чўзиқ унли *нойира* дейилади. Равийдан кейинги қисқа унли *мажро*, ундан кейин келувчи барча қисқа унлилар эса *нафоз* деб юритилади. Келтирилган мисолдаги «баданнимни-шиканнимни» жуфтлигида равийдан кейинги тартибда «и» – мажро, «м» – *васл*, «н» – *хуруж*, «и» – *нафоздир*. М.қ. саналиши учун равийдан сўнг шу унсурлардан бирининг бўлиши кифоядир.

**МУХАММАС** (ар. *مخمس* – бешлик) – *мусаммат* турларидан бири, беш мисрала бандлардан таркиб толувчи шеър шакли; беш мисрала банд. М. шеър шаклида дастлабки банд мисралари ўзаро қофияланади (а-а-а-а-а), кейинги бандларининг аввалги тўрт мисраси ўзаро, охириги мисраси эса биринчи банд билан (б-б-б-б-а, в-в-в-в-а ва ҳ.) қофияланади. М. мумтоз адабиётимизда кенг тарқалган жанрлардан бири бўлиб, у икки хил бўлади: 1) мустақил М.: мумтоз адабиётшуносликда «таъби худ мухаммас» деб юритилиб, унинг барча мисралари бир шоир қаламига мансубдир. М.нинг бу тури Ҳофиз Хоразмий, Навоий, Машраб, Огаҳий каби шоирлар ижодида катта ўрин эгаллайди. Шеърятимизда М.нинг биринчи банд охиридаги бир ёки икки мисра кейинги бандлар сўнгида таржеъ сифатида такрорланувчи хили ҳам учрайди. Бир мисра таржеъ қилинган М.ларда қофияланиш одатдагидек бўлса, икки мисра таржеъ қилинган М.ларда қофияланиш а-а-а-а-а, б-б-б-а-а, в-в-в-а-а... кўринишида бўлади. Мас., Машрабнинг «Эй сафобахши баҳорим, бўстоним, қайдасан?» мисраси билан бошланувчи М.ида ҳар бир банд охирида «Волидам, Маккам, Мадинам, меҳрибоним, қайдасан?» мисраси таржеъ қилинган; 2) ўзга шоир газалига боғланган М. *тахмис* деб юритилиб, у тахмисчи шоирнинг ўзга шоир газалидаги ҳар бир байтга ўздан яна уч мисра қўшиш орқали яратилади. Бунда тахмис боғлаётган шоирнинг ўша газал мазмунига путур етказмаслиги, қўшилаётган мисраларнинг газал вазни, қофияси, радифи ва бошқа жиҳатларига мос бўлиши талаб этилади. Шеърятимизда тахмис М.нинг Навоий, Огаҳий, Увайсий, Нодири каби қатор мумтоз

сўз санъаткорлари ҳамда Ҳабибий, Чустий, Э.Воҳидов, А.Орипов, О.Матжон, Ж.Камол каби янги давр шоирлари боғлаган гўзал намуналари мавжуд. Шунингдек, адабиётимиз тарихида шоирнинг ўзи ёзган газалга боғлаган тахмис М.лар, сийрак бўлса-да, учрайди (мас., Навоий ва Огаҳий ижодида).

**МУШОИРА, МУШОАРА** (ар. *مشاعره* – шеър айтишиш) – 1) шоирлар анжумани, шеър мажлиси. Ўтмиш адабий жараёнида М.лар муҳим ўрин тутди, яна ҳам аниқроғи, ўтмишда адабий жараён кўпроқ М. шаклида кечган. М.ларда шоирлар ўз асарларини таҳдим этиш, улар ҳақидаги ўзгалар фикрини билиш, шунингдек, бошқа шоирлар билан ижодий фикр алмашиш, ҳамкорлик қилиш имконига эга бўлганлар. Мумтоз адабиётимиздаги бир қатор жанрлар, айрим шеър санъатларининг юзага келиши бевосита М. билан боғланади: уларнинг бир қисми М. иштирокчиларининг бир-бирларига жавоб айтиши (тазмин, тахмис), бошқа бир қисми шеърини мусобақа (муаммо, чистон, бадиҳа) руҳи билан боғлиқ ҳолда вужудга келган. М.лар дастлаб санъат ва адабиётга меҳр қўйган подшо саройларида, ижод аҳлига ҳомийлик қилган бадавлат кишилар хонадонларида ўтказилган. Хусусан, Ҳусайн Бойқаро саройи ва Навоий хонадонидан ўтказиб турилган М.лар давр адабиёти тараққиётининг муҳим омилларидан бўлди. Шу фикр Қўқон адабий муҳитининг юксалишида Умархон, Хива адабий муҳити фаолиятида Муҳаммад Раҳимхон Феруз саройларида ўтказилган М.ларга нисбатан ҳам бемалол айтилиши мумкин. Айни чоғда, М.ларни фақат подшолар ёки бадавлат ҳомийлар билангина боғлаш тўғри бўлмайди, чунки санъатга меҳри, таъби назми бор кишилар ҳамиша ижодий мулоқотга талпинди, уларнинг ўзаро йигинлари мунтазам ўтказиб турилган, уларда нафақат шеърят, балки умуман санъат хусусидаги суҳбатлар бўлган, ўз шеърларидан ташқари бошқа шоирлар, салафлар ижодидан намуналар ўқилган, улар таҳлил қилинган, шарҳланган, муносабат билдирилган. Мумтоз адабиётимизнинг кейинги даврларида шу анъана устуворроқ бўлди: М.лар кўпроқ мадраса хужралари, шоирлар хонадонларида ўтказиб турилган. Мас., XIX аср охири – XX аср бошларида гоҳ «Кўкалдош», гоҳ «Бекларбегини» мадрасаларида Тавалло, Тошқин, Сидқий, Мискин, Хислат каби шоирлар иштирокида М.лар бўлиб турган. Жумладан, Сидқий «авзон, сажъ, қофия» каби тушунчаларни шундай давраларда ўрганганини эътироф этади. Ёки Қўқонда ўтказилган М.лар ҳақида Фурқат ёзади: «... аср шуаролариким, чунончи: мавлоно Муҳйи, мавлоно Муқимий, мавлоно

Завқий, мавлоно Нисбатдурлар, ҳамиша мажлис бунёд айлаб, зодаи таъбаримиздин мушоира қилур эрдик ва бир газалда тутаббуъ кўрсатиб, бир мазмун ҳар навъ тарзда ифода топар эди... ва баъзи вақт тавсифи ва ҳусн таърифида газал машқ айлаб, қадимий шуаролар девонларидин бир шўх газални топиб, унга ҳар қайсимиз алоҳида мухаммас боғлардик. Дигар шеър арбоблари бизлар суҳбатимизни орзу айлаб келур эдилар. Агар бирор марғуб газал зодаи таъб бўлса, табиатлик кишилар нусха сўраб олур эдилар». Фурқатнинг бу гаплари М.ларнинг аҳамияти ҳақида юқорида айтилган фикрларни тасдиқлайди. Шунингдек, ўтмишда маълум бир шоир мухлисларининг йигинлари ўтказиб турилган бўлиб, бундай М.лар «бедилхонлик», «фузулийхонлик», «машрабхонлик» каби номлар билан юритилган; 2) икки ёки ундан ортиқ шоир айтишуви шаклидаги шеър. Ижодий мусобақа руҳида яратилувчи бундай шеърларда, одатда, маълум бир мавзу, радиф, вазн, муайян бир қофияни сақлаш талаб қилинади, бу эса шеърнинг бир бутунлигини таъминлаш омилidir. XIX асрда яшган шоира Манзурабону шундай дейди: «Айш-ишрат ботқоғига ботиб қолган пошшаойимларни танқид қилувчи шеърнинг дастлабки:

*Ҳаддидин ошмасинлар вайсақи пошшаойимлар,  
Эшон бобомга қилсин минг-мингни пошшаойимлар, —*

байтини Нозимахоним айтган бўлиб, биз етти шоир давом эттирган эдик. Отинча аям энг яхши чиққан мушоираларимизни биздан хотира сифатида ўз дафтарларига кўчириб кўяр эдилар. Ўша шоир дугоналаримнинг исмлари бундай эди: Муаттар, Гулчеҳра, Насиба, Париваш, Сайёра, Сурайё. Биз етти шоир биргаликда қирқдан ортиқ мушоира — шеър ижод этган эдик. Афсуски, улардан бирортаси менда сақланиб қолмаган». Шунингдек, М.лар икки шоир савол-жавоби тарзида ҳам ёзилиб, уларнинг айримлари топишмоқ (мас., Махтумқули ва Дурди шоир) шаклида бўлса, бошқаларида ҳазил-мутойиба (мас., Завқий ва Муқимий М.лари) руҳи устунлик қилган.

**МУШОКИЛ** (ар. *مشاكل* — шаклдош) — аруз баҳрларидан бири, 1 та *фоилотун* (— v —) ва 2 та *мафоийлун* (v — — / v — —) асларининг кетма-кет тақроридан ҳосил бўлади, *қариб* билан шаклдош бўлгани учун шу ном билан юритилади. Асосан, араб шеърлятида қўлланади. Навоийнинг «Мезон ул-авзон» асарида ҳам, Бобурнинг «Мухтасар»ида ҳам *мушокили мусаддаси солим* (— v — / v — — / v — —) вазнига:

*Неча сансиз фироқингда фигон айлай,  
Нола бирла улус бағрини қон айлай, —*

байти мисол сифатида келтирилган. Бундан ташқари, Бобур «Мухтасар»да М. баҳрининг яна ўн етти вазнини махсус мисоллар билан келтирган. Жумладан:

*Йўқ сенингча жафокори жафожўй,  
Йўқ менингча вафодори дуогўй, —*

байти *мушокили мусаддаси макфуфи мақсур* (— v — — / v — — — / v — —) вазнига мисол қилинган.

**МУҚАЙЯД ҚОФИЯ** (ар. *مقيد* — боғланган қофия) — илми қофияда қофиянинг тузилишига кўра фарқланувчи бир тури, равий билан тўхтайдиган қофия. Мас., Огаҳийнинг:

*Мунчаким, эй дил, етишди ҳажридин заҳмат санга,  
Узмадинг ҳаргиз умидинг васлидин, раҳмат санга, —*

байтида М.қ. қўлланган (заҳмат — раҳмат). Мутлақ қофиядаги каби М.қ. таркибидаги ҳар бир ҳарф алоҳида ном билан юритилади: *қайд* — равийдан олдинги ундош, *ридф* — равийдан олдинги чўзиқ унли, *ишбо* — равийдан олдинги қисқа унли; *дохил* — ишбодан олдинги ундош, *ҳазе* — қайддан олдинги қисқа унли, *таъсис* — дохилдан олдинги чўзиқ унли. Келтирилган мисолдаги «заҳмат — раҳмат» жуфтлигида равийдан олдинги «а» қисқа унлиси — ишбо, ишбодан олдинги «м» ундоши — дохил.

**МУҚОБАЛА** (ар. *مقابله* — бир нарсанинг қаршисида бўлиш, қарши келиш) — мумтоз адабиётдаги шеърий санъат, байтда аввал икки ёки ундан ортиқ бир-бирига мувофиқ келувчи нарса-тушунчаларни аңлатувчи сўзларни, сўнг уларнинг зидди бўлган нарса-тушунчаларни билдирувчи сўзларни келтириш. Мас., Э.Воҳидовнинг:

*Сенга бўлсин нурли кундуз, менга қолсин қора тун,  
Барча гулшан сенга бўлсин, бор тиканзорлик менга, —*

байтида бир-бирига мувофиқ келувчи «нурли», «кундуз», «гулшан» тушунчаларига «қора», «тун», «тиканзор» тушунчалари зидланмоқда, улар ҳам ўзаро мувофиқдир. Гарчи М. билан тазоб-

га берилаётган таърифлар бир-бирига яқин ва бу ҳол муайян асосга эга бўлса ҳам, уларни фарқлаш зарур. М.нинг тазоддан фарқи шуки, биринчидан, унда байт таркибидаги зидлик ҳосил қилаётган жуфтликлар сони икки ёки ундан ортиқ бўлиши, иккинчидан, зидлан-тирилаётган тушунчаларнинг бир гуруҳга мансублари ўртасида ўзаро мувофиқлик, яқинлик (нурли, кундуз, гулшан каби) бўлиши талаб этилади. Яъни М. тазоднинг мазкур шартлар билан мураккаблашган бир кўриниши, демак, аслида ҳар қандай М. тазоддир, лекин ҳар қандай тазод ҳам М. бўла олмайди.

**МУҚТАЗАБ** (ар. *مقتضب* – кесилиш, қисқариш) – аруз баҳрларидан бири, мунсарихдан кесиб олинганга ўхшаганлиги учун шундай ата-лади. *Мафъулоти* (— — — v) ва *мустафъилун* (— — v —) аслларининг кетма-кет такроридан ҳосил бўлади. М. араб шеъриятига хос баҳр бўлиб, ўзбек шеъриятида қўлланмаган. Навоий «Мезон ул-авзон» асарида мазкур баҳрнинг *муқтазаби мусаммани матвий* (— v — v / — v — / — v — v / — v — v —) вазнига:

*Эй ниғори маъвашим, эй ҳарифи журъакашим,  
Тут қадаҳқи, беҳад эрур ишқ тобидин оташим, —*

байтини мисол сифатида келтирган. Бобур эса «Мухтасар» асарида М. баҳрининг жами ўн беш вазнига тўхталган ва махсус байтлар би-тиб, мисол сифатида келтирган.

## Н

**НАЗИРА** (ар. *نظيره* – ўхшаш, ўхшаш нарса, намуна) – ўзга шоир шеърига эргашиш йўли билан, унга ўхшатма тарзида ёки жавоб сифатида яратилувчи шеър. Шарқ адабиётида Н. битиш анча кенг тарқалган, замондош шоирлар ёки салафлар билан ўзига хос ижодий мусобақа тусини олган аъъанадир. Н.да шоир ўзга шоир шеъридан бир байт ёки мисрани айнан олиб, уни давом эттиради ёхуд ўз шеърига айнан келтирилган байт ёки мисрани сингдириб юборади. Бундай шеърлар форс-тожик адабиётида *татаббуъ* (ар. бирор нарсанинг кетидан тушиш, изидан бориш) деб юритилади, лекин ўзбек шеъриятида Н. истилоҳи кенгрок оммалашган. Баъзан Н.га нисбатан *тазмин* атамаси ҳам ишлатилади. Бироқ илми бадиъга оид айрим манбаларда Н. билан *тазмин* жиддий фарқланади: ўзга шоирнинг мисра ёки байтини шеърда айнан келтириш *тазмин*, бирининг шеърига жавоб сифатида, адабий мусобақа тарзида ёзилган шеър эса Н. ёки татаббуъ атамалари билан юритилади. Ўзга шоир асарига боғлаган Н.нинг тақлиддан иборат бўлиб қолмаслиги, шоирнинг унга ижодий ёндашиши талаб этиладики, бунда мавзунинг янада ёрқинроқ ифодаланиши ва бадиий савиянинг юксалиши кўзда тутилади. Н. деярли барча мумтоз шоирларимиз ижодида учрайди. Мас., «Девони Фоний» Навоийнинг Ҳофиз Шерозий, Дехлавий, Абдурахмон Жомий, Саъдий, Мавлоно Котибий, Мавлоно Шоҳий, Камол Хўжандий, Хусайний, Вафой, Қосим Анвор каби ўнлаб шоирлар шеърларига боғланган Н.лардан таркибланган. Мумтоз адабиётимизда газал, қасида, мураббаъ ва маснавийларга Н. боғлаш кенгрок оммалашган. Мас., Жомийнинг «Лужжат ул-асрор» қасидаси Хисрав Дехлавий қасидасига, Навоийнинг «Лисон ут-тайр» дос-тони Атторнинг «Мантиқ ут-тайр» достонига, нома жанридаги «Таашшукнома» (Саид Аҳмад) билан «Латофатнома» (Хўжандий) Хоразмийнинг «Муҳаббатнома»сига, Ҳазинийнинг «Арзим эшит, эй золиму ситамгар» мисраси билан бошланувчи мураббаъси

эса Муқимийнинг «Арзим эшит, аё сарви равоним» мисраси билан бошланувчи машхур мураббаъсига Н.лардир. Шунга қарамай, шеърятимизда газалларга боғланган Н.лар кўпроқ учрайди (мас., Навоийнинг «Кошки» радифли газалига Хусайний ва Бобур, Фурқатнинг «Кўзларинг» радифли газалига Ҳазиний боғлаган Н.лар ва б.)

**НАЗМ** (ар. *نظم* – тузук, тартиб, тартибга келтириш, териш, ти-зиш) – бадий нутқ шаклларида бири, тизма, шеърин нутқ (қ. *бадий нутқ*). Нисбатан кам ҳолларда Н. кенг маънода қўлланиб, умуман, шеърятни билдиради, бу кенг маънодаги наср билан қарши қўйилган ҳолда юзага чиқади.

**НАСР** (ар. *نثر* – тизилмаган, тарқоқ, сочма) – бадий нутқ шаклларида бири, сочма; прозаик нутқ (қ. *бадий нутқ*). Муомала амалиётда, умуман, бадий проза, Н.да битилган асарлар жами маъносида, проза терминига синоним сифатида ҳам қўлланади. Термин иккала маънода ҳам фаол ишлатилади.

**НАСРИЙ ШЕЪР** (русчадан калъка: «стихотворение в прозе») – насрий йўлда ёзилган лирик асар; ўзбек адабиёти ва адабиётшунослигида *сочма*, *мансур шеър*, *мансура* каби терминлар билан ҳам юритилади. Н.ш. лирик қахрамон ҳис-туйғу ва кечинмаларини тасвирлаши, одатда, кичик ҳажмга эга бўлиши, эмоционаллиги каби жиҳатлардан лирик шеърнинг ўзи, ундан фақат нутқий ташкилланиши жиҳати билан фарқланади. Агар лирик шеър муайян ўлчов асосида тартибга солинган нутқ шаклига эга бўлса, Н.ш. ритмик жиҳатдан ўлчовга солинмайди. Иккиси ҳам лирикага мансуб бўлгани ҳолда, *шеър* атамасини қўллашдаги турличалик (*насрий шеър* бирикмасида *шеър* сўзи турга – лирикага мансубликни, *лирик шеър* деганда эса нутқ шаклини билдиради) сабабли Н.ш. терминини ҳам ишлатиш зарурати юзага келади. Шу маънода Н.ш.ни *ритмик проза*, *сажъ* (*қофияли проза*) *каби* эпос ёки *сарбаст*, *оқ шеър* каби лирика ҳодисалари билан чалқаштирмаслик керак. Ўзбек адабиётида Ойбек, Миртемир, Р.Парфи, О.Матжон, И.Ғафуров каби ижодкорлар Н.ш. шаклида самарали ижод қилиб, унинг яхши намуналарини *яратганлар*.

**НАТУРАЛИЗМ** (лот. *natura* – табиат) – 1) табиий фанлар соҳасида эришилган улкан муваффақиятлар таъсирида XIX асрнинг 60-йилларидан бошлаб Европа адабиётларида шаклланган адабий йўналиш. Илк бор Францияда майдонга келган Н.нинг фалсафий асоси – позитивизм, О.Конт таълимотиدير. XIX асрнинг 70-йиллари

ўрталарига келиб Э.Золя атрофида шу йўналишга мансуб ижодкорлар (Г.Флобер, Ги де Мопассан, Г.Ибсен ва б.) мактаби шаклланди. Э.Золя ўзининг «Экспериментал роман», «Натуралист роман-навислар» номли асарларида Н.нинг назарий асосларини ишлаб чиқди. Табиий фанларнинг табиат сирларини ўрганиш борасидаги ютуқларидан илҳомланган натуралистлар жамиятни, инсонни шу каби теран, юксак даражадаги аниқлик билан тадқиқ этишни ўз олдларига мақсад қилиб қўйганлар, уларга *кўра*, *бадий билиш* илмий билишга монанд бўлмағи зарур. Шунга *кўра*, улар асарнинг бадийлик даражасини ҳам унда билиш амали нечоғлик кўламли ва чуқур амалга ошганидан келиб чиққан ҳолда белгилаганлар. Улар ҳаётни борича, бўяб-бежамасдан, бирон-бир мафкура ёки ахлоқий тарбия мақсадларига йўналтирмаган ҳолда тасвирлаш керак деб билишди. Яъни натуралистлар адабиёт ҳаёт материални танлаб тасвирлаши керак эмас, уни борича тасвирлаши керак, адабиёт учун бегона мавзу ёки сюжет йўқ деб ҳисоблайдилар. Натуралистлар асосий эътиборни *маиший тафсилотларга*, инсон руҳиятининг физиологик асосларига, унинг феъл-хўйи, хатти-ҳаракатлари, тақдиридаги тушунтириш қийин жиҳатларига қаратадилар. Улар учун ижодий қайта яратиш эмас, натурани аслига мувофиқ тасвирлаш муҳим. Буларнинг бари Н. ақидаларини мутлақлаштирган ижодкорларни, уларнинг асарларини санъатдан йироқлаштиради. Айни чоғда, Н. адабиёт тарихида ўзининг муайян ижобий изини ҳам қолдирди. Жумладан, жамиятнинг энг қуйи қатламлари турмушини иқир-чиқиригача тасвирлашга интилиш, инсон руҳиятининг энг чуқур пучмоқларигача кириб боришга интилиш каби жиҳатлар реалистик адабиёт имкониятларининг кенгайишига хизмат қилди; 2) адабиётшуносликда Н. термини реализмга зид қўйилган ҳолда ҳаёт материални сайламасдан, бадий-фалсафий идрок этмасдан оддийгина қайд этиш, бадий умумлаштириш ва ғоявий-ҳиссий муносабатдан мосуво, ҳаётдан оддийгина нусха кўчиришдан иборат, том маънодаги ижодийликдан йироқ, демакки, чинакам санъатга ёт ижодий метод маъносида ҳам тушунилади. Баъзан шу йўсин тасвир реализм мақомида турган адиблар ижодида, реалистик асарларнинг алоҳида эпизодларида ҳам учраб қоладики, бундай ҳолларда Н. термини баҳо маъносида, йўл қўйилган камчиликларнинг умумий номи сифатида ҳам ишлатилади.

**НАФОЗ** (ар. *نفاذ* – сўзи ўтиш, ҳукми жорий бўлиш) – қаранг. *мутлақ қофия*

**НЕКРОЛОГ** (юн. nekros – ўлик, logos – сўз, нутқ) – бирон-бир шахснинг (одатда, таниқли кишилар, давлат ёки жамоат арбоблари, санъаткорлар, адиблар ва ҳ.) ўлими муносабати билан ёзилган мақола; кейинги вақтда бирон-бир шахсга яқин кишиси вафоти муносабати билан билдирилган мўъжаз таъзияномалар ҳам Н. деб юритилмоқда. Одатда, Н.ларда вафот этган шахснинг фаолияти, бу фаолиятнинг аҳамияти мухтасар ёритилади. Шу жиҳати билан Н.лар вақти келиб қимматли манба бўлиб қолиши ҳам мумкин. Мас., жадид нашрларида И.Ғаспирли вафоти муносабати билан эълон қилинган Н.лар унинг Туркистон билан алоқалари ҳақида маълумотлар бериши билан муҳим бўлса, Чўлпоннинг «Икки йўқотиш» номли Н.и кўқонлик маърифатпарварлар – домла Йўлдош Мавлавий билан шоир Иброҳим Даврон ҳақида маълумот берадики, улар давр адабиёти ва тарихини ўрганишда асқотади.

**НЕОСТРУКТУРАЛИЗМ** – қаранг: **постструктурализм**

**НИДО** (ар. نداء – қичқирик, чақирик, ундов) – иншо йўллари билан бири, фикрни ифодалаш усули, ўй-фикр, ҳис-туйғу, кечинмаларнинг қимгадир ёки нимагадир мурожаат тарзида баён этилиши, шеърда ундалма қўллаш. Яъни шоир сабога, кўнгилга, маъшуқага ёки ўз-ўзига мурожаат этар экан, шу орқали ўз ҳис-туйғуларини, кечинмаларини баён қилиб олади. Мас., Бобур ёрга:

*Агарчи сенсизин сабр айламак, эй ёр, мушкулдур,  
Сенинг бирла чиқишмоқлик дағи бисёр мушкулдур, –*

тарзида, Машраб:

*Эшит арзимни, эй дилбар, юрак-бағрим кабоб ўлди,  
Рақиблар шодумон бўлди нигоримнинг жафосидин, –*

тарзида мурожаат қилиб, шу орқали ишқ изтироблари, ҳижрон азоблари билан боғлиқ туйғуларни изҳор этишни мақсад қиладилар. Аксар ҳолларда, шоир шеър давомида баён этган фикрлар ўз-ўзига мурожаат тарзида хулосаланиши мумкин. Мас., Навоий бир мақтаъсида:

*Эй Навоий, барча ўз узрин деди, ўлгунча куй  
Ким, сenga ишқ ўти – ўқ эрмиш азалнинг қисмати, –*

дер экан, ўзига мурожаат қилиш орқали «бошдан кечирилган ишқ изтиробларида ҳеч ким айбдор эмас, балки ишқ сenga тақдирнинг битигидир» деган хулосага келади. Умуман, шеърятимизда «Эй бод, откур ёра саломим», «Эй сорбон, охиста юр, оромижоним борадур», «Дўстлар, бу кун ажаб бир сарвқомат кўрмишам», «Эй Навоий, собит ўлсун шоҳи ғозий давлати», «Ул паридин мен нечук жон элтайинким, Бобуро», «Машрабо, ўлгунча даргоҳида мақсудинг будур» каби кўринишларда байтлар битмаган, Н. усулига мурожаат қилмаган шоир деярли топилмайди.

**НОВАТОРЛИК** (лот. novator – янгиловчи, янгиланувчи) – адабий жараён билан боғлиқ категория, адабий жараёнда анъана билан ҳар вақт диалектик алоқада мавжуд бўлган ҳодиса, адабиёт тараққиётининг муҳим ички омили, бадиий тафаккур ривожига сезиларли таъсир ўтказиб, кейинчалик анъанага айланувчи муҳим бадиий-эстетик янгилик. Адабий анъанага сайлаб ва танқидий муносабатда бўлган, ўз даврининг бадиий-эстетик эҳтиёжларини теран ҳис этолган ижодқоргина янгилик яратишга қобил бўлади. Мас., ўзбек мумтоз адабиёти анъаналари бағрида етишган Чўлпон ўз ижоди билан шеърятимизга қатор янгиликларни олиб кирди. Жумладан, унинг бадиий шакл соҳасидаги Н.и шеърларининг ритмик-интонацион қурилишида бармоқ ва сарбаст имкониятларидан кенг фойдаланиши, мумтоз шеърятдаги шеърый шакллари ўзгартириб қўллаши, шеърят тилини жонли сўзлашув тилига яқинлаштиришга интилиши, шеърятимизга *ижровий лирика*, *персонажли лирика* каби жанр кўринишларини олиб кирганида; бадиий мазмун соҳасида эса шеърятга ижтимоий «мен»ни олиб киргани, шахсийланган ижтимоий дардни куйлагани, анъанавий поэтик образлар (ёр, ошиқ, висол ва б.) маъносини ўзгартиргани кабиларда кўринади. Унутмаслик керакки, даврнинг бадиий-эстетик талаб-эҳтиёжларини шу даврда қалам тебратган ижодкорларнинг бари ҳам ҳис этади, шу маънода, талантли ижодкорларнинг ҳаммасида ҳам муайян даражадаги Н. мавжуд. Айни чоғда, Н. хусусиятлари даврнинг йирик санъаткорлари ижодида мужассам ифодасини топади.

**НОВЕЛЛА** (итал. novella – янгилик) – кичик эпик жанр. Адабиётшуносликда Н. масаласида яқдил тўхтама келинган эмас: «ҳикоя» ва «новелла» атамаларини синоним деб билувчилар ҳам, уларни кескин фарқловчилар ҳам бор. Яна бир тоифа Н.ни ҳикоянинг бир кўриниши деб ҳисоблайди. Сўнги қарашга кўра, ҳикоянинг икки типи бор: биринчисида очерклилик (тавсифий-ривожий), иккинчи-

сида новеллистиклик (конфликтли-ривожий) хусусияти устундир. Бу ўринда гап икки турли жанр ҳақида эмас, балки бир жанрнинг икки сифат кўриниши ҳақида боради, ҳикоя ва Н. атамалари шу икки типни фарқлаш учун қўлланади. Ҳикоядан фарқли ўлароқ, Н.га муфассал тафсилотларга бой ривоя хос эмас, мутахассислар уни ҳикоядан фарқлаш учун *соф сюжет санъати* деб ҳисоблайдилар ва унда драмага хос хусусиятлар устунлигини таъкидлайдилар. Булардан Н. ҳикоядан ўзининг сюжет-композицион хусусиятлари билан фарқланиши англашилади. Н.нинг (новеллистик ҳикоянинг) композицион курилиши: 1) ровийнинг холис «кузатувчи» мавқеида туриши; 2) ҳикоя қилинаётган воқеанинг юз бериш вақти билан ҳикоя қилиниш вақтининг бир-бирига мослиги; 3) «сахнавийлик» – ўқувчи наздида ҳаёт сахнасида кечаётган воқеани томоша қилаётганлик иллюзиясининг юзага келтирилиши; 4) сюжетнинг шиддатли ривожланишию қутилмаган бурилишларга эгалиги билан ажралиб туради. Мазкур хусусиятлар мавжуд бўлиши учун эса Н.да биргина воқеа – «ҳаётнинг бир парчаси»ни поэтик жонлантириш тақозо этилади. Шундай экан, Н. сюжети ҳам «воқеалар тизими» деган таърифга мувофиқ эмас: унда бир-бирига боғлиқ воқеалар ривожланади (мас., Чўлпон. «Тараққий»; А.Қаҳҳор «Бемор»). Шу йўсин тушунилган Н.нинг нодир намуналари сифатида Мопассаннинг «Дўндиқ», А.Чеховнинг «Хамелеон», О'Генрининг «Фаришталар тўхфаси», И.Буниннинг «Хилват йўлкалар» каби асарларини кўрсатиш мумкин. Чўлпоннинг «Ойдин кечаларда» асари эса замонавий Н.нинг ўзбек адабиётидаги илк ва гўзал намунаси. Шунингдек, жанрнинг сара намуналари А.Қаҳҳор, Ш.Холмирзаев каби адиблар ижодида ҳам кўплаб топилди.

**НОЙИРА** (ар. نايره – нурлантириш, ёритиш) – қаранг: **мутлак қофия**

**НУТҚИЙ ХАРАКТЕРИСТИКА** – инсон образини яратишнинг муҳим воситаларидан бири, элик ва драматик асарларда персонаж характерига хос хусусиятларни унинг нутқини индивидуаллаштириш орқали бериш. Кишининг нутқи унинг характер хусусиятлари, интеллектуал даражаси ва маънавий олами, муайян ижтимоий гуруҳ ёки ҳудудга мансублиги ва ш.к.лар ҳақида хабар берувчи энг ишончли манбадир. Шу боис адабий асарда персонаж нутқини индивидуаллаштириш (ўзига хос жиҳатларини акс эттириш) тўлақонли бадиий характер яратишнинг муҳим шарти саналади.



**ОБРАЗ** (рус. образ – акс) – қаранг: **бадиий образ**

**ОБРАЗЛАР СИСТЕМАСИ** – бадиий асардаги бир-бири билан узвий боғланган образлар тизими. Амалиётда О.с. деганда кўпинча асардаги персонажлар тизими назарда тутилади, бироқ бу терминнинг тор маъносидир. Зеро, О.с. фақат персонажларни эмас, балки бадиий воқеликни ташкил қилаётган жами (наrsa, ҳодиса, жой ва ҳ.) образлардан таркиб топади. Яъни бадиий асардаги ҳар бир образ яхлит системанинг унсури, шунга кўра, у бутуннинг қисми саналади (қ. *бадиий образ турлари*) ва ўзининг мазмун-моҳиятини бутун контекстидагина тўлиқ намоён этади. Чунки О.с.даги барча образлар бир-бири билан узвий алоқада бўлиб, улар бир-бирини тўлдирди, изоҳлайди, ойдинлаштиради. О.с.даги унсурларнинг алоқалари сифат жиҳатидан турлича. Жумладан, образлар орасида интегратив (ҳажим-тобе) алоқанинг мавжудлиги уларнинг системадаги мавқеи, ташиётган ғоявий-бадиий юк залвори жиҳатидан даражаланиши билан изоҳланади. Мас., асардаги наrsa-буюм ёки жой образлари персонаж образига тобеланади: уни тўлақонли яратишга хизмат қилади. Шунингдек, О.с.нинг таркибий қисми бўлмиш персонажлар тизимида ҳам худди шундай алоқалар кузатилади: ёрдамчи ва иккинчи даражали персонажлар бош персонажларга нисбатан тобе муносабатдадир (қ. *ситуация*). О.с.даги иккита образ орасида доим ҳам бевосита алоқа кузатилмаслиги мумкин, лекин билвосита (мазмуний) алоқа ҳаммиша бор. Мас., «Кеча»даги Зеби билан Марям орасида бевосита алоқа йўқ. Бироқ улар Акбарали билан Мирёқуб орасидаги бевосита алоқа асосида билвосита боғланади: минг-боши хонадони ва фоҳишахона, Зеби ва Марям тақдирларидаги муштараклик туфайли бу алоқа бадиий концепцияни ифодалашда муҳим аҳамият касб этади. Шунга ўхшаб романдаги кундошлар – Ҳадичахон, Пошшахон ва Султонхон образлари Зебини мазмунан тўлдирди, унинг тўйдан кейинги хатти-ҳаракатларини асослайди,



Зебидек беғубор қизларнинг шулардан бирига айланиш жараёни ҳақида тасаввур беради. Умуман, романда образларнинг бу каби алоқалари ижтимоий ҳаётнинг кенг эпик полотносини яратиш имконини беради: Раззоқ сўфи, Эшонбобо, Қумариқ масжиди имоми ва судда қатнашган имом-хатиб образларининг бир-бирини тўлдириши эътиқоди султ диндорлар; нойиб тўра, рус инженери, адвокат ва судьяларнинг ўзаро алоқалари эса мустамлакачиларнинг умумлашма образини яратиб, давр картинасини кенг тасаввур қилишимизга имкон беради. Демак, гап О.с. – СИСТЕМА ҳақида борар экан, асар мазмун-моҳиятини тушуниш учун уни ташкил қилаётган образларнинг турфа кўринишдаги алоқаларини теран идрок этиш талаб этилади.

**ОКСИМОРОН** ёки **ОКСЮМОРОН** (юн. *οχυμορον* – закиёна нодонлик) – услубий фигура, мантиқан тамомила зид тушунчалардан ҳосил бўлган синтактик бирлик. Адабиётларда О. сиқик ва шунинг учун парадоксал мазмун касб этувчи антитеза деб ҳам таърифланади, бироқ бу ҳамиша ҳам тўғри эмас. Чунки антитезада зид маънодаги икки сўз бир-бирига қарама-қарши қўйилса, О.да мазмун жиҳатидан зид тушунчаларни ифодаловчи сўзлар ажралмас бирлик ҳосил қилади, кўпроқ аниқловчи-аниқланмиш муносабатида келади. Мас., «*Ёмоннинг яхшиси бўлгунча, яхшининг ёмони бўл*» нақли, «*сукунат овози*», «*нафис ҳақорат*», «*ёлгон ҳақиқат*» бирикмаларида, «*Ўткан кунлар*»даги Отабекнинг «*ширин ўлим*» дейишида О. ҳодисаси кузатилади. Шунингдек, Х.Давроннинг: «*Энг даҳшатли бақариқ – соқовнинг бақариғи*» сатридаги *соқовнинг бақариғи*; И.Мирзонинг «*Ишқ қадимий масалдир: Ҳам заҳар, ҳам асалдир. Иккисига коса бир, Асалдайн заҳарим!*» сатрларидаги «*асалдайн заҳарим*»; Фахриёрнинг «*Бизлар узоқ чекиндик олға, Енгавердик... мағлуб бўлгани*» мисраларидаги «*олға чекинмоқ*», «*мағлуб бўлиш учун өнгмоқ*» бирикмалари ҳам О.га мисол бўла олади.

**ОКТАВА** (лот. *octo, octava* – саккиз, саккизлик) – саккиз мисрадан таркиб топувчи, беш ёки олти стопали ямб (қ. *стопа*) ўлчовидаги мисралари абабабсс тартибида қофияланувчи банд шакли. Ўйғониш даври итальян шеърлятида юзага келган ва тез орада итальян ҳамда испан эпик поэзиясининг асосий банд шакли бўлиб қолган. Жумладан, Л.Ариосто, Т.Тассо сингари машхур адибларнинг эпик поэмалари О. банд шаклида ёзилган. Кейинчалик О. банд шакли бошқа халқлар адабиётларида ҳам ўзлашган: немис адабиётида Гёте («*Фауст*»га ёзилган бағишлов), англиз адабиётида Байрон

(«*Дон Жуан*»), рус адабиётида В.Жуковский, А.Пушкин ва б., бой ритмик-интонацион имкониятлари, қофияланиш тартиби ва ўлчовнинг қулайлиги сабабли, О. банд шаклида лирик шеърлар ҳам ёза бошлаганлар. О.да аввалги олти мисранинг кесишган тартибда ва сўнгги икки мисранинг жуфт қофиялангани катта қулайлик тугдиради: дастлабки 6 мисрада ҳис-туйғуни ё ўй-фикрни ривожлантириб келиб, сўнгги икки мисрада лирик яқун яшаш мумкин. Шу қулайлик туфайли О. дан лирик шеърлар ёзишда ҳам фойдалана бошланган. Бу ҳолда энди О. қатъий шеър шакли, шеърый жанр сифатида тушунилади.

**«ОНГ ОҚИМИ»** – XX аср модернистик адабиётида майдонга келган ҳаётни тасвирлаш усули; инсон руҳиятида кечувчи жараёнларни бевосита, улар ҳақиқатда қандай кечса, ўшандай тасвирлашга интилган адиблар ва уларнинг асарларига нисбатан қўлланувчи шартли атама. О.о. термини XIX аср охирларида оммалашган бўлиб, америкалик файласуф У.Жемс фаолияти билан боғлиқ. У.Жемсга кўра, инсон онги дарё оқимиға монанддир, бу оқимда ҳис-туйғулар, ўй-фикрлар, туйқус пайдо бўлувчи ассоциациялар бир-бири билан бетартиб алмашилиб туради, мантиқан изоҳлаб бўлмайдиган даражада бир-бирига чатишиб кетади. Адабиёт ҳамиша инсон руҳиятида кечувчи жараёнларга қизиққан, уларни турли йўллар билан ифодалашга интилган. Бу нарса, айниқса, инсон хатти-ҳаракатларини ҳам ижтимоий, ҳам руҳий жиҳатдан асослашга интилган реалистик адабиётда кучли намоён бўлди. XIX аср реалистик адабиётида *ички монолог*нинг кенг оммалашгани, Л.Толстой, Ф.Достоевский каби адибларнинг *ички монолог* имкониятларидан максимал даражада фойдаланиб руҳий жараёнларни имкон қадар ҳақиқатга монанд тасвирлаш йўлида самарали изланганлари шу интилишнинг натижасидир. О.о.ни шу изланишларнинг бевосита давоми, *ички монолог*нинг шартлилик асосида мантиқ қолиппарига солинмаган кўриниши сифатида тушуниш мумкин. Яъни реалистик адабиёт О.о. (*ички монолог*)ни тасвир усулларида бири деб билади, унда инсон онгидаги жараёнлар воқелик билан боғланади ва уни бадий идрок этиш воситаси бўлиб қолади. Ўтган аср бошларидан шаклланган О.о. адабиёти эса унга ҳаётни бадий акс эттиришнинг универсал методи деб қаради, инсон руҳиятида кечувчи жараёнларни аслича акс эттиришга интилди, уларни воқелик билан боғлаш, мантиқий изчил кўринишга келтириш, қолипга солишдан воз кечди. Натижада О.о. адабиётининг В.Вульф, М.Пруст, Ж.Жойс каби йирик намоёндалари асарларида асосий мақсад инсон руҳиятига имкон қадар чуқур ки-

риб бориш, унинг қоронғу пучмоқларига назар солиш бўлиб қолдики, натижада улар кўп жиҳатдан эксперименталлик хусусиятини касб этди, анъанавий эпосга хос ривоя структураси парокандаликка учради, характер бутунлигига путур етди. О.о. адабиёти инсон руҳияти тасвири ва таҳлилида, ҳеч шубҳасиз, олға қадам эди, бироқ, иккинчи томондан, унда руҳият тасвири бобида *натурализм*га огиш кузатилди. Яъни натурализм воқеликни бор ҳолича тасвирлашга интилгани каби, О.о. адабиёти инсон руҳиятидаги жараёнларни аслича акс эттиришни мақсад қилди. Мазкур камчилик ва чекланганликдан қатъи назар, О.о. адабиёти инсонни англаш имкониятларини кенгайттирди, инсон ва унинг руҳияти ҳақидаги тасаввурларни бойитди. О.о. адабиёти, хусусан, унинг ёрқин намояндаси Ж.Жойснинг «Улисс» асари бадиий тафаккур ривожига чуқур из қолдирди. Жумладан, О.о. адабиёти Э.Хемингуэй, У.Фолкнер каби бир қатор йирик адибларнинг ижодий ўсишига тўртки берди, унинг анъаналари *сюрреализм*, *янги роман* намояндалари изланишларида ижодий давом эттирилди; О.о.нинг пайдо бўлишига замин ҳозирлаган реалистик адабиёт ҳам унинг маъқул томонларини ўзлаштирди.

**ОЧЕРК** (рус. очеркать – тасвирлаш) – эпик турнинг кичик шакли, бадиий-публицистик жанр. О. ҳажм эътибори билан ҳикояга яқин туради, лекин ундан қатор жиҳатлари билан фарқланади. Аввало, О. қонфликт асосида ривожланиб ечимга интилувчи сюжетга эга эмас. Ҳикояда ҳаётдаги воқеалар ижодий тафаккур кучи билан қайта ишланиб бадиий воқеликка айланттирилса, О.да мавжуд воқеликнинг характерли (муаллиф мақсадига мос) жиҳатларини танлаб олиб тасвирлаш билан чекланилади. Бошқача айтсак, О. ҳамиша *ҳужжатлилиқ* хусусиятига эга: унда тасвирланган шахслар ҳаётда мавжуд, воқеалар ҳақиқатда юз берган ва ҳ. Ҳикоя бадиий образлар воситасида фикрлайди, О.да эса муаллиф мушоҳадалари фактографик ва иллюстратив образларга таянади; ҳикоянинг диққат марказида муҳит билан алоқадаги шахс характери турса, О. марказида ижтимоий муҳитнинг шахс образи орқали қўйилган муаммолари туради. Шу жиҳатдан, О.нинг турли муаммоларни идрок қилиш, билиш имкониятлари жуда кенг. Шу боис, мутахассислар фикрича, миллий адабиётлар тарихида О.нинг гуллаб-яшнаши жамият ҳаётида туб ўзгаришлар юз бераётган даврларга тўғри келади. Зеро, деярли барча О.ларнинг материали – муаллиф яшаган давр ҳаёти, уларда шу даврга оид фактлар, замондошлар қаламга олинади.

Айрим манбаларда О.лар табиатига кўра бадиий адабиёт, беллетристика (қ. *беллетристика*) ёки публицистикага киритилиши мумкин деб кўрсатилади. Бироқ бу ҳолда О. билан ҳикояни фарқловчи жиҳатни белгилаб бўлмай қолади. Зеро, айрим ҳикоялар очерклилик хусусиятига (қ. *ҳикоя*) эга. Шунинг учун О.ни беллетристика ва публицистика жанри сифатида тушунган маъқулроқдир.

**ОҚ ШЕЪР** (русчадан калька: «белый стих») – муайян ўлчовга эга бўлгани ҳолда, мисралари ўзаро қофияланмаган шеър. Европа шеъриятида XVI асрдан бошлаб қофияси бўлмаган антик шеърятга эргашиш натижаси сифатида пайдо бўлган. Дастлаб эпик ва драматик (Шекспир, Мильтон, Жуковский) поэзияда қўлланган, кейинчалик бу шеър шаклидан лирикада ҳам фойдаланила бошланди. О.ш. билан қофияланиш тартиби эркин бўлган шеър шакллари чалкаштирмаслик керак. Юқорида айтилганидек, О.ш.да ҳамиша маълум ўлчов асосидаги *изометрия* мавжуд бўлади. Мас., У.Носирнинг қуйидаги шеъри:

*Шафақ учай деб қолди,  
Қалтар қонидек рангсиз...  
Кўзларимни узмайман.*

*Дединг: Энди учар у!  
Ўтган қайтиб келмайди,  
Эртани севиниб кут, –*

7 бўгинли бармоқ вазида ёзилган бўлиб, унда шу ўлчов бутун шеър давомида сақланади, лекин мисралари ўзаро қофияланган эмас. XX аср ўзбек адабиётида О.ш. намуналари Ойбек, Ҳ.Олимжон, М.Шайхзода, А.Орипов, Р.Парфи каби кўплаб шоирлар ижодида ҳам учрайди. Шунингдек, адабиётимизда О.ш.дан шеърый драмалар ёзишда ҳам фойдаланилган (М.Шайхзода. «Мирзо Улугбек»).

# П

**ПАЛИНДРОМ** (юн. *palindromeo* – орқага югурмоқ) – сўз ўйинларидан бири; сўзни чаппа ўқиғанда ҳам маълум маъно чиқадиган тарзда қўллаш, мисра ёки жумлага шу тарзда тартиб бериш; мумтоз шарқ адабиётшунослигида қалб (қ.) деб юритилади. П.да ўнг ё чаппа ўқилишидан қатъи назар бир хил маъно чиқиши (айрим манбаларда турли маънолар чиқиши ҳам П.га мансуб этилаверади) кўзда тутилади. Мисра (жумла) доирасидаги П. сўзма-сўз тартибда ёки ҳарфлар бўйича ўқилганда, сўз доирасидагиси эса ҳарфлар бўйича ўқилганда воқе бўлади. Агглютинатив тилларга мансуб туркий тилларда мисра (жумла) доирасидаги П.нинг воқе бўлиши жуда қийин, бунга сўз ўзгартирувчи қўшимчаларнинг сўз охирида келиши ва кетма-кет қўшилиб бориши халал беради; флектив тиллардаги шеъриятда мисра доирасидаги П.нинг ҳарфлар бўйича воқе бўлувчи хили, сийрак бўлса-да, учраб туради (мас., «А роза упала на лапу Азора»). Булардан фарқли ўлароқ, П.нинг мазкур хилидан фойдаланиш имкони аморф тилларда (мас., хитой шеъриятида) анча кенг. Сўз доирасидаги П. нисбатан кўпроқ учрайди, ундан турли сўз ўйинлари қилган ҳолда муайян фикр-ни ифодалаш мақсадида фойдаланилади. Мас.:

*Мен «йўқ»дан «қўй» қилдим,  
«Йўқ» сўзини тескари ўқиб.*

*«Овсар» – «расво» бўлди.*

*«Нодон» эса...*

*Барибир «нодон»лигича қолди (И.Искандар).*

Агар келтирилган шеърда сўзнинг ўнг ва чаппа ўқилиши очик қиёсланган бўлса, Фахриёрнинг куйидаги шеърида ўзгача ҳол кузатилади:

*Қорни сира тўймаган шу йўқ  
Зарбоф тўн ҳақида ўйларми сира?*

*Ва ҳечса мингямоқ жандасини у  
Тескари киймоқни ўйлаб кўрарми?*

Аввалги шеърдан фарқли ўлароқ, бунисида сўзни чаппа ўқиш ке-раклигига ишора қилиш (*тескари киймоқ*) билан чекланилган. Шоир «йўқ» сўзини мисрада грамматик жиҳатдан амалдаги қоидаларга хилоф позицияга қўяди ва бу билан уни алоҳида, бўрттириб-таъкидлаб кўрсатади, натижада сўз П. объектигина эмас, қўйилаётган саволларга жавоб сифатида лирик қаҳрамон изтиробларининг асоси бўлиб қолади.

Шунингдек, П. усулидан асарга, унда иштирок этувчи персонажлар, нарсаси-ҳодиса, тушунча ва ш.к.ларга ном беришда ҳам фойдаланилади. Мас., А.Каримовнинг «Қаро кўзим» фантастик қиссасида ҳаракатланувчи Аснрона, Азурефи, Арухшама каби персонажларнинг исми Анора, Феруза, Машхура исмларини чаппа ўгириб ҳосил қилинган. Фақат янги исмлар талаффузига ўзига хослик (гўё ўзга сайёраликлар тилига мослик) бағишлаш учун ҳосил қилинган исмларда товуш орттирилган.

**ПАМФЛЕТ** (фр. *page feuillet* – учар варақа) – публицистика жанри, аниқ бир шахс ёки ижтимоий тузилма (тузум, партия, ҳаракат, гуруҳ ва б.)ни кескин фош этиш мақсадига қаратилган кичик ҳажмли асар. П.нинг услубий хусусиятлари шу мақсадга мос: таъкидлар, мурожаатлар ва кучли эмоционаллик асосида юзага келувчи риторик интонациялар, патетик руҳ, афористик характерда ифодаланган ҳукм-хулосалар, ўткир сарказм даражасига етадиган яксон қилувчи киноявийлик. Булар П.нинг ошкор *тенденциоз* руҳда бўлишини, ўқувчига бевосита таъсир қилишини таъминлайди. Гарчи П. жанр сифатида Реформация даврига келиб қарор топган бўлса-да, унга хос хусусиятлар антик адабиётдаёқ мавжуд бўлган. Жаҳон адабиёти тарихида М.Лютер, Э.Роттердамский, Ж.Мильтон, Ж.Свифт, В.Гюго, Э.Золя, Г.Манн, А.Герцен, Л.Толстой каби ижодкорлар қаламига мансуб П.лар машхур ва муҳими, улар ўз даври ижтимоий-сиёсий тафаккурига жиддий таъсир ўтказган. XX асрда, айниқса, 20 – 30-йилларда Ф.Фулом, Ҳ.Олимжон, А.Қаҳҳор сингари адибларимизнинг қатор публицистик чиқишлари, гарчи уларнинг жанри аксар *фельетон* деб белгиланган бўлса-да, моҳиятан П. саналиши мумкин (мас., Ф.Фулом. «Янқилар, уйинга йўқол!», «Жомаси пок, ўзи нопок бандалар» ва б.). П.га хос юқоридагича хусусиятлар баъзан бадиий асарларда ҳам кучли воқе бўлади ва шу билан боглиқ ҳолда *памфлетлилик* ҳақида гапириладики, бундай асарнинг ҳамма унсури –

тили, услуби, образлар тизими тўлалигича фош этиш мақсадига йўналтирилади. Шуни назарда тутиб адабиётшуносликда баъзан *хикоя-П.*, *роман-П.*, *пьеса-П.* сингари атамалар ҳам ишлатиладики, улар асарнинг жанрини эмас, кўпроқ услубий хусусиятлари, гоёвий йўналишини аниқлаштиришга хизмат қилади.

**ПАЛЕОГРАФИЯ** (юн. *palaios* – қадимги, *γραφω* – ёзма) – ёзувлар тарихини ўрганувчи тарихий-филологик фан соҳаси. П.нинг вазифалари доирасига қадимги ёзма ёдгорликларни тадқиқ этиш, битикларни ўқиш (расшифровка), улар яратилган жой ва вақтни аниқлаш кабилар ҳам киради. П. бу вазифаларни ёзув асосида, қадимги битикларнинг ёзув хусусиятларидан келиб чиққан ҳолда амалга оширади. П. ўз фаолиятини тарих, тил тарихи, адабиёт тарихи, матншунослик каби соҳалар билан мустаҳкам алоқада олиб боради. Жумладан, матншунослик фаолиятида П. муҳим ёрдамчи соҳа бўлиб хизмат қилади.

**ПАРАДОКС** (юн. *paradoxos* – қутилмаган, ғалати) – жамиятда анъанавий тарзда ҳукм суриб келаётган, аксарият томонидан қабул қилинган фикрга, баъзан эса зоҳиран соғлом мантиққа зид гап. П. афористикага хос лўнда ва ўткир ифода шаклига эга бўлади ва ўзи инкор қилаётган фикр зиддига ишонтира олиш ё олмаслиги, қай даражада тўғрилигидан қатъи назар, оригиналлиги билан эътиборни жалб қилади. Мазкур жиҳатлари билан П. баҳс-мунозаралар, публицистик чиқишлар, сатирик асарлар, замонавий анекдотларда самарали бадий услуга айланади. Мас., Фахриёрнинг «Аксилэкология» (1985) шеърида кўпчилик онгида қарор топган «инсон табиатни бўйсундира олади» деган қараш П. тарзида инкор этилади:

*Пайхон қилар одамни экин,  
Ташбиҳ надур, далаларнинг ўзи бий.  
Чўллар уни қувлаб боради,  
Ё раббий.*

П. тарзида ифодаланган фикрдаги қутилмаганлик унинг ўқувчи онгида муҳрланиб қолишига, кейинчалик қайта-қайта мушоҳада қилинишига асос бўлиши билан, айниқса, эътиборлидир (мас., Фахриёр: «Юрак қушдир. Қафас билан бирга туғилган қуш»; «Дарё, сени қандоқ чўмилтирамиз, Қайда ювинарсан, булганчиқ дарё?»). Баъзи асарлардаги сюжет ситуациялари, ҳатто асар тўлалигича П. принципи асосига қурилиши мумкин. Жумладан, Фахриёрнинг қуйидаги шеъри:

*Ун бўлмасе ҳам уйда,  
Дехқон элагини сотмайди.  
Шикоятлар келмас уйига,  
Бировга арз қилиб ётмайди.*

*Очлик енгиб, тоқ бўлса тоқат,  
Икки дунё тор келса кўзга,  
У зорланмас, сўкинмас, фақат  
Элагини тутар оғизга.*

Шоир П. асосида «Эл оғзига элак тутиб бўлмайди» мақолини қайта мушоҳада этади. мустабид тузум шароитида мутелашган халқ фожиасини, замона ва тузумга кинояли муносабатини ифода қилади.

**ПАРАЛЛЕЛИЗМ** (юн. *parallelos* – ёнма-ён турувчи ёки борувчи) – 1) халқ оғзаки ижодида жуда кенг қўлланган, кейинчалик ёзма адабиёт томонидан ўзлаштирилган тасвир усули, муайян ўхшашликка эга нарса-ҳодисаларни параллел (ёнма-ён) тарзда тасвирлаш. П. тасвирланаётган нарса-ҳодисалар орасидаги ўхшашлик ёки зидлик туфайли образни жонли тасвирлаш, ҳис-туйғуни ёрқин ифодалаш имконини беради. Поэтик усул сифатида П. илдизлари инсон ўзини табиатнинг узвий бўлаги ҳисоблаган, уни илоҳийлаштириб ва сизгиниб яшаган қадим замонларга бориб тақалади. Шу боис халқ ижодида табиат билан инсон ҳаёти (муайян ҳаётий вазият, воқеа, руҳий ҳолат ва ҳ.) манзараларини параллел тарзда тасвирлаш, айниқса, кенг қўлланган. Мисол учун, машхур «Ёр-ёр» мисраларини олайлик:

*Далада тойчоқ кишнайди  
От бўлдим деб, ёр-ёр.  
Уйда келин йиғлайди  
Ёт бўлдим деб, ёр-ёр.*

Мазкур парчада уйда йиғлаётган келин билан далада кишнаётган тойчоқнинг параллел тасвирлангани келиннинг руҳий ҳолатини ёрқин ифодалайди. Тойчоқ «от бўлдим деб кишнайди», чунки «от бўлиш» – етим ташланди демак, энди у олдингидек онасининг бағрида беташвиш яшай олмайди; кишнаётган тойчоқ ўзга уйга келин бўлиб тушган, «чиққан қиз чилдан ташқари» ақидасига кўра

энди яқинларига «ёт» бўлган келиннинг дардини ифодалайди; 2) аналогия асосида П.нинг синтактик П., лексик-морфологик П., психологик П., интонацион П. каби ҳатор бошқа кўринишлари ҳақида ҳам гапирилади. Бу ҳолда ташкилланиши (фонетик, лексик-морфологик, ритмик, синтактик ва б.) жиҳатидан бир-бирига ўхшаш нутқ бўлақларини матннинг турли бўлақларида таъкидлаб жойлаштиришга асосланган стилистик фигура, матн композициясига дахлдор бадиий усуллар тушунилади. Жумладан, энг кўп тарқалган кўринишларидан бири синтактик П.дир:

*Йўлин йўқотса одам – муҳаббатга суюнгай,  
Гуссага ботса одам – муҳаббатга суюнгай,  
Чорасиз қотса одам – муҳаббатга суюнгай...*

Келтирилган мисолда П. банд доирасида, мисраларда жумла қурилишининг бир хиллиги асосида воқе бўлса, баъзан П. бандларнинг синтактик қурилишидаги бир хиллик асосида ҳам юзага чиқадики, бу *строфик* П. деб юритилади.

Синтактик П.нинг мураккаблаштирилган кўринишлари ҳам бўлиб, бунга *хиазм* ва *инкорли* П.ларни мисол қилиш мумкин. П.нинг жумладаги сўзларни тўла ёки қисман тескари тартибда такрорлаш асосига қурилган кўриниши *хиазм*, кейингиси аввалги бўлақни инкор қилувчи тури эса *инкорли* П. деб аталади. Қуйидаги мисолда уларнинг иккиси ҳам мавжуд:

*Ёмоннинг яхшиси бўлгунча,  
Яхшининг ёмони бўл.  
Сомоннинг бугдойи бўлгунча,  
Бугдойининг сомони бўл.*

3) яна аналогия асосида композицион П. тушунчаси ҳам юзага келган. Композицион П. турли кўринишларда намоён бўлади. Мас., эпик асарлардаги бир пайтда ёнма-ён кечаётган (мас., Ч.Айтматовнинг «Қиёмат» романидаги Авдий, Акбара ва Бўстон сюжет чизиклари) ёки турли замонда кечгани ҳолда параллел тасвирланаётган воқеалар ётган сюжет линиялари (мас., Ҳ.Султоновнинг ўтмиш-ҳозир параллелига қурилган «Ажойиб кунларнинг бирида» қиссаси) композицион П.га мисол бўла олади. Шунингдек, табиат тасвири билан қахрамон руҳияти, ҳаёлдаги ҳолат билан ҳаётий ҳолат, туш би-

лан ўнг ва ш.к.ни параллел тасвирлаш ҳам композицион П. усулида амалга ошади.

**ПАРАФРАЗ(А)** (юн. *paraphrases* – қайта ҳикоя қилиш) – адабий матнни бошқа сўзлар билан, баъзан эса бошқача йўсинда (насрий асарни шеърий, шеърий асарни насрий йўлда) қайта баён қилиш. П. турлича сабаблар (матнни муайян ўқувчи оммага мослаштириш зарурати, асарни қабул қилишни осонлаштириш, қисқача мазмун билан таништиришнинг етарли экани, нашр имкониятлари ва ш.к.) билан амалга ошади. Мас., антик Римда Эзоп масаллари Федр ва Бабрийлар томонидан шеърга солинган; А.Навоий «Хамса»сига кирган дostonларнинг насрий баёни амалга оширилган; ўқувчилар учун чиқарилган хрестоматияларда йирик асарларнинг боблари тушириб қолдирилади-да, уларнинг мазмуни анча муфассал баён қилинади ва Ҳ. Гарчи П. адабиёт тарихида ва ҳозирги ноширлик амалиётида учраб турса-да, терминнинг адабиётшунослиқда қўлланиши фаол эмас.

**ПАРДА** – драматик асарнинг сахнага қўйилганда узлуксиз воқеа сифатида ижро этилувчи бўлаги. Одатда, сахнада шу бўлақ ижроси тугагач, парда туширилади: ўзбек адабиётшунослигида П. термини шу асосда пайдо бўлган, жаҳон адабиётшунослигида *акт* (лот. *actus* – ҳаракат) термини билан юритилади. Драмани П.ларга бўлиш антик даврдаёқ анъана тусига кирган, П.лар орасида хорнинг кўшиқ-рақслари ижро этилган. Антик адабиётда драматурглар асарни беш П.га бўлганлар, бу нарса классицизм даврида қатъий қоидага айлантирилган. Кейинги давр адабиётида бундай қатъийлик йўқ: драматик асарлар бир ёки бир нечта П.дан иборат қилиб бўлинаверади. Шу билан бирга, ҳозирда драматик асарни П.ларга эмас, бир-бирини давом эттирувчи «эпизод»ларга бўлиш ва спектаклни битта *антракт* (танаффус) билан тугатиш анъанаси шаклланган. Драматик асарнинг ижро учун мўлжаллангани П.ларга бўлинишини табиий ва зарур ҳолга айлантиради. Чунки, одатда, бир П. воқеалари узлуксизлиги ва бир жойда кечиши, иштирок этувчи персонажлар таркиби билан бутунлик ҳосил қиладики, ундан сўнг П. туширилиши кейингисининг ижроси учун зарур ишларни амалга ошириш (сахна декорацияси, костюм ўзгариши, грим ва ш.к.) имконини беради.

**ПАРОДИЯ** (юн. *parodia* – тескари қилиб куйлаш) – 1) бирон-бир асар, ижодкор, ижодий услуб, жанр кабилар устидан кулиб ёзилган асар. П.да кулгига олинган асар (ижодкор, услуб, жанр ва б.) га хос белгилар сақлаб қолингани ҳолда, мазмуни унга номўвофик

бўлади. Шунга кўра, П.нинг моҳияти кулгига олинган объект (асар, ижодкор, услуб, жанр ва б.) билан бирликда англашилади, бу ҳолда П. объекти билан кулги объекти битта. Мас.:

*Тошқинлик, шошқинлик сувгадир хос,  
Порлоқлик, ёрқинлик нургадир хос.  
Учириш, ўчириш – сувгадир хос,  
Барқ уриш, бўй тараш – гулгадир хос.*

Ё.Исҳоқовнинг «Хусусият» шеърідан

*Чўктириш сувга хос, бўктириш – ошга,  
Оёқдан чалмоқлик хос зрур тошга.  
Мен сенга янги гап айтмоқчи эдим,  
Найлай шу эски гап кёбқолди бошга.*

Ў.Саидов пародияси;

2) муайян асар, одатда, кўпчиликка таниш асарга хос шаклий хусусиятларни сақлаган ҳолда бошқа бир мавзуну ҳажвий талқин қилишга қаратилган асарлар ҳам П. деб юрилади. Бу ҳолда П. объекти билан кулги объекти битта эмас. Яъни бунда объект қилиб олинган асар устидан кулиш мақсади эмас, бошқа мақсадлар кузатилади. Мас., «Камайиб қолмас-ку давлатинг, ахир, Бир бор кўрагимга тақиб кўйсанг гул» – «Камайиб қолмас-ку давлатинг, ахир, Бир бор чўнтагимга солиб кўйсанг пул».

**ПАРЦЕЛЛЯЦИЯ** (фр. *parcelle* – узв, бўлак) – нутқ ифодавийлигини ошириш усуллари билан, мелодика билан боғлиқ нутқ фигура; битта жумла таркибидаги бўлақларнинг интонацион жиҳатдан алоҳида гап шаклида берилиши. П.га учраган бўлақлар ёзувда тиши белгилари билан ажратилади. Мас., У.Азим шеърідан:

*Дарахтларни зулумот кўмди.  
Дарахтларга қаргалар кўнди.  
Зулумотни оралаб нохуш  
Қанот қоқиб ўтди бир бойқуш.  
Бир ваҳима!.. Ҳасрат!..*

Парчадаги сўнги икки мисра грамматик жиҳатдан бир бутунни (Қанот қоқиб ўтди бир бойқуш – бир ваҳима, ҳасрат...) ташкил

қилиб, мисрада алоҳида гап шаклини олган бўлақлар (*Бир ваҳима!.. Ҳасрат!..*) аслида ажратилган изоҳловчилардир. Уларнинг алоҳида гап шаклини олиши шеърга ўзига хос оҳанг бағишлаб, мазмунни кучайтиришга (нохуш ҳолатнинг ёрқин ифодасига) хизмат қилади. Ўзбек шеъриятида П. ҳодисаси кўпроқ уюшиқ бўлақларни (У.Азим: «Юравер. Қолма йўлдан. Қолган қолар. Ачинма. Чўчима ҳеч нарсадан), ундалма ва ундовларни (У.Азим: «Майда одам! Шошма! Ўз бошинг қолиб, Яна ўзга бошни олиб кетяпсан!»; «Нодон! Мақсад тириклик, ишон!»), шунингдек, санаш оҳангида боғланган йиғиқ содда гапларни (У.Азим: «Ботир бўл. Олга югур. Қўрқма ҳар хил қотилдан») алоҳида ажратиш орқали воқе бўлади.

**ПАУЗА** (юн. *pausis* – тўхтам) – нутқнинг бир текис оқимидаги узилиш, тўхтам. Жонли нутқда П.лар фикрни аниқ-равшан, керак ўринларни ажратиб-таъкидлаб ифодалашга ёрдам беради ва шу жиҳатдан мазмун ифодаловчи муҳим унсурлардан саналади. Бадиий нутқда П.нинг икки тури ажратилади: жумланинг синтактик қурилиши билан белгиланувчи мантиқий П. ва унга боғлиқ бўлмаган ритмик П.лар. Агар мантиқий П.лар ҳар қандай нутққа хос бўлса, ритмик паузалар фақат шеърини нутққа хос ҳодиса саналади. Ритмик П.лар баъзан мантиқий П.ларга ҳам мос келади, шунга қарамай, шеърини нутқда ритм талабидан келиб чиқувчи ритмик П.лар етакчилик қилади. Шеърини нутқ ритмини ҳис этишда П.лар жуда муҳим бўлиб, улар ритмик бўлақларни (туроқ, мисра, банд) талаффузда бир-биридан ажратади ва шу асосда ритмиклик яққол сезилади. Ритмик П.лар сифат жиҳатидан даражаланади: туроқлардан кейинги П. том маънодаги тўхтам эмас, у кўпроқ мелодиканинг ўзгариши ҳисобига тасаввур қилинади; мисрадан кейин анча сезиларли П., банд ниҳоясида эса бундан-да аниқ сезилувчи П. бўлади (қ. *ритм*).

**ПАФОС** (юн. *pathos* – ҳис, эҳтирос) – ижодкорнинг ўзи тасвирлаётган воқеликка гоёвий-ҳиссий муносабати, автор эмоционал-лиги. П. термини антик эстетика ва риторикада ишлатилган бўлиб, кейинчалик турли маъно ўзгаришларига учраган. Жумладан, Арасту П. деганда инсон қалбининг хусусияти, кучли эҳтиросни назарда тутди. Унга кўра, П. нотиклик усуллари билан бўлиб, унинг ёрдамида нотик тингловчиларда ўзи истаган ҳисларни уйғотади. Терминни трагедияга нисбатан қўллаганида Арасту П.нинг қаҳрамон фожияси, руҳий изтироблари орқали намоён бўлиши ва томошабинда ҳам шунга мос ҳисларни уйғотишини таъкидлайди. Кейинчалик, хусусан, Уйғониш давридан П. инсон қалбининг хусусияти деб эмас, балки

асарнинг муайян ҳис-туйғуларни уйғота олиш хусусияти сифатида тушунила бошланди, шу боис у кўпроқ услуб, қаҳрамон, кўтаринкилик, трагиклик каби тушунчалар билан боғлиқ ҳолда ишлатилди. Гегель эстетикасида П. жуда муҳим ўрин тутаетди, у санъатнинг ўзаги, «санъат салтанати»нинг асоси сифатида талқин қилинади. Гегельга кўра, П. инсон моҳиятини ташкил этувчи объектив мавжудлик, қалбни ҳаракатлантирувчи қудратли куч бўлиб, ижодкор ўз асарида уни ифодалашни мақсад қилади, яъни муайян П.ни ифодалаш санъат асарининг муддаоси, ижоднинг мотивидир. Шу асосда Гегель ижодга туртки берувчи мотивлар, П. кўринишлари сифатида «оила, ватан, давлат, черков, шон-шараф, дўстлик, ғурур, номус, муҳаббат» кабиларни кўрсатади. Гегель таърифидаги П. кўпроқ асар персонажлари билан боғлиқ бўлса, В.Белинский уни ижодкор шахси билан боғлайди. Унга кўра, П. «ғоя-эҳтирос» бўлиб, у ижодкорнинг маънавий борлигидан келиб чиқаетди. Бу ҳолда алоҳида олинган асар П.и ҳақида ҳам, муайян ижодкорга хос П. ҳақида ҳам гапириш мумкин бўлади. П.ни бундай тушуниш шўро адабиётшунослигида, жумладан, ўзбек адабиётшунослигида ҳам устуворлик қилди. Мас., Г.Поспелов П.ни бадиий мазмуннинг *маъзу, проблематика, бадиий ғоя* қаторидаги муҳим узвларидан деб билади ва унинг *қаҳрамонлик, трагизм, сентиментализм, романтика, драматизм, сатира ва юмор* каби турларини ажратади. Шуни қайд этиш лозимки, Г.Поспелов П. термини билан бир қаторда *воқеликка ғоявий-ҳиссий муносабат* терминини ҳам қўллайди. Адабиёт назариясига оид айрим манбаларда эса П. ўрнига *автор эмоционаллиги, воқеликка муносабат турлари* каби терминлар ишлатилади. Мазкур ҳол ҳозирги адабиётшуносликда П. термини қўлланиши жиҳатидан пассивлашганидан далолат беради. Бунинг сабаби эса унинг ҳодиса моҳиятини тўла қамрай олмаётгани билан боғлиқдир. Агар Арасту-Гегель анъанаси бўйича П. кўпроқ персонажлар (объект) билан, Белинскийдан бошлаб ижодкор (субъект) билан боғланган бўлса, ҳозирда субъект – объект – адресат учлигини бирликда олиб қараб, уларни қамраб олувчи *бадиийлик модустлари* (қ.) термини фаоллашди.

**ПЕЙЗАЖ** (фр.  *paysage* – жой, юрт) – адабий асарда яратилувчи бадиий воқеликнинг муҳим компоненти, воқеалар кечувчи очик макон (ёпиқ макон – *интерьер*) тасвири. Анъанага кўра, П. дейилганда табиат тасвири тушунилади, лекин бу хил тушуниш бирмунча торроқ. Чунки П. нафақат табиатни (агар бу сўз остида бирламчи табиат тушунилса), балки у билан бирга инсон томонидан яратилган

нарсалар тасвирини ҳам кўзда тутаетди. Шу маънода, мас., бирон-бир *киёбон* ёки шаҳар кўчасининг тасвири ҳам П., ҳолбуки, улар табиат тасвири эмас, жой тасвиридир. Ёзувчи П.ни воқеалар ривожини тўхтатиб қўйганча муфассал тасвирлаши (*статик* П.) ёки унга тааллуқли деталларни воқеалар давомида бериб бориши (*динамик* П.) мумкин. Асарда П. бажарувчи бирламчи функция воқеалар кечаетган жой ва вақт ҳақида тасаввур беришдир. Бироқ П.нинг асардаги функциялари бу билан чекланмайдди, у полифункционаллик хусусиятига эга. Жумладан, П. қаҳрамон руҳиятини очиш воситаси сифатида кенг қўлланади. Бунда жой тасвири (ундаги «ранг»лар) персонаж руҳияти билан уйғунлик касб этиши ҳам, унга контрастли фон бўлиб хизмат қилиши ҳам мумкин; қаҳрамон руҳиятидан ўтказиб берилган П. эса унинг айни дамдаги ҳолатини тасвирлаш воситаси (мас., «Ўткан кунлар»даги ҳайдалган Отабек кўзи билан кўрилган тўл) бўла олади. Шунингдек, айрим ҳолларда П. сюжет воқеаларини асослайди ёки уларнинг ў ёки бу йўналишда ривожланишига (мас., А.Орипов. «Хангома») туртки беради. Турли адабий турларга мансуб асарларда П.нинг ўрни ва сифати фарқланади. Эпик асарларда анча муфассал тасвирланган П.лар кенг ўрин тутса, драматик асарларда фақат шартли равишдагина П. ҳақида гапириш мумкин. Зеро, ремаркаларда жойга хос бир нечта асосий деталларни умумий тарзда келтиришнинг ўзини фақат шартли равишдагина жой тасвири дейиш мумкин. Лирик асарларда ҳам П. кўпроқ деталлар тарзида мавжуд, бироқ улар лирик сюжетни ривожлантириш, асослашга хизмат қилади, лирик ҳолат вақти ва макони ҳақида тасаввур беради, лирик субъект руҳиятидан ўтказиб берилгани боис ўша кайфиятнинг суратига айланади ёки уни ифодалаш учун фон вазифасини ўтайди ва б. Яъни П.нинг лирикадаги функциялари кўламлироқ, фақат тасвир кўлами (*пейзаж лирикаси* истисно қилинса) торроқ.

**ПЕЙЗАЖ ЛИРИКАСИ** – тавсифий лириканинг бир тури, лирик субъектнинг ҳис-туйғу ва кечинмалари табиат тасвири орқали ифодаланган асарлар. П.л.да тасвирланган табиат манзарасида лирик субъект қалби суратланади, лирик субъект қалбидан ўтказиб берилган манзара оний кайфиятнинг образига айланади. Шу маънода, П.л.да табиатни тасвирлаш мақсад эмас, балки бир воситадир. Лирик асарларни таснифлашда П.л. кўп ҳолларда тематик жиҳатдан ажратилади. Бироқ бу хил таснифда муайян шартлилик мавжуд. Зеро, шеърда пейзаж тасвирлангани ҳолда, у тематик жиҳатдан фалсафий (А.Орипов. «Куз хабллари»), ижтимоий-сиёсий

(А.Орипов. «Баҳор кунларида кузнинг ҳавоси»), интим (А.Орипов. «Сен баҳорни соғинмадингми?») ва б. йўналишларда бўлиши мумкин. Кўп ҳолларда шеърда тасвирланган манзара рамзий образга айланади ва мавжудликнинг мангу муаммолари, ижтимоий ҳаёт, инсон феъл-атвори, ҳаётнинг мазмуни ва ш.к.лар моҳиятини образли тарзда очиб беришга қаратилади (Ойбек. «Наъматак»). Шеърни П.л.га киритиш учун унда тўлақонли манзаранинг чизилиши тақозо этилади. Шу маънода, пейзаж деталлари кечинмаларга туртки берувчи, лирик ҳолатни яратувчи ва ш.к. композицион унсур вазифасини ўтаган шеърлар билан П.л.ни фарқлаш жоиз. Мас., А.Ориповнинг «Баҳор» шеърида пейзаж элементлари ҳис-туйғуларга туртки беради, уларнинг ривождаги бурилишларни асослайди, шеърнинг айрим парчалари – тўлақонли табиат манзараси, Шунга қарамай, «Баҳор» П.л. намунаси эмас, пейзаж деталлари кенг истифода этилган медитатив лирика намунасидир.

**ПЕРИПЕТИЯ** (юн. *peripeteia* – қутилмаган бурилиш) – сюжетшунослик категорияларидан бири, воқеа ривожини ва қаҳрамон тақдиридаги қутилмаган кескин бурилиш. Антик драма назариясида П. термини фаол қўлланган бўлиб, бу ҳол антик драма хусусиятлари билан изоҳланади. Жумладан, Арасту «Поэтика»да трагедиядаги П.ни қаҳрамон саъй-ҳаракатининг қўзланганига тамоман зид ҳолатга олиб келиши сифатида тушунтиради. Яъни П.га қутилмаганлик, қандайдир тасодиф туфайли воқеалар ривожини ва қаҳрамон тақдирида қутилмаган эврилишлар юз бериши хос бўлиб, бу қаҳрамон билан тақдири азал конфликтини асосига қўрилган сюжетларда муҳим аҳамиятга эга бўлган. Мас., Софоклнинг «Шоҳ Эдип» трагедиясида аввал чўпон, кейин эса элчи олиб келган хабар сюжет воқеалари ривожда кескин бурилиш ясайди, натижада шодликдан қайғуга ёки, аксинча, қайғудан ҳурсандчиликка бирдан ўтиш кузатилади. П.да қаҳрамон ҳаётидаги эврилишлар «бахтиёрлик – бахтсизлик» ёки «бахтсизлик – бахтиёрлик» схемалари асосида амалга ошади, сюжетнинг бундай тартибда қурилиши асарга қизиқарлилик, ўқишлилик бахш этади. Шунинг учун П. антик адабиётда, ўрта асрлар ва Уйғониш даври адабиёти намуналарида воқеабанд сюжетларнинг муҳим структуравий унсури бўлган. Бадиий тафаккурнинг реализм босқичига яқинлашиши баробарида, қаҳрамон тақдирида тасодиф, умуман, тақдири азал роли сусайиб, ундаги ўзгаришларнинг ижтимоий-психологик омилларини очишга интилиш кучаяди, шу билан боғлиқ ҳолда П.нинг сюжет структурасидаги роли ва

салмоғи ҳам ўзгаради. Албатта, у исиз йўқолгани йўқ, чунки, биринчидан, у сюжетга қизиқарлилик бахш этувчи унсур, иккинчидан, инсон ҳаётида тасодиф сезиларли ўрин тутишини ҳам инкор қилиб бўлмайди. Бироқ реализм адабиётида тасодиф ҳам муайян ҳаётини асосга эга, яъни у ҳақиқатга монанд тасвирланади. Мас., «Ўткан кунлар»да Отабекнинг уста Олим билан учрашиб қолиши – тасодиф, уста Парфи сабаб душманини таниши – тасодиф, ганимлар режасидан воқиф бўлиши – тасодиф ва буларнинг бари ҳаётини заминга эга. Ҳозирги адабиётшуносликда П. термини, асосан, драматик асарларга нисбатан қўлланади, эпик асарлар таҳлилида эса тушунчани *ситуация* термини ўзига қамраб олади.

**ПЕРИФРАЗ(А)** (юн. *peri* – яқин, атрофида, *phrasis* – гапираман) – нарсасиз ҳодиса, жой ёки шахсни ўз номи билан эмас, унга хос тавсифий белгиларни ифодаловчи сўз бирикмаси билан аташ; моҳиятан кўчимага яқин бўлгани учун манбаларда кўчима тури деб кўрсатилади. Мас., «Икки дарё орғилигида Ҳақ адолат топмади қарор» мисраларида географик жойлашишига оид белги орқали Ўзбекистон аталмоқда, бу ўринда *нарсасиз* ва *унинг жойлашиши ўрни* алоқадорлиги асосидаги кўчима кузатилади. Ёки «Шарқнинг юлдузи» (Ўзбекистон), «юртимнинг юраги» (Тошкент), «Шарқ дарвозаси» (Тошкент) каби П.ларда ҳам *ўхшашлик*, *функциядошлик* асосидаги маъно кўчиши мавжуд. Бироқ П.да ҳамма вақт ҳам маъно кўчиши кузатилавермайди. Мас., Тошкент ўрнига «юртимиз пойтахти», А.Қодирий ўрнига «миллий романчилигимиз асосчиси», С.Аҳмад ўрнига «қаҳрамон адибимиз» тарзида атаган П.ларда маъно кўчиши мавжуд эмас, улар объектни унга хос белгиларни ўз маъносида ифодалаш орқали атайди.

**ПЕРСОНАЖ** (лот. *persona* – шахс, театр маскаси) – бадиий адабиётдаги инсон образини, адабий асардаги воқеа иштирокчиси, ҳис-кечинма ва нутқ субъекти. П. термини қаҳрамон, *иштирок этувчи* (драматик асарда), *характер* терминлари билан битта синонимик қаторни ташкил қилиб, маъно жиҳатидан нейтрал бўлгани боис бу қаторда доминанта вазифасини ўтайди. Яъни П. термини уларнинг ўрнида бемалол қўлланиши мумкин, бироқ ҳамма П.ларга нисбатан ҳам қаҳрамон, иштирок этувчи ёки характер терминини ишлатиб бўлмайди. Зеро, улар ўзининг асарда тутган мавқеи, таъшиётган гоявий-бадиий юкнинг салмоғи, воқеалардаги иштироки, умумлаштириш даражаси каби қатор жиҳатлардан фарқланади, даражаланади.

**ПЕРСОНАЖЛИ ЛИРИКА** – субъектив шакллантирилишига кўра фарқланувчи лирика кўринишларидан бири, лирик кечинма ҳам



лирик қаҳрамон, ҳам ўзга бир шахс тилидан ифодаланувчи шеър. Яъни бундай шеърда лирик қаҳрамон билан бир қаторда персонаж (ўзга бир шахс)нинг иштироки ҳам кўзда тутилади. П.л.нинг илдиэлари халқ оғзаки ижоди ва мумтоз адабиётга бориб тақалади, уларда П.л.нинг қуртаклари мавжуд. Жумладан, мумтоз адабиётимиздаги кўплаб шеърларда ёр, ағёр каби персонажлар иштирок этади. Бироқ, мас., ёр образи мавжуд шеърларнинг барини ҳам П.л. намунаси дейиш тўғри эмас, уларнинг аксариятида ёр тавсифланади, холос. П.л.га киритиш учун эса ўзга шахс шеър субъектларидан бирига айланishi, унинг тилидан ифода этилган лирик кечинма (ўй-фикр, ҳис-туйғу) мустақил гоъвий-бадиий қиммат касб этиши, бошқача айтсак, шеър диалогиклик (полифониклик) хусусиятига эга бўлиши тақозо этилади. Мас., Э.Воҳидовнинг «Ҳозирги ёшлар» шеърини П.л.нинг яхши намунаси сифатида кўрсатиш мумкин. Шеърдаги лирик персонаж – чолнинг ўй-ҳислари лирик қаҳрамон ўй-ҳисларига уйқашгина эмас, тўлақонли гоъвий-эстетик қимматга ҳам эга, чунки шеърда эстетик мушоҳада объектига иккита нигоҳ билан қаралади, лирик субъект иккиланган. П.л.га хос бундай белгилорчи хусусият А.Ориповнинг «Самолётда ёзилган шеър», Х.Давроннинг «Дунё гўзал...», «Бобур» каби қатор шеърларида ҳам кузатилади.

**ПЛАГИАТ** (лот. plagio – ўғирламоқ) – адабий ўғирлик, ўзга ижодкорнинг асарини ўзлаштириб, ўзининг номидан (ёки тахаллус остида) эълон қилиш. Шунингдек, бировнинг асаридан айрим парчаларни айнан ўзлаштириб олиш ҳам, мазмунини сақлаган ҳолда шаклини биров (жумла тузилишини, услубини, айрим сўзларни ва ш.к.) ўзгартириб ўзлаштириш ҳам П. саналади. Афсуски, П. бадиий ижод амалиётида ҳам, илмий ижод амалиётида ҳам учраб туради. Бу эса қонун билан ҳимояланган муаллифлик ҳуқуқини топташ бўлиб, юридик жиҳатдан ҳам, маънавий-ахлоқий жиҳатдан ҳам номақбулдир.

**ПЛЕОНАЗМ** (юн. pleonasmos – ортиқчалик) – кўпсўзлилиқ, нафақат муайян мазмунни тўлиқ ифодалаш учун, балки услубий жиҳатдан ҳам ортиқча сўз қўллаш. П. стилистик фигуралар сираига киритилади, лекин меъёрдан бировгина чекиниш уни услубий камчилиққа айлантиради. Фикрни кучайтириб ифодалорчи восита сифатида сўзлашув нутқида (мас., «ўз кўзим билан кўрдим»), фольклор асарларида («Қора сийҳ қошлари... Қаро-қаро сочлари...») кенг қўлланади. П.нинг меъёрни сақлаган ҳолда қўлланиши ифоданинг таъсирли, оҳангдор бўлишига хизмат қилади (Э.Шукур: «Карвон хоки туброб – теварак сароб, Қайққа кетармиз, эй дил, қайққа?»).

Ғ.Ғулумдан олинган қуйидаги шеърини парчада эса меъёр бир қадар бузилган, шу боис унда ортиқчалик сезилади, П. услубий камчилиққа айланади:

### Қўш чиқди

МТС кўрасидан,

«Формол», Челябин,

Харьков тракторлари,

Бир эмас, қатор ряд-ряд,

Якка эмас қўш чиқди, қўш чиқди.

Бу ўринда бутун бошли шеърини банд биргина «тракторлар қатор-қатор бўлиб чиқди» деган фикрни ифода этади. Албатта, шоир қишлоқда техниканинг кўпайганидан бениҳоя қувонганини изҳор этмоқчи, лекин меъёр сақланмагани учун ифода ва мазмун орасида номутаносиблик юзага келади.

**ПОВЕСТЬ** (рус. ҳикоя, ривоят, қисса) – қаранг: қисса

**ПОДТЕКСТ** – қаранг: тағмаъно

**ПОЛИФОНИЯ** (юн. polys – кўп, phone – овоз) – мусиқашунослиқдан ўзлашган термин, М.Бахтиннинг «Достоевский ижоди муаммолари» (1929) асарида илк бор адабиётга татбиқан ишлатилган. Мазкур асарида олим Ф.Достоевский романининг янги типини – «полифоник роман» яратганини асослаб берди. М.Бахтинга кўра, Достоевскийга қадар яратилган романларда маллиф онги устувор бўлиб, қолган ҳамма нарса, жумладан, қаҳрамон шунга тўла бўйсундирилган. Олим буни «романининг монологик типини» деб атайди ва, ундан фарқли равишда, полифоник романининг асосий белгиси сифатида муаллифнинг қаҳрамонларга нисбатан диалогик мавқеда туриши, яъни уларнинг ҳар бири олам ҳақидаги ўз нуқтаи назарига эгаллиги ва бу нуқтаи назарларнинг ҳар бири мустақил ҳолда (муаллиф нуқтаи назари билан параллел тарзда, унга бўйсундирилмаган ҳолда) яшашини кўрсатади. Шундан келиб чиқиб М.Бахтин полифоник роман гоъси индивидуал онгда эмас, онлар диалогиде яшайди, икки ёки ундан ортиқ оннинг диалогиде воқе бўлади деб ҳисоблайди. Яъни полифоник романдаги гоълар интериндивидуал, интерсубъектив характерга эгадир. Монологик типдаги романдан фарқли равишда, гоънинг муаллиф онгига бўйсундирилмаганидан полифоник роман проблематикасининг ўзига хослиги келиб чиқади: унда инсон мавжудлиги билан боғлиқ узил-кесил ҳал қилиб бўлмайд-

диган муаммолар, инсон ҳаётидаги тасвирланаётган вақтда ҳали тугалланмаган (давом этаётган) ҳолат ва манзаралар акс этади. М.Бахтин роман мисолида кўрсатиб берган П.ни фақат роман доираси билан чеклаб бўлмайди, зеро, олим роман мисолида XIX аср охирларидан бадий тафаккурда содир бўлган ўзгаришларни очиб берган эдики, шу маънода П.ни бадий тафаккурнинг янги сифат кўриниши деб тушуниш лозим. Аини чоғда, бадий тафаккурнинг мазкур шакли монологик тафаккурни инкор қилмайди, яъни бу иккиси бадий ижод амалиётида ёнма-ён яшайверади.

Полифонизм XX аср фалсафий-эстетик тафаккурига жиддий таъсир кўрсатиш билан бирга адабиётшуносликда турлича талқинлар, терминни турли маъноларда қўллашларни ҳам келтириб чиқарди. Жумладан, ўзбек адабиётшунослигида баъзан конкрет романни *полифоник* дейиш учун М.Бахтин Достоевский романлари мисолида кўрсатган барча хусусиятларни излаб топишга интилиш кузатилади. Ҳолбуки, М.Бахтин асарлари 80 йиллар муқаддам ёзилган, полифоник роман ҳақидаги таълимоти эса қарийб 130 – 140 йиллар муқаддам яратилган асарлар асосида ишлаб чиқилган. Демак, полифоник роман айнан М.Бахтин айтган барча хусусиятларни ўзида намоён этиши лозим деган даъво ўринсиз, сабаби, орада ўтган вақт ичида полифонизм бадий тафаккурда ўзлашиб бўлган, баски, энди у ўзини ўзгачароқ шаклларда намоён қила олади. Яъни монологик роман (тезис)га зид ўлароқ пайдо бўлган полифоник роман (антитезис) кейинчалик уларнинг ҳар иккисига хос жиҳатларни ўзига сингдириши (синтез), синтезлашиш йўлидан бориши табиий. Шу боис полифоник бадий тафаккур ҳозирда нафақат роман, балки қисса, ҳикоя каби эпик, шунингдек, драматик ва ҳатто айрим лирик асарларда ҳам кузатилиши мумкин.

**ПОРТРЕТ** (фр. *portraire* – тасвирламоқ) – 1) персонажнинг сўз воситасида тасвирланган ташқи кўриниши (қиёфаси, жуссаси, кийими, юз-кўз ифодалари, тана ҳолати ва ҳаракатлари, қилиқлари), ўқувчи тасаввурида жонланадиган тўлақонли инсон образини яратиш ва унинг характерини очиш воситаларидан бири. П. эпик асарнинг композицион унсури бўлмиш *тасвиф*нинг бир кўринишидир. Шартли равишда *статик* ва *динамик* П. турлари фарқланади. Статик дейлишига сабаб шуки, П.нинг бу навида персонажнинг ташқи қиёфаси сюжет воқеаси тўхтатилган ҳолда анча муфассал, деталлаштириб чизилади. Одатда, бундай П.лар персонаж асар воқелигига илк бор кириб келган паллада (мас., «Кеча»даги Раззоқ сўфи П.и) берила-

ди. Динамик П. деганда эса муфассал тасвир эмас, балки воқеа ва диалоглар тасвирида, яъни ҳаракат давомида бериб борилувчи персонаж ташқи кўринишига хос айрим деталлар назарда тутилади. Бундай П. деталлари (юз-кўз ифодалари, тана ҳолати ва ҳаракати, қилиқлари) кўпроқ *ремарка*лардан жой олади ва персонажнинг аини пайтдаги рухий ҳолатини ифодалашга хизмат қилади. Адабий асар муаллифи персонаж П.ини муфассал чизиши (А.Қодирий яратган Кумуш, Раъно П.лари) ёки унинг қиёфасига хос айрим деталларни бериш билан кифояланиши мумкин. Чунки П. – восита, демак, унинг қандай бўлиши муаллиф бадий нияти, унинг ўзига хос тасвир услуби, персонажнинг асарда тутган мавқеи каби қатор омиллар билан боғлиқдир. Мас., Чўлпон севимли қахрамони Зеби П.ини чизмаган, у персонажнинг сийратини чизади, хатти-ҳаракатларини жонли тасвирлайди, гап-сўзларидаги жонли оҳангни ифодалашга интилади, хуллас, ҳар бир ўқувчининг ўз Зебисини тасаввур этиб олишига имкон яратади. Натижада қахрамон қиёфасини чизмасликнинг ўзи ўзига хос бадий услубга айланадики, унинг ёрдамида адиб ўқувчини қахрамонига «яқинлаштиради». Демак, П.нинг қандай ва қай даражада чизилиши белгили эмас, бунда асосий мезон П. (ёки П. деталлари)нинг инсон образини ўқувчи тасаввур эта оладиган даражада тўлақонли яратиш учун етарли бўлишидир; 2) бирон-бир шахс ҳаёти ва фаолиятини атрофлича ёритувчи хужжатли ёки мемуар очерк тилидаги асарлар ҳам аналогия асосида баъзан П. деб аталади (мас., *Ажойиб кишилар ҳаёти* нашр туркумидаги асарлар). Шунингдек, танқидчиликда кенг тарқалган ёзувчи ҳаёти ва ижодини ёритувчи адабий танқидий асарлар жанри *адабий портрет* деб белгиланиб, муомала амалиётида кўпинча П. деб юритилади.

**ПОСТМОДЕРНИЗМ** (фр. *postmodernisme* – модернизмдан кейинги) – ўтган асрнинг иккинчи ярмидан адабиёт ва санъатда, умуман, ижтимоий-гуманитар соҳаларда кузатила бошлаган оқим, ижодий метод. Француз постструктурализмнинг деконструкция (Ж.Деррида), постфрейдизмнинг «шизоанализ» ва «онгсизлик (Ж.Делёз, Ф.Гаттари) таълимотлари ҳамда семиоти-кадаги киноявийлик концепцияси (У.Эко) П.нинг фалсафий асосини ташкил қилади. П.нинг юзага келиш вақти, ўзига хослиги масаласида турлича фикрлар мавжуд. Айрим мутахассислар П. 40-йилларда, Ж.Жойснинг «Финнеган маъракиси» (1939) асари билан бошланган деса, бошқалари ўтган асрнинг ўрталарини, яна бир хиллари 70 – 80-йилларни кўрсатадилар. Ҳолбуки, П. терми-

ни анча аввал пайдо бўлган: илк бор П.Винницнинг «Европа маданияти инқирози» (1917) асарида ишлатилган бўлса, Тойнбининг «Тарихни ўрганиш» (1947) асарида термин культурологик маънода, жаҳон маданиятида европоцентризмнинг барҳам толиши маъносида қўлланади. Адабиётшунослиқда ҳам П. термини XX асрнинг 20-йиллариданоқ ишлатилган бўлиб, у адабий жараёндаги модернизмга акс таъсир ҳодисаларини, 60 – 70-йиллар америка адабий танқидчилигида эса ультрамодернистик ижодий тажрибаларни англатган. Терминнинг кенг оммалашishi Ч.Женкс номи билан боғлиқ; у ўзининг «Постмодернистик меъморлик тили»(1977) асарида П.ни неосавангардга хос экстремизм ва нигилизмдан чекиниш, қисман анъаналарга қайтиш маъносида қўллайди. Аслида, П. терминига турли вақтларда берилган таърифларнинг ҳар бири ўзида ҳодисанинг бир қиррасини мужассам этадики, бу маъно ўзгаришлари маълум даражада П.нинг шаклланиш жараёнини акс эттиради. Аввало шунини қайд этиш лозимки, модернизм билан П. муносабати масаласида ҳам фикрлар турлича: П.га модернизм тараққиётидаги бир босқич сифатида қараш ҳам, уни модернизмга акс таъсир сифатида майдонга чиққан янги ҳодиса деб билиш ҳам, эскирган бадиий шакллардан янгиларига ўтиш даври ҳодисаси деб ҳисоблаш ҳам бор. Шунга қарамай, ўтган асрнинг сўнгги чорагидан П.нинг модернизмдан жиддий фарқланувчи ҳодиса эканлиги тобора ошқор кўзга ташланиб, табиийки, у ҳақдаги шунга мос қарашлар ҳам устуворлик касб этиб борди. Ҳозирги адабиётшунослиқда бу икки ҳодисанинг жиддий фарқланиши эътироф этиладики, фарқлардан айримларини кўрсатиб ўтиш мақсадга мувофиқ:

Модернизм	Постмодернизм
Янги адабиёт ва санъатни яратиш даъвоси, анъаналарни инкор қилиш	Анъаналарни ўзига сингдириш ва уларга киноявий муносабатда бўлиш
Оламни хаос деб билиш, ундан қочиш	Хаос деб билинган оламни қабул қилиш, уни ўйин тарихасида ўлаштириш
Гўзалликни реалликдан ташқаридан излаш	Гўзалликни реалликдан излаш
Антропоцентрик гуманизм: инсонга муҳаббат	Универсал гуманизм, унинг объекти жами тирик мавжудот, табиат, кинот – бутун ОЛАМ

Маданиятда европоцентризм, Европа халқлари маданиятини умумбашарий маданият асоси деб билиш	Шарқ, Латин Америкаси, Африка, Океания халқлари маданиятига кучли қизиқиш, барча маданиятларни қиммат жиҳатидан тенг билиш
Элитар санъат	Элитар ва оммавий санъат орасида чегаранинг йўқолиши, асарда элита ва оммага мўлжалланган қатламлар мавжуд бўлиши – икки ёқлама кодлаштириш
Семантика, мазмун муҳим	Риторика, мазмунни етказиш шакли муҳим
Жанрлар, улар орасида аниқ чегаралар мавжуд	Жанрлар мугацияси
Ижодий жараённинг натижаси – тугал асар муҳим	Ижодий жараённинг ўзи муҳим
Ижодни индивидуал ҳодиса деб билиш, ижодкор фаоллигини ва унинг мазмунни шакллантирувчи марказ эканлини эътироф этиш	Ижодда индивид ролини инкор қилиш, «муаллиф ўлими» концепцияси
ва бошқалар	

П. назариётчиларига кўра, «П. асри» ҳисобланмиш 70 – 80-йиллардан олам манзараси тамом ўзгарган, аввалгилардан фарқли шарт-шароитлар юзага келган. Жумладан, электрон ахборот воситалари, хусусан, телевидение ва интернет тармогининг ривожланиши маданиятларнинг ажиб қоришувига олиб келдики, турмуш тарзи ва маданиятдаги эклектиклик санъат ва адабиётда ҳам шунга мос эклектикликни келтириб чиқарди. Хусусан, адабиёт ва санъатда европоцентризм, этноцентризмнинг емирилиши, турли санъат «тил»ларининг қоришиб кетиши айтилиши шу ҳол натижаси деб қаралади. Мазкур ҳолнинг яна бир омили сифатида оммавий дисдислашиш кўрсатилади. Яъни бадиий дид ўтмаслашган, бадиий асар қиммати унинг қанча фойда келтиргани билан ўлчанадиган шароит адабиёт ва санъатдаги турли, ҳатто бир-бирига зид тамо-йилу услубларнинг қоришувига изн беради. Бу эса анъанавий бадиият мезонларини емиради, ҳақиқий санъат билан оммавий санъат орасидаги фарқни йўқотиб, санъатнинг дизайнлашувига олиб келадики, бундай санъатнинг ўзи бадиий дидни ўтмаслаштиради. П. назариётчилари нафақат реализм, балки, умуман, анъанавий санъат оламни тушуниш ва тушунтиришга интилган, шу



конструкция») ва шу асно матнга ижод онлари контекстида муаллиф ихтиёридан ташқари, анланмаган тарзда ёки ўзи яширишни хоҳлаганига зид ўлароқ кириб қолган маъноларни очишга интилади. Яъни П. матнда контекст қолдирган «из»ларни қидирадики, бу излар ғайришуурий (онгсизлик) тарзда акс этгани учун, уларни интуитив тарздагина фарқлаш мумкин. Яна бир жиҳати, П.га кўра, конкрет матнда фақат ижод онлари контекстининггина эмас, балки унга қадар мавжуд бўлган бошқа матнлар «из»и бор, аниқроғи, матн ўша изларнинг йиғиндиси («текст – кўштирноқсиз цитата». Р.Барт), матнлараро ўхшашликлар (ғоя, мотив, образ) эса интертекстуал ўйин, турли аллюзиялар, анланган ёки анланмаган цитациялар натижасидир. Шунга кўра, ижодкор воқеапикжа эмас, балки ўзигача мавжуд бўлган матнларга тақлид қилади. Бу қараш эса ижодда индивидуаллик ролини пасайтириш (автор ўлими), асардаги образларнинг воқелик билан алоқасини инкор этишга (яъни белги воқеликка ишора қилмайди, у ўзинигина ифодалайди) олиб келади. Модомики, матн «из»лар йиғиндиси экан, талқин ҳам матндан ташқарида қоладиган нарсаларни тушунишдир, демак, тушуниш натижа эмас, балки жараён. Айни чоғда, П. учун муҳими тушуниш эмас, балки матн конструкцияси, унинг қандай ясалгани, матн яратиш технологиясини ўрганиш бўлиб қолади.

П.нинг асосчилари, айни чоғда, постмодернизм классиклари ҳам саналади. Худди постмодернизм каби П. ҳам ҳозирда фаолиятда бўлган, демак, ўзгариб, шаклланиб, такомиллашиб бораётган ғоят серқирра ҳодисадир. Шу маънода, юқоридагиларни унинг айрим жиҳатларигина деб тушуниш, у ҳақда тўла маълумот олиш учун кўплаб махсус адабиётларни ўрганиш лозим.

**ПОЭЗИЯ** (юн. ποίεο, ποίησις – ижод қилмоқ сўзидан) – 1) ҳозирда кенг қўлланувчи маънода бадий нутқни ташкил қилишнинг икки асосий типидан бири, ритмик жиҳатдан ўлчов асосида тартибга солинган нутқ, назм. Шу билан боғлиқ ҳолда, умуман, шеърий йўлда ёзилган асарларни – шеъриятни билдиради: ўзбек поэзияси, 20-йиллар поэзияси ва ҳ.; 2) термин қарийб XVIII асрга қадар санъат тури, бадийят ҳодисаси сифатидаги адабиёт, бадий адабиёт маъносида ишлатилган ва прозага қарши қўйилган. Бунда П. турга мансублигидан қатъи назар, барча адабий-бадий (яъни бадий образ воситасида иш қўрилган) асарлар жамини, проза эса адабий асарлар (кундаликлар, ҳоғиралар, саёҳатномалар, тарихий ҳикоялар, фалсафий рисоалар ва ҳ.) жамини англлатган.

**ПОЭМА** (юн. ποίεο, ποίημα – ижод қилмоқ, ижод қилинган) – қаранг: **достон**

**ПОЭТИКА** (юн. poetike techne – ижод санъати) – кенг маънода адабиёт назарияси, тор ва ҳозирда кўпроқ қўлланилаётган маънода адабиёт назариясининг таркибий қисми, адабий асар ҳақидаги таълимот. П.ни, умуман, адабиёт, сўз санъати ҳақидаги фан – адабиёт назарияси маъносида тушуниш антиқ даврлардан анъанага айланган. П.ни тор маънода – адабиёт назариясининг таркибий қисми сифатида тушуниш XX асрнинг илк чорагидан бошлаб қарор топган бўлиб, бунда рус адабиётшунослигидаги формал мактаб вакилларининг хизмати катта. Улар адабий асарнинг шаклий томонларига, унинг қурилиши масалаларига асосий эътиборни қаратдилар. Гарчи бу мактабнинг илк босқичида шаклни устун қўйиш, бадий асар «приёмлар йиғиндиси» (В.Шкловский) қабилдаги даъволар бўлса ҳам, кейинча бадий шакл ва мазмунни уйғун бирликда олиб ўрганиш томон бурилиш кузатилади. Формал мактаб вакиллари ва унга яқин илмий мавқеда турган олимлар тил ва нутқнинг услубий кўринишлари (В.В.Виноградов), бадий асар тили (Г.О.Винокур), шеър композицияси, ритм ва метрика (В.М.Жирмунский), шеърий синтаксис ва поэтик интонация (Б.М.Эйхенбаум), сюжет қурилиши (В.Шкловский), сеҳрли эртаклар структураси (В.Я.Пропя) каби қатор масалаларни атрофлича чуқур тадқиқ этдилар. Бу илмий изланишлар адабий асар моҳиятига кириб бориш, унга бадий жозиба бахш этган унсурларни очиб беришга қаратилган бўлиб, улар адабий асар қурилиши билан боғлиқ ўрганилиши лозим бўлган масалалар кўлами беқиёс кенглиги ва муҳимлигини кўрсатди. Б.В.Томашевский ўтган асрнинг 20-йилларида: «П.нинг (бошқача айтсак – адабиёт ёки сўз санъати назариясининг) вазифаси адабий асар қурилиши усулларини ўрганишдан иборатдир. П.нинг объекти – бадий адабиёт», – деб ёзаркан, П.ни адабиёт назариясига синоним тарзда ишпатса-да, унинг вазифаси «адабий асар қурилиши усулларини ўрганиш» деб таъкидлайди. Шунинг ўзидаёқ П.ни адабиёт назариясининг махсус соҳаси сифатида тушунишга мойиллик кузатилади. Худди шу йилларда В.М.Жирмунский П.ни «адабиётни санъат сифатида ўрганувчи фан» дея таърифлайди. Унинг фикрича, эстетик объект ва эстетик кечинма хусусиятларини белгилаш алоҳида фан бўлмиш П. доирасидан ташқарида, П.нинг вазифаси эстетик объект – адабий асар структурасини ўрганиш-

дир. Формал мактабга қарши турган М.М.Бахтин социологик П. ҳақида сўз юритади ва унинг вазифаси «Адабий асар нима? Унинг структураси қандай? Бу структуранинг элементлари қайсилар, уларнинг функциялари нималардан иборат? Жанр, услуб, сюжет, мавзу, мотив, қахрамон, метр, ритм, мелодика ва ҳ. нима?» каби масалаларни ўрганиш» деб таъкидлайди. М.М.Бахтин назарда тутган социологик П.нинг предмети формал мактаб тушунчасидаги П. предметига, асосан, мос келади. Баҳслашувчи томонлар қарашларидаги бу муштараклик ўтган асрнинг 20-йилларидаёқ П. адабиётшуносликнинг ўз предмети, вазифаларига эга бўлган махсус тармоғи сифатида кенг эътироф этила бошланганини кўрсатади. XX аср ўрталарига келиб П.ни адабиёт назариясининг таркибий қисми сифатида тушуниш тўла қарор топди дейиш мумкин. Айти шундай талқин, одатда, кўпчилик томонидан эътироф этилган қарашларни акс эттирадиган энциклопедик лугатлар, ўқув адабиётларидан жой олгани ҳам мазкур фикрни тасдиқлайди. Жумладан, В.М.Жирмунский ўқув қўлланмасида: «Сўз санъатининг умумфалсафий, эстетик асосларини адабиёт назарияси ўрганади. П. эса адабиёт назариясининг асосий хулосаларига таянган ҳолда поэзия фойдаланадиган ифода воситалари системасини ўрганади», – деб ёзди, адабиёт назарияси ва П.нинг вазифалар доирасини аниқ чегаралаб, уларнинг бир-бирига боғлиқлигини таъкидлади. Ўтган аср ўрталарида чоп этилган 6 жилдлик «Қисқача адабиёт энциклопедияси»да эса П.га «адабий асарларнинг қурилиши ва уларда фойдаланиладиган эстетик воситалар системаси ҳақидаги фан» дея таъриф берилган.

Тадқиқ объектини қайси жиҳатдан ўрганиши, масалалари доираси, ўз олдига қўйган мақсади ва шуларга мос илмий ёндашувидан келиб чиққан ҳолда П. доирасида умумий (ёки назарий) П., хусусий П. ва тарихий П. соҳалари фарқланади. Умумий П. кўпинча назарий П., баъзан эса «макропоэтика» деб ҳам юритилади. Умумий П. асарнинг ички қурилиши (фоника, ритмика, строфика, стилистика, образлар тизими, сюжет-композиция сатҳлари) билан боғлиқ умумий қонуниятларни очиш, бадиий воситалар ва усуллар тизимини ишлаб чиқишни мақсад қилади. Назарий П.дан фарқли ўлароқ, хусусий П. худди шу ишни конкрет асар доирасида амалга оширади, ўша асарнинг бадиий ўзига хослигини очиб бериш, тавсифлаш мақсадини кўзлайди. Тарихий П. эса алоҳида бадиий усул ва воситаларнинг тарихий тадрижини қиёсий ва типологик аспектларда ўр

ғанади. Таъкидлаш жоизки, адабиётшуносликда тез-тез учрайдиган «романтизм П.си», «Чехов П.си», «структурал П.» каби бирикмалар маъноси ҳам бевосита атаманинг асосий маъносидан ўсиб чиқади. Мас., «романтизм П.си» дейилганда романтизм йўналишига мансуб асарларнинг қурилишига хос умумий хусусиятлар, бадиий усул ва воситалар тизими назарда тутилади.

**ПОЭТИК ТИЛ** – қаранг: **бадиий тил**

**ПРОЗА** (лот. *prosa* – тўғри, одатий) – 1) ҳозирда кенг қўлланувчи маънода бадиий нутқнинг икки асосий типидан бири, ритмик жиҳатдан ўлчовли тартибга солинмаган нутқ, наср. Шу асосда умуман насрда ёзилган асарларни – эпик турга мансуб асарларни билдиради: *ҳозирги ўзбек прозаси, замонавий проза* ва ҳ.; 2) XVIII асрга қадар *поэзия* билан қарши қўйилган ҳолда санъатга мансуб бўлмаган, яъни бадиий образ воситасида фикрламайдиган адабий асарларни билдирган.

**ПРОЗАИЗМ** – бадиий матн таркибида бегона, ўринсиз кўринадиган сўз, сўз шакллари, синтактик бирликлар П.лар деб юритилади. Адабиётда аънаналар, хусусан, бадиий тил аънавийлиги кучли бўлган даврларда бадиий матнга одатий мулоқотга хос нутқ бирликларининг киритилишига жиддий камчилик деб қаралган. Бундай муносабат наср бадиий нутқнинг назм билан тенг ҳуқуқли шакли сифатида кечроқ (Фарбда XVIII асрдан кейин) тан олингани, *поэзия* билан *проза* бир-бирига кескин қарши қўйилгани билан изоҳланади. Ўзбек шеърлятига бадиий тил аънаналарига *хилоф сўз ва синтактик* конструкциялар – П.ларнинг кўллаб кириб келиши XX аср бошларида тўғри келади ва бу ҳол адабиётнинг тематик доираси кенгайгани, унинг ҳаётга яқинлашуви билан изоҳланади. Мас.:

*Нонвойда йўқдур инсоф, андин ўтадур аллоф,  
Кўр, чакса ун хамири қирқ икки нон бўлубдур.*

*Алҳол муҳтасиб йўқ, бир-икки қилса ул дўқ  
Ичкуга халқ роғиб, доим **фиён** бўлубдур.*

*Кўб қозихоналарда ушбу замоналарда  
Ишдин **закунчилар** кўб, эмди ямон бўлубдур.*

Ёки:

*Бир кунда ўн **десят** ер ҳайдаб қилурга тайёр,  
Гар ҳайдар эрса бир бор, обод этиб **трактур**.*

Яна:

*Бир неча йиллар ичинда шахримиз жаннат бўлар,  
Буя тариқа бошчилар қилса ташаббуслар агар.*

Ибрат газалларидан келтирилган бу парчаларда фақат ўз даври учун янги сўзларнинг киритилиши эмас, ифоданинг ўзи ҳам П.лар саналиши мумкинки, улар оддий гаплар вазнга солиб айтилгандек таэссурот қолдиради. Адабиётда реалистик тенденцияларнинг кучайиб бориши баробарида, П.ларга муносабат ҳам юмшадики, бу сўз эстетик қимматининг қайта кўриб чиқилиши билан боғлиқ. Айни чоғда, бу бадиий тил анъаналарини тўла инкор қилиш дегани эмас, яъни бадиий тилни, айниқса, шеърий нутқни сўзлашув тилига яқинлаштиришда муайян меъёрни сақлаш зарур.

**ПРОЛОГ** (юн. pro – олдидаги, logos – сўз) – адабий асарнинг кириш қисми, муқаддима. П.лар мазмун мундарижасига кўра турлича бўлади: асарнинг ёзилиш сабабини изоҳлаш, асосий мазмунини мухтасар баён этиш, асар вақтигача юз берган воқеаларнинг қисқа баёни ва ҳ. Шунга кўра, П.лар турли бадиий-эстетик мақсадларга хизмат қилади: ўқувчини асар воқелигига олиб кириш, тасвирланажак воқеаларнинг юз бериш омиллари ҳақида умумий тасаввур бериш, муайян эмоционал-ҳиссий ҳолат ҳосил қилиш ва ҳ. Ҳар қандай муқаддима эмас, фақат бадиий муқаддимагина П. саналиши мумкин. Яъни П. саналиши учун муқаддима бадиий матннинг узвий қисми бўлиб қолиши зарур, асосий матндан яққол ажралиб (ўзаро асосий матн – ёндош матн муносабатидаги) турган сўзбошиларни П. санаш тўғри эмас. Мас., «Ўткан кунлар»нинг «Ёзувчидан» деб номланган кириш қисми асосий матннинг узвий қисми бўлмай, балки ёндош матндир. Чўлпоннинг «Кеча» романи бошланишидаги мўъжазгина баҳор тасвири эса матннинг узвий бўлаги. Шу маънода, «Ўткан кунлар»да муаллиф ижодий ниятлари изҳор этилган алоҳида сўзбоши, «Кеча»да эса ўқувчини тасвирланажак воқеаларни қабул қилишга эмоционал жиҳатдан тайёрлашга қаратилган лирик характердаги П. мавжуддир.

**ПРОТОТИП** (юн. prototypon – образ асоси) – адабий асардаги образнинг яратилишига асос бўлган реал шахс. П. бадиий образ учун материал бўлиб, унинг ёзувчи бадиий ниятига мувофиқ қайта ишланиши асосида бадиий персонаж – бадиий образ яратилади. Яъни бадиий персонаж ҳеч вақт П.нинг айнан ўзи эмас, балки унинг ёзувчи ижодий тафаккури маҳсули ўлароқ дунёга келган

«бадиий эгизаги»дир: улар орасида ўхшашлик бор, айнан мослик эмас. Шунинг учун ҳужжатли асарлардаги персонажлардан фарқли равишда, бадиий асарлардаги П. асосида яратилган персонажлар кўпроқ ўзга ном билан ҳаракатлантирилади. Мас., «Ой ва сариқ чақа» (С.Моэм) романидаги Чарлз Стрикленд образининг П.и машҳур рассом Поль Гоген бўлса, «Қалдирғоч» (Т.Малик) қиссасидаги Асадулла Мираълам образининг П.и улуг маърифатпарвар Абдулла Авлонийдир. Замонавий мавзуларда ёзилган асарларда ҳаракатланувчи персонажлар ўқувчига у ёки бу реал шахсни эслатади, ўша реал шахс қанчалик машҳур бўлса, персонажда уни таниб олувчилар доираси шунчалик кенг бўлади. Мас., ўтган асрнинг 80-йиллари охирилари – 90-йиллари бошларида М.М.Дўстнинг «Лолазор» романидаги Ошно, Назар Яхшибоев, Катта пахтакор, Қурбоной ёки С.Аҳмаднинг «Жимжитлик» романидаги Мирвали образларининг П.ларини аксарият ўқувчилар таниб олганлар. Умуман, кенг маънода қаралса образнинг материали воқелик экан, ҳар қандай образнинг ҳам ҳаётда маълум асоси, яъни ёзувчи ҳаётида дуч келган, кузатган, мулоқотда бўлган шахслар борлиги, ўша шахсларнинг маълум жиҳатлари образда акс этиши табиийдир. Бироқ П. ҳақида, одатда, у билан образ орасидаги ўхшашликлар яққол сезилса ёки П. ёзувчи ижодий лабораториясини ўрганишда аҳамиятли бўлсагина тапирилади.

**ПСИХОЛОГИК МАКТАБ** – XIX асрнинг охири чорагида Европа ва рус адабиётшунослигида майдонга келган илмий йўналиш. П.м. маданий-тарихий мактаб ва биографик метод қарашларини қайта идрок этиб, уларни ривожлантириш асосида шаклланган. Худди маданий-тарихий мактаб каби П.м. ижодкор шахснинг шаклланишида оила, ижтимоий муҳит, давр сингари омилларнинг муҳимлигини эътироф этади, биографик метод каби бадиий асарда ижодкор шахси акс этади деб билади. П.м. мазкур қарашларни бирлаштиради, яъни бу омилларнинг бари ижодкор руҳияти орқали намоён бўлади деб ҳисоблайди ва шундан келиб чиқиб ижодкор руҳий биографияси, бадиий ижоднинг руҳий томонларини ўрганишни диққат марказига қўяди. П.м.га кўра, бадиий образ инсон кўнглида дунё билан алоқа таъсирида пайдо бўлган кечинмаларнинг ташқарига чиқиши, моддийлашуви натижасидир. Ижодкор, аввало, ўзи учун ёзади: у асарда ўзини қийнаётган дардлар, ўй-ҳисларни ифодалайди ва шу орқали улардан фориғ бўлади, асар ижодкор қалби моделидан ўзга нарса эмас. Шунга асосан, П.м. конкрет асарга хос жами хусусиятлар ил-

дизини ижодкор шахсияти, унинг руҳий ўзига хослигидан кидиради, асарлар бир-биридан фарқли бўлишининг сабабини эса турли кечинмалар ва турли ижодкор психологик типлари мавжудлиги билан изоҳлайди. Яъни асарнинг қандай бўлиши кўл жиҳатдан ижодкор психологик типи билан боғлиқ. Мас., Д.Н.Овсянко-Куликовскийга кўра, объектив ижодкор табиатан ўзига ёт бўлган қахрамонларни, субъектив ижодкор эса ўзига руҳан яқин бўлган қахрамонларни тасвирлайди: *эгоцентрик бўлмаган ижодкор* (мас., Пушкин, Чехов) ҳаётни кузатиш орқали ўз хулосаларини хотиржам ифода этишга, *эгоцентрик ижодкор* (мас., Гоголь, Достоевский) эса воқелик устида турли тажрибалар ўтказишга мойил бўлади ва ш.к. Албатта, ижодкор типларини бу тарзда фарқлашни ҳам, асарга хос айрим хусусиятларни тушунтиришда уларнинг аҳамиятини ҳам инкор этиб бўлмайди, бироқ П.м.нинг қарашларида буларни мутлақлаштириш кузатилади ва оқибатда адабиёт (*бадий тафаккур*) тараққиёти қонуниятлари, унинг ижтимоий ҳаёт билан боғлиқлиги деярли четга сурилиб қолади. Мутлақлаштириш бадий асар мазмуни масаласида ҳам яққол кўзга ташланади, бунда ҳам субъектив ибтидо устуворлик касб этади. П.м. бадий мазмунни оний ҳодиса ҳисоблайди, яъни бадий асар мазмуни ўқувчи онгида шаклланади, ҳар бир ўқувчи ўзининг бетакрор ҳаётий тажрибасидан келиб чиққан ҳолда мазмунни шакллантиради. Бундай қараш адабиётшунослик масалаларини фалсафий асосда, тил ва лисоний мулоқот қонуниятларидан келиб чиққан ҳолда тушунтирган А.Потебня фикрларига асосланади. А.Потебняга кўра, лисоний мулоқотда фикр эмас, балки фикрнинг моделигина («ташқи шакл») етказилади: тингловчи уни «ички шакл» (ташқи шакл онгда уйғотган тасаввур) билан боғлаган ҳолда фикрни (мазмунни) англайди. Яъни сўзловчи фикрни бевосита етказаятгани йўқ, уни моделга таянган ҳолда тингловчининг ўзи қайта ҳосил қилмоқда. Олимнинг фикрича, адабий асарнинг ўқилишида ҳам худди шу қонуният амал қилади. Табиийки, бундай ёндашув диалогиклик қонуниятига зид бўлиб, адабиёт моҳиятини торайтиришга олиб келади. Жумладан, А.Потебня санъаткорнинг вазифаси асарни яратаётган вақти унга муайян мазмун минимумини юклаш эмас, балки образни ўқувчи онгида турли мазмунларни шакллантиришга асос бўла оладиган даражада серқирра қилиб яратишдан иборат деб ҳисоблайди.

П.м.нинг алоҳида илмий мактаб, йўналиш сифатидаги фаолияти ХХ аср бошларида барҳам топиб, унинг ўрнини *интуитивизм* ва

*психовнализ* эгаллади. Шунга қарамай, П.м. адабиётшунослик ривожида сезиларли из қолдирди, унга хос таҳлил тамойиллари қатор илмий муаммоларни янгича ёритишга имконият яратди ва бу билан сўз санъатини илмий билиш доирасини кенгайтди. Ҳозирги адабиётшуносликдаги кўплаб йўналишлар П.м. ишлаб чиққан таҳлил усулларини ижодий ўзлаштириб, улардан ўз адабий-эстетик системалари доирасида самарали фойдаланмоқда.

**ПЪЕСА** (фр. *pièce* – парча, қисм) – драматик турга мансуб ҳар қандай асар. Термин ХХ асрдан бошлаб шу маънода қўлланади, драматик асар, жанридан қатъи назар – у трагедия, комедия ё драма бўладими, П. деб ҳам юритилаверади.



# Р

**РАВИЙ** (ар. *روي* – юкни туяга боғлайдиган арқон) – қофияланиб келаётган сўз ўзаги ёки негизи охирида айнан такрорланиб келувчи чўзиқ унли ёки ундош. Мумтоз поэтикада қофияланаётган сўзларда Р.нинг айнан такрорланиши шарт ҳисобланган. Навоий «Мажолис ун-нафоис»да Атойининг машҳур:

*Ул санамким сув яқосинда паритек ўлтурур,  
Ғояти нозуклигини сув била ютса бўлур, –*

байти ҳақида «қофиясинда айбғинаси бор» деганида айнан Р.нинг йўқлигини назарда тутган (**бўлур** – **ўлтурур**). Яъни биринчи мисрадаги «ўлтурур» сўзининг ўзаги «р» билан, «бўлур» сўзининг ўзаги эса «л» билан тугамоқда.

**РАДД** (ар. *رد* – қайтармоқ) – мумтоз адабиётдаги шеърий санъат, бир сўзни байтнинг турли ўринларида такрорлаш. Сўз байтнинг қайси ўринларида такрорланаётганига қараб Р.нинг бир неча турлари фарқланади ва уларнинг ҳар бири такрорланиш ўрнини ифода этувчи алоҳида номга эга. Мас., *раддул ʼажз ʼала садр* (қ.) каби. Бундан ташқари, шеърда *қофия*, *матлаъ* каби унсурларнинг турли кўринишларда такрорланиб келиши ҳам мана шу истилоҳ билан юритилади: *радд ул-қофия* (қ.), *радд ул-матлаъ* (қ.) каби.

**РАДД УЛ-МАТЛАЪ** (ар. *ردالمطلع* – матлаънинг қайтарилиши, такрорланиши) – мумтоз адабиётдаги шеърий санъат. Номланиши «матлаъни такрорлаш» маъносини берса ҳам, амалда ғазал матлаъси ёки қасиданинг биринчи байти таркибидаги мисралардан бирининг сўнги байтда (баъзан ораликдаги байтлардан бирида) такрорланиши ҳам Р.м. деб юритилаверади. Мисранинг такрорланиши шунчаки такрор бўлмаёй, балки маълум бир поэтик мақсадни кўзлайди. Ғазал матлаъси ёки қасиданинг биринчи байтида илгари сурилган фикр-ғояни шоир кейинги байтларда ривожлантириб боради,

шеър ниҳоясида эса байт (мисра)ни такрорлаш орқали ўша фикр-ғояни таъкидлайди. Натижада матлаъ (ёки унинг бир мисраси)да ифодаланган фикр-ғоя, ҳис-кечинма тўлишади, ёрқинроқ ифодасини топади. Зеро, такрорланаётган матлаъ (мисра) гўё ўзидан аввал келган байтлардаги мазмунни сингдириб олади ва умумлаштириб ифода этади. Ўзбек мумтоз шеъриятида Навоийдан кенг қўллана бошлаган ушбу санъатнинг гўзал намуналарини деярли барча шоирлар ижодида учратиш мумкин. Хусусан, Э.Воҳидов шеъриятида Р.м. санъатидан жуда самарали фойдаланилган. Мас., шоирнинг:

*Тушда кўрдим дилбаримни, эй сабо, уйғотмағил,  
Олма бир дам васл шавқин, кўй, мени кўзғотмағил, –*

матлаъси билан бошланувчи ғазали мақтаъсида матлаънинг илк мисраси такрорланади:

*Ғар йўқотсам бу кеча мен қайга борғум ахтариб,  
Тушда кўрдим дилбаримни, эй сабо, уйғотмағил.*

**РАДД УЛ-ҚОФИЯ** (ар. *ردالقافية* – қофиянинг қайтиши, такрор келиши) – мумтоз адабиётдаги шеърий санъат, ғазал ёки қасиданинг биринчи байти мисраларидаги қофия ҳосил қилаётган сўзлардан бири ёки ҳар иккисининг кейинги байтларда, баъзан эса мақтаъда айнан такрорланиши. Мас., Лутфийнинг:

*Қон бўлди кўнгул фироқингиздин,  
Жон куйди ҳам иштиёқингиздин, –*

матлаъси билан бошланувчи ғазали биринчи мисрасидаги қофия мақтаъда яна такрорланиб келган:

*Бу Лутфийи ҳастани сўрунғим,  
Бечора ўлар фироқингиздин.*

**РАДД УЛ-ʼАЖЗ МИН АС-САДР** (ар. *ردالعجز من الصدر* – садрдан ажзга қайтиш) – мумтоз адабиётдаги шеърий санъат, бир сўзнинг байтнинг турли ўринлари (*садр*, *ҳашв*, *аруз*, *ибтидо*, *зарб*)да такрорланиши. Бунда такрорланаётган сўзлар бир хил маъноли бўли-

ши, ўзаро *тажнис* (омонимик муносабат) ёки *иштиқоқ* (ўзақдош) ҳосил қилиши, шунингдек, шибҳи иштиқоқ, яъни асли ўзақдош бўл-маса-да, ёзилиши (*омограф*) ёки талаффузи (*омофон*)га кўра яқин бўлиши мумкин. Шулардан келиб чиққан ҳолда Ра.м.с. тарзида умумий ном билан юритилувчи мазкур санъатнинг турли кўринишлари фарқланади. Мас., куйидаги байтларда бир хил маъноли сўзлар байтнинг турли ўринларида такрорланади:

*Ишқ ўти тушаган кўнгулга ўзга ўт бегонадир,  
Мен бўлибман, воҳ ажаб, дардманди шеър, бемори ишқ.*

*Ой жамолининг акси кўзгу бағрига тушди,  
Рашк ўтида бағримни ўртар-у ёқар кўзгу.*

Навоийнинг:

*Гар Навоий хўблар сайдидур, аммо қилмамиш  
Сендин ўзга кимса ул ошуфтаи расвони сайд, –*

байтида такрорланаётган сўзлар ўзаро омонимик муносабатда (биринчи мисрадаги *сайд* сўзи «ўлжа» маъносида, иккинчи мисрада «ов жараёни» маъносида келган) бўлиб, тажнис ҳосил қилса, Атойининг:

*Номуроде бўл, Атойи, дилбарунг йўлиндаким,  
Дилбар ўқтур, ошиқи содиққа дилбардин мурод, –*

байтида эса ўзақдош сўзлар такрорланиб иштиқоқ ҳосил қилади.

**РАДДУЛ ЎАЖЗ ЎАЛА САДР** (ар. *ردالعجز على الاصلر* – ажздан садрга бориш) – мумтоз адабиётдаги шеърий санъат, *байт* охири (*ажз* ёки *аруз*)да келган сўзни кейинги *байт* боши (*садр*)да такрорлаш. Ушбу санъат илми бадиъга оид манбаларда *мутобик*, *муқаддар* истилоҳлари билан ҳам юритилади. Мас.:

*Кеча-кундуз қилма гулбонгингни бас, эй андалиб,  
Ким санга беш кун бу гулшан ичра меҳмон бўлди гул.  
Гул чоғи ёри сафар айлаб, Навоий жониға  
Ҳар бири бир тоза қонлиг доғи ҳижрон бўлди гул.*

**РАДИФ** (ар. *رديف* – отнинг орқасига эргашиб, мингашиб келувчи, изма-из борувчи) – мумтоз лирикадаги шеър унсурларидан бири, шеър давомида барча байт (ёки мисра)лар охирида қофиядан сўнг айнан такрорланиб келувчи сўз, сўз бирикмаси. Яъни моҳиятан Р. ҳам сўз такрорининг хусусий кўриниши бўлиб, фақат унинг такрорланиш ўрни қатъий белгиланган. Иккинчи томондан, шеър унсури сифатида Р. ритми таъкидлаб кучайтириш функциясини ўтайдики, бу сўз такрорининг ҳамма кўринишларига ҳам хос эмас. Ниҳоят, Р. сўз ёки сўз бирикмасининг шунчаки такрори эмас, у байт (ёки мисра) билан ажралмас мазмуний алоқада бўлиб, фикр-туйғуларни таъкидлаш, кучайтириш каби вазифаларни ҳам бажаради. Мас., Огаҳийнинг:

*Дўстлар, бу кун ажаб бир сарв қомат кўрмишам,  
Сурати боштин обқ фарқи латофат кўрмишам, –*

матлаъсида «қомат» ва «латофат» жуфтлиги қофияни ҳосил қилса, улардан кейин такрорланиб келаётган «кўрмишам» сўзи Р. бўлиб, у *газал*даги кейинги барча байтларнинг иккинчи мисрасида «қомат-латофат» жуфтлиги билан қофиядош сўзлардан кейин такрорланади. Мащрабнинг куйидаги байтида Р. бир неча сўздан иборат:

*Муродингга етай десанг, қаландар бўл, қаландар бўл,  
Ситам аҳлин ютай десанг, қаландар бўл, қаландар бўл.*

Айрим ҳолларда Р. бундан ҳам кўпроқ сўзлардан таркибланиб, мисранинг асосий қисмини эгаллаши ҳам мумкин. Мас., Навоийнинг «*Жондин сени кўл севармен, эй умри азиз*», Бобурнинг «*Туз оҳ, Заҳириддини Муҳаммад Бобур*» мисраси билан бошланувчи рубоийларида ўзаро қофияланаётган мисралар фақат қофия ва Р.дангина иборатдир. Мумтоз шеърятимизда Р. *газал*ларда, айниқса, кенг қўланади. Шу боис *газал*ни ё *матлаъ*, ё Р. билан аташ кўпроқ расм бўлган: «Навоийнинг «*Топмадим*» Р.ли *газали*», «Бобурнинг «*Қолдим*» Р.ли *газали*» ва ш.к.

**РАЖАЗ** (ар. *رجز* – туя ҳолдан тойганда пайдо бўладиган қалтироқ касали) – *аруз* баҳрларидан бири, мустафъилун аслининг (– – v –) такроридан ҳосил бўлади. Мазкур баҳр изтиробли оҳангга эгаллиги учун шундай номланган. Р. ўзбек шеърятини анча фаол қўлланадиган баҳрлардан ҳисобланади. Алишер Навоийнинг «*Мезон*

ул-авзон»ида Р.нинг ўн уч вазни, Бобурнинг «Мухтасар» асарида эса олтмиш уч вазни мисоллар билан санаб ўтилган. Ўзбек шеъриятида Р. баҳрининг саккиз рукнли, тўрт рукнли вазнларидан кенг фойдаланилган. Р. баҳрида ёзилган шеърларнинг ўзбек шеъриятидаги дастлабки намуналари «Қисаси Рабғузий»да учрайди. Навоийнинг жами йигирма тўрт шеъри (жумладан, йигирма икки ғазал, бир қитъа, бир муаммо) Р. баҳрида ёзилган. Бундан ташқари, Атойи, Саккокий, Лутфий, Гадоий, Огаҳий каби мумтоз шоирлар билан бирга замонавий шоирлар ижодида ҳам Р. баҳридан кенг фойдаланилади. Мас., Огаҳийнинг «Устина» радифли машҳур ғазали *ражази мусаммани солим* вазнида бўлиб, унинг чизмаси: -- v - / - - v - / - - v - / - - v - кўринишидadir:

*Қилгил тамошо қомати зебоси бирла оразин,  
Гар кўрмасанг гул бўлгонин пайванди шамшод устина.*

**РАМАЛ** (ар. رمل – туянинг лўкиллаши, куй номи) – аруз баҳрларидан бири, *фоилотун асли* (- v - -) такроридан ҳосил бўлади. Баҳрнинг оҳанги туянинг лўкиллашига ўхшагани учун шундай номланган. *Фоилотун* рукнида бир *ватад* икки *сабаб* орасига бўйра тўқилганга ўхшаш ҳолатда жойлашгани учун *рамала*, яъни тўқиш маъносини билдирувчи сўздан олинган деган фикрлар ҳам бор. Р. баҳри ўзбек мумтоз шеъриятида энг кўп ишлатилгани учун у *туркий баҳр* деб ҳам юритилади. А.Навоийнинг «Мезон ул-авзон»ида Р.нинг ўн уч вазни, Бобурнинг «Мухтасар» асарида эса эллик тўққиз вазни мисоллар билан санаб ўтилган. Ҳусайний (Ҳусайн Бойқаро) қаламига мансуб ғазалларнинг бари шу баҳрда ёзилган бўлиб, бу Р.нинг жуда фаол қўлланганига ёрқин далилдир. Шеъриятимизда Р.нинг 8 ва 6 рукнли жами йигирма тўрт вазнидан кенг фойдаланиб келинган. Р. баҳрида ёзилган шеърларнинг дастлабки намуналари «Қисаси Рабғузий»да учрайди. Навоийнинг «Хазойин ул-маоний» девонидаги 1827 та (ярмидан кўпи) шеър Р. баҳрида ёзилган. Мас.:

*Дилбаро, сендин бу ғамким, менда бордур, кимда бор?  
Фурқатингдин бу аламким, менда бордур, кимда бор? –*

матлаъли ғазали *рамали мусаммани маҳзуф* вазнида. Манбаларда *фоилотун* рукнининг байт таркибида ҳеч қандай зиҳофга учрамаган

ҳолда такрорланишидан ҳосил бўладиган вазн (*рамали мусаммани солим*: -v - - / - v - - / - v - - / - v - -) шеъриятимизда Навоийгача ҳам, ундан кейин ҳам мутлақо қўлланмагани, фақат Навоийнинг «Хазойин ул-маоний» куллиётида биргина ғазал мана шу вазнда яратилгани айтилади. Унинг матлаъси:

*Эй жамолу раҳматингдин гар залилу гар муаззаз,  
Сафҳаи кавнайн ўлуб отинг тарозидин мутарраз.*

«Мезон ул-авзон»да эса ушбу вазнга мисол сифатида куйидаги байт келтирилган:

*Келки, ишқингдин кўнгулда йўқтурур сабру қарорим,  
Бошима өткур қадамким, ҳаддин ошти интизорим.*

**РАМЗ** (ар. رمز – имо, ишора, имлаш) – символ; кўчим турларидан бири, фақат шартли равишда ва шу матн доирасида кўчма маъно касб этувчи сўз ёки сўз бирикмаси; образлилик тури. Р. моҳиятан *аллегория*га яқин, ундан фарқи шуки, Р. контекст доирасида ҳам ўз маъносида, ҳам кўчма маънода қўлланади. Р.нинг маъноси контекст доирасида ва шартдан хабардорлик бўлганда реаллашади. Мас., Чўлпон шеъриятидаги «юлдуз», «булут», «бахор», «қиш» образлари Р.нинг ёрқин мисоли бўла олади. Жумладан, машҳур «Қаландар ишқи» шеърини ишқий мавзудаги шеър сифатида тушунавериш мумкин. Бироқ ундаги Р.лар қатида бошқа маъно ҳам мустақил ҳолда мавжуд бўлиб, уни ўз вақтида шоирга руҳан яқин кишилар яхши тушунишган. Сабаби, улар рамзларнинг маъноси англашилладиган контекстан – шоирнинг ҳаёт йўли, орзу-интилишлари, шеър ёзилган пайтдаги руҳий ҳолати ва ҳ. омиллардан хабардор бўлганлар. Демак, Р. маъноси ҳозирда ҳам Чўлпоннинг ҳаёт йўли ва ижодий мероси контекстидагина англаниши мумкин. Р.нинг табиатини Р.Парфи шеърдан олинган куйидаги парча мисолида кўриш мумкин:

*Яна келдим маҳзун гўшага,  
Бунда бир най ётибди синиб.  
Қўй, сизинма ортиқ ўшанга,  
Қўй, сизинма унга, севгилим...*

Парчадаги «синган най» рамздир. Мазкур рамзни ўз маъносида ҳам (яъни гарчи нотабий кўринса-да, ўша гўшада чинданам синган най ётибди маъносида), лирик қахрамоннинг йўқотилган ҳислари, армонга айланган орзулари маъносида ҳам тушуниш мумкин. Кейинги ҳолда «синган най»ни Р. сифатида қабул қилган бўламыз. Муҳим томони шуки, «синган най» билан «йўқотилган ҳислар, армонга айланган орзулар» орасида метафорадаги каби ўхшашлик ёки метонимиядаги каби алоқадорлик асосидаги муносабат йўқ. Яъни «синган най» фақат шу контекст доирасидагина шартли равишда ўша мазмунни ифодалайди. Худди шу гап Чўлпоннинг «Қаландар ишқи» шеъридаги «ёр», «муҳаббат», «денгиз», «юлдуз», «қуёш» Р.ларига ҳам тааллуқли. Зеро, улар ҳам ўзлари ифодалаётган рамзий маъно билан ўхшашлик ёки алоқадорлик муносабатида эмас, фақат шартли равишдагина (шартдан, контекстан бохабар кишиларга) рамзий маънони ифодалайдилар. Шартдан, контекстан бохабар ўқувчи учун эса шеърнинг фақат бевосита мазмуни, юзадаги мазмунигина мавжуддир.

**РЕАЛИЗМ** (лот. *realis* – мавжуд, ҳақиқий) – адабиётшуносликда Р. термини тор ва кенг маъноларда қўлланади. Кенг маънода Р. терминининг маъноси бадиий асар (унда тасвирланган бадиий воқелик) билан реал воқелик муносабатидан келиб чиқади. Яъни бу ҳолда Р. умумэстетик тушунча бўлиб, ҳаётни ҳақиқатга (реалликка) мувофиқ тасвирлашни, ҳаёт ҳақиқатини билдиради. Ҳар қандай бадиий асарда воқелик у ёки бу тарзда акс этиши, воқеликни ҳаётга монанд тарзда акс эттириш эса қадимдан мавжудлиги эътиборга олинса, бу маънодаги Р.нинг илдиэлари жуда қадим замонларга тақалиши табиийдир. Шу боис адабиётшуносликда *антик Р.* (ёки *мифологик Р.*), *ўғониш даври Р.и*, *маърифатчилик Р.и* каби ата-малар ишлатилади, табиийки, бу маънодаги Р. *классицизм*, *сентиментализм* каби йўналишларга ҳам хосдир. Демак, бу маънода Р. термини ҳаётни бадиий акс эттириш принциплари, бадиий тафаккур типини англатади.

Тор маънода Р. ҳаётни ҳақиқатда мавжуд нарса-ҳодисалар моҳиятига мувофиқ тарзда, воқеликда мавжуд фактларини *типиклаштириш* (қ.) асосида яратилган бадиий образлар орқали акс эттиришга асосланувчи ижодий метод ва онгли равишда шу методга таянган *адабий йўналишни* билдиради. Ушбу метод (йўналиш)нинг майдонга чиқиши XIX асрнинг ўрталарига тўғри келади. Р. методиди адабиётнинг *билиш функцияси* устувор аҳамият

қасб этади, реалист ижодкорлар адабиётни олам ва одамни (жумладан, ўзини) идрок этишнинг муҳим ва самарали воситаси деб биладилар. Шунга кўра, Р. ҳаётни бутун мураккаблиги билан кенг кўламда акс эттиришга интилади. Билиш мақсадининг устуворлиги боис Р. инсонни ижтимоий муҳит билан узвий алоқада тасвирлайди, ижтимоий-тарихий шароитнинг инсон тақдири ва феъл-атворида таъсирини теран бадиий тадқиқ этади. Зеро, реалист санъаткор инсон тақдири, унинг амаллари, орзу-интилишлари ижтимоий асосга эга деб билади, буларнинг барини ижтимоий-психологик жиҳатдан асослашга интилади. Айни чоғда, етук Р. адабиётида инсон ижтимоий шароитга боғлабгина қўйилмайди, инсон ўз ирода кучи билан ундан юқори кўтарила оладиган, унга қарши тура билладиган куч сифатида ҳам кўрсатилади. Худди шу жиҳати билан Р. *Натурализмдан* фарқланади, ҳаётни унга қараганда теранроқ ва ҳаққонийроқ акс эттира олади. Инсонни мураккаб ижтимоий муносабатлар тизимида тасвирларкан, Р. ҳаётни кенг кўламда тасвирлашга эришади, жамиятнинг жорий ҳолати, ундаги тараққиёт ёки таназул тенденцияларини бадиий идрок этади, у ҳақда ўзининг бадиий ҳукмини ифодалаб, адабиётнинг *концептуал* функциясини амалга оширади. Айни чоғда, Р.ни ҳаётдан оддийгина нусха кўчириш (қ. *натурализм*) деб тушунмаслик керак. Зеро, ижодий метод сифатида Р. ҳам воқеликни ижодий акс эттиради, ижодий қайта яратади. Р. адабиётидаги ижодий қайта яратиш *типиклаштириш*, яъни воқеликнинг муайян давр ва муҳит учун энг характерли жиҳатларини умумлаштириш орқали амалга ошади. Бироқ бу ҳол ижодийликка зид деб тушунилмаслиги керак, зеро, Р.даги типиклаштириш бадиий тўқимани асло инкор қилмайди, фақат унинг ҳам воқелик моҳиятига мувофиқ бўлишини тақозо этади. Шу билан бирга, Р. тараққиёти давомида, хусусан, XX аср Р.ида бадиий шартлилик (рамзий образлар, ривоятлар, фантастика элементлари ва ш.к.)нинг турли кўринишлари ҳам кенг қўлланила бошлади. Мазкур ҳолга реалистик тасвир принципларидан чекиниш деб қарамаслик керак. Аксинча, бу Р. адабиётининг ҳаётни теранроқ идрок этиш, ўз бадиий имкониятларини бойитиш йўлидаги ҳаракати, унинг адабий жараёндаги бадиий-эстетик ҳодисалар (турли адабий йўналишлар, оқимлар; янги услубий оқимлар, тасвир принциплари ва б.) билан ижодий рақобат-мулоқоти натижасидир.

XIX аср ўрталаридан майдонга чиққан Р. метод (йўналиш)и шўро адабиётшунослигида танқидий Р. деб, шўро адабиётининг методи

эса социалистик Р. деб юритилган. Ҳар икки терминнинг илмий муомалага кириши ҳам М.Горький номи билан боғлиқдир. Улардан биринчисини *танқидий* Р. деб атаркан, М.Горький бу давр реалистик адабиёти намуналарининг аксарияти мавжуд буржуа тузумидаги ижтимоий муносабатларни теран таҳлил этиши ва унинг инсонийликка зид моҳиятини очиб бериши ҳамда ғоявий-баддий инкор қилишидан келиб чиқади. Иккинчиси, яъни *социалистик* Р. ҳам худди шу каби ғоявий-мафкуравий асосда таърифланган, у воқеликни марксча-ленинча дунёқараш асосида баҳолаши билангина фарқланади. Ҳолбуки, биринчидан, ижодий метод сифатида Р. моҳиятан битта ҳодиса бўлиб, унинг доирасида турлича дунёқарашлар ифода этилиши мумкин; иккинчидан, у ўз тараққиёти давомида сифат жиҳатидан ўзгариб-такомиллашиб, ўзининг тасвир ва ифода имкониятларини муттасил бойитиб борган.

**РЕАЛИЯ** (лот. *realis* – ашёвий) – муайян халқнинг турмуш тарзи, маданияти, тарихи билан боғлиқ бетакрор, ўзга халқларда учрамайдиган нарса-ҳодиса, тушунча; шундай нарса ва тушунчаларни англатувчи сўз. Адабий асарда муайян давр, жой колоритини беришда, миллий турмуш тарзи, миллий руҳни ифодалашда Р.лар муҳим аҳамиятга эга бўлиб, уларни таржимада адекват ифодалаш катта қийинчилик туғдиради. Шунинг учун таржима амалиётида Р.лар кўпинча айнан берилиб, изоҳ билан таъминланади. Муайян халқ турмушида ишлатилувчи нарса-буюмлар (мас., каноэ, тамогавк, мокасин ва ш.к. – ҳиндуларда; исирик, обрез, тахмон ва ш.к. – ўзбекларда), ҳудудий-маъмурий бўлиниш номлари (аббатлик, губерния; улус, туман, музофот), диний унвон ва даражалар (аббат, поп, епископ; шайхулислом, муфтий, қози), мансаб номлари (граф, барон, дьяк; бек, амир, тунқотар, ҳудайчи, хоким), шунингдек, географик ёки маданий-этнографик тушунчаларни англатувчи сўзлар ҳам Р.лар сирасига киритилади.

**РЕМАРКА** (фр. *remarque* – изоҳ) – драматик асарларда муаллиф томонидан сахна воқесининг бошланиши олдидан берилувчи ёки унинг кечиши давомида қавс ичида бериб борилувчи изоҳлар. Р. парда ёки кўриниш олдидан берилган ҳолларда воқеа кечаётган жой, вақт, иштирок этувчилар ва ш.к.лар ҳақидаги зарур маълумотлардан иборат бўлади. Воқеа давомида берилаётган Р.лар эса нутқ жараёнига (овоз тони, оҳанги, темпи, паузалар; персонажнинг тана ҳолати, юз-кўз ифодаси, имо-ишоралари, қилиқлари) ёки сахнадаги ҳаракатга (персонажларнинг сахна бўйлаб ҳаракатлари, янги персо-

нажнинг сахнага чиқиб келиши ё кетиши ва б.) оид тафсилотларни ўз ичига олади. Р.лар драматик асарни сахналаштиришда ва, айниқса, уни ўқиш жараёнида воқеаларни тасаввурда жонлантиришда жуда муҳим. Чунки Р.лар муаллифнинг ўзи асар воқеаларини қандай «кўргани», персонажларнинг гап-сўзларини қандай «эшитгани»ни ифода этади.

Анъанага кўра, Р. термини драматик асарларга нисбатан қўлланиб келинган бўлса, эпик асарларда диалогнинг (сахनावийлик хусусиятига эгалликнинг) кенг ўрин олиб бориши баробарида, термин эпик асарларга нисбатан ҳам қўлланила бошлади. Ҳозирда эпик асарлардаги диалоглар давомида муаллиф томонидан бериб борилувчи (овоз тони, оҳанг, темп, паузалар; мимика, имо-ишоралар, персонажнинг ҳаракати ва ш.к.ларга оид) изоҳлар ҳам кўпинча Р. деб юритилмоқда.

**РЕМИНИСЦЕНЦИЯ** (лот. *reminiscentia* – хотирлаш, эслаш) – 1) адабий ҳодисаларнинг диалогик муносабатда бўлиши натижаси ўлароқ юзага келувчи ҳодиса, адабий асардаги илгари мавжуд бўлган асарларни ёдга солувчи нуқталар. Бундай Р.лар анланган ёки анланмаган (асарда ижодкор хотирасида муҳрланиб қолган ўзга асардаги нуқталарнинг ғайриихтиёрий тарзда акс этиши) равишда воқе бўлади; улар очиқ-ошкор эмас, шу боис илғаб олиниши ҳам бирмунча қийин ва шу жиҳати билан *ўзлаштириш* ва *тақлиддан* фарқланади. Мас., Ш.Раҳмоннинг шеърда Торобий типидан айтилган қуйидаги сўзлар Чўлпон шеърларини ёдга солади:

*Жоним-жигаримсан  
сён-да одамсан,  
ловқал кўзингда бир ёш кўрсайдим,  
ловқал қовушиб қолган қўлингда  
ёвларга аталган бир тош кўрсайдим.*

Ҳозирги китобхон учун парчадаги Р.лар аниқ кўринар, лекин шеър ёзилган 1983 йили кўпчилик учун ўхшашликни илғаб олиш қийин бўлгани ҳам аниқ. Ёки шоирнинг «Мен севган дарёлар шундоқ қолурму, мени ўйлатган йўл қолурми шундоқ? Мен суянган тоғлар шундоқ қолурми, шундоқ қолармикан юракларда доғ?» сатрлари жадид шеъриятидаги оҳанглари ёдга солади. Шунга ўхшаб Ҳ.Олимжоннинг «Муқанна»сида Муқанна тилидан айтилган қуйидаги

гаплар ҳам Чўлпоннинг «Бузилган ўлка»га шеъридаги оҳангларни эслатади:

*Нима учун юрт чиқмайди оловдан?  
Нима учун эл қутулмас таловдан?  
Нима учун элни босган ҳашарот?  
Дин, хирож деб ўз-ўзига қўйди от?  
Нега қилди элни бунча гадоё, хор?  
Нега бўлди ҳамма сенга отбоқар?  
Қиз онадан, хотин эрдан ажралди,  
Косиб уйдан, деҳқон ердан ажралди?  
Нима учун?*

Кейинги мисоллардаги Р.лар ритмик хотира туфайли вужудга келган бўлиб, Р.нинг бу тури деярли барча шоирлар ижодида кўплаб кузатилади; 2) адабий асардаги ўзидан илгариги адабий ҳодисаларни эслатувчи, онгли равишда ёки англамаган тарзда юзага келган нуқталарнинг бари, адабиётдаги адабиёт образи. Мазкур маънода терминнинг қамров кўлами кенгайди ва у, табиийки, биринчи маънони ҳам ўз ичига олади. Бунда асардаги (қўштирноқда ёки қўштирноқсиз берилган) цитаталар, шеърий мисралар (жумладан, *назира, тахмис*), образлар (мас., *талмех* санъати), гоёвий-тематик ва эмоционал мотивлар (мас., А.С.Пушкиннинг «Куз» – А.Ориповнинг «Куз ҳаёллари» шеърлари) билан бирга бошқа ижодкорларнинг асарларини эслатиш (мас., А.Қодирий романларида Фузулий ва Саъдий; Чўлпон романида М.Арцибашев, Л.Андреев асарлари тилга олинади), улар ҳақида билдирилган мулоҳазалар ҳам Р.лар ҳисобланади. Шунингдек, бу маънода адабий асарда бошқа санъат турларига мансуб асарларнинг эслатилиши, муҳокама этилиши ёки шарҳланиши (мас., А.Ориповнинг «Муножотни тинглаб», У.Азимнинг «Театр» туркуми, Х.Давроннинг «Гулливер лилипутлар дёрида» шеърлари) ҳам Р.ларга киритилади.

**РЕТАРДАЦИЯ** (лот. retardation – секинлаштириш, тутиб туриш) – эпик асарларга хос сюжет-композицион усул, воқеалар ҳақида ҳикоя қилишни, сюжет ривожини секинлатиш. Р. асарга сюжетдан ташқари элементлар (лирик чекинишлар, муфассал портрет, пейзаж тасвири, персонаж характеристикасини бериш, персонажнинг ўтмиши ҳақида ҳикоя қилиш, киритма ҳикоялар, ривоят ва ш.к.лар)ни кири-

тиш орқали амалга ошади. Мас., «Меҳробдан чаён»нинг бошланишида шу усулда ҳар бир персонаж ҳақида тафсилотлар берилади, натижада Солиҳ маҳдум асарнинг бошида буюрган манти 17-бобга бориб ейилади, яъни асосий воқеанинг ҳикоя қилиниши секинлаштирилади.

**РЕПЛИКА** (фр. replique – жавоб, эътироз) – диалогнинг нутқ субъекти алмашиши билан чегараланувчи қисми, битта нутқ субъекти томонидан айтилган нутқ бўлаги. Ҳажм жиҳатидан Р. чегараланган эмас; у биргина товуш, сўз, сўз бирикмаси, битта гап ёки бир-бирига боғлиқ бир неча гапдан иборат бўлиши мумкин. Шунингдек, диалог иштирокчиларидан бирининг бошқасига жавобан жим қолиши (бу ёзувда кўп нуқта билан ифодаланади) ҳам Р.дир, чунки у шаклан нолга тенг бўлса-да, ҳамisha мазмунга эга бўлади.

**РЕФРЕН** (фр. refrain – нақорат) – 1) нақорат, кўшиқнинг ҳар бир бандидан сўнг айнан қайтариладиган банд, ярим банд ёки мисра. Р. ёзма адабиётга фольклордан ўтган бўлиб, у халқ кўшиқларида кенг қўлланган; 2) шеърдаги ҳар бир банд охирида такрорланиб келувчи мисра. Бу маънода Р. мумтоз шеъриятимиздаги *таржеъ санъати*га тўғри келади. Ғарб шеъриятида Р. асосига қурилган *рондо, рондель, триолет, баллада* каби, ўзбек мумтоз шеъриятида эса *таржеъбанд* каби қатъий шеър шакллари мавжуд.

**РИВОЯ** (ар. روياء – ҳикоя қилиш) – воқеликни объектив-воқеабанд тарзда акс эттирувчи эпик асарларнинг ўзаги, эпик асар қурилишининг асосий шакли, ундаги муаллиф ёки персонаж-ҳикоячи нутқи, яъни асар матнининг персонажлар нутқидан ташқари қисми. Р.нинг асоси замон ва маконда кечувчи воқеалар ҳақидаги ҳикоя бўлиб, ўша воқеалар кечаётган замон ва макон, уларнинг иштирокчилари бўлган персонажларга оид турли тафсилотлар (пейзаж, нарсасура, портрет, муаллиф характеристикаси), муаллифнинг фалсафий, маънавий-ахлоқий, ижтимоий-сиёсий ва ш.к. мазмундаги мушоҳадалари, муаллиф тилидан берилган персонаж ўй-фикрлари (ўзиники бўлмаган муаллиф нутқи) ҳам бевосита унинг таркибий қисмидир. Эпик асардаги Р. муаллиф, ровий ёки персонаж ҳикоячи тилидан, яъни турли мавқе, «нуқтаи назар»дан туриб олиб борилиши мумкин. Шунга кўра, Р. композицияси «нуқтаи назар»ларнинг муайян гоёвий-бадий мақсадлар билан ўзаро алмашиб туриши, параллел берилиши, бирлаштирилиши, зидланиши кабилар билан белгиланади. Эпик асарда Р.нинг объектив ва субъектив кўринишлари кузатилади. Биринчи ҳолда Р. «халис кузатувчи» мавқеидан туриб

олиб борилади, яъни ровий воқеаларга аралашмайди, тасвир предметига муносабат очик ифодаланмайди; иккинчисиде эса, аксинча, воқелик «ичдан ўтказиб» бериледи, тасвир предметига муносабат ҳам ошкор ифодаланеди (қиёсланг: А.Қаҳҳор. «Ўғри» – Ғ.Ғулом, «Менинг ўғригина болам»). Яна бир фарқ Р. субъектининг тасвирланаётган воқеадан хабардорлик даражасиде ҳам кузатилади. Аънавий эпосде Р. субъекти воқеанинг барча икир-чикирларидан воқиф шахс сифатиде намоён бўлади (мас., эртақларде), у асарнинг ҳар нуқтасиде ҳозиреу нозир, воқелик, асосан, унинг нигоҳи орқали бериледи. Замонавий эпосде кенг оммалашган объектив Р. гўё айни дамде ўз ҳоличе кечаётган воқеа-ҳодисаларни тасвирлаётганлик иллюзиясини ҳосил қиле олади (бу жиҳат кичик эпик шаклларде тўла, йирик эпик шаклларде эса кўпроқ эпизодик тарзде намоён бўлади), бу эса ўқувчиде Р. субъекти ҳам воқеаларни шу вақтде кузатаётгандек (яъни воқеаларнинг юз бериш ва ҳикоя қилиниш вақти орасиде тафовут йўқдек) таассурот қолдиради. Шунингдек, ҳозирги эпосде етакчилик қилеётган бу нав Р. асар давомиде нуқтаи назарнинг ўзгариши, воқеликнинг гоҳ муаллиф, гоҳ ҳикоячи-персонаж, гоҳ эса бошқа бир персонаж нигоҳи билан кўрилиши ва баҳоланишига имкон беради. Бу эса тасвирнинг динамиклигини таъминлайди, унга жонлилик ва ҳаёттилик бахш этиб, эстетик таъсир кучининг ошишига хизмат қиледи. Бундан ташқари, тасвир предметига баҳо бераётган субъектларнинг кўпайиши Р.нинг полифониклик касб этиши, яъни муаллиф, ҳикоячи-персонаж ва қаҳрамон гоъвий мавқеларининг турличе бўлишига имкон яратади (қ. полифония). Замонавий эпик асарларде Р.нинг турли кўринишлари мавжуд эканлиги, улар конкрет асарде синтезлашган ҳолде воқе бўлаётганини таъкидлаш лозим.

**РИДФ** (ар. ريف – изма-из келтириш) – қаранг: **муқайяд кофия**

**РИТМ** (юн. rhythmos – тенг ўлчовлилик) – кенг маъноде Р. муайян бўлақларнинг маълум вақт оралиғиде тартибли такрорланиб туришидир. Бу маънодеги Р. борлиқдеги жуда кўп нарса-ҳодисаларде бор. Мас., тарновдан томчилаб турган томчилар чиқараётган товушде, ариқ сувининг маромли шилдираб оқишиде, йил фаслларининг, кун билан туннинг алмашинувида; инсоннинг юрак уриши, нафас олиши, маълум бир ҳаракатни бажариши – буларнинг барида Р. кузатилади. Р. табиий равишде инсон нутқига ҳам хос. Ҳар бир индивид нутқининг ўзиге хос Р.и бўлиб, бу ритм унинг физиологик имкониятлари (мас., ҳар бир одамнинг нафас олиши ўзиге хос,

нутқ ритми эса кўп жиҳатдан шунга боғлиқ) билан белгиланади. Кундалик мулоқот нутқидеги ритмга турли омиллар (мас., касаллик, руҳий ҳолат, бирор нарсадан таъсирланиш, ҳаракат мароми ва б.) таъсир қилиши ҳамде уни ўзгартириши мумкин. Оғзаки нутқде хос Р. табиий равишде ёзма нутқде ҳам кўчади, зеро, ёзув оғзаки нутқининг ҳарфлар воситасиде моддийлашуви: одам ёзганиде «мия»де гапиради, ўқиганда «тасаввурде» эшитади. Демак, нутқ ҳодисаси бўлмиш ҳар қандай адабий асарде Р. бўлиши қонуний ва табиий ҳол экан. Ритмиклик адабий асарнинг турли сатҳлари (нутқ, ривоя, композиция)де намоён бўлса-де, нутқий курилишиде, айниқса, аниқ кўзге ташланади, шунинг учун Р. ҳақиде кўпроқ бадиий нутқ билан боғлиқ ҳолде гапирилади. Бадиий нутқининг насрий ва шеърий шакллари Р. жиҳатидан фарқланади. Насрий нутқ Р.и, умуман, инсон нутқининг ритмиклигидан келиб чиқеде, ундеги ўзгаришу товланишлар эса матннинг конкрет бўлағидеги тасвир предметининг мазмун-моҳияти, унга муаллиф муносабати билан боғлиқ ҳолде юзага келеди. Насрдегидан фарқли ўлароқ, шеърий нутқ Р.и махсус ҳосил қилинган, муайян ўлчов асосиде тартибга солинган. Шеърий Р.нинг ўлчов бирликлари ўзаро қисм-бутун алоқасидеги нутқий бўлақлар (бўгин, туроқ, мисра, банд) бўлиб, улар *ритмик бўлақлар* ёки *ритмик бирликлар* деб юритилади. Р.нинг ҳис этилиши учун шеърни ўқиганда (талаффузде) ритмик бирликлар бир-биридан ажралиб турганини ҳис қилиш керак, бунде *ритмик воситалар* муҳим аҳамиятга эга. Ритмик воситалар шеър Р.ининг таъкидланиши, кучайтирилишига хизмат қиледе, уларнинг асосийлари сифатиде *ритмик пауза*, *қофия* ва *қофияланиш системасини* кўрсатиш мумкин. Ҳар бир ритмик бўлақ бошқаларидан ритмик пауза билан ажратилади, шу ажратилиш ҳисобига улар талаффузде ўлчов бирлиги сифатиде намоён бўлади. Дейлик, бўгин бир товуш зарби билан айтилади ва жуда ҳам қисқа, сезилар-сезилмас пауза (аслиде, бу пауза эмас, икки товуш зарбининг бир-биридан фарқланиб туриши ҳисобига «пауза»дек таассурот қолдиради, холос) билан ажралади. Туроқлардан кейинги пауза бироз сезиларлироқ бўлса, мисралар ниҳоясидеги пауза яққол сезилади, банд якунидеги катта пауза унга ритмик-интонацион тугаллик бахш этади. Ритмик пауза билан мантиқий пауза доим ҳам бир-бирига мос келавермаслиги мумкин, яъни шеърий нутқде вергул кўйилмаган ўринларде ҳам тўхталиб ўтиш ва, аксинча, вергулли ўринларде тўхталишни сезилмаслик даражасига келтириш зарурати юзага келиши одатий

ҳолдир. Мисра якунида келувчи қофиялар ритмик жиҳатдан мисрани таъкидлаб кўрсатишга, шеърнинг оҳангдорлиги, мусиқийлиги, таъсирдорлигини оширишга хизмат қилади. Шеърни ўқиш давомида қофия мисранинг тугаганидан дарак беради, пауза бажараётган ажратиш функциясини таъкидлайди. Шунга ўхшаб қофияланиш тартиби банднинг шаклланиб бўлгани, тугаганини таъкидлайди. Мас., тўрт мисрали а-б-а-б тарзида қофияланган шеър ўқилаётган бўлса, ўқувчи кейинги бандларда ҳам шу хил тартибни кутади, тартиб ниҳояланганида, банддаги тугалланганликни ҳис қилади. Яъни қофияланиш тартиби, бир тарафдан, шеър ритмининг ҳис этилишига, иккинчи тарафдан, мазмун ва ритмнинг уйғунлашувига, уларнинг ўқувчи тасаввурида яхлит бирлик ҳосил қилишига ёрдам беради. Хуллас, Р. шеърини нутқнинг эмоционаллиги, мусиқийлиги асоси, пойдеворидир.

**РИТОРИКА** (юн. *rhetorikē* – нотиклик) – 1) нотиклик санъати ҳақидаги фан. Антик Юнонистонда мил. ав. V асрларда пайдо бўлган. Мил. ав. II – I асрларга келиб тизим ҳолини олган, антик Римда ҳам изчил ривожланган. Рнинг назарий асослари файласуфлар, амалиётчи нотиклар томонидан ишлаб чиқилган бўлиб, бунда Арасту, Цицерон, Квинтилианларнинг хизматлари, айниқса, катта. Антик Юнонистон ва Рим иқтимоий тузумида нотикликнинг катта ўрин тутгани Рнинг гуркираб ривожланишига асос бўлган. Шунга кўра, Рнинг предмети нутқ бўлиб, у билан боғлиқ барча масалаларни (материал танлаш, жойлаштириш, жумла тузиш, фикрни далиллаш ва инкор қилиш, сўз танлаш, услуб, услубий фигуралардан фойдаланиш, нутқни ўқиш ва ҳ.) ўрганган. Шу билан бирга, қадимдаёқ Рнинг ўрганиш объектига проза ҳам кирган бўлиб, бу жиҳатдан у поэтикага қарши қўйилган. Яъни поэтика бадиий тўқима билан иш кўрувчи поэзия бадиий адабиётни, Р эса реал материал билан иш кўрувчи проза нутқлар, фалсафий ва тарихий асарларни ўрганган; 2) ҳозирда Р адабиётшуносликнинг бадиий матнни, унинг ташкилланиш қонуниятларини ўрганувчи соҳаси сифатида ҳам таърифланади ва шу маънони таъкидлаш учун баъзан *неориторика* термини билан ҳам юритилади. Бу қарашга кўра, Р бадиий матннинг ташкилланишини, поэтика эса бадиий воқеликнинг ташкилланишини ўрганади, яъни улар бадиий асарнинг турли сатҳларида иш юритади.

**РИТОРИК МУРОЖААТ** – бадиий ундалма. Жонли сўзлашувда ундалма нутқ қаратилган шахснинг муайян жавоб ҳаракатини (диққатини жалб этиш, гапирувчига қараш, яқинлашиш ва б.) талаб

қилади. Яъни худди риторик савол жавоб талаб қилмагани каби, Р.м. ҳам мос реакцияни талаб қилмайди, нутқни безаш, муайян кайфият ё ҳиссий муносабатни ифодалаш воситаси бўлибгина хизмат қилади. Р.м. шеърини нутқда, айниқса, кенг қўлланилиб, кўпроқ нарсаси-ҳодисаси, жой кабиларга қаратилади: «Қайда ўсдинг, қайда яшнадинг, Япроқ, япроқ, айтиб бер менга...» (Р.Парфи), «Юртим, сенга шеър битдим бугун...» (А.Орипов), «Гул бўйларини боғдан келтирган, эй шабода...» (Э.Воҳидов), «Ай, қалдирғоч, ўқи «Вал-лайли...» (З.Мирзо). Шунингдек, ўзи ҳозир бўлмаган одамга шу ерда каби муурожаат қилиш ҳам Р.м.нинг бир кўринишидир: «Эшитдим, онажон, хафа эмишсан, Кечир, ойлаб сенга ёзолмадим хат...» (Р.Парфи). Булардан Р.м. *апострофа* (қ.) термини билан синонимик муносабатда экани аён бўлади.

**РИТОРИК СЎРОҚ** – жавоб берилишини талаб қилмайдиган савол, фикрнинг сўроқ шаклида тасдиқланиши. Худди риторик муурожаат каби Р.с. ҳам нутқ беазаги, эмоционал муносабатни кучайтириш, фикрни таъкидлаб ифодалаш сингари мақсадларга хизмат қилади. Мас., А.Ориповнинг «Ахир, у эмасми дўстни ғаним-у, Ғанимни дўст қилиб қўйгувчи одам?» тарзидаги Р.с.и «ҳа, айнан ўша – учинчи одэм» деган фикрни таъкидлаб ифодалайди. Р.Парфининг «Япроқ, япроқ, сўзлаб берсанг-чи, Ўз севгиндан бўзлаб берсанг-чи, Нечун тушдинг, нечун оёққа?...» тарзидаги Р.с. эса лирик қаҳрамонни ўйлатаётган муаммо, қийнаётган дардга ишора қилади. Ёки «Сени, оҳанг, эй ғамли оҳанг, Танимасдим, билмасдим олдин. Томиримда хун талашур жанг, Шунча ғамни қаердан олдинг?» мисраларини олсак, Р.с. дастлабки уч мисрадаги ўй-ҳисларни хулосалаб, бир зарб каби кучайтириб ифодалаётгани кўринади. Келтирилган мисоллардан Р.с. лирик асарда турлича бадиий-эстетик мақсадларда ишлатилиши, унинг полифункционал табиати маълум бўлади. Мумтоз шеърятимиздаги тажохули ориф санъати Р.с.нинг айрим кўринишларига ўхшаш, бироқ юқоридагилардан келиб чиқилса, Р.с. мазкур санъатга нисбатан анча кенг ҳодиса экани аён бўлади.

**РИТУАЛ-МИФОЛОГИК ТАНҚИД** – Ғарб маданиятшунослиги ва адабиётшунослигидаги метод, XX асрнинг 30-йилларида кўҳна маданиятларни ўрганишдаги ритуал-мифологик йўналиш (Ж.Фрейзер) ва К.Юнг аналитик психологиясининг синтези сифатида майдонга чиққан. Агар мифологик мактаб вакиллари адабиётнинг пайдо бўлишини мифлар билан боғлаган бўлсалар, Р.-м.т. мифларнинг ўзи ритуаллардан келиб чиққан деб ҳисоблайди. Уларга



кўра, нафақат антик театр, балки қаҳрамонлик эпоси ҳам, қадим Шарқнинг муқаддас мәнбаларию антик фалсафа, ўрта асрлар эпопею роман — ҳуллас, адабиёт тўласича ритуалдан келиб чиққан. Муҳим жиҳати шуки, Р.-м.т. ритуал-мифологик моделларни ижодий тасаввурга қанот берувчи манба эмас, балки унинг структурасини белгиловчи бош омил деб билади. Шунинг учун К.Юнгнинг *архетип*лар (к.) ҳақидаги таълимоти уларнинг қарашларида муҳим ўрин тутди. Албатта, энг қадимги даврларда яратилган кўплаб асарларга, архаик жанрларга бундай ёндашув асосли. Лекин Р.-м.т. бундай ёндашувни адабиёт тарихининг энг қадимги даврларидан то ҳозирги кунига қадар татбиқ этади, замонавий адабиёт намуналарида ҳам ритуал-мифологик илдизларни очиш ва уларни шу асосда тушунтиришга интилади. Тўғри, XX аср жаҳон адабиётида мифларга мурожаат этишнинг кучайиши бунга маълум даражада асос ҳам берар, лекин мазкур ҳолатни инсоният хотирасида «коллектив онгсизлик» сифатида яшаётган архетипларнинг ўзини намоён этиши сифатидагина тушуниш, архетипнинг бадиий тафаккурдаги ролини мутлақлаштириш тўғри бўлмайди. Зеро, худди шу ҳол Р.-м.т.ни бадиий ижодда коллектив ролини индивид ролдан устувор деб билишга, ундаги биографик факторни буткул инкор қилишга олиб келади. Шу каби бир ёқламаликларга қарамай, Р.-м.т.га хос ёндашув архаик жанрларни, ҳақиқатан ҳам ритуал-мифологик асоси кучли бўлган ўрта асрлар ва қисман Уйғониш даври (умумлаштириб айтганда, ижодда традиционализм етакчилик қилган даврлар) адабиётини ўрганишда самарали натижалар берганини ҳам қайд этиш лозим. Жумладан, унга хос ёндашув рус олими М.Бахтиннинг «Франсуа Рабле ижоди ва ўрта асрлар ҳамда ренессанс даври халқ маданияти» асарида қўлланган, бу эса муҳим назарий умумлашмалар чиқаришга асос бўлган.

**РИЦАРЛИК РОМАНИ** (фр. roman chevaleresque — кавалерлик романи, нем. Ritterroman — рицарлик романи) — ўрта асрлар куртуаз адабиётининг асосий жанрларидан бири, дастлаб XII аср ўрталарида рицарлик ҳаракати гуллаб-яшнаган Францияда пайдо бўлиб, кейин бутун Европага тарқалган. Жанр генезиси қаҳрамонлик эпосига бориб тақалса-да, Р.р. қатор хусусиятлари билан мажусийлик даври мифлари, қадимги кельтлар ва германларнинг ривоятлари, халқ эртаклари, шунингдек, Шарқ адабиёти намуналарига ҳам яқин туради. Р.р. марказидаги қаҳрамон — рицарь ўзининг беқиёс жасорати, олийжаноблиги билан ажралиб туради. Айни шу нарса,

қаҳрамон шахсининг олдинги планга чиқарилиши, уни алоҳида шахс сифатида (ҳам руҳиятидаги жараёнларни, ҳам ўзи ва суюқли ёри шон-шарафи йўлидаги кураши, бу йўлдаги жонбозлик ва беқиёс қаҳрамонликларини) тасвирлашга урғу берилгани Р.р.ни роман жанри тараққиётидаги муҳим босқичга айлантиради. Р.р.лари аввалига шеърый шаклда яратилган бўлса, XIII аср ўрталаридан унинг насрий баёнлари ҳам пайдо бўла бошлаган. Кўплаб Р.р.лари тематик жиҳатдан туркумларга бирлашган бўлиб, ўз даврида улардан Тристан ва Изольда муҳаббати, «юмалоқ стол» рицарлари, қирол Артур, Ланселот ҳақидаги туркумлар машҳур бўлган. Гарчи Р.р. Европа адабиёти ҳодисаси бўлса-да, Узоқ, Ўрта ва Яқин Шарқ адабиётларида ҳам унинг ўхшашлари (аналоглари) мавжуд бўлганки, бу миллий адабиётлар тараққиётидаги стадиал умумийликнинг ёрқин далилидир. Жумладан, ўзбек халқ оғзаки ижоди (мас., Гўрўгли туркуми) ёки ёзма адабиётимиздаги қатор дostonлар (мас., «Фарҳод ва Ширин») моҳият эътибори билан Р.р.ларига яқин туради.

**РОВИЙ** (ар. روائي — ҳикоячи, қисса айтиувчи, хабар, маълумот берувчи) — эпик асарлардаги ривоя субъекти, воқеаларни ҳикоя қилаётган, улар кечаётган макон ва замон, уларда иштирок этаётган персонажларга оид тафсилотларни етказиб, тасвир предметига у ёки бу тарзда муносабат билдираётган шахс. Эпик асарда ривоя кўпроқ муаллиф (конкретлаштирилмаган «учинчи шахс» ҳам аксар муаллиф сифатида тушунилади), баъзан эса персонаж (мас., Г.Гулом. «Шум бола») тилидан олиб борилади. Шунингдек, баъзан асарда бир неча Р.нинг иштирок этиши ҳам кузатилади (мас., Ў.Ҳошимов. «Икки эшик ораси»; М.Муҳаммад Дўст. «Лопазор»). Шунга қарамай, Р.ларнинг кўпайиши ривоянинг бутунлигига путур етказмайди, чунки бу ҳолда ҳам матндан муаллиф (ёки асосий Р. вазифасидаги персонаж)нинг тингловчи мақомида тургани англашилаверади.

**РОМАН** (фр. roman — «лотин тилида эмас, роман тилларидан бирида ёзилган» маъносига) — замонавий адабиётда эпик турнинг йирик ҳажмли жанри. Р.га таъриф берилганда, одатда, унинг ҳажман катталиги, ҳаётни кенг кўламда тасвирлаши, қаҳрамон ҳаётдан катта даври олиб, турли ижтимоий муносабатлар билан боғлаб талқин қилиши, кўплаб ва турфа кишилар тақдирлари орқали жамиятнинг жорий ҳолатини акс эттира олиши; мураккаб кўп чизиқли сюжетга эга бўлиши каби жанр хусусиятлари қайд этилади. Дарҳақиқат, бу

хусусиятлар аксарият Рларга хос, лекин жанр хусусиятларини шуларнинг ўзи билангина белгилаш камлик қилади: амалда ҳажман қиссадан фарқ қилмайдиган ёки қисқагина давр мобайнида кечган воқеалар тасвири билан чекланган Рлар ҳам, марказида биргина шахс тақдири (бошқа персонажлар унинг характерини очишга хизмат қилади) турган ёки биргина сюжет чизигига эга Рлар ҳам учрайди. Шунинг учун мутахассислар Рнинг жанр сифатида белгиловчи муҳим хусусиятлари деб яна романий проблема, романий қаҳрамон ва романий тафаккурни кўрсатишади. Табиийки, бу учала тушунча бир-бирига узвий боғлиқ, бири иккинчисини тақозо этади. Романий проблеманинг моҳияти шундаки, у инсон тақдири, унинг жамият (кенгроқ қаралса – олам) билан ўзаро муносабати бадий тадқиқи орқали оламу одам моҳиятини англашга интилади. Г.Лукач фикрига кўра, дунёнинг яхлитлигию бутунлигини, мавжудликнинг туб моҳиятини англаш Рнинг бош муаммоси бўлса, қаҳрамоннинг дунё билан зиддияти ўша муаммони ҳал қилиш воситасидир. М.М.Бахтин эса қаҳрамон тақдири ва эгаллаган мавқеининг унинг ўзига номувофиқлиги Р жанрининг марказий мавзу-муаммоларидан бири деб ҳисоблайди. Демак, Рда қўйилган проблемани бадий идрок этиш учун қаҳрамон ҳам шунга мос бўлиши талаб қилинадики, бунинг учун романий қаҳрамон жамиятда яшагани ҳолда, ўзининг индивидуаллигини теран идрок этадиган, муҳит билан зиддиятга киришган шахс бўлиши лозим. Зеро, Рнинг классик тушунчадаги «буржуа эпоси» (Гегель), «янги давр эпоси» (Белинский) сифатидаги кўриниши шахснинг жамиятдаги мақоми ўзгарган, у ўзини ўз ҳолича бутун бир олам сифатида идрок эта бошлаган бир шароитда шаклланди. Ўзини алоҳида олам сифатида идрок этган шахснинг жамият билан, олам билан зиддиятларини бадий талқин қилишу йўқотилган эпик бутунликни тиклаш классик Рнинг бош муаммоси бўлиб қолдики, шу маънода у «янги давр эпоси» саналади. Шу боис Р марказида шахснинг ҳаёти, унинг зиддиятларию тўқнашувлари туради. Немис файласуфи Шеллинг Р воқеани эпосдан, тақдирни драмдан олади деганида айни шу нарсани назарда тутган. Эпик бутунликни тиклашга интилаётган шахс деганимиз, аввало, ижодкорнинг ўзи, Р марказида турган қаҳрамоннинг ташқи олам билан тўқнашувлари (кенг маънода шахс драмаси) ўша бутунликни тиклаш воситаси эканлиги эътиборга олинса, Рни ўз ҳаёт йўлида чигал муаммоларга дуч келган ижодкорнинг «зиддиятли ҳолатни адабий йўл билан ечишга уриниши» (А.Прието) дейиш мумкин бўлади.

қўйилган проблемани шунга мос қаҳрамон воситасида идрок этиш жараёнида жамиятнинг жорий ҳолати, оламу одам ҳақидаги яхлит бир концепция, Р бадий фалсафаси шаклланадики, бу романий тафаккур маҳсулидир. Албатта, Р жанрининг бир неча асрлик тараққиёти давомида унинг турли хил ва кўринишлари яратилгани, жанрнинг ҳозирда ҳам такомиллашиб бораётгани эътиборга олинса, юқорида саналган хусусиятларни барча Рлардан излаш, уларни қатъий қоида деб тушуниш тўғри бўлмайди. Бу ўринда ҳар бир даврнинг бадий-эстетик талаб-эҳтиёжлари Рга маълум ўзгаришлар киритиши, ўтган давр мобайнида Рнинг турфа (тарбиявий, маиший, ишқий, саргузашт-детектив, ижтимоий-психологик, тарихий-биографик, сатирик ва ҳ.) хиллари яратилгани, ниҳоят, Р ҳозирда ҳам такомиллашиб бораётган жанр эканлигини ҳамisha ёдда тутиш лозим.

**РОМАНТИЗМ** (фр. romantique, инг. romantic) – Европа адабиётида XVIII аср охири – XIX асрнинг биринчи ярмида етакчилик қилган адабий йўналиш. Этимологик жиҳатдан термин испанча «romance» сўзи билан боғлиқ бўлиб, XVIII асрда китоблардагина учратиш мумкин бўлган ғайритабиий, ажабтовур, фантастик нарсаларнинг бари шу сўз билан юритилган. Дарҳақиқат, Р адабиёти яратган бадий оламни шундай сўз билан номлашга етарли асос бор эди. Зеро, Р мавжуд воқелиқдан қониқмаслик туфайли, маърифатчиликка хос олам (одам ва жамият)ни ақл билан расо ҳолга келтириш гоёсига ишончининг барбод бўлиши натижаси ўлароқ юзага келган бўлиб, «реалликдан қочиш»га, реал оламдан кўра мукамалроқ олам яратишга интилади. Р классицизмга хос «табиатга тақлид» ва ундан келиб чиқувчи ҳақиқатга монандлик талабларини инкор қилади, унинг учун бадий реаллик мавжуд реалликдан ҳаққонийроқдир. Мавжуд воқелиқдаги туссизликдан безган Р вакиллари кўпинча кўҳна ўтмишдан маъни излашади (мас., В.Скотт, В.Гюго, А.Дюма романлари), улар тасвирлаган воқеа-ҳодисалар аксар узоқ, экзотикага бой юртларда кечади ва ш.к.

Р адабиётининг умумлаштириш принципи – идеаллаштириш, у воқеликка боқий ва мутлақ идеаллар асосида ёндашади, шунинг учун Рда воқелик билан идеал орасидаги номутаносиблик яққол кўринади, уларнинг зиддияти ўта кескин намоён бўлади. Натижада Р адабиётида олам иккига ажралади, иккиси – идеал олам билан мавжуд олам алоҳида яшайди. Р адабиётининг бош зиддияти – азгулик ва ёвузлик кураши, унга кўра, ёвузлик ҳам, унга қарши

кураш ҳам бирдек боқийдир. Яъни бу кураш ёвузликни илдизи билан йўқотишу оламни тубдан ўзгартиришга ожиз, кўлидан келадигани — ёвузликнинг оламда мутлақ ҳоким бўлишига йўл бермаслик, холос. Ёвузликка қарши курашаётган бетакрор шахс — Р. адабиётининг бош қаҳрамони. Р. адабиётга ўзининг янгича шахс концепцияси билан кириб келди. Унинг учун шахс — алоҳида олам. Шахснинг сирли ва ададсиз ички олами Р. адабиётининг марказий муаммосига айланади. Р. шахсдаги бетакрор индивидуал хусусиятларга урғу беради, асосий эътиборни унинг ички оламидаги зиддиятлар, қалбию онгидаги изоҳлаш мушкул ҳаракатлар, ғайришуурий ҳолатларга қаратади. Мавжуд воқеликдаги маишат қулига айланиб бораётган одамларга зид ўлароқ, Р. адабиёти муҳаббатю нафрати, меҳрию қаҳри чексиз, юксак туйғуларга, изтиробли ўйловлару ўзини бешафқат тафтиш қилишга қобил қаҳрамонни яратади. Бу қаҳрамон олам сир-синаотини англашга ожизлигидан изтироб чекади, мавжуд воқелик соғлом ақлга номувофиқ экани, ўзининг шахсий эркига даҳл қилаётганидан изтиробга тушади. Р. адабиётининг қаҳрамони шахсий эркини, инсонлик шаънини юксак қадрлайди, уларга қарши ҳар қандай ҳаракатга бутун вужуди билан қарши туради.

Шахсга бу хил қараш Р.нинг ижодкор шахсга муносабатида ҳам ўз аксини топади. Ижодкорни муайян қондалар билан чеклаган классицизмдан фарқли ўлароқ, Р. том маънодаги ижодий эркинлик тарафдори, у ҳар қандай чекловларни инкор қилади. Шунинг учун Р. назариётчилари адабий тур ва жанрлар орасига қатъий чегара қўймайдилар, адабиётнинг бошқа санъат турлари билан синтезлашуви ёки конкрет бадиий асарда турли эстетик белгилар (трагизм ва комизм, тубан ва юксак ва б.)нинг қоришиқ ҳолда намоён бўлишини табиий ҳол деб биладилар. Улар бадиий асарни тирик организмга қиёс қиладилар, бадиий шакл мазмундан табиий равишда ўсиб чиқади ва у билан узвий боғлиқ ҳолда яшайди деб тушунадилар. Яъни бунда ҳам норматив характердаги поэтикага оид қўлланмаларда қатъий белгиланган меъёрларни инкор қилиш, ижодкорнинг яратувчилик ҳуқуқини эътироф этиш кузатилади. Р. адабиётни *тарихий роман, фантастик қисса, лиро-эпик поэма* каби жанрлар билан бойитди; ифодада метафориклик, юксак даражадаги ассоциативлик ва шу асосда кўп маънолилиқка интилгани сабаб бадиий тилнинг ифода имкониятларини кенгайтира билди. Р. бадиий тафаккур ривожидан сезиларли из қолдирди, унинг аънанала-

ри *символизм, экспрессионизм, сюрреализм* сингари оқимлар томонидан ижодий ўзлаштирилди, романтик пафос адабиёт ва санъатга хос эстетик белгилардан бири бўлиб қолди.

**РУБОИЙ** (ар. *رباعى* — тўртлик) — Шарқ мумтоз шеъриясида кенг тарқалган лирик жанр, ҳазаж баҳрининг ахраб ва ахрам шажараларида ёзилиб, кўпроқ а-а-б-а тарзида қофияланувчи тўрт мисрали мустақил лирик асар. Арабча номланишига қарамай, Р. дастлаб форсий адабиётда пайдо бўлиб, кейин араб ва туркий адабиётларга ўтган. Р.нинг келиб чиқиши масаласида ихтилофлар мавжуд: айрим мутахассислар жанр генезисини туркий халқлар оғзаки ижодидаги тўртликлар билан боғласа, бошқалари уни форс шеъриясига хос ва жанр асосчиси Абу Абдулло Рудакий деб ҳисоблашади. Ўзбек халқ оғзаки ижодида, шунингдек, ёзма адабиётимизнинг Навоийгача бўлган даврида дубайтий (дубайтий — икки байт ёки тўрт мисрадан иборат шеър, яъни тўртлик) вазнига (ҳазаж мусаддаси маҳзурф ёки мақсур) тушадиган тўртликлар кўплаб яратилган бўлса-да, Р. вазнига тушадиган тўртликлар учрамайди. Юсуф Хос Ҳожибнинг «Қутадғу билиг» асаридаги тўртликлар мутақориб, Насимий ва Лутфий тўртликлари эса рамал баҳрида яратилган. Шайх Аҳмад Тарозийнинг «Фунун ул-балоға» асарида Р. сифатида келтирилган форс тилидаги мисоллар ҳазаж баҳрида, туркийдагилари эса рамали мусаддаси мақсур (ёки маҳзурф) вазнидадир. Бундан ўша давр (XV аср бошлари) ўзбек адабиётида Р. жанри вазн жиҳатдан ҳали қатъий тартибга солинмагани кўринади. Навоийдан бошлаб ўзбек адабиётида ҳам Р.нинг ҳазаж баҳри тармоқларида ёзилиши қатъий қоидани олдики, шу боис Навоийни ҳақли равишда ўзбек адабиётида Р. жанри асосчиси дейиш мумкин. Дарҳақиқат, барча манбаларда Р.ни жанр сифатида белгиловчи муҳим хусусиятлардан бири сифатида унинг вазни, яъни ҳазаж баҳрининг ахрам ва ахраб шажараларида ёзилиши эътироф этилади. Яъни бундан бошқа вазнга тушувчи ҳар қандай тўрт мисрали шеър Р. эмас, балки қитъа, дубайтий ёки тўртликдир: «Бирор тўртликни Р. деб аташ учун унда тугал мазмун, Р. шакли бўлишидан ташқари Р. вазни ҳам бўлиши керак. Тўртлик қанчалик чуқур маъно ва гўзал шаклга эга бўлмасин, агар у Р.нинг махсус вазнига тушмаса, Р. бўла олмайди» (Е.Исҳоқов). Мумтоз поэтикага оид асарларда Р.нинг нега айнан ҳазаж баҳрида ёзилиши ва бу вазннинг нега қатъийлиги ҳақида аниқ фикр йўқ. Ўтмиш адабиётшунослари фақат фалсафий фикрлар, ҳаётий кечинмаларни ифодалаш учун мазкур вазнларнинг қулайлиги хусусида гапириш билан кифояландилар.

Р. икки хил қофияланиш тартибига эга: биринчи, иккинчи ва тўртинчи мисралари ўзаро қофияланиб, учинчи мисраси очик қоладиган (а-а-б-а) тури хосий Р. ёки Р.и хоса дейилади. Мас.:

*Ҳижронда соғиниб мени шод этгайсен,  
Мен хастани мухлис эътиқод этгайсен,  
Бу хатни анинг учун битидим мунда,  
Кўргач бу хатимни мени ёд этгайсен (Бобур).*

Тўртала мисраси ўзаро қофияланадиган (а-а-а-а) Р. кўпроқ тарона ёки Р.и тарона, айрим манбаларда эса мусарраъ деб юритилади. Шунингдек, А.Навоий Р.нинг бу хилини рубоия деб атаган. Мас.:

*Кўнглумни гаму дард ила қон айлади ишқ,  
Кўз йўлидин ул қонни равон айлади ишқ,  
Ҳар қатрани билмадим қаён айлади ишқ,  
Бедил эканим буйла аён айлади ишқ (Навоий).*

Қайд этиш керакки, хосий Р. билан таронаи Р.нинг турли даврлардаги фаоллик даражаси, уларга ижодкорларнинг муносабати бир хил бўлмаган. Хусусан, Навоий меросида таронаи Р. салмоқли (ўзбекча Р.ларининг 95 фоизи, форсий Р.ларининг ҳаммаси) бўлса, Бобур хосий Р.ни маъқул кўрган (унинг 211 та Р.сидан 181 тасида уч мисра ўзаро қофияланган); X – XI асрларда таронаи Р. ёзиш урф бўлса, Навоийдан кейинги даврда хосий Р.лар салмоғи ортиб борган.

Рубоийнинг композицион қурилиши маълум бир масала юзасидан фикрни изчил ривожлантириб, ихчам ва тугал ифодалашга мос: дастлабки икки мисрада гоё ва мақсад, кейинги икки мисрада далил ва хулоса ўз аксини топади. Шундан келиб чиқиб ҳозирги адабиётшуносликда Р.нинг биринчи мисраси тезис, иккинчиси анти-тезис, учинчиси моддаи рубоия (ёки хулоса учун асос бўладиган кўприк), тўртинчи мисра эса синтез дейилади. Яъни Р.нинг биринчи мисрасида жуда муҳим бир фикр тезис қилиб қўйилади-да, кейинги уч мисра шу фикр талқинига бағишланади; ёки биринчи ва иккинчи мисрадаги фикрий тезисга учинчи мисрада антитезис қўйилиб, тўртинчи мисрада синтез (хулоса) берилади.

**РУЖУЪ** (ар. رجو – қайтиш) – мумтоз адабиётдаги шеърий санъат, аввал айтилган фикр (бирор нарса-тушунча, ҳолат ҳақида айтилган гап, унга қилинган қиёс, ташбеҳ, тамсил ва ш.к.)дан қайтиб,

сўнг уни янада кучлироқ, таъсирлироқ, гўзалроқ тарзда ифодалаш. Яъни Р. санъатида шоир шеърда ўзи келтирган чиройли ўхшатиш ва сифатлашларни гўё билмасдан айтиб қўйгандек ёки улардан қаноатланмагандай бўлиб, фикридан қайтади ва аввалгилардан кўра гўзалроқ ташбеҳу сифатлашларни келтиради. Атоуплох Хусайний таърифига кўра, Р.да лирик қаҳрамон маъшуқа гўзаллиги ёки бошқа бирор сабаб туфайли ҳушини йўқотар ҳолатга келади ва шу ҳолатида беихтиёр фикр айтиб қўйиб, кейин, ҳушига келгач, «аслида мана бундоқ эди» тарзида «гапини тўғрилаб олади». Мас., Мунис:

*Сабо таҳрикидин, йўқ, балки оғзинг шармидин бошин  
Қуйи солмоққа мойил бўлгусидур ҳар замон гунча, –*

байтида гунчанинг бош эгиб туришини аввал шамол ҳаракати («сабо таҳрикидин») туфайли деб айтади, сўнг фикридан қайтиб, бунинг сабаби гунчанинг ёр «оғзи шарми», яъни ёр оғзи гўзаллиги олдида бош эгиб туриши деб изоҳлайди. Бу ўринда Р. санъати хусни таълил (қ.) санъати билан қоришиқ ҳолда намоён бўлади, бу эса ифоданинг янада гўзал ва таъсирли чиқишини таъминлайди. Илми бадиъга оид манбаларда Р. истидрок (қ.) деб ҳам юритилади, бироқ бу масалада яқдиллик йўқ, истидрокка берилган таърифлар Р.дан бирмунча фарқлидир.

**РУКН** (ар. ركن – устун) – арузда жузв (туркий арузда ҳижо)ларнинг муайян тартибда бирикишидан ҳосил бўлувчи ритмик бўлак, жузв билан баҳр орасидаги ритмик бирлик. Ҳозирги адабиётшуносликда Р. термини кўпроқ мазкур маънода қўлланса-да, мумтоз арузшуносликда у жузв (қ.) маъносида ҳам фаол ишлатилган. Аксинча, ҳозирда Р. термини билан юритилувчи тушунча мумтоз арузшуносликда афойил, тафойил, ажзо, вазн, аркон (Р.нинг кўплиги) каби истилоҳлар билан ҳам ифодаланган. Арузда жузвларнинг маълум тартибда қўшилишидан саккизта афойил ёки асллар, яъни асл Р.лар юзага келади:

*Фаувлун = ватади мажмуъ + сабаби ҳафиф*

*Фоилун = сабаби ҳафиф + ватади мажмуъ*

*Мафойилун = ватади мажмуъ + сабаби ҳафиф + сабаби ҳафиф*

*Фойлотун = сабаби ҳафиф + ватади мажмуъ + сабаби ҳафиф*

*Мустафъилун = сабаби ҳафиф + сабаби ҳафиф + ватади мажмуъ*

*Мафъулоту* = сабаби ҳафиф + сабаби ҳафиф + ватади мафруқ

*Мафоилатун* = ватади мажмуъ + фосилаи суғро

*Мутафоилун* = фосилаи суғро + ватади мажмуъ

Мазкур саккиз асл Р.нинг такроридан баҳрлар (қ.) ҳосил бўлади. Аслларнинг зиҳофга (қ.) учрашидан тармоқ (ёки фаръий, фуруъ) Р.лар юзага келади.

**РУҲИЙ-ТАРИХИЙ МАКТАБ** – XIX аср охири – XX аср бошларида романтизм эстетикаси ва немис файласуфи В.Дильтейнинг «ҳаёт фалсафаси» таълимоти асосида *маданий-тарихий мактаб*га зид ўлароқ вужудга келган адабиётшунослик мактаби. Дильтей таълимотига кўра, тарихий руҳ миллат ва даврнинг уйғун бирлиги бўлиб, мазкур бирлик, аввало, санъаткор даҳоси туфайли воқе бўлади. Яъни тарих ва руҳият санъаткор қалбида ягона кечинмага айланади ва худди шу кечинма бадий шаклда моддийлашиб, яхлит маънавий-руҳий реалликка айланадики, бу маънавий-руҳий реаллик нафақат ўқувчи, балки санъаткорнинг ўзига ҳам илк бор намоён бўлаётган ҳақиқатнинг ўзидир. Дильтей санъат воқеликни бошқа гуманитар фанларга қараганда адекват акс эттиришга кўпроқ қодир, санъат турлари орасида эса адабиёт руҳий-тарихий мавжудлик моҳиятини ҳаммадан кўра теранроқ идрок эта олади деб билади. Чунки адабиёт тил билан иш кўради, руҳ эса тилда ўзининг бутун теранлиги билан тўла ва объектив ифодасини топади. Шулардан келиб чиқиб Р.-т.м. бадий асар талқинида руҳий-тарихий ва психологик ёндашувларни синтезлаштиришга интилади. У маданий-тарихий мактабга хос адабиётга позитивистик ёндашувни қабул қилмайди, адабиётшуносликнинг вазифаси табиий фанлардаги каби рационал тушунтириб бериш эмас, балки бадий бутунликни кўпроқ интуитив тарзда («ҳамдардлик», «асар руҳига кириш» асосида) бевосита тушуниш ва талқин қилишдан иборат деб билади. Р.-т.м. бадий асар таҳлилида «кечинма»ни марказий ўринга қўяди, унга субъект (ижодкор) ва объект (давр) бирлиги сифатида қарайди, ҳар бир ижодкор бетакрор, «руҳ тарихи»даги ўзига хос ва автоном ҳодиса деб билади. Бироқ бу биографик ёндашувдан мутлақо фарқланади. Зеро, бадий асарда тарихий руҳ акс этади деб билган Р.-т.м. ижодкор шахси, дунёқараши масалаларига жиддий эътибор бергани ҳолда, асарда аксланган тарихий руҳ илдизини биографик фактлардан эмас, даврнинг умуммаданий контексти (даврнинг умумий руҳи, етакчи фалсафий қарашлар, шуларга бевосита боғлиқ ижодкор дунёқараши)дан қидиради. Р.-т.м.

ўтган асрнинг 20-йилларида гуллаб-яшнаган бўлса, 30-йилларда унинг алоҳида адабий мактаб сифатидаги фаолияти тугади: унинг бир қисм тарафдорлари ўз фаолиятини феноменологик мактаб, бошқа бир қисми янги гегелчилар қаторида давом эттирди.

## С

**САБАБ** (ар. *سبب* – чодирнинг арқони) – сокин ва мутаҳаррик ҳарфларнинг муайян тартибда бирикишидан ҳосил бўлувчи ритмик бирлик, жузе (қ.). Ҳарфларнинг қай тартибда бирикишидан келиб чиқиб, С.нинг икки тури фарқланади: С.и *ҳафиф* (ёки энгил С.) ва С.и *сақийл* (ёки огир С.). Битта мутаҳаррикка бир сокин ҳарфнинг қўшилишидан С.и ҳафиф ҳосил бўлади: «гул», «кўз», «қад» каби сўзлар шу вазнга мос. Мас., «гул»: мутаҳаррик (гу) + сокин (л). Иккита мутаҳаррик ҳарфнинг қўшилишидан С.и сақийл (талаффузи С.и ҳафифга нисбатан қийинроқ экани учун шундай номланади) ҳосил бўлади: «гала», «сана», «била» каби сўзлар шу вазнга мос. Мас., «била»: мутаҳаррик (би) + мутаҳаррик (ла).

**САВОЛУ ЖАВОБ** (ар. *سؤال و جواب* – савол-жавоб) – мумтоз адабиётдаги шеърий санъат, байтни икки шахснинг ўзаро савол-жавоби тарзида шакллантириш. С.ж. санъати, шунингдек, байт доирасидан чиқиши, яъни бир байт савол, иккинчиси эса жавоб тарзида шакллантирилиши ҳам мумкин. Рашидиддин Вотвот ушбу санъатни форсийзабон шоирлар гоят қадрлаши, форс шеъриятида бошдан-оёғи шу санъат асосида ёзилган қасидалар мавжудлигини қайд этган. С.ж. санъати ўзбек шеъриятида ҳам жуда фаол қўлланган, у шеърга жонлилиқ, ҳаёттилик бахш этиши билан деярли барча мумтоз шоирларимиз эътиборини тортган. Мас.:

*Сўрса малакулмавт: «Санга ҳур керак?» деб,  
«Йўқ-йўқ, манга дилхоҳ!» дегумдур, даги ўлгум (Атойи).*

*Дедим: кўнглумга ҳар ёндин ҳадангинг недурур ёра?  
Муҳаббат ўтига, деди, ўтиндурким қалайдурман (А.Навоий).*

*Ҳажрда қаддимни дол эттинг, десам, бергай жавоб:  
Ким қўйибдур севгини қадди букилган чол учун (Э.Воҳидов).*

**САДР** (ар. *صدر* – кўкрак) – қаранг: **тақтиъ**  
**САЁҲАТНОМА** – адабий жанр, йўлчининг сафар давомида кўрган-кечирганлари, ўзга юртларнинг табиати, ижтимоий-маиший турмуши, халқи, урф-одатлари ва бошқа ш.к. муаллиф мансуб миллат ўқувчилари учун қизиқарли ва фойдали бўлиши мумкин маълумотлар берувчи асар. Аксар ҳолларда С.лар ўз олдига ўзга юртлар ҳақида маълумот бериш, яъни *маърифий* мақсад билан бир қаторда публицистик, бадиий-эстетик, фалсафий, сиёсий мақсадларни ҳам қўяди. Жанрнинг генезиси фольклор ва ёзма адабиёт анъаналарининг синтезлашуви натижаси бўлиб, марказида сайёҳ-ҳикоячи турган асарлар фольклор (мас., этаклар) ва ёзма адабиётда (мас., антик саёҳатномалар) жуда қадимдаёқ яратилган. С.ларнинг жанр-композицион хусусиятлари сифатида марказида сайёҳ-ҳикоячи образининг туриши ва сафар (муайян йўналишдаги макон ва замонда ўзгарувчи ҳаракат) фактининг мавжудлиги, сайёҳ-ҳикоячининг кўзатувчи мақомида туриши ва ўзга юртда кўрганларини ўз юртидаги ҳолат билан қиёслаб бориши кабиларни кўрсатиш мумкин. Жанрнинг ушбу асосий хусусиятлари сақлаб қолингани ҳолда, адабиёт ривожини давомида С.нинг бир қатор бошқа кўринишлари ҳам пайдо бўлди. Жумладан, кўпроқ публицистик характердаги ва ижтимоий-маърифий мақсадларни кўзловчи «ўз юрти буйлаб сафар»лар (А.Радишчев. «Петербургдан Москвага саёҳат»; Муқимий. «Саёҳатнома»; Чўлпон. «Вайронлар орасидан»); ўз юртидаги ҳолатни шартли равишда таҳлил қилиш, муайян ижтимоий-сиёсий қарашларни ифодалаш мақсадларига қаратилган ва кўпроқ сатирик характердаги асли мавжуд бўлмаган «фантастик юртлар»га саёҳатлар (Ж.Свифт. «Гулливёрнинг саёҳатлари»); хорижликларнинг муаллиф юртидаги саёҳати (Монтескье. «Форс хатлари»; Фитрат. «Сайёҳ ҳинди») ва б. Шунингдек, адабиёт тарихида жанрга хос шаклий хусусиятлар (сайёҳ, сафар факти) олингани ҳолда, С.лардан ўзгача мақсадларни кўзловчи асарлар ҳам кўплай учрайди. Мас., Чўлпоннинг «Йўл эсдалиги»да С.га хос шакл асосида сайёҳ-муаллиф руҳияти, дунёқарашидаги ўзгариш жараёнлари ифодаланганки, уни рамзий лирик-публицистик асар ҳисоблаш мумкин.

**САЖЪ** (ар. *سجع* – булбул, тўти, қумри каби қушлар овозининг уйғунлашиб келиши, ўлчовли) – мумтоз адабиётдаги лафзий санъат, бир ёки бир неча гаплардаги айрим бўлақларнинг ё вазнда, ё қофияда, ё ҳар иккаласида мос келиши. Илми бадиъга оид айрим манбаларда С. насрга хос дейилса, бошқаларида ҳам насрга, ҳам

назмга хослиги эътироф этилади. Шунга қарамай, С.ни насрга хос деб билиш, уни қофияли наср сифатида тушуниш кенгроқ оммалашган ва бу илмий жиҳатдан тўғрироқдир. Чунки назмдаги С. ва унинг турларига берилган таърифлар *тарсеъ, мувозана, зулқофитайн, зулқавофиъ, издивож* каби қатор шеърий санъатларни қамраб олади. Яъни бу ҳолда бир ҳодиса турли номлар билан юритилади, холос, С.ни бундай кенг маънода тушуниш терминологик чалкашликларни янада кучайтиради. Шунинг учун С.ни наср билан боғлиқ ҳодиса деб билиш мақсадга мувофиқ. С.нинг илдизлари туркий халқлар фольклорига бориб тақалади. Агар халқ оғзаки ижоди жанрларининг, асосан, ижрога мўлжаллангани, ижронинг мусиқа жўрлигида амалга ошгани эътиборга олинса, С.нинг фольклорда кенг оммалашши сабаби (ўзига хос оҳанг, мусиқийлик ҳосил қилиши, эстетик таъсир кучининг ошиши каби) аён бўлади. Мас., «Шуйтиб хут **кириб**, мушуклар миёв **бўлиб**, қозонлар сутга **тўлиб**, битта-ярим эрта қочган кўйлар **кўзилаб**, қорлар қошоқ бўлиб **эриб**, кўзигуллар **очилиб**, одамзод баҳрига оламга бир ажойиб эрта кўклам иси сочилибди» («Юнус билан Мисқол»).

С. ёзма адабиётда ҳам анча кенг тарқалган санъатлардан биридир. Жумладан, мумтоз адабиётимизда дoston бобларига қўйилган насрий сарлавҳаларда (мас., Навоий «Хамса»си), девонларга ёзилган дебочаларда, насрий муножотларда С. санъати кенг қўлланган. Ҳозирги насрда ҳам матннинг айрим ўринларида, хусусан, тасвир предметиға эмоционал муносабат қуюқ ифодаланувчи лирик чекинишларда, воқеа ривожидаги ҳаяжонли нуқталар ёки персонажлар руҳиятида жунбишга келган кечинмалар тасвирида С.га хос хусусиятларни кўриш мумкин.

**САЙЁР СЮЖЕТЛАР НАЗАРИЯСИ, МИГРАЦИЯЛАР НАЗАРИЯСИ** — XIX нинг иккинчи ярмида пайдо бўлган назария. Унга кўра, турли халқлар оғзаки ижодида бир-бирига ўхшаш сюжетлар мавжудлиги адабий асарлар бир маданий-тарихий ҳудуддан бошқа маданий-тарихий ҳудудларга кўчиб юриши билан изоҳланади. Мутахассислар С.с.н.нинг вужудга келишини халқаро маданий алоқаларнинг кучайиши билан боғлайдилар, унинг асосчиси сифатида эса немис олими Т.Бенфей эътироф этилади. 1859 йили Т.Бенфей ҳинд фольклори намунаси бўлмиш «Панчататра»ни нашр эттиради, унга олимнинг бу нодир асар юзасидан олиб борган тадқиқотлари ҳам қўшилганди. Бу тадқиқотида Т.Бенфей аксарият ҳикоят ва эртақлар Ҳиндистонда пайдо бўлган, кейин бутун дунёга тарқалган деган хулоса чиқаради.

Мазкур хулоса *мифологик мактаб* (қ.) қарашларига зид бўлиб, икки йўналиш орасидаги баҳс-мунозаралар натижасида уларнинг тадқиқ предмети чегараланади: *мифологик мактаб* вакиллари асосий эътиборни фольклор генезисига, миграциялар назарияси эса унинг кейинги ҳаётига қаратди. С.с.н. фольклорни муайян бир элат ёки халқ мулки тарзида тушунишни чеклади, унга турли юрт, даврлар поэтик маданиятларидан ўзлаштириш натижаси деб қаради. Албатта, бундай қарашда муайян бир ёқламалик бор. Зеро, турли халқлар фольклоридаги ўхшашликлар фақат адабий алоқа, ўзлаштириш билангина изоҳланмайди, бунда типологик ўхшашликларни ҳам назарга олмоқ зарур. Бироқ С.с.н. қиёсний кўпроқ формал-схематик асосда амалга оширдик, бу типологик ўхшашликларнинг ҳам аксар ўзлаштириш сифатида тушунилишига олиб келди. Шуларга қарамай, С.с.н. фольклоршунослик ва адабиётшунослик ривожида сезиларли из қолдирди: фаолияти турли халқлар фольклорини қиёсий ўрганиш билан боғлиқ бўлгани учун ҳам, у илмий муомалага жуда катта ҳажм ва кўламдаги материални жалб этди, қиёсий адабиётшунослик ривожига хизмат қилди, тарихий поэтика соҳасининг шаклланишига ҳам маълум даражада асос солди.

**САНОЙИЪ** (ар. *صنایع* — санъатнинг кўплиги) — нутқни гўзал қилувчи бадиий воситаларнинг жами. Нутқни безовчи воситалар, нутқ гўзалликлари дастлаб икки турга бўлинади. Биринчиси нутқнинг атайлаб ишлов берилмаган, тил ҳодисасига айланиб улгурган табиий гўзаллиги бўлиб, улар *зотий гўзалликлар* дейилади. Нутққа безак бериш учун атайин яратиладиган воситалар *оризий гўзалликлар* дейилади. Атоуллоҳ Ҳусайний таъбири билан айтганда: «*Биринчи навъи ... дилбарларнинг табиий ҳусни янглигдур ва иккинчи навъи ... безаклар сингаридур*». Илми бадиёда С.ни нутқнинг кўпроқ қайси жиҳатига безак бериши жиҳатидан *лафзий, маънавий* ҳамда *лафзӣю маънавий санъатлар* кўринишида таснифлаш аъъанаси шаклланган. Нутқнинг маъно томони билан боғлиқ бўлиб, унинг маъно гўзаллигини таъминлашга хизмат қилувчи шеърий санъатлар *маънавий санъатлар* деб юритилади. Адабиётларда *ийҳом, тавжих, таҷоҳули ориф, талмех, ирсол ул-масал, ҳусни таълил, лаффу нашр, муболага, ташбеҳ, тамсил, истиора* каби ўнлаб санъатлар *маънавий санъатлар* сирасига киритилади. Шеърнинг кўпроқ шакл томонига эътибор қаратган ҳолда унинг услубига безак берувчи санъатлар эса *лафзий санъатлар* дейилади. Айни пайтда, бу ўринда маъно ҳам эътибордан четда қолмайди, аксинча,

«алфозни маънога тобиъ қилмоқ» (А.Хусайний) талаби қўйилади. *Илми бадиъга* оид асарларда *тарсеъ, тажнис, сажъ, қалб, тажзия, зулқофиятайн* кабилар *лафзий санъатлар* сифатида тавсифланади. Нутқни гўзал қилувчи бир гуруҳ воситалар ҳам шаклга, ҳам маънога алоқадор бўлгани боис, *лафзию маънавий* ёки *муштарак санъатлар* деб юритилиб, унга *тақобул, муқобала, таъдил, тансиқ ус-сифот, иқтибос, тазмин, хусни ибтидо, хусни тахаллус, хусни матлаъ, хусни мақтаъ* кабилар киритилади. Санъатларни бундай гуруҳлашда бирмунча шартлилик бор. Чунки шаклнинг маънодан, маънонинг эса шаклдан айри ҳолда санъат ҳосил қилиши мумкин бўлмаган ҳолдир. Бу ҳақда яна Атоуллоҳ Хусайний ёзади: «Борча гўзалликларнинг асоси улдурким, нутқ ул тарзда адо этилгайким, маънони англашга, анинг латофати, таркиби ва соғламлигига ҳеч бир халал етмагай. Асос ул эмаским алфозга хусни зийнат бермакка сайъ қилгайлар-у, маънога халал етур ҳолдин кўз юмгайлар ёхуд, аксинча, холис маъно баён этиб, хусни адо тариқига йўламагайлар».

**САРБАСТ, ВЕРЛИБР** – ўзбек адабиётида XX асрдан оммалаша бошлаган шеър шакли. С.да ёзилган шеър мисраларидаги бўгинлар сони ҳам, уларнинг чўзиқ-қисқалиги ҳам, тuroқланиш ёхуд қофияланиш тартиби ҳам мутлақо эркиндир. Шунинг учун ўзбек адабиётшунослигида С. ва *эркин шеър* терминлари кўпинча синоним тарзда ишлатилади, бироқ бу терминлар бошқа-бошқа тушунчаларни англатади (қ. *эркин шеър*). С. шеър насрий нутқдан аввалбошдан нутқий булак (мисра)ларга бўлиниши билан фарқ қилиб, бу нарса график (ҳар бир мисрани алоҳида сатрга ёзиш) ва интонацион (ритмик пауза ва ритмик акцентлар ҳисобига) жиҳатдан таъкидланади. Х.Давроннинг «Энг кучли бақриқ...» номли шеъри С.га мисол бўла олади:

<i>Энг кучли бақриқ –</i>	6
<i>Соқовнинг бақриғи.</i>	7
<i>Ў, қандай куч билан бақирар</i>	9
<i>Қабртошлар...</i>	3
<i>Энг кучли сукунат – на кўз сукути,</i>	11
<i>на соқов сукути, на тош сукути.</i>	11
<i>Энг даҳшатли сукунат – Шоир жим юрса...</i>	12

Келтирилган шеърда мисралардаги бўгинлар сони турлича, мисраларнинг ўзаро қофияланиши кузатилмайди, лекин график кўриниши унинг шеър эканини, эмоционал тўйинтирилган нутқ экан-

лигини таъкидлаб турадики, уни мос оҳанг билан ўқиймиз. Прозаик нутқдан фарқли ўлароқ, бунда нутқнинг мусиқий бўлишига ҳам эътибор берилади, лекин унинг мусиқийлиги тенг ўлчовлилик ёки тартибли қофияланиш асосида эмас, балки сўз ва товуш такрорлари, ритмик ургулар ҳисобига таъминланмоқда, С.да ёзилган шеърнинг анъанавий бармоқ ёки аруздаги шеърдан фарқли томони шуки, ундаги оҳангдорлик аввалбошдан маълум маромга солинмайди, муайян маромга мос кечинмалар ифодаланмайди. Аксинча, бунда фикр-туйғуга мос оҳанг сўзнинг маъноси асосида юзага келади, яъни бу ўринда маъно асосида ўқилади ва сўзлар шунга мос оҳангларга ўралади.

**САРГУЗАШТ АДАБИЁТИ** – ҳақиқатда юз берган ёки тўқиб чиқарилган воқеаларни қизиқарли тарзда ҳикоя қилувчи воқеабанд асарларнинг умумий номи. С.а. намуналарига хос умумий хусусиятлар сифатида сюжет воқеаларининг шиддат билан ривожланиши, сирли ва ажабтовуф воқеаларнинг юз бериши, ўтқир интригаларга бойлиги, сюжет ситуацияларининг кескин ўзгариши ва персонажлар тақдирида терс бурилишлар юз бериши (омад – омадсизлик, бахтиёрлик – бахтсизлик), қаҳрамонларнинг турли синовларга дуч келишию уларни енгиб ўтиши ва ш.к.ларни кўрсатиш мумкин. Бу жиҳатлари билан С.а. *фантастика, илмий фантастика ва детектив адабиётга* яқин туради, аниқроғи, *саргузаштлилик* бу турдаги асарларнинг барчасига хос хусусиятдир. Шунга кўра, кўплаб асарларда *саргузаштлилик, детектив ва фантастика* элементларининг қоришиқ ҳолда намоён бўлиши табиийдир. Айни чоғда, саргузаштлиликка енгил-елпи ҳодиса сифатидагина қараш ҳам унчалик тўғри бўлмайди. Чунки жаҳон адабиёти саргузаштлилик асосида яратилган жиддий асарларни, сўз санъатининг нодир намуналарини ҳам билади. Жумладан, Сервантеснинг «Дон Кихот», Ф.Рабленинг «Гаргантюа ва Пантагрюэль», Ж.Свифтнинг «Гулливернинг саёҳатлари» каби асарлари ҳам саргузашт сюжет асосига қурилган. Умуман олганда, кўпроқ оммавий китобхонга мўлжаллангани, китобхонни ўзига жалб этишни асосий мақсад қилишидан келиб чиқиб С.а. *беллетристикага* мансуб дейилади. Айримлар эса болалар ва ўсмирлар томонидан севиб ўқилгани учун С.а.нинг кўплаб намуналари, жумладан, А.Дюма, Ф.Купер, М.Рид, Р.Стивенсон, Р.Хаггард каби адибларнинг дунёга машҳур асарларини болалар адабиёти сирасига киритадилар. Ўзбек адабиётида саргузашт сюжет асосида яратилган асарлар (А.Навоий. «Фарҳод ва Ширин»; Ғ.Ғуллом. «Шум



бола» ва б.) ҳам, С.а.нинг яхши намуналари ҳам (Х.Тўхтабоев. «Сариқ девни миниб») мавжуд.

**САРИЪ** (ар. *سريع* – тез) – аруз бахрларидан бири, тез айтилдиган бахр бўлгани учун шундай номланган. 2 та *мустафъилун* (– – V – / – – V –) ва 1 та *мафъулоту* (– – – V) аслларининг кетма-кет такрорланишидан ҳосил бўлади. Навоийнинг «Мезон ул-авзон» асарида С. бахрининг беш вазни, Бобурнинг «Мухтасар»ида ўн етти вазни мисоллар билан келтирилган. С. бахрининг бир неча вазнлари бўлса ҳам, шеъриятимизда, асосан, икки вазнидан кенг фойдаланилади. Ўзбек мумтоз шеъриятида илк бор Алишер Навоий ўзининг икки ғазали ва бир фардини ҳамда «Хамса» таркибидаги «Ҳайрат ул-аброр» достонини С. баҳрида яратган. Навоийдан сўнг Огаҳий, Муқимий, Ҳабибий каби шоирлар ҳам ушбу баҳрда шеърлар ёзганлар. Мас., Навоийнинг:

*Сендин йироқ кўзнинг эрур ҳайронлиги,  
Ҳажринг аро ҳар лаҳза саргардонлиги, –*

байти шу баҳрда бўлиб, у *сарийи мусаддаси солим* (– – V – / – – V – / – – – V) вазнидадир.

**САРКАЗМ** (юн. *sarkazo* – этини юлмоқ) – 1) комикликнинг тури, тасвирланаётган нарсага қаратилган заҳарли кулги. Антик даврлардан келувчи анъанага кўра, С.га киноянинг бир тури, унинг кескин ва юқори даражада намоён бўлиши сифатида қаралади. С. билан киноя орасида ўхшашлик катталигига қарамай, уларни жиддий фарқловчи жиҳатлар ҳам бор. Жумладан, кинояда ҳаминша кўчма маънолик хусусияти сақланади ва объект билан ифода алоқаси пардаланади, С.да эса кўчма маънолик, пардаланганлик хусусияти емирилади – назарда тутилган объект билан ифоданинг алоқаси анча очиқ бўлади. Агар кинояда баҳо контекстда реаллашса, С.да салбий баҳо матннинг ўзиданоқ англашилади – у гўё ҳарир мато билан пардаланган (юзадаги мақтов ёки нормал муносабат замиридаги кулги шундоқ сезилиб туради). Маълум даражада пардаланганлик С.ни *инвективадан*, ошқора фош этувчи ғазабли нутқдан фарқлайди. Айни чоғда, С. субъектив муносабатнинг намоён бўлиши жиҳатидан ҳам киноя билан инвектива оралиғида туради: кинояда объектга нисбатан яшириб, хотиржам турган ҳолда кулинса, С.да субъект муносабати яширилмайди, лекин унинг ифодаси *инвектива* даражасида кескин бўлмайди; 2) бадийлик модуси. С. бадийлик

модуси сифатида юмор билан бирга бир гуруҳни ташкил қилади. Агар юморда ниқоб остида индивидуаллик бўлса, С. ниқоб остида индивидуалликнинг йўқлиги билан характерланади. С. бадийлик модуси қаҳрамони учун ниқоб оламда мавжудликнинг ягона шакли унинг бору йўғи ниқоб, шунинг учун ундан айрилиб қолмасликка ҳаракат қилади. Яъни С.даги «мен» – ноль, йўқ даражадаги «мен», у оламда ниқобсиз мавжуд бўлолмайди. Мас., «Парвона»даги Уткурий турли ниқоблар (шоир, ошиқ, улфат ва ҳ.)ни кетма-кет алмаштираверади, бироқ бу ниқоблар ортида унинг ўзига хос шахсияти кўринмайди. Ёки М.Муҳаммад Дўстнинг «Истеъфо» қиссасидаги бошқа қаҳрамонларга киноявий муносабат кузатилгани ҳолда, Бинафшахонга муносабат С. даражасига чиқадики, унда ҳурмат қилишга, қадрлашга арзийдиган шахсиятнинг ўзи йўқ. Бинафшахон фақат роль ўйнайди, унинг турган-битгани ниқобдан («элга таниқли шоира», «катта арбобнинг хотини») иборат, холос. «Бинафшахон шеър ёзганда тақадиган тақинчоқларини тақиб... фаранги атирнинг анвойи бўйларини ҳар ён таратиб» каби жумлалардан унинг барча хатти-ҳаракатлари ниқобга мос қиёфани ўхшатишга қаратилганини англаш мумкин. Худди юморда бўлгани каби, С. бадийлик модуси учун ҳам энг олий қадрият – индивидуаллик. Фарқи шуки, юмор ниқоб остидаги ҳақиқий индивидуаллики очишга қаратилса, С. қаҳрамон ниқоб қилиб олган сохта индивидуаллики инкор қилишга қаратилади.

**САТИРА** (лот. *satura* – аралаш, қурама) – 1) комикликнинг асосий турларидан бири. С.нинг юмордан фарқи шундаки, у ўз объектида айрим нуқсонлар, тузатса бўладиган камчиликларни эмас, балки бутунлай танқид ва инкор этиладиган моҳиятни – жамият ва унинг тараққиёти учун жиддий зарар келтирадиган, ижтимоий ҳавфли иллатларни кўради. Шу боис С. тузатишни эмас, бутунлай йўқотиш мақсадини кўяди. С.даги кулги юмордаги каби дўстона, беғараз кулги эмас, балки фош қилувчи бешафқат кулгидир (мас., А.Қаҳҳор. «Оғриқ тишлар», «Тобутдан товуш»); 2) бадийлик модуси. С., одатда, қаҳрамонликка тескари модус сифатида талқин этилади. Сатирик модус қаҳрамони жамият ҳаёти учун муҳим ва долзарб мақомга даъво қилгани ҳолда, шахс сифатида бундай мақомга муносиб бўлолмайди. Унинг барча интилишлари, муҳим ва ноёб шахс эканига ўзини ва бошқаларни ишонтиришга уринишлари, ўзи эгаллаб турган мақомни сақлаб қолиш учун хатти-ҳаракатлари – барчаси ўз-ўзини тасдиқлаш шаклида бўлишига қарамай, моҳиятан

ўз-ўзини инкор қилишгача олиб келади. Сатиранинг идеали ҳам худди қахрамонлик модусидаги каби жамият ҳаётидаги энг муҳим ва долзарб вазифани адо этувчи шахсдир. Фарқи шуки, сатирик қахрамоннинг моҳияти (имкони, савияси ва б.) у ижро этаётган рол (ижтимоий мавқеи, вазифаси)дан анча тор. Қахрамон буни англаб тургани ҳолда, ўзини эгаллаб турган мавқеига муносиб қилиб кўрсатишга интилади, бу эса уни қахрамонлик ва трагик модуслардан фарқлайди. Сатирик модуснинг воқе бўлишида муаллифнинг фаол муносабати, кулги орқали инкор қилиш мавқеида туриши муҳим. Шу билан бирга, сатирик модус марказидаги шахс муаллиф учун кулги объектигина бўлиб қолмайди, у ҳам, модус назариясидаги «мен-оламда» концепциясига кўра, трагик ва драматик қахрамонлар каби муаллиф (китобхон) учун ўз-ўзини англаш имкониятидир. Айтиш керакки, модус маъносидаги С. комиклик тури сифатида тушуниланган С. билан доим ҳам мувофиқ келмайди. Бу ўринда С. қахрамонлик модусининг трансформацияга учраши натижасида ва унинг зидди сифатида пайдо бўлгани (қахрамон – аксилқахрамон), шунингдек, комиклик С.нинг бош хусусияти эмас, балки унинг учун факультатив ҳодиса эканлигини эсда тутиш лозим. Бундан ташқари, битта асар доирасида турли бадиийлик модуслари қоришиқ ҳолда намоён бўла олади. Агар шулардан келиб чиқилса, мас., А.Қаҳҳорнинг «Сароб» романидаги Саидийга фақат драматик модус эмас, сатирик модус қахрамони сифатида ҳам қараш керак. Муаллиф уни инкор қилади, бироқ қахрамон эстетик аналогия сифатида ёзувчи учун ўз-ўзини англаш воситаси бўлиб, Саидийнинг йўли нотўғри эканлигини ўзи учун тасдиқлаб олишни хоҳлайди. Табиийки, ўқувчида ҳам худди шу ҳолнинг кечиши кўзда тутилади. Демак, «Сароб»дан трагик ёки фақат драматик катарсисни кутиш ўзини оқламайди, чунки бу ҳолда субъект – объект – ўқувчи бирлигига эришилмайди. «Сароб»нинг баъзан нотўғри талқин ва баҳолашга учрагани асар бадииятининг айна шу хусусияти доим ҳам эътиборга олинмагани билан изоҳланиши мумкин.

**СЕНТИМЕНТАЛИЗМ** (фр. *sentiment* – ҳис) – XVIII асрнинг иккинчи ярмида Европа миллий адабиётларида вужудга келган оқим, номланиши англиз адиби Л.Стерннинг «Сентиментал саёҳат»(1768) асари билан боғланади. Маърифатпарварлик рационализмининг таназзулга учраши натижасида майдонга чиққан С., ундан фарқли ўлароқ, инсон табиатининг жавҳари онг эмас, ҳисдир деган қарашга асосланади. Шунга кўра, С. мукамал инсонни тарбиялашнинг шар-

ти дунёни ақлга мувофиқ таразда қайта қуриш эмас, унга табиатан хос бўлган ҳисларни эркинлаштириш ва ривожлантиришдир деб билади. С. адабиётининг қахрамони хос муҳим хусусият юқори даражада индивидуаллаштирилганлик бўлиб, бу жиҳати билан у жонли инсонга яқинроқ туради. Яна бир жиҳати, С.да куйи табақа кишилари ҳаёти, ички дунёси тасвирига кўпроқ эътибор бериладики, бу унинг ютуқ томони, кашфи сифатида баҳоланади. Табиийки, С.да инсонни баҳолаш мезони ҳам шунга мос ўзгарди: инсон қиммати унинг ҳис эта олиш даражаси, катта туйғуларга қобиллигига қараб белгиланади, ҳис эта олиш инсонга хос энг юксак фазилат ҳисобланади. С. адабиёти инсон руҳиятини чуқур таҳлил қилишга интилди, инсон бир қилип доирасида қолмаслиги, унинг турли омиллар таъсирида «ҳар хил» бўлиб туриши мумкинлигини кўрсата олди ва бу билан инсонни анча ҳаётий тасвирлашга эришди. С.нинг кўплаб вакиллари инсон руҳиятини, умуман, инсонни ижтимоий муҳит билан боғлиқликда тасвирлашга интилдилар (Ж.Руссо. «Янги Элоиза»; Д.Дидро. «Фаталист Жак»). Булар С. бағрида адабиёт тараққиётининг кейинги босқичлари – романтизм ва реализмга хос хусусиятлар ниш уриб етилгани, унинг бадиий тафаккур ривожидида сезиларли аҳамият касб этганидан далолат беради. Айна чоғда, С. адабиётининг ўртамиёна намуналарида меъёрдан ошган, сунъийлик даражасига етган эмоционаллик – йиглоқилик, ҳиссийётга ўта берилувчанлик, ҳиссийётлар оламида ўралашиб қолишлик каби жиҳатлар ҳам учрайди. Илмий муомалада салбий маънода қўлланувчи «сентименталлик» терминининг келиб чиқиши шунга бориб тақалади. Шу билан бирга, жаҳон бадиий тафаккури С.нинг бош хусусияти бўлган ҳиссийликни ўзига сингдириб олганини ҳам эътироф этиш керакки, *сентименталлик* (қ.) адабиётдаги воқеликка муносабат турларидан бири сифатида тушунилиши шундандир.

**СЕНТИМЕНТАЛЛИК** (русчадан калька: «сентиментальность») – муаллиф эмоционаллиги кўринишларидан бири; маънавий дунёси гоят бой бўлгани ҳолда, ҳаётда шунга муносиб ўрин тополмаган, тақдирнинг изми ёки жамиятнинг жорий тартиботлари бир четга суриб қўйган инсонларга ачиниш ҳисси билан йўғрилган муносабат. Бадиийлик модусларидан фарқли равишда, С. кўпроқ субъект билан боғлиқ. Яъни бу ўринда *субъект – объект – ўқувчи* учлигидан биринчиси (ижодкор) етакчилик қилади. Шуни ҳам таъкидлаш жоизки, ижодкор С.и барча ўқувчиларга бирдек таъсир қилолмайди, бу нарса конкрет ўқувчининг характер хусусиятлари, бадиий диди,

дунёқараши кабилар билан бевосита боғлиқдир. Яъни ижодкор С.и айрим ўқувчиларда шунга мос катарсисни юзага келтирса, бошқаларида киноявий муносабат ҳам уйғотиши мумкин. Мазкур ҳол С.нинг объект (қаҳрамон)даги асоси аниқ-равшан, мустаҳкам эмаслиги билан боғлиқдир. Ривоя персонаж тилидан берилган ёки муаллиф ўзи билан персонаж орасида эстетик дистанцияни сақлай олмаган (бу нарса, айниқса, бошловчи ижодкорларга хос) ҳоллар-да объект (қаҳрамон)нинг ўзида С. бордай туюлади, лекин бу ҳол-да ҳам С., аслида, муаллифнинг гоёвий-эмоционал муносабати асосида юзага чиқади. Чунки объект ўз табиатида кўра трагик ёки драматик хусусиятга эга бўлиши мумкин, бироқ муаллиф ундаги бу жиҳатларга урғу беришга эмас, унга ачиниш туйғуларини ифодалаш ва ўқувчига юқтиришга интилади. Мас., Чўлпоннинг «Қурбони жаҳолат» ҳикояси қаҳрамони Эшмуродда *драматизм*даги каби ўзини ўзгаларга (муҳит, жамият ҳолати) қарши қўйган ҳолдаги ички фаол муносабат бор. Лекин муаллиф қаҳрамонида мавжуд драматизм имконларини рўёбга чиқариш ўрнига унга сентиментал муносабатини ифодалаш ва шу орқали ўқувчида ачиниш туйғуларини уйғотишга интилади. Натижада Эшмурод ўқувчи ачиниши керак бўлган «қурбон» мақомида қолади, муаллиф С.и қаҳрамонни ёқлаб, уни «қурбон» қилаётган муҳитни инкор этишга қаратилади. Сентиментал қаҳрамонлардан фарқли ўлароқ, трагик ва драматик қаҳрамонлар ўз мавжудлигини намоён этиш учун олам тартиботига (трагизм) ёки бошқа бир «мен»га – ўзгаларга (драматизм) қарши тура олади, яъни улар ҳаракатсиз, пасив қурбон эмас, уларнинг ҳатто ўлими ҳам ўз мавжудлигини намоён қилиш йўлидаги ҳаракат, уриниш бўлиб қолади (Анна Каренина, Жюльен Сорель). Агар бадиийлик модуслари асосида ётувчи «мен-оламда» концепцияси қаҳрамоннинг ўз мавжудлигини англаши ва намоён этишини талаб этса, С.да қаҳрамоннинг мавжудлигини идрок этган ҳолда уни намоён қилолмаслиги кузатилади ва айна шу ҳол уни «қурбон» мақомида қолдиради (қиёсланг: «Ўткан кунлар»даги Кумуш ва «Даҳшат»даги Унсиннинг ўлими).

**СИЛЛАБИК ШЕЪР ТИЗИМИ** (юн. syllabe – бўгин) – бир хил миқдордаги бўгинлардан таркиб топган мисралар таҳририга асосланувчи шеър тизими. С.ш.т. ургуси тургун бўлган тиллар (мас., француз тили) табиатида мос бўлса-да, тарқалиш кўлами анча кенги, бу турли омилларга боғлиқ. Мас., роман тилларидаги адабиётларда у антик шеър тизими асосида, бу тил эгалари учун лотин тилидаги хижола қисқа-чўзиқлиги аҳамиятсиз бўлиб қолиши оқибатида (яъни

қисқа-чўзиқлик фарқланмай қолгач, антик шеърларда *изометрия* фақат хижолапар сонига боғлиқдек бўлиб қолган) юзага келган ва у миллий тил табиатида мос шеър тизимига ўтишда бир босқич бўлиб хизмат қилган. Жумладан, рус шеърлятига поляк адабиётидан ўзлашган силлабик шеърларда мисра охири ёки ўртасида ритми таъкидлаш учун урғули бўгин келтирилганки, бу кейинчалик силлаботоник шеър тизимига ўтишга асос бўлган. Баъзида С.ш.т. билан *бармоқ* битта нарса деб тушунишга мойиллик кузатиладики, бу тўғри эмас. Бармоқ тизимида, силлабик шеърдан фарқли ўлароқ, мисрадаги бўгинлар сонигина эмас, уларнинг қай тартибда туюқланиши ҳам аҳамиятлидир (қ. *бармоқ*).

**СИЛЛАБО-ТОНИК ШЕЪР ТИЗИМИ** (юн. syllabe – бўгин, tonos – урғу) – шеър мисраларида урғули ва ургусиз бўгинларнинг бир тартибда гуруҳланиб такрорланишига асосланган шеър тизими, ХХ асрга қадар ушбу шеър тизими «*силлабо-метр*ик» деб номланган. Рус шеърлятида В.Третьяковский ва М.Ломоносовлар ўтказган ислохотдан сўнг мазкур шеър тизими етакчилик қила бошлаган. Рус силлабо-тоник шеър тизимида бешта *стоп* (руск) бўлиб, улар *хорей*, *ямб*, *дактиль*, *анapest* ва *амфибрахий* тарзида антик шеър тизимидан ўзлаштирилган терминлар билан юритилади. Шу стопларнинг тартибли такрори ритми ҳосил қилади, конкрет шеър ўлчови эса *уч стопали ямб*, *тўрт стопали ямб* қабилда номланади.

**СИМВОЛИЗМ** (юн. simbolon, фр. symbolisme – белги, нишон) – Европада XIX аср охири – XX аср бошларида кузатилган маданий-маънавий инкироз шароитида, позитивистик ёндашув (қ. *натурализм*) ва тобора урчиб бораётган омма адабиёти (*беллетристика*) намуналари обрўсизлантирган реалистик тасвир принципларига қарши ўлароқ вужудга келган адабий оқим. С.нинг адабий-эстетик асослари XIX асрнинг 60 – 70-йилларида П.Верлен, А.Рембо, С.Малларме каби француз шоирлари ижоди билан қўйилган. Мутахассислар С.га *романтизм* вори сиқатида қарайдилар, шу боис унинг фалсафий асосларини А.Шопенгауэр, Э.Гартман ва қисман Ф.Ницше таълимотида кўрадилар. Символистлар конкрет-ҳиссий идрок доирасидан ташқарида турувчи гоёлар, «ўзи-ўзидаги нарса»ларни бадиий акс эттиришга интиладилар. Уларга кўра, *символ* кундалик маишат домидан кутулиш ва дунёнинг идеал моҳиятини англаш учун образдан кўра самаралироқ воситадир. Улар шоир қалбан мутлақ ҳақиқатга яқин туради, шу боис у оламни *символ*лар орқали интуитив тарзда идрок эта олади деб ҳисоблайдилар. Умуман олганда, С. намоёнда-

лари дунёқараш нуқтаи назаридан Афлотунизм таълимоти, пантеизм фалсафаси, оламни рамзли идрок этишга қаратилган христиан диний-мистик таълимотлар (мас., Псевдо Дионисий, Августин ва б.) билан ҳам боғланади. Рус С.ининг фалсафий-эстетик қарашлари (улар В.Соловьёв таълимотига асосланади) ҳам кўп жиҳатдан гарблик ҳаммаслақлари қарашларига мос, бироқ улар рус менталитети ва мамлакат ижтимоий-тарихий шароити билан боғлиқ ўзига хос жиҳатларга ҳам эга. Жумладан, рус С.ининг етакчиларидан бири Д.Мережковский уни юзага келтирган асосий омилни жамиятда «энг ашаддий моддиюнчилик билан руҳнинг энг эҳтиросли идеал интилишлари» тўқнаш яшаган давр шароитида кўради. Яъни бу ўринда ашаддий моддиюнчилар реалистлар бўлса, руҳнинг идеал интилишлари С.га хосдир. Уларга кўра, реалистлар ҳаётнинг оддий кузатувчилари, С.лар эса ҳамиша мутафаккирдир (К.Бальмонт). Символистларнинг реалликдан безгани, оламни интуитив тарздагина идрок қилиш мумкин деб билганлари уларни романтизмнинг бевосита ворислари дейишга асос беради. Улар учун дунё қоронғу бир зиндон, ундан чиқадиган биргина туйнук борки, у ҳам бўлса ижод онларидаги экстаз ҳолатидир, айна шу онларда санъаткор оламнинг моҳиятига кира билади. Санъатнинг вазифаси эса шу онларни мангуга муҳрлашдан иборатдир. Яъни санъат бошқа соҳаларда ваҳий деб аталувчи нарсанинг ўзгинаси. Шунга кўра, ижодкор ўз қалбининг қоронғу пучмоқларини ўзи учун ойдинлаштиришга киришган палладагина санъат бошланади (В.Брюсов). С. вакиллари учун символ – мангуликка очилган дарича. Айна чоғда, символлар воқелик қаъридан табиий равишда ва беихтиёр оқиб чиқиши лозим, мабодо ижодкор бирон-бир гоёни ифодалаш учун уларни ўйлаб топса, унинг ўлик аллегориядан фарқи қолмайди. Яъни конкрет мазмунга боғланган аллегориядан фарқли ўлароқ, символ доимий ҳаракатда – у турфа мазмун қирраларини очиб бораверади; символ воситасида ифодаланган фикр сирли милтираб, ҳамиша ўзига жалб этиб туради, у инсон қалбига сўз билан айтгандан кўра кучлироқ таъсир қилади. Майдонга келган давр ижтимоий ҳаётидаги бўҳронлар, маънавий таназзул билан боғлиқ ҳолда С.да ҳам *декаданс* кайфияти сезиларли, шунга қарамай, унинг энг иқтидорли вакиллари ижоди умумбашарий ва мангу муаммоларнинг бадий идрокига қаратилган бўлиб, бадий тафаккур ривожига муносиб ҳисса бўлиб кўшилган.

**СИНЕКДОХА** (юн. *synekdoche* – нисбат бериш) – кўчим тури, бутун-қисм алоқаси асосидаги маъно кўчиши, метонимиянинг бир

кўриниши. С.да ҳам маъно алоқадорлик асосида кўчади, шу сабабли унга метонимиянинг бир тури (унинг миқдорий кўриниши) сифатида қаралади. Мас., Х.Давроннинг «Кулол муҳаббати» шеъридаги илк банд:

*Саҳардан то оқшомга қадар,  
Кўкда порлаб ёнмагунча ой,  
Эртак сўйлар сархуш бармоқлар,  
Эртак тинглар қизил рангли лой...*

Бунда «эртак сўйлар» деганда кулол ўз ишига бутун меҳри, қалб кўри билан берилган ижоднинг сеҳрли онлари назарда тутилади. Эртак сўйлаётган «бармоқлар» – қисм, у бутунни – кулолни англатади. Метафора билан С.нинг бирлиги ифоданинг гўзал ва таъсирли бўлишини таъминлайди: гўё йирик планли кино кадри каби сеҳрли бармоқлар тафтидан ийиб, гўзал бир шаклга кираётган чархдаги лойни шеърхон кўз олдига келтиради. Ёки М.Юсуфнинг:

*Фақат шу ер яқин юракка,  
Фақат шунда қувонар кўзлар, –*

мисраларида «кўз» одам маъносида ишлатилгани ҳам С.га мисолдир. Якка нарса номини аташ билан умумни назарда тутишлик ҳам С. саналади. Ш.Раҳмон бир шеърида: «Қадимда мевалар етилган пайтда савоб деб яшаган комил *аждодим* мусофир чанқоғин боссин деб атай бузиб кўяр экан боғлар деворин», – деб ёзаркан, «қадим аждодим» бирикмаси остида аждодларни, бутун халқни назарда тутади. Шунга ўхшаб «Ўзбекнинг қоракўз *болаларига* битта дунё қолсин ҳайратлик» деганида ҳам ўзбек халқи назарда тутилган. Бадий асарларда атоқли отларнинг турдош от маъносида қўлланиши ҳам С.нинг бир кўриниши саналади. Чунки, мас., шоир «фақат Жумавойи бўлгани учун ҳавасларинг келар Робинзонларга» деганида, машҳур романга ишора қилгани ҳолда, Робинзонга ўхшаш ҳаёт кечирувчи кишиларни – кўпчиликни назарда туттади.

**СИТУАЦИЯ** (фр. *situation* – ҳолат, шарт-шароит) – сюжетшунослик категорияларидан бири, воқеабанд сюжетнинг муҳим унсури. С. деганда сюжетнинг икки муҳим воқеаси орасидаги шундай ҳолат назарда тутиладики, унда иштирок этувчи персонажлар ва улар орасидаги ўзаро муносабатлар муайян даражада тургунлик касб эта-

ди. Бироқ сиртдан тургун кўринган ҳолат ўз ички зиддиятларига эга: турли персонажлар мавжуд ҳолатни у ёки бу тарзда ўзгартиришни истайди. Ички зиддиятлар ҳолатни кескинлаштиради ва бу кескинлашув С.ни коллизияга (қ. *коллизия*) айлантирадики, энди сифат жиҳатидан бошқа С.га ўтилади. Шу маънода, сюжет ривожини бир С.дан иккинчисига ўтиш, шундай алмашишлар йиғиндиси сифатида таърифлаш мумкин. Мас., Чўлпоннинг «Кеча» романидаги Зеби сюжет чизигининг илк С.и: сўфининг хонадонида тутқун мақомида яшаётган, энди кўнгли кенгликларга талпинаётган Зеби (бу ҳолат роман вақтига қадар шаклланган, унинг иштирокчилари Зеби, Раззоқ сўфи ва Қурвонбиби). С.да мавжуд ички зиддият Салтининг келиши ва дугонасини қишлоқ сафарига таклиф этиши билан очиқроқ намоён бўлади. Раззоқ сўфининг кириб келиши билан *коллизияга* айланади ва сафарга рухсат берилиши билан сифат жиҳатидан янги С.га алмашади. Умуман, Зеби сюжет линияси яна *сафар – тўй арафаси – мингбошига таслим бўлиш – кундошлар орасидаги турмуш – суд* каби С.ларни ўз ичига олади. Ушбу С.ларнинг ҳар бирида иштирок этувчи персонажларнинг ўзаро муносабатлари маълум даражадаги тургунликдан *коллизияга* ва сўнг сифат жиҳатидан янги С.га айланишини кузатиш мумкин. С.нинг сюжетда намоён бўлиши асар жанри, турга мансублигига қараб турлича бўлади. Жумладан, драматик асар сюжетида С. ва унинг алмашилиши яққол кўзга ташланиши муҳим хусусият, ҳикояларда эса С. ва унинг ўзгариши бир воқеанинг ички эпизодлари даражасида намоён бўлади.

**СИФАТЛАШ** – қаранг: **эпитет**

**СОНЕТ** (итал. sonetto, провансча sonet – кўшиқ сўзидан) – қатъий шеър шаклларида бири, шакл хусусиятларига кўра тасниф этилувчи лирик жанр. С. ўн тўрт мисрадан таркиб топиб, иккита *катрен* ва иккита *терцет*ни ўз ичига олади. С.нинг каноник шакли икки кўринишда бўлиб, «итальянча» вариантыда катренлари abab abab, терцетлари эса cdc dcd (ёки cde cde); «французча» вариантыда катренлари abba abba, терцетлари ccd eed (ёки ccd ede) тарзида қофияланади. Шеърят тарихида С.нинг каноник талаблардан чекиниш ҳоллари ҳам учрайди. Жумладан, «инглиз» С.ида учта катрен ва битта дистихдан ташкил топиб, катренлари abab cdcd efef тарзидаги кесишган, дистих эса gg тарзида жуфт қофияланади. Шунингдек, С.га бундан бошқа ҳам турли ўзгаришлар (қофияланишига: бошдан охиригача жуфт ва тоқ мисралари ababab... тарзидаги схема; композициясига: аввал икки терцет, кейин икки катрен; ўлчовига: катрен-

лардаги тўртинчи мисра бошқа ўлчовда ва б.) киритиб, турфа вариантлари тажриба қилиб кўрилган. Бироқ С.нинг каноник шакллари барибир ўз мавқеини дахлсиз сақлаб қолган, ҳозирда ҳам С. деганда шулар назарда тутилади.

**СОНЕТЛАР ГУЛЧАМБАРИ** – *сонетлар гулдастаси*; ўн тўртта сонетдан таркиб топган туркум бўлиб, ҳар бир сонет ўзидан аввалги сонетнинг охириги мисраси билан бошланади, ўн тўртта сонетнинг биринчи мисраларидан эса ўн бешинчи сонет – магистрал таркиб топади. Магистрал туркумнинг гоъвий-композицион асоси бўлиб, одатда, у бошқаларидан аввал ёзилади. Бу жиҳатдан қаралса, магистралнинг ҳар бир мисраси тартиб бўйича қолган ўн тўрт сонетнинг биринчи мисраси бўлиб келади. Ўзбек шеъриятида С.т. шоир Б.Бойқобилов ижодида кузатилади.

**СОЦИАЛИСТИК РЕАЛИЗМ** – XX аср бошларида Россия ва Европанинг бошқа мамлакатлари адабиётида юзага келган адабий йўналиш; шўролар ҳукумати томонидан расман қўллаб-қувватланган ва собиқ Иттифоқ ҳамда жаҳоннинг бошқа социалистик мамлакатлари адабиётида етакчилик қилган ижодий метод. Фалсафадаги тушунчаларни адабиётга «диалектик-материалистик ижодий метод» тарзида тўғридан-тўғри кўчиришга қарши ўлароқ С.р. термини шўро матбуотида илк бор 1932 йили ишлатилган. Кейинроқ собиқ Иттифоқ ёзувчиларининг биринчи съезди (1934) М.Горький томонидан инқилобий гуманистик гоъяларни амалга татиқ этишга қаратилган ижодий дастур сифатида таърифланган С.р.ни шўро адабиётининг асосий методи дея эътироф этган. Тўғри, XX аср бўсағасига келиб Европанинг қатор мамлакатлари, айниқса, Россиядаги инқилобий ҳаракатлар сабаб жиддий ўзгарган ижтимоий-тарихий шароитда адабиётнинг дунёни идрок қилишида ҳам жиддий ўзгаришлар содир бўлди: реализмни инкор қилиш билан бир қаторда уни сифат жиҳатидан янгилашга, янгиланган ижтимоий воқеликни янгича акс эттиришга интилиш ҳам мавжуд эди. Худди шу шароитда яратилган М.Горькийнинг «Она» романи, «Душманлар» пьесаси С.р. адабиётининг илк намуналари сифатида кўрсатилади. Ижодий принциплари нуқтаи назаридан қаралса, бу асарлар моҳият эътибори билан реалистик адабиёт намунаси эди, лекин уларда ҳаёт материални танлаш, тасвирлаш ва баҳолаш принциплари янгиланганди. Яъни бу адабиёт, аввало, гоъвий нуқтаи назардан фарқланди. Шу жиҳатдан С.р.ни XX аср бошларида вужудга келган ва собиқ Иттифоқ, шунингдек, жаҳоннинг қатор социалистик мамлакатлари адабиётида

70-йилларга қадар етакчилик қилган *адабий йўналиш* деб ҳисоблаш мумкин. Мазкур йўналишнинг табиий ва қонуний равишда, ижтимоий-тарихий шароитдаги ўзгаришлар билан боғлиқ ҳолда юзага келгани ва адабий жараёнда бошқа йўналиш ва оқимлар қатори мавжуд бўлгани шубҳасиз. Бироқ адабиёт соҳасида ўз гегемонлиги, яккахокимлигини ўрнатишга бел боғлаган шўро сиёсати уни муайян адабий-эстетик канонга айлантириш ва барча ижодкорларни шу асосда бирлаштирган ҳолда ўз мафкурасига хизмат қилдиришга интилди. С.р.нинг қатор талаблари ишлаб чиқилди. Жумладан, воқеликни инқилобий ривожланишда тасвирлаш, асарнинг инқилобий фаол гуманизм билан йўғрилган бўлиши, унинг марказида коммунистик *гоялар гапбасига ишонган ва шу йўлда толмай қурашаётган* ижобий қаҳрамоннинг туриши, давр зиддиятларини марксистик синфийлик нуқтаи назаридан тушуниш ҳамда баҳолаш ва ш.к. Мазкур талаблар туб моҳияти билан ғоявий асосда бўлиб, улар воқеликни бир ғоявий қолипда кўришни тақозо этиши билан, табиийки, ижодий индивидуалликка раҳна солади. Иккинчи томондан, улар 30-йиллар ўрталарида марксизм-ленинизм асосчиларининг қарийб 50 – 100 йиллар аввалги шароитда айтган фикрларига таянган ҳолда ишлаб чиқилган. Ҳолбуки, ўтган даврлар мобайнида ҳаёт XX аср шиддатига мос муттасил ўзгаришда бўлган. Албатта, бу зиддиятли ҳолатда С.р. назариясининг ижод амалиётидан орқада қолиши, унинг доғмага айланиши табиий эди. Натижада назария бир томон, адабий жараён бир томонлигича қолди. Ҳозирда совет даври адабиёти билан социалистик реализм адабиёти битта нарса эмаслиги кенг эътироф этилади. Зеро, чинакам санъаткорлар мафкура зугуми остида ҳам дунёни ўзича кўриш, тасвирлаш ва баҳолашга интилдилар. Аксинча, шу қолиплар асосида, шўро адиби олдида кўйилган талабларга оғишмай амал қилиб ёзилган асарларнинг аксарияти ғоявий схематизм қурбони бўлди, метод зугуми сабаб ижодий имкониятлар рўёбга чиқмади. Ўтган асрнинг 60 – 70-йилларидан методнинг доғмага айланиб бораётгани очик кўзга ташлана бошлади. Худди шу шароитда назарияда С.р.ни очик система сифатида талқин этиш, бошқача айтсак, уни ислоҳ қилишга интилиш ҳам кучайди. Бирок мазкур ҳаракат методни инқироздан сақлаб қолишга ожиз эди, чунки яккахоким мафкура шароити методнинг асоси (яъни марксча-ленинча фалсафа) дахлсиз қолишини тақозо этарди. Ҳозирги адабиётшуносликда С.р. методи ва адабиётга салбий муносабат, уни «сохта метод» деб аташ устуворроқ. Албатта, бунга муайян асос ҳам йўқ

эмас. Айни чоғда, С.р. адабиёт тарихининг маълум босқичида табиий равишда вужудга келганини ҳам эътироф этиш зарур. Фақат шу ҳодисани мутлақлаштириб, уни бадиий ижоддаги ягона ва энг тўғри йўл деб тушунилгани, муайян давр адабиётига хос хусусиятлар асосида гўё универсал қондалар ишлаб чиқилгани ва ижодкорларнинг уларга риоя қилиши лозимлиги деярли маъмурий тарзда белгилаб кўйилгани уни муқаррар таназзулга олиб келди.

**СОЦИОЛОГИК МЕТОД** – бадиий адабиётни, адабий ҳодиса ва фактларни ижтимоий ҳаёт билан узвий алоқада ўрганишга асосланувчи тадқиқот методи. Адабиёт ва санъатга ижтимоий ҳодиса сифатида қараш қадимдан мавжуд (мас., Афлотун. «Давлат») бўлсада, уларнинг ижтимоий табиатини илмий асосда ўрганиш XIX аср ўрталаридан бошланди. Адабиётга социологик ёндашув тамойиллари илк бор *маданий-тарихий мактаб* фаолиятида кўзга ташланади. Жумладан, шу мактабнинг йирик намояндаси И.Тэн адабий асарда маълум бир тарихий даврдаги «халқ руҳи» акс этади деб билади, бу руҳ эса миллатнинг айни шу даврдаги тафаккур даражаси, турмуш тарзи, урф-одатлари ва ш.к.лар билан чамбарчас боғлиқ. Тэнга кўра, адабий асар табиати «ирқ» (миллатга хос тугма сажия), «муҳит» (табиат, иқлим, ижтимоий шароит) ва «давр» (эришилган маданий даража ва анъана) хусусиятлари билан белгиланади. Шунинг учун адабий асарни алоҳида олиб эмас, балки шу омилларни ҳисобга олган ҳолда таҳлил ва талқин қилиш зарурки, шундай ёндашувгина илмий жиҳатдан асосли хулосалар чиқаришга имкон беради. Шундан бўлса керак, XIX аср ўрталаридан бошлаб адабиётшуносликда социологик ёндашувнинг салмоғи муттасил ортиб борди; социологик ёндашув марксистик адабиётшуносликнинг, хусусан, шўро адабиётшунослигининг ҳам асосини ташкил қилди. Дарҳақиқат, С.м. адабиётшуносликнинг қатор масалаларини ўрганишда муҳим ўрин тутди. Мас., бадиий воқелик билан реаллик муносабатлари, унинг тарихан ҳаққонийлик даражаси, ҳаёт ҳақиқати билан бадиий ҳақиқат муносабати каби масалаларни ўрганишда С.м.гина қўл келиши мумкин. Унга таяниб асарнинг ғоявий-мафкуравий томонлари, қаҳрамонларнинг характер хусусиятлари, асардаги конфликтлар табиати, образлар тизими ва ҳ. бадиий унсурларнинг ижтимоий илдизларини очиш мумкин. Ҳаёт ҳақиқатининг бадиий ҳақиқатга айланиш жараёни, характер ва прототип, тарихий шахс образи ва реал тарихий шахс муносабати каби ижод жараёни билан боғлиқ муаммоларни ўрганишда ҳам социологик ёндашув асос вазифасини ўтайди.

С.м.нинг адабиётшуносликда муҳим аҳамиятга моликлиги шубҳасиз, бироқ уни мутлақлаштириш ярамайди. Аксинча, унга мавжуд тадқиқ методларидан бири сифатида қараш, муайян масалани ўрганиш учун зарур ўринларда ва бошқа методлар билан бирликда қўллаш самаралироқ. Зеро, адабиёт фақат ижтимоий омилларгагина боғлиқ эмас, адабиётшуносликнинг предмети, уни қизиқтирган масалалар гоят серқиррадир. Бунини эътиборга олмаслик эса адабиёт учун зарарли оқибатларга олиб келиши мумкинки, бунга ёрқин мисолларни шўро адабиётшунослигидан истаганча топишимиз мумкин. Мас., шўро адабиётшунослигидаги *вульгар социологизм* кўринишлари С.м. мавқеини мутлақлаштириш натижаси эди. Бадиий асарлар, адабий ҳодисалар таҳлилида С.м. бузиб қўлланган, уларни шу асосда баҳолаган танқидий мақолалар кейинча кўплаб ижодкорларни қатагон қилиш учун дастакка айланди, ўқувчи оммани ўша ижодкорларни «халқ душмани», асарларини «зарарли» деб тушунишга тайёрлади. Айтиш керакки, шўро даврида айрича аҳамият берилган С.м. ҳозирда анча эътибордан қолган, кўпинча унга салбий муносабат кузатилади. Бироқ бунга қўшилиб бўлмайди, чунки гап методда эмас, ҳамма гап унинг қандай ва қай мақсадда қўлланишидадир. Демак, ундан воз кечиш тўғри эмас, зеро, адабиётшуносликдаги талай масалаларни тадқиқ этишда С.м.нинг муҳимлиги инкор қилиб бўлмайдиган ҳақиқатдир.

**СОҚИЙНОМА** (ар. *ساقى* – сув улашувчи, руҳий озуқа берувчи, *نامه* – хат) – мумтоз адабиётдаги ўзига хос композицион қурилишга эга йирик ҳажмли лирик жанр. С. бир неча банддан ташкил топиб, унинг ҳар бир банди маснавий шаклидаги бир неча байтдан (а-а, б-б, в-в ва ҳ.) таркибланади. Манбаларда С.нинг қатъий шаклий белгилари сифатида *мутақориб* баҳрида ёзилиши ва ҳар бир бандининг соқийга мурожат билан бошланиши кўрсатилади. Мас., Навоийнинг «Фавойид ул-кибар» девонига киритилган С. жами 32 банддан иборат бўлиб, унинг биринчи банди қуйидаги байт билан бошланади:

*Соқиб, тут қадаҳи шоҳона,  
Қатраси лаъл вале якдона.*

**СТИЛИЗАЦИЯ** (юн. *stylos* – мумланган тахтачага ёзиш учун ишлатилган таёқча; услуб) – муайян бадиий-эстетик мақсадларни кўзлаб ўзга бир ижодкор, давр, адабий йўналиш ва ш.к.ларга хос услубий хусусиятларни қайта тиклашга асосланган усул. Манбаларда бирон-

бир ижтимоий гуруҳга мансуб шахс тилининг ўзига хос жиҳатларини қайта яратиш ҳам С.нинг бир кўриниши деб таърифланади. Бироқ бунини *персонаж нутқини индивидуаллаштиришдан* фарқлаш лозим: С. ҳақида ривоят персонаж-ҳикоячи тилидан олиб-борилган ва ўша ҳикоячи нутқида хос услуб қайта тикланган ҳолларда гапириш тўғрироқ бўлади. Мас., Ф.Фуломнинг «Шум бола» қиссасида ривоят персонаж тилидан олиб-борилган ва унга хос услубий хусусиятлар қайта яратилган. Ёки Х.Султоновнинг «Кўнгил озодадур» қиссасида XIX аср адабий тили, хусусан, Гулханий услубига хос жиҳатлар қайта яратилади. Ёзма адабиётда фольклорга хос услубни қайта яратиш ҳам С.нинг анча кенг тарқалган кўринишидир. Бунга халқ йўлида ёзилган шеърлар (И.Мирзо. «Фарғонача»; Э.Шукр. «Менгим момонинг йўқлови»), адабий эртакларни (Ф.Фулом. «Ҳасан Кайфий», «Афанди ўлмайдиган бўлди») мисол қилиш мумкин. У.Азимнинг «Бахшиёна» туркуми, Х.Давроннинг «Бахши ўғиллари ҳақида ривоят», Фахриёрнинг «Бахшининг севгиси» асарлари халқ достонларига С. қилиш асосида яратилган. Шунингдек, С. *пародиянинг* ўзак хусусияти саналади, унда объектга хос услубий хусусиятлар сақлангани ҳолда, бу иш ҳажвий-кулгили тарзда амалга оширилади.

**СТОПА** (юнон тилидан русчага калька: оёқ, товон) – антик шеър тизимидаги ритмик бирлик, чўзиқ ва қисқа ҳижоларнинг муайян тартибдаги гуруҳи, уларнинг тақоррланиши ҳисобига маълум ўлчовли ритм юзага келади. Терминнинг пайдо бўлиши қадимда шеър ритми оёқни кўтариб-тушириш орқали белгилаб (доирада усул белгилангани каби) борилгани билан боғлиқ; қисқа ҳижода оёқ (товон) ердан узилиб, чўзиқ ҳижода ерга урилган. Термин рус силлабо-тоник шеърятти томонидан ўзлаштирилган бўлиб, унда С. ургули ва ургусиз ҳижоларнинг муайян тартибдаги гуруҳини билдиради. Бу шеър тизимида бешта *стопа* (руки) бўлиб, улар: *хорей* (–V), *ямб* (V–), *дактиль* (–V V), *анапест* (V V–) ва *амфибрахий* (V – V) тарзида антик шеър тизимидан ўзлаштирилган терминлар билан юритилган (ургусиз: V, ургули: –). Моҳиятига кўра, С. аруз тизимидаги *руки* (қ.) билан ўхшашдир.

**СТРОФИКА** (юн. *strophe* – бурилиш; банд) – шеършуносликнинг банд тузилиши ҳақидаги бўлими, шеърини мисраларнинг бандга бирикиш тамойиллари (ҳажм, жумла қурилиши, ритмик композиция) ва қонуниятларини, шунингдек, қатъий банд тузилишига (строфик) эга ва эга бўлмаган (астрофик) шеър шакллари, шаклий белгиларига кўра таснифланувчи қатъий шеърини шакллари ўрганади.

**СТРУКТУРАЛИЗМ** (лот. *structura* – қурилиш, жойлашиш) – XX асрдаги иккита жаҳон уруши оралиғида шаклланган ва 60-йилларга келиб кенг (айниқса, Францияда) оммалашган йўналиш, ижтимоий ва гуманитар илм соҳаларидаги тадқиқот методи. С.нинг отаси сифатида замонавий тилшуносликнинг асосчиси Ф. де Соссюр (1857 – 1913) эътироф этилади. Олим ўзининг «Умумий тилшунослик курси» асарида реал нутқ бирлиги билан унинг асосида ётувчи системани фарқлайдики, бу система инсон томонидан тил ўрганиш жараёнида ўзлаштирилади. Соссюрга кўра, шу системанинг структураси (тузилиши, унсурлари, уларнинг ўзаро муносабати)ни тавсифлаш ва ўрганиш тилшуносликнинг асосий вазифасидир. Худди шу тамойил кейинчалик, Иккинчи жаҳон урушидан сўнг, бошқа ижтимоий-маданий ҳодисаларга ҳам кўчирилиб, тилшунослик методлари эстетика, санъат ва маданиятнинг барча соҳаларига татбиқ этила бошланди. Тилшунослик методлари билан бирга С. ўз фаолиятида мантиқий-математик тадқиқ усулларига таянди, психоанализдаги онгсизлик категориясини ўзлаштирди. Дунёқараш нуқтаи назаридан С. экзистенциализмга зид мавқе эгаллагани ҳолда, фалсафадаги баъзи (марксизм, феноменология, герменевтика) таълимотлар билан муштарак нуқталари ҳам бор. Хусусан, мутахассислар С.нинг ҳаммадан ҳам неопозитивизмга яқин туришини таъкидлайдиларки, бу гуманитар билим соҳасини аниқ ва табиий фанлар (яъни аниқ ва қатъий қонуниятларига эга илм) даражасига етказиш мақсади билан изоҳланади. Хуллас, ўтган аср ўрталарига келиб С. ижтимоий-маданий ҳодисалар замирида ётувчи моделларни очиш, шу асосда ижтимоий-гуманитар соҳаларда объектив илмий билиш имкониятларини намоён этишни мақсад қилган илмий йўналиш, методга айланади. С. тилшунослик, адабиётшунослик ва антропологияда бошқа соҳаларга қараганда кучлироқ намоён бўлдики, илмий йўналиш сифатидаги С.нинг етакчилари сифатида тилшунос Р.Якобсон, адабиётшунос Р.Барт, антрополог К.Леви-Строссларнинг эътироф этилиши шундан.

С.нинг адабиётшуносликдаги илк куртаклари рус формал мактаби намояндалари (Р.Якобсон, В.Шкловский, Ю.Эйхенбаум, Ю.Тиньянов ва б.) фаолиятида юз кўрсатган бўлса, В.Проппнинг «Сехрли эртак морфологияси» (1928) асари мазкур метод анча изчил қўлланган тадқиқот саналади. Кейинчалик структур адабиётшунослик маркази Францияга кўчиб, унинг ривожчи Р.Якобсон, Р.Барт, Ц.Тодоров каби олимлар фаолияти билан боглиқ ҳолда кечди. Шунингдек, структур

адабиётшунослик ривожиди Ю.М.Лотман бошчилигидаги Москва-Тарту илмий мактабининг ҳам катта хизмати бор. Шу ўринда структурал адабиётшуносликка хос хусусиятлардан айримларини келтириб ўтиш ўринли. Жумладан, у адабий асарга имманентлик тамойили асосида ёндашади, яъни адабий асарни алоҳида ҳодиса сифатида олиб, унинг ички қурилишини тадқиқ этади, асардан ташқаридаги омиллар (генезиси, ривожланиши, ташқи вазифалари ва ш.к.) эътибордан соқит қилинади. Имманент таҳлилнинг мақсади эса тадқиқ этилаётган асарнинг ички қурилиши, ундаги унсурларнинг асарнинг систем бутунлик сифатида намоён бўлишини таъминловчи ўзаро алоқа ва муносабатларини ўрганишдан иборатдир. С. ифода ва маъно муносабатига ноанъанавий ёндашади. Анъанага кўра, маъно аввалдан мавжуд ва ифодалашни тақозо этадиган нарса сифатида тушунилса, С. буни инкор қилиб, структура – шакл унсурларининг ўзаро алоқа-муносабатлари системани юзага келтириши давомида маъно воқе бўлади деб билади. Яъни бу хил ёндашувада, бир томондан, маъно структуранинг ҳосиласи сифатида тушунилади; иккинчи томондан, ҳар қандай ҳодисанинг туб ва универсал структуралари мавжуд деган қарашдан келиб чиқиб айтиш мумкин бу структураларга маънони шакллантирувчи омил деб қаралади, натижада эса ижодда субъектнинг роли пасайтирилади ё буткул истисно қилинади. Туб универсал структураларни аниқлаш, нарса-ҳодисаларнинг математик аниқликдаги моделларини яратиш С. ўз олдига қўйган асосий мақсадлардан биридир. Жумладан, Ц.Тодоров структурал поэтика ўз тушунчаларини конкрет асарга эмас, балки ҳар қандай адабий матнга қаратади деб айтади. Яъни модель жанрга мансублигидан қатъи назар, ҳар қандай асар таҳлилинини асослашга ярамоғи керак. Р.Барт эса ўз олдига янада максимал мақсадни кўяди: у «сўнгги структура» ёки «матрица»ни излайдики, у нафақат адабий, балки, умуман, ҳар қандай матн, бунга қадар яратилган, яратилаётган ва яратилажак матнлар моҳиятини акс эттира олсин. Модель ва структураларни яратиш, табиийки, тадқиқ объектнинг структуравий унсурларини ажратиш, таснифлаш, улар орасидаги турли (бинар оппозиция, контраст, зидлаш, тўлдириш, симметрия, асимметрия ва б.) муносабатларни ўрганишни тақозо этади. Шунга кўра, структур адабиётшуносликда мазкур талабга мос тушунчалар тизими, таҳлил усуллари ишлаб чиқилган.

70-йилларга келиб С. ўз имконларини сарфлаб бўлди, ўрнини ўзининг бағрида етишган, ўзининг давомчиси ва зидди сифатида



майдонга чиққан *постструктурализмга* (қ.) бўшатиб берди. Умуман олганда, С. ўз олдига қўйган улкан мақсадларга, хусусан, адабий асарга бадиий-эстетик қадрият сифатида ёндашиш масаласини ҳал қилишга эришолмади. Зеро, бадиий асарнинг ички тузилиши, структура элементлари ва уларнинг ўзаро алоқалари, қисмларнинг бутунликка бириктириш қонуниятларини нечоғлиқ чуқур ва атрофлича ўрганмасин, унинг таҳлиллари бадиий асарнинг эстетик таъсир кучи ва бадиий қимматини белгилайдиган қатор омилларни эътибордан соқит қилганди. Шунга қарамай, С. адабий-назарий тафаккурни, бадиий асар ҳақидаги мавжуд тасаввурларни бойитди, унинг илгари етарли эътибор берилмаган томонларига диққатни жалб қила билди, у ишлаб чиққан методлар ҳозирги адабиётшуносликнинг бадиий таҳлил имконларини кенгайтди.

**СЮЖЕТ** (фр.  *sujet* – предмет, асосга қўйилган нарса) – бадиий шаклнинг энг муҳим элементларидан бири, асардаги бир-бирига узвий боғлиқ ҳолда кечадиган, қаҳрамонларнинг хатти-ҳаракатларидан таркиб толувчи воқеалар тизими. Сюжетлилиқ бадиий адабиётнинг хос хусусиятларидан бири бўлиб, С. тур ё жанрдан қатъи назар, барча асарларда бор, бироқ унинг намоён бўлиши кўп жиҳатдан қайси тур ёки жанрга мансублигига боғлиқ. Мас., лирикада воқеалар тизими йўқ, лекин унда ўй-фикрлар, ҳис-кечинмалар ривож мавжуд ва бу унинг С.ини ташкил қилади. Ёки эпоснинг кичик шакллари, хусусан, новеллалардаги С. ҳам «воқеалар тизими» деган таърифга мувофиқ эмас: бунда бир ҳаётий ҳолат ичидаги ўсиш, ривожланиш кузатилади (мас., Чўлпон. «Тараққий»; А.Қаҳҳор. «Бемор»). Шуни кўзда тутган ҳолда адабиётшунослиқда воқеабанд ва воқеабанд бўлмаган С. лар ажратилади. Айрим адабиётшунослар (мас., Г.Поспелов) С. эпик ва драматик асарларга хос, лирик асарлар С.га эга эмас деб ҳисоблайди. Бу қарашга кўра, лирик асарда композиция С. (воқеалар тизими) ўрнини босиб, ўй-кечинмаларни муайян тартибда уюштиради. Мазкур қараш терминологик чалкашликлардан қочиш, С. терминини бир маънода – воқеалар тизими деб тушуниш имконини беради. Кенг оммалашган таърифлардан бирига кўра, С. «у ёки бу характернинг, типнинг тарихий ривожланиши, ташкил топиб боришидир» (М.Горький). Бироқ характер доим ҳам ривожланиш, ўсиш ва шаклланишда кўрсатилмайди. Мас., ҳикояда характерлар тайёр ҳолда берилади, воқеа давомидида ривожланмайди, С. бу ўринда воқеанинг ички ривожини намоён этади, холос. Демак, мазкур таъриф универсал эмас, у айрим типдаги асарларга (мас.,

«Кутлуг қон») нисбатангина тўғридир. Албатта, С. ривож давомидида характернинг шаклланиши, очилиши ҳам бор гап, лекин бу С.нинг бадиий функцияларидан бири, унинг моҳияти эмас. Хуллас, агар «сюжет» термини остида эпик ва драматик асарларга хос С. назарда тутилса, унда С. асардаги «бир-бирига боғлиқ воқеалар тизими» ёки «конкрет ҳолат, битта воқеанинг ички ривожидир».

С.нинг бирламчи функцияси асар проблемасини бадиий тадқиқ этишга имкон берадиган ҳаёт материални уюштириб беришдан иборатдир. Демак, С. нинг қандай бўлиши мазмунга, муаллиф ижодий ниятига боғлиқ. Мас., А.Қодирий «Ўткан кунлар» учун танлаган С. Отабекнинг Тошкентдан, Кумушнинг Маргилондан бўлиши – ижодий ният ижроси учун энг мақбул вариант. Негаки С.нинг «ўқ»и – «ишқий-маиший» С. чизиғи Тошкент билан Маргилонни боғлагани ёзувчига ўзини ўйлатган проблемалар тадқиқи учун зарур воқеа ва тафсилотлар (хон ўрдаси, Тошкент исёни, қипчоқ қирғини каби)ни асарга олиб кириш имконини беради. Муҳими, улар асарга ҳеч бир зуракиликсиз, ўқувчи хаёлини банд этган Отабек-Кумуш линиясига узвий боғланган ҳолда олиб кирилади, натижада адибга шахс эрки, миллат эрки, миллат тақдири муаммоларини атрофлича бадиий тадқиқ этиш, фикрларини ифодалаш имкони яратилади. Кўринадики, С. ҳаёт материални шунчаки эмас, балки бадиий концепцияни шакллантириш ва ифодалашга энг қулай (оптимал) тарзда уюштириш экан.

С. персонажларнинг «ҳаракат»ларидан таркиб топади. Персонажларнинг макон ва замонда кечувчи хатти-ҳаракатлари ҳам, руҳиятидаги ўй-фикрлар, ҳис-кечинмалар ривож ҳам ҳаракатдир. Шу ҳаракат типларидан қайси бири етакчилик қилишига қараб С.нинг икки типи ажратилади: а) «ташқи ҳаракат» динамикасига асосланган С.; б) «ички ҳаракат» динамикасига асосланган С. Биринчи типдаги С.ларда персонажларнинг бирор мақсад йўлидаги хатти-ҳаракатлари, кураши, тўқнашувлари, ҳаётидаги бурилишлар тасвирланади ва шу асосда уларнинг тақдири, ижтимоий мавқеида муайян ўзгаришлар юз беради. Бу нав С.ларда воқеа тўлақонли тасвирланади ва ўз ҳолича ҳам бадиий-эстетик қиммат касб этади. Келиб чиқиши жиҳатидан С.нинг мазкур тури қадимийроқ (фольклордаги сеҳрли эртаклар, ривоятлар, достонлар). Янги ўзбек адабиётида ҳам С.нинг бу типи кенгроқ тарқалган: «Ўткан кунлар», «Меҳробдан чаён», «Кеча ва кундуз», «Кутлуг қон», «Сароб» – буларнинг барида ташқи ҳаракат динамикаси етакчилик қилади.

Албатта, бу асарларда «ички ҳаракат» динамикаси ҳам бор, бироқ у мавқе жиҳатидан С. типини белгилашга ожизлик қилади. С.нинг иккинчи типда воқеалар ўз ҳолича эмас, персонаж руҳиятидаги жараёнга туртки бериши жиҳатидан аҳамият касб этиб, асар давомида персонажлар ҳаётида, тақдирида ёки ижтимоий ҳолатида эмас, унинг руҳиятида бурилишлар, ўзгаришлар содир бўлади. Бу тип С.лар адабиётимизда анча кейин, XX асрнинг 80-йилларидан, пайдо бўлиб, ҳозирча нэсрнинг кичик ва ўрта (мас., А.Аъзам. «Бу куннинг давоми», «Асқартоғ томонларда») шаклларида, шунингдек, бир қатор драматик (мас., Ш.Бошбеков. «Тақдир эшиги», «Эшик қоққан ким бўлди») асарларда синаб кўрилди.

Воқеаларнинг ўзаро муносабатига кўра С.нинг *хроникали* ва *концентрик* турлари ажратилади. Хроникали С.да воқеалар орасида вақт муносабати (А воқеа юз берганидан сўнг, Б воқеа юз берди) етакчилик қилса, концентрик С. воқеалари орасида сабаб-натижа муносабати (А воқеа юз бергани учун, Б воқеа юз берди) етакчилик қилади. Хроникали С., бир томондан, ҳаётни кенг эпик кўламда тасвирлаш, иккинчи томондан, қаҳрамон тақдирини даврий изчилликда, характерини ривожланишда кўрсатиш учун қулай. Чунки унда асосий сюжет билан ёндош ҳолда ёрдамчи сюжет чизиқларини ҳам юргизиш, жуда катта ҳаёт материални қамраб олиш имконияти мавжуд. Хроникали С.да асарнинг «бадий вақт»и исталганча кенгайтирилиши мумкин: унда «параллел вақт»да кечаётган воқеаларни тасвирлаш, ретроспекция – замонда ортга қайтиш усулидан фойдаланиш имкониятлари анча кенг. Шунингдек, хроникали С.га қурилган асарга С.дан ташқари унсурлар (ривоятлар, киритма эпизодлар ва б.), муаллиф мушоҳадалари, тафсилотларни табиий равишда киритиш, бадий матнга сингдириб юбориш мумкин. Шу боис катта эпик асарларда (С.Айний. «Қуллар»; П.Қодиров. «Юлдузли тунлар») кўпроқ хроникали С. қўлланади. Концентрик С. эса воқеаларнинг битта асосий воқеа теграсида айланиши билан характерланади. С.нинг бу тури воқеаларнинг конфликт асосида шиддат билан ривожланиб, ечимга томон интилишини тақозо қилади. Концентрик С. асарнинг шакл-композицион жиҳатдан мукамал, ўқишли ва қизиқарли бўлишига имкон беради. Чунки бу нав С. ўқувчи диққатини битта нуқтада тутиб туради, унинг ўқиш жараёнидаги фаоллигини оширади (мас., детектив асарлар). Концентрик С. нисбатан қисқа вақт ичида кечган воқеаларни қамраши, ёндош С. чизиқларини

киритиш имкониятларининг камлиги билан ҳам характерланади. Саналган хусусиятларни О.Ёқубовнинг «Муқаддас», «Биллур қандиллар», «Улугбек хазинаси» каби асарлари мисолида кузатиш мумкин. Айтиш керакки, С.нинг бу икки турига хос хусусиятлар кўпроқ аралаш ҳолда зуҳур қилади. Зеро, хроникали С. воқеалари орасида сабаб-натижа (олдин юз берган воқеа кейин юз берган воқеага қисман сабаб бўлиб келади) муносабати, концентрик С. воқеалари орасида эса вақт муносабати (натижа сабабдан кейин келади) кузатилиши табиий. Шунга кўра, конкрет асардаги С. типи мазкур муносабатларнинг қайси бири етакчи мавқега эгаллигига қараб белгиланади. Баъзи асарларда С.нинг иккала типига хос хусусиятлар ҳам салмоқли ва уйғун ҳолда намоён бўлади, айни шу уйғунлик уларнинг жозибасини таъминлайди. Мас., А.Қодирийнинг «Ўткан кунлар», Чўлпоннинг «Кеча ва кундуз» романларида шу хил уйғунликни кўрамыз. Иккала романда ҳам хроникалилик етакчи бўлгани ҳолда, концентрик С. хусусиятларидан кенг фойдаланилганки, ҳар икки типга хос энг яхши жиҳатларнинг уйғунлашуви бадий мукамалликка хизмат қилади.

**СЮРРЕАЛИЗМ** (фр. *surrealisme* – олий реализм, реализмдан юқори) – адабиёт ва санъатдаги XX асрнинг 20-йилларида майдонга келган авангардистик йўналиш. С.нинг пайдо бўлиши француз шоири А.Бретон (1896 – 1966) бошчилигидаги ёзувчи ва рассомлар гуруҳининг фаолияти билан боғлиқ. С.нинг илк намунаси сифатида А.Бретон билан Ф.Супо ҳаммуаллифлигида ёзилган «Магнит майдонлари» (1919) асари эътироф этилади, унинг адабий-бадий ҳаракат сифатидаги фаолиятининг бошланиши 1924 йилга тўғри келади. Худди шу йили А.Бретоннинг «Сюрреализм манифести» (унинг яратилишида Л.Арагон ҳам қатнашган) эълон қилиниб, унда гуруҳнинг адабий-эстетик қарашлари дастурий тарзда ифодаланган. С. Биринчи жаҳон урушидан кейинги маънавий инқироз шароитида вужудга келган бўлиб, унинг назарий асосини Беркли, Кант, Ницше каби мутафаккирлар, шунингдек, Б.Кроче томонидан янгича идрок этилган Гегель таълимотлари ташкил қилади. 20-йилларда ижодкор зиёлилар орасида урф бўлган Фрейд таълимотининг С.га таъсирини алоҳида таъкидлаш позим.

С. рационализмни, шу билан боғлиқ ҳолда реализмни инкор қилади. Жумладан, «Сюрреализм манифести»да ёзилишича, инсоният «ҳамон мантиқзулми остида яшамоқда», ҳолбуки, ҳозирги вақтда мантиқ фақат иккинчи даражали масалаларни ҳал қилишгагина

ярокли, рационализм бевосита тажриба билан боғлиқ фактларнигина идрок эта олади, холос. Позитивизм пойдеворига қурилган реализм эса – инсондаги ҳар қандай ақлий ва руҳий парвоз душмани, у тушунтириб бўлмайдиган нарсаларни тушунтиришга телбаларча берилган ва бу билан ақлларни мудроқ ҳолга солади, ундаги таҳлил истаги жонли сезимларни босиб кетади. Буларга қарши ўлароқ, С. тахайюл эркинлиги, инсонни цивилизация зугумидан озод қилиш шiorлари билан майдонга чиқди, объектив воқеликни тасвирлаш ва бадий билиш эмас, балки ундан-да юқори турувчи реалликни яратиш, инсон онгининг чуқур пучмоқларини тасвирлаш, унинг онгости қатламларига таъсир қилиш орқали бадий мулоқотни амалга оширишни мақсад қилди, «автоматик ёзиш»ни ижоднинг асосий усули деб билди. Ижоднинг мазкур усулига манифестда қуйидагича таъриф берилади: «Соф психик автоматизм кўзлайдиган мақсад – хоҳ озгаки, хоҳ ёзма ва хоҳ исталган бошқа йўсинда фикрнинг реал яшашини ифодалашдир. Фикрни ақл назоратидан холи тарзда, ҳеч бир эстетик ёки маънавий андишаларсиз ўқиб бериш демакдир». «Магнит майдонлари», муаллифларининг таъкидлашларича, худди шу йўсинда, фикр ва ассоциацияларни бевосита, қандай тезликда туғилган бўлса, ўшандай тезликда қайд этиш натижасида дунёга келган. Яъни бунда, бир томондан, четда холис турган ижодкор гўё фикрларни қайд этувчи аппаратга айланади; иккинчи томондан, ижодкор ўзидан ўтказиб берилаётган олам, объектнинг бир қисми, тил эса восита эмас, балки субъект бўлиб қолади. Сюрреалистик образда воқелик деформацияланган (бу ҳол, айниқса, рассомликда яққол кўзга ташланади, тасвирланаётган нарсаларнинг шакл-шамойили кучли ўзгаришга учрайди) ҳолда аксланади, унга эркин ассоциативлик (қ.), бир-бирига асло қўшилолмайдиган (мисоли ўт билан сувдек) нарсаларнинг бирлашиб кетиши хос. С.га хос образнинг табиати терминни илк бор ишлатган Аполлинернинг: «Инсон юришга тақлид қилмоқчи бўлганида гилдиракни – оёққа ўхшамайдиган нарсани яратди. Бу гайришуурий сюрреализм эди», – деганида ўзининг мухтасар ифодасини топган. Сюрреалистик образда нарса гўё қисмларга ажратилади-да, кейин мантқиққа тўғри келмайдиган тарзда қайта бирлаштирилади, натижада нарса реализмдаги каби аслига монанд аксини топмайди, у ҳақда ирреал таассурот ҳосил қилинади. Бу, умуман, С. эстетикасига хос бўлиб, ундаги гўзаллик тушунчаси «гўзаллик анатомик столда тикув машинаси билан ёмғирпўшнинг «гўзаллик анатомик столда тикув машинаси билан ёмғирпўшнинг тасодифий учрашуви» дегувчи француз шоири Лотреамон (1846 –

1870) қарашларидан озиқланади. Реализм воқеликдаги сабаб-натижа асосидаги ўзаро боғлиқликни диққат марказига қўйса, С. унда «объектив тасодиф» (А.Бретон) устувор деб билади. С. эстетикасида «объектив тасодиф» билан бир қаторда «гаройиблик»ка ҳам катта аҳамият берилади: «гаройиб нарса ҳар вақт гўзал, барча гаройиб нарсалар гўзал, фақат гаройиб нарсаларгина гўзал», – дейилади «Сюрреализм манифести»да. Шунинг учун сюрреалистик асарларда гайриоддий, фантастик элементлар кенг ўрин тутуди, улар реалистик деталлар билан ғалати тарзда бирикади ва гўё олий реализмни, аслидагидан ҳам ҳақиқийроқ воқеликни яратишга хизмат қилади. С. образни санъат доирасидан чиқаради, уни белги эмас, балки моддий мавжудлик деб билади. С.нинг йирик намояндаси рассом С.Дали ҳазилнамо йўсинда буни қуйидагича ифодалайди: «Гўзаллик ё ейишли бўлади, ё умуман бўлмайди». Табиийки, бунда бадий асарнинг эстетик объект эмас, балки мавжуд нарса сифатида қабул қилиниши, эстетик таъсири ҳам жисман (шаҳвоний лаззат, даҳшат, ташвиш ва ш.к. тарзда) ҳис этилиши кўзда тутилади. С. санъатни мифологик асосга эга деб билади, мифларга мурожаат қилиш билан бирга яқин ўтмиш адабиёти ва санъатидаги образлар, мотивлар асосида янги мифлар яратишга интилади; бадий ижодда субъект ролини юқоридагича тушунгани боис ҳам санъатни кўпроқ коллектив ижод маҳсули деб ҳисоблашга мойил. Яна бадий ижодга ўйин деб қараш ҳам хос бўлиб, С.нинг мавжуд воқеликка муносабатида киноя, юмор устувор, бироқ у кўпроқ «қора юмор» кўринишида, мавжуд қадриятларни анархик инкор қилишга қаратилган бўлиб, моҳиятан абсурдга яқин туради. Булардан кўринадики, байроғига «Севги, гўзаллик, исён» сўзларини битганча «дунёни қайта тузиш» (К.Маркс), «ҳаётни ўзгартириш» (А.Рембо) мақсадлари билан майдонга чиққан С. ўзидан аввалги ва ўзига замондош исёнкор, авангардистик оқимларга хос жиҳатларни сингдирганди.

С.нинг адабий-бадий мактаб сифатидаги фаолияти узоқ давом этмади. Иккинчи жаҳон уруши арафасида тарқалиб кетди. Шунга қарамай, у XX аср адабиёти ва санъатида чуқур из қолдирди: унинг бағридан П.Элюар, Л.Арагон, Г.Лорка каби улкан шоирлар, С.Дали каби рассомлар, Ж.Кокто, А.Мишо, А.Хичкок каби кино арбоблари етишиб чиқди. С. вакилларининг назарий қарашлари эса ўзидан кейинги структур психоанализ, структурализм, постструктурализм каби қатор илмий йўналишларга сезиларли таъсир кўрсатди.

**СЎЗБОШИ** – адабий асар (китоб)га муаллиф, бошқа бир ижодкор ёки танқидчи, таржимон, тахририят, ношир кабилар томонидан ёзилган, асосий матндан ажралиб турувчи адабий-танқидий характердаги мухтасар мақола, қайд ва ш.к.лар. Муаллиф томонидан ёзилган С.лар кўпинча ўқувчига бевосита мурожаат шаклида бўлиб, у асарнинг тушунилиши учун зарур деб билган кўшимча маълумотларни (ёзилиш сабаби, мақсад-муддаоси, муайян рецетив йўналишни таъкидлаш ва ш.к.) ўз ичига олади ва турли сарлавҳалар («Ёзувчидан», «Муаллифдан», «Ўқувчиларимга» ва б.) остида берилади. Ноширлик ишида асарга бошқа шахслар томонидан ёзилган С.ларни бериш ҳам кенг тарқалган. Бундай С.лар ҳам, аввало, асарни тарғиб қилиш, унинг тушунилишига кўмаклашиш мақсадини кўзлайди ва шунга мос маълумотлар (муаллифнинг ҳаёти ва ижоди, асарнинг ёзилиш тарихи, ёзилган даври билан боғлиқ жиҳатлари, мухтасар танқидий мулоҳазалар ва ш.к.) ни ўз ичига олади. Аксарият ҳолларда бу хил С.лар мутахассислар (танқидчи, адабиётшунос, матншунос ва ш.к.) томонидан ёзилади, улар муайян даражада ўзининг жанр хусусиятларини шакллантирган бўлиб, ҳақли тарзда адабий-танқидий жанрлар сирасида саналади. Мутахассислар томонидан ёзилган С.ларнинг алоҳида номланиши ҳам, бошқа турли умумий номлар («Сўзбоши», «Сўзбоши ўрнида», «Нашрга тайёрловчидан», «Таржимондан» ва б.) остида берилиши ҳам кузатилади. Шунингдек, вақтли матбуотда кенг оммалашган таниқли ёзувчи-шоирлар томонидан ёш ижодкорларнинг илк асарларига ёзилган «оқ йўл»лар ҳам С.нинг кўринишларидан биридир.

**СЎНГСЎЗ** – адабий асар охирида берилувчи кўшимча. С. муаллиф ёки бошқа биров (ёзувчи, танқидчи ва б.) томонидан ёзилиб, одатда, асарнинг тушунилиши учун зарур маълумотларни ўз ичига олади ва асосий матндан яққол ажралиб (ўзаро *асосий матн – ёндош матн* муносабати асосида) туради. Эпилог ва кейинги тарихдан фарқли равишда С. сюжетнинг бевосита ёки билвосита давоми эмас, у бадиий матн таркибига тўлиқ сингиб кетмайди, яъни структуравий жиҳатдан мустақилдир. Муаллиф томонидан ёзилган С.лар услубига кўпроқ ўқувчига бевосита мурожаат этиш, у билан дўстона самимий мулоқотга мойиллик, мазмун-мундарижаси жиҳатидан турличалик (асарни мухтасар лирик-фалсафий хулосалаш, айрим нуқталарга ўқувчи диққатини қайта жалб этиш, миннатдорчилик ёки узрхоҳлик ва ш.к.) хосдир. Ноширлик амалиёти-

да асарга ўзгалар томонидан ёзилган С.ларни илова қилиш ҳам кенг оммалашган. Бундай С.лар ҳам мазмун-мундарижасига кўра турлича (ёзувчи ҳаёти ва ижоди билан таништириш, асар ҳақидаги мулоҳазалар, унинг яратилиши билан боғлиқ айрим тафсилотлар, муаллиф ҳақидаги хотиралар ва ш.к.) бўлиши мумкин. Асосийси, бундай С.ларнинг пировард мақсади битта – асарни тарғиб этиш, унинг тушунилиши, китобхонлар дилидан ўрин олишига кўмаклашиш бўлиб қолаверади.

# Т

**ТААЖКУБ** (ар. *تعجب* – ажабланиш) – мумтоз адабиётдаги шеърий санъат, бирор нарса-ҳодиса, ҳолат ва ш.к.лардан ҳайратда қолганлик, ажабланишни ифодалаш. Т. санъати қўлланган ўринларда шоир гўё ўзини ҳайратда қолгандай кўрсатиб, асл муддаосини баён қилиб олади, асл муддаоси ёрни васф этиш, ошиқ аҳволи руҳиясини тасвирлаш ва ш.к.лар бўлади. Мас., Машраб ёрга хитобан «Малаксан ё башар, ё ҳуру ғилмонсан, билиб бўлмас» дея Т. изҳор қилади, асл муддаоси эса ёрнинг гўзалликда тенгсизлигини таъкидлашдир. Ёки Навоийнинг байтларидан бирида қуйидагича Т. изҳори бор:

*Гар қуёшқа эл назар қилса кўзига ёш тўлар,  
Ул қуёш боргач назардин, кўзларимга тўлди ёш.*

Мазкур байтда шоир «аслида, одам қуёшга қараса, кўзи ёшланади, менинг кўзларим эса, қуёшим (ёрим) кетгач, ёшланмоқда» дея ҳайратланади ва шу орқали ҳижронда қолаётган ошиқ аҳволини моҳирона тасвирлашга эришади.

**ТАБДИЛ** (ар. *تبدیل* – алмаштириш, ўзгартириш) – қаранг: **тарду акс**

**ТАБЛИГ** (ар. *تبلیغ* – юқори даражага, меъёрига өтказиш) – қаранг: **муболага**

**ТАВЗЕЪ** (ар. *توزیع* – тарқатмоқ, тақсим қилмоқ, жойлаштирмақ) – мумтоз адабиётдаги шеърий санъат, байтда бир хил товушларни такрорлаш. Т.га берилган таърифларда ихтилофлар мавжуд: айрим манбаларда Т.нинг юзага чиқиши учун фақат ундош товушлар такрорланиши шарт қилинади, бошқаларида эса бу шарт қўйилмайди, ундош ё унлилар такрорланаётганидан қатъи назар, Т. деб юритилаверади. Т.дан ҳосил бўлувчи поэтик самара шуки, бир неча бора

такрорланувчи товуш (ёки товушлар гуруҳи) байтга ўзига хос оҳанг, муסיқийлик бахш этади. Мас., Навоийнинг:

*Ошиқ ўлдум, билмадим ёр ўзгаларга ёр эмиш,  
Оллоҳ-оллоҳ, ишқ аро мундоқ балолар бор эмиш, –*

байти гоят хушоҳанг, чунки унинг таркибида «О» унлисининг ўн бир марта такрорлангани, яна бир жиҳати, биринчи ва иккинчи мисралардаги «О» товуши эгаллаган позицияларнинг бир-бирига мослиги муסיқийликни кучайтириб бермоқда. Мирзо Кенжабекнинг қуйидаги байтида эса Т. санъати «с» ва «қ» ундошларининг бир неча марта такрорланиши натижасида воқе бўлган:

*Секин-секин сузардим сувдан сўраб саодат,  
Қалқа-қалқа қайғим қопмиш сароб ичинда.*

Қайд этиш керакки, Т. товушларнинг механик такрори ёки шаклбозликка мойиллик эмас, аксинча, унинг сара намуналарида такрорланаётган товушлар ифода этилаётган мазмун билан уйғунлик касб этади, мазмун ифодасини ритмик-интонацион жиҳатдан кучайтиради. Жумладан, мисолга олинган байтда сиргалувчи «с» товуши такрори ҳосил қилаётган оҳанг секин-секин қалқиб бораётган қайиқ ҳолатига мос ва бу нарса унинг ўқувчи тасаввурида жонланишига ёрдам беради.

**ТАВИЛ** (ар. *طویل* – узун) – аруз баҳрларидан бири, араб назмидаги энг узун вазнли баҳр бўлгани учун шундай номланади. Фаулан (V – –) ва мафойилун (V – – –) аслларининг кетма-кет такроридан ҳосил бўлади. Т. араб шеъриятига хос баҳр бўлиб, фўрсий ва туркий шеъриятда деярли қўлланмаган. Навоийнинг «Мезон ул-авзон» асарига Т. баҳрининг биргина вазни, Бобурнинг «Мухтасар»ида эса олти вазни мисоллар билан келтирилган. Навоийнинг «Ҳазойин ул-маоний» девонидаги уч шеър тавили мусаммани солим (v – – / v – – – / v – – / v – – –) вазнида яратилган бўлиб, улардан бирининг матлаъси қуйидагича:

*Юзунгдек қамар йўқтур, қадингдек шажар йўқтур,  
Шажар бўлса ҳам анда, лабингдек самар йўқтур.*

**ТАВСИФ** (ар. *توصیف* – сифатлаш, мақташ) – ривоявий асар композициясининг узвий қисми, асар воқелигига киритилаётган нарса-

ходиса, жой, портрет, интерьер, экстерьер ва ш.к.лар тасвири. Т.нинг статик ва динамик кўринишлари ажратилади: воқеа ривожидан тўхтатилган ҳолда берилган Т.лар *статик*, воқеа ривожидан давомидан берилган Т.лар эса *динамик* деб юритилади (қ. *пейзаж, портрет*). Воқеабанд сюжет асосидаги асарларда Т. қадимдан бор. Жумладан, халқ оғзаки ижодидаги дostonларда Т. кенг ўрин тутлади: қаҳрамон портрети, унинг оти, қурол-яроғи ва ш.к.ларнинг бўртма Т.и асарнинг таъсир кучини оширади, воқеаларни асослайди, характерологик хусусиятлар касб этади. Замоनावий адабиётда, хусусан, эпик асарларда статик Т. салмоғи бирмунча камайиб, кўпроқ динамик Т.лар берилётгани кузатилади. Шунингдек, Т. бошқа турларга мансуб асарларда ҳам мавжуд бўлиб, у ҳар бир жанрнинг композицион-услубий хусусиятларидан келиб чиққан ҳолда қўлланади. Мас., драматик асарлардаги ремаркаларда берилган Т.лар алоҳида муҳим деталлар қайдидангина иборат, улар ярим тайёр ҳолда бўлиб, сахналаштириш вақтида конкретлаштирилиш ва тўлдирилишни кўзда тутлади. Лирик асарлардаги Т. деталлари, умуман олганда, ҳис-туйғу объекти сифатида муҳим. Шу билан бирга, *тавсифий лирика*да, жумладан, пейзаж лирикасида Т. жанр белгилловчилик хусусиятига эга бўлади.

**ТАВТОЛОГИЯ** (юн. *tauto* – айнан ўша, *logos* – сўз) – матнда битта сўзнинг такрорланиши; бу ҳодиса мумтоз адабиётшуносликда *такрир* (қ.) деб аталган. Халқ оғзаки ижодида, поэтик нутқда Т.дан шеърий нутқ эмоционаллигини ошириш, ифодаланаётган фикр ёки туйғуга алоқадор муҳим сўзни таъкидлаш орқали таъсирни кучайтириш воситаси сифатида кенг фойдаланилади. Мас., И.Мирзо шеъридан олинган бир бандда «юмшоқ» сўзи тўрт бора айнан такрорланади:

*Ушук урган кўсақлар юмшоқ,  
Пахта юмшоқ,  
гўдақлар юмшоқ –  
Домлага гап қайтармас эдик,  
Ер ҳам юмшоқ – ботарди этик...*

Такрорланаётган «юмшоқ» сўзи шўро замонида пахтага қул қилинган халқ фожиасини «юмшоқлик» билан очиб беради, лекин бу «юмшоқлик»нинг таъсири анча-мунча *инвектив*е руҳидаги хитоблардан таъсирлироқ. Бунинг бош омили Т.нинг ўринли, мақсадли

амалга оширилганидир. Гап такрорланаётган сўзларнинг ўрнига тушганидагина ҳам эмас, муҳими, улар фикр-туйғуни таъкидлаб-бўрттириб ифодалаётганида. Такрорланаётган «юмшоқ» сўзи «осмон узок, ер қаттиқ» нақли билан пинҳон зид кўйилади ва шу асосда ҳолатнинг мантиққа сиғмайдиган, чидаб бўлмайдиган эканлиги англашилади. Демак, бу ўринда Т. ўзини ҳар жиҳатдан оқлайди. Бироқ бадиий нутқда биргина сўз такрорланар экан, бунда меъёрни унутмаслик, айни сўз ҳар гал такрорланганида кўшимча тарзда муайян бадиий-эстетик юк ташиши лозимлигини эътиборда тутиш зарур. Зеро, бадиий усул сифатидаги Т. билан нуқсон саналувчи Т. орасидаги чегара деярли шаффоф бўлади. Матнда битта сўзни ўринсиз, муайян бадиий-эстетик вазифа юкламаган ҳолда такрорлаш салбий маънодаги Т.ни юзага келтиради. Амалда термин шу маънода фаолроқ ишлатилади.

**ТАВШИХ** (ар. *توشیح* – зийнатлаш) – мумтоз адабиётдаги шеърий санъат, мисра ёки байт бошидаги (баъзан эса тақтеълар чегарасидаги) ҳарфлар йиғиндисидан бирор сўз (исм) келтириб чиқариш. Мазкур санъат асосида ёзилган шеър *мувашшаҳ* деб номланади. Т. санъати гоят нозик, у шоирдан жуда катта маҳоратни талаб этади, чунки келтириб чиқариш кўзда тутилган сўз мисра (ёки байт) ни маълум бир ҳарф билан бошлашни талаб этади. Бу эса мисра (ёки байт)ни мазмун ифодаси учун энг мақбул сўз билан эмас, чиқариладиган исмга мос сўз билан бошлашни тақозо қилади, натижада шакл мазмундан устуворроқ бўлиб қолади. Яъни Т. санъати юксак маҳорат ва дид билан қўллансагина, шеърга зеб бўлади, акс ҳолда, у шеърнинг бадиий савиясини тушириб юбориши ҳам мумкин. Мас., ХХ бошларида шоирлар давраларида «мувашшаҳбозлик» кенг русум бўлган: Муқимий, Фурқат, Ҳамза каби давр шоирларининг кўпгина шеърлари Т. санъати асосига қурилган, лекин уларнинг бари ҳам бадиий жиҳатдан етук бўлмаган. Албатта, адабиётимизда Т. санъати маҳорат ва дид билан қўлланган шеърлар ҳам талайгина. Шулардан бири сифатида Э.Воҳидовнинг «Исми не ул қушником...» деб бошланувчи ғазалини келтириш мумкинки, унинг ҳар бир байти бошидаги ҳарфлар йиғиндисидан «истак» сўзи келиб чиқади.

**ТАГМАЪНО** – матннинг бевосита мазмунига мувофиқ келмайдиган, контекст доирасида ва мулоқот субъектларига маълум бўлган муайян шарт асосидагина воқе бўлувчи маъно. Т. фикрнинг «коса тагида нимкоса» тарзида ифодаланиши натижасида воқе бўлади, шунинг учун бундай ҳоллар «тагдор қилиб гапирмоқ» дея таъриф-

ланади. Сўзлашув жараёнида Т.га турлича йўллар билан ишора қилиниши (баъзан эса, аксинча, нутқ ситуацияси билан боғлиқ ҳолда Т. яширилиши) мумкин. Мас., тасаввур қилинган, бир неча киши орасидаги суҳбат асноси куйидагича иккита гап айтилди:

– Ҳаво совуб кетдими?

– Ҳа-а, бу йил ҳаво пастроқ, Аҳмаджон, қиш ҳам келиб қолди...

Агар биринчи суҳбатдош қишда қайтариш шарти билан Аҳмаджондан қарз олган бўлса, унда кейинги гап Т. касб этади, яъни Аҳмаджон суҳбатдошига қарзни қайтариш муддати яқинлашиб қолганини эслатган бўлиб чиқади. Бироқ бу маъно фақат уларнинг иккисига (шартдан хабардор бўлганлари учун) маълум, холос, бошқа суҳбатдошлар гапнинг бевосита маъносини қабул қиладилар. Т.нинг муҳим хусусияти ҳам шу, бунда матннинг зоҳирий (бевосита) маъноси билан ботиний маъноси мустақил ҳолда яшайди, бир-бирига халақит бермайди. Бадий адабиётда Т. турли омиллар (мас., фикрни очиқ ифодалаш имкони йўқлиги; хослар учун ёзиш истаги ва ш.к.) таъсирида юзага келади ва турли ғоявий-бадий мақсадларни кўзлайди. Мас., Чўлпоннинг «Мен қочмадим» (1921) номли шеъри нома жанрида ёзилган бўлиб, сарлавҳа остида адресат аниқ кўрсатиб қўйилган: «Тошкентдаги ўртоқларимга». Шеър «Тошкентдаги ўртоқлари» шоирнинг Бухорога жўнашини қайноқ ижтимоий ҳаётдан қочиш деб баҳолаганларига жавоб тарзида ёзилган. Эскидан алоқада бўлган кишилар орасида «мулоқот контексти» мавжуд, шунинг учун шеър адресатга ўзининг бевосита маъносидан кўпроқ маъноларни етказди:

*Мен янгилар ўлкасидан синмаган  
Бир қанотни тақиб олиб қўзгалдим:  
Шу йўлимда япроқлари сўлмаган  
«Ёш ёғоч»нинг соясида тўхталдим.*

Шоирнинг ўртоқлари Чўлпон «янгилар ўлкаси» деганда қизил Туркистонни назарда тутаётгани, бу ерда унинг «бир қаноти синган»и, яъни озодликка бўлган умидлари чилпарчин бўлганини биладилар. Энди шоир синмаган қанотини тақиб, «йўл»га тушган, у ҳали ўз «йўл»идан («Шу йўлим», яъни кураш йўлидан) қайтган эмас. Яъни унда озодликка эришиш орзуси ҳали ҳам бор ва шу йўлдаги курашни давом эттириш учун янги ташкил топган Бухоро Жумҳурияти («Ёш ёғоч»)га борган. Чўлпон «ёш ёғоч»нинг

япроқлари сўлмаганлигини айрича таъкидлайдики (бунинг Т.си шоир ижоди контекстидагина очилади), контекстдан хабардор дўстлари унинг нима демоқчилигини пайқаб олишларига ишонади. Чўлпон шеъриятида инқилоб фақат бир бора куёшга ўхшатишган: «Муҳаббат осмонида гўзал Чўлпон эдим, дўстлар, Куёшнинг нурига тоқат қилолмай ерга ботдим-ку». Худди шу асосда Чўлпонни «ерга ботирган» куёш ҳали «ёш ёғоч»нинг япроқларини сўлдириб улгурмаган, шоир шу дарахт «сояси»да ундан омонлик топмоқчи деган Т. келиб чиқади. Бундан аён бўладики, шоир ижодида такрорланувчи поэтик мотивлар Т.га ишора қилади (қ. *мотив*). Умуман, бадий адабиётдаги Т. кўпроқ рамзий образлар (мас., Ойбек. «Наъматак»), нарса-ҳодисалар орасидаги аналогиялар (мас., тарих – замона), ассоциатив алоқалар (мас., табиат – жамият) асосида юзага чиқади.

**ТАДРИЖ** (ар. *تدريج* – саралаш) – мумтоз адабиётдаги шеърий санъат, шеърнинг бошланишида кўйилган мавзунинг охирига қадар изчил давом эттирилиши. Яъни Т. санъати матлаъда айtilган фикр (ҳолат, тавсиф, таъриф ва ш.к.) кейинги байтларда муттасил кучайтириб борилишини тақозо этади. Мас., Сайфи Саройининг бир ғазали:

*Топилмас хусн мулкунда сенга тенг бир қамар манзар,  
На манзар? Манзари шоҳид. На шоҳид? Шоҳиди дилбар, –*

матлаъси билан бошланиб, унда маъшуканинг гўзал юзи таърифланади. Кейинги байтларда ҳам шоир ёр юзининг гўзаллиги таърифида давом этади, уни деталлаштириб, бўрттириб, рангларини бойитиб, хуллас, изчил ривожлантириб боради:

*Бу кун Юсуф жамолини қилибтур ҳақ сенга бахшиш,  
На бахшиш? Бахшиши давлат. На давлат? Давлати мафхар.*

*Сўзунг дурру жавахирдур, кўнгуллар ганжина пойиқ,  
На пойиқ? Пойиқи хусрав. На хусрав? Хусрави кишвар.*

*Шакардин топидур хулқунг, карамда хотиринг матлаб,  
На матлаб? Матлаби маъдан. На маъдан? Маъдани жавҳар.*

*Зиҳи давлатлу ошиқким, сенинг бирла қилур ишрат,  
На ишрат? Ишрати жаннат. На жаннат? Жаннати кавсар.*

*Бу хуснунг шавқи завқини кўнгул тўтилари топти,  
На топти? Топти хуш лаззат. На лаззат? Лаззати шаккар.*

Шоир ёрнинг юз гўзаллигини шу тариха таърифлаб келади-да, мақтаёда асли мақсади шу бўлганини, ушбу ғазали «ёр жамоли шавқи»дан сўз воситасида тортилган сурат эканлигини таъкидлайди:

*Жамолинг шавқина Сайфи Сароий боғлади сурат,  
На сурат? Сурати хусно. На хусно? Хусни жонларвар.*

Айрим манбаларда Т. санъатига берилган таъриф бирмунча фарқланади. Унга кўра, Т. санъатининг воқе бўлиши учун биринчи байт қайси сўз билан тугаса, кейинги байтнинг шу сўз билан бошланиши ва бу тартиб шеърнинг бошидан-охиригача сақланиши талаб этилади. Гарчи бу таърифда шеърнинг шаклий томонига кўпроқ эътибор берилган бўлса-да, у юқоридаги таърифни инкор қилмайди. Чунки аввалги байт охиридаги сўзнинг кейинги байт бошида такрорланиши табиий равишда мазмун изчиллигини ҳам таъминлайди. Таърифлардаги фарқнинг асоси шуки, уларнинг бирида Т.га шеър санъати (яъни нутқ беъзаги), иккинчисида эса композицион усул сифатида қаралмоқда.

**ТАЖЗИЯ** (ар. تجزیه – бўлак-бўлак қилмоқ) – мумтоз адабиётдаги шеърини санъат, байт мисраларини икки бўлакка ажратиб, ҳар бир бўлакни ўзига муқобил бўлган иккинчи бўлак билан қофиядош қилиш. Яъни биринчи мисранинг биринчи бўлаги иккинчи мисранинг биринчи бўлаги билан, биринчи мисранинг иккинчи бўлаги эса иккинчи мисранинг иккинчи бўлаги билан қофияланади. Мисраларнинг бу кўринишда қофияланиши, асосан, фард, ғазал ёки қасиданинг матлаъси ҳамда маснавий шаклида қофияланувчи байтларда кузатилади. Мас., Машрабнинг машҳур:

*Агар ошиқлигим айтсам, куйиб жону жаҳон ўртар,  
Бу ишқ сиррин баён этсам, тақи ул хонумон ўртар, –*

байтида биринчи мисрадаги «айтсам» сўзи иккинчи мисрадаги «этсам» сўзи билан, биринчи мисрадаги «жаҳон» сўзи иккинчи мисрадаги «хонумон» сўзи билан ўзаро қофияланган. Т. мусажжаъга (қ.) ўхшаб кўринса-да, ҳақиқатда ундан фарқлидир: мусажжаъда тўрт

бўлак қилинган байтнинг уч бўлаги қофияланса, Т.да фақат остин-устин бўлақлар ўзаро қофияланади.

**ТАЖНИС** (ар. تجنیس – ҳамжинс, жинсдош) – мумтоз адабиётдаги шеърини санъат, шакли бир хил (омоним) ёки бир-бирига яқин (омограф, омофон, омоформа) бўлган сўзларни байтнинг турли ўринларида келтирган ҳолда, ҳар бир ўринда алоҳида маънони ифодалаш. Т. мумтоз шеърятда энг фаол қўлланган санъатлардан бири саналади. Унинг асосида алоҳида шеърини жанр (туюқ) шаклланиши, айрим санъатларнинг махсус навлари (тажнисли тарсеъ, радднинг айрим кўринишлари ва б.) воқе бўлиши ҳам ижодкорлар шаклдош сўзлар тақдим этувчи бадиий-эстетик имконларга алоҳида эътибор билан қараганларидан далолатдир. Мас., Навоийнинг машҳур:

*Қаро кўзум, келу мардумлиг эмди фан қилгил,  
Кўзум қаросида мардум киби ватан қилгил, –*

матлаъсининг биринчи мисрасида «мардум» сўзи инсон маъносида (яъни мардумлиг – одабийлик, одамгарчилик), иккинчи мисрасида эса «кўз қорачиги» маъносида қўлланган. Навоийнинг бошқа бир:

*Зулфи савдоси мени суду зиёндин қилди фард,  
Мену ул савдо, ишим йўқтур зиёну суд ила, –*

байти биринчи мисрасида «савдо» сўзининг «шайдолик», «савдосотик» каби маънолари, иккинчи мисрасида эса «савдойилик», «эсхушдан айрилганлик» маъноси назарда тутилган.

Илми бадиъга оид манбаларда Т.ни турларга ажратиш масаласида ихтилофлар мавжуд. Ушбу масалага махсус тўхталган адабиётшунос Ё.Исҳоқов Т.ни, аввало, иккига – Т.и том ва Т.и ноқисга ажратишни, сўнг эса Т.и ноқиснинг турларини фарқлашни таклиф қиладики, бу назарий жиҳатдан тўғри йўлдир. Т.и том деганда такрорланаётган сўзларнинг ёзув ва талаффузда айнан бир хил бўлгани ҳолда, турли маъно ифодалаш, Т.и ноқис деганда эса уларнинг ёзилиши ё талаффузида жузъий фарқлар бўлиши назарда тутилади. Юқоридаги иккала байт ҳам Т.и томга мисол бўла олади. Навоийнинг қуйидаги туюғида эса Т.и ноқис кузатилади:

*Лаълидин жонимга ўтлар ёқилур,  
Қоши қаддимни жафодин «ё» қилур,*



*Мен вафоси ваъдасидин шодмөн,  
Ул вафо, билмонки, қилмас ё қилур.*

Бунда «ёқилур» сўзи биринчи мисрада «ёқмоқ, алангалатмоқ» маъносида, иккинчи мисрада «ё қилмоқ, эгмоқ» маъносида, тўртинчи мисрада эса «қилармикан ё қилмасмикан» маъносида қўлланган. Лекин биринчи ҳолда «ёқилур» битта сўз, иккинчисидида қўшма феъл, учинчисидида эса сўз қўшилмасининг бир қисми бўлиб, улар ёзилишда фарқланади. Шу фарқ ушбу Т.нинг нуқсони бўлиб, тажниси ноқис (нуқсонли тажнис) аталишига сабабдир. Манбаларда нуқсонли Т.нинг тажниси музаййял, тажниси музориъ, тажниси лоҳий, тажниси акс, тажниси муздаваж, тажниси мураккаб, тажниси хаттий, тажниси мушавваш каби кўринишлари саналади. Шунинг ҳам қайд этиш лозимки, уларнинг номланишида турличаликлар мавжуд.

**ТАЖОҲУЛ УЛ-ОРИФ** (ар. *تجاهل العارف* – билувчининг билмаган бўлиб кўриниши, ўзини билмасликка солиш) – мумтоз адабиётдаги шеърий санъат, шоирнинг аслида билган нарсасини билмагандек қилиб кўрсатиши, бунда шоирнинг асл муддаоси бирор нарсанинг асл ҳолатини билмагандек, уни бошқа бирор нарсага ўхшатиш, ё мадҳ этиш, ё муболаға, ё ҳазил қилиш бўлади. Т.о. қўлланган байт риторик сўроқ гап тарзида шаклланади, яъни шоир бирор нарсани сўраш, ноаниқ нарса ёки белгига аниқлик киритишни эмас, риторик сўроқ орқали ёрнинг гўзаллиги, ошиқнинг ҳолати ёки бошқа шу каби бирор вазиятни ўхшатиш, қийёслаш орқали эътироф этишни мақсад қилади. Мас., Атойининг:

*Кўз учидин қиё-қиё шева била боқишларинг  
Жан тамурин қиёр учун тигму ё назармудур? –*

байтида ёрнинг «қиё-қиё» боқишларини «бу шунчаки бир назарми, ё жон томирини қийиш учун тигми?» тарзида ёр нигоҳларининг тигдек ўткир эканлигини эътироф этмоқчи. Ёки Навоийнинг:

*Юзни гуллардин бежабму бизни қурбон айладинг,  
Ё юзингга төгди қонлар бизни қурбон айлагач? –*

байтида ҳам ёр юзидаги қизилликнинг асл сабабини билмагандек бўлиб, «юзингни гуллар билан бежаганмисан ёки бизни қурбон қилиш чоғида қон сачраганми?» тарзида ифода этмоқда. Шеъриятимизда

бошдан-охир Т.о. санъати асосида ёзилган газаллар ҳам учрайди. Мас., Атойининг:

*Эй пари пайкар санам, сен наслц одамдинмусен,  
Ё малак, ё ҳур, ё руҳи мужассамдинмусен? –*

матлаъли газали шу тарзда битилган.

**ТАЗКИРА** (ар. *تذكرة* – зикр этиш, тилга олиш, эслаш) – Шарқ мумтоз адабиётида кенг тарқалган адабий-танқидий жанр. Тларда шоирларнинг ҳаёти ва ижоди ҳақидаги мухтасар маълумотлар зикр этилиб, уларнинг асарларидан намуналар (одатда, бир неча байт ҳажмида) келтирилади ва ижодига умумий тарзда баҳо берилади. Тларда ижодкорлар ҳақида маълумотлар бериш билангина чекланиб қолинмасдан, шеърият ва унинг назарий масалалари билан боғлиқ эътиборга лойиқ фикр-мулоҳазалар, маълум бир давр адабий ҳаёти ҳақидаги муҳим маълумотлар ҳам ўрин олади. Адабиёт тарихида шоирларгина эмас, балки олимлар, авлиёлар ҳақидаги Тлар ҳам яратилган (мас., А.Навоий. «Насойим ул-муҳаббат»; Сидқий. «Тазкираи Имоми Аъзам»). Т. ёзиш анъанаси дастлаб араб ва форс адабиётларида шаклланган бўлиб, кейинроқ туркий адабиётда ҳам кенг оммалашган. Т.нинг энг қадимги намунаси сифатида Абу Мансур ас-Саолибийнинг «Ятимат ад-даҳр фи маҳосили аҳли аср» («Замона аҳлининг фазилатлари ҳақида ягона дурдона», XI аср) асари эътироф этилади. Мазкур Т.дан ўша давр Араб, Ажам, Мовароуннаҳр, Хоразм ва Хуросон адабиёти ва санъати ҳақидаги қимматли маълумотлар ўрин олган. Туркий тилдаги илк Т. сифатида Навоийнинг «Маҷолис ун-нафойис» асари кўрсатилади. Тлар мумтоз адабиёт тарихи, алоҳида ижодкорлар асарларини, улар билан боғлиқ назарий масалаларни ўрганишда муҳим манба саналади. Жумладан, Муҳаммад Авфий Бухорийнинг «Лубоб ул-ал-боб» («Билимлар мағзи», XIII аср), Давлатшоҳ Самарқандийнинг «Тазкират уш-шуаро» (XV), Малехо Самарқандийнинг «Музаққир ул-асҳоб» (XIX аср), Раҳматулла Возехнинг «Тухфат ул-аҳбоб» (XIX аср), Фазлийнинг «Мажмуаи шоирон» (XIX аср), Аҳмад Табибийнинг «Мажмуаи шоирон» (XIX аср); XX аср бошлари адабиёти ҳақида маълумот берувчи Неъматулла Муҳтарам, Мирсиддиқ Ҳашмат ва Абдиларнинг бир хил – «Тазкират уш-шуаро» номли, шунингдек, П.Қаюмовнинг «Тазкирайи Қайюмий» асарлари шундай Тлар сира-сидандир.

**ТАЗМИН** (ар. تضمين – ўз ичига олиш) – қаранг: **назира**

**ТАЗОД** (ар. تضاد – зид қўйиш, қаршилантириш) – мумтоз адабиёт-

даги шеърий санъат, наср ё назмда бир-бирига қарама-қарши маъноли сўзларни ишлатиш. Илми бадиъга оид асарларда Т. санъати *тибоқ, табоқ, татбиқ, такофу, мутобақа, мутобиқа, тақобул, мутаозод* каби номлар билан ҳам юритилган, номланиши турлича бўлса ҳам, улар моҳиятан деярли бир хил. Шоир лирик қаҳрамон кўнглидан кечаётган зиддиятли кечинмаларни баён этиш, бир-бирига зид манзаралар чизиш ё бошқа шу каби мақсадларни кўзлаб байт таркибида бир-бирига қарама-қарши маъноли сўзлар (антонимлар)дан фойдаланади. Т.ни юзага келтираётган қарама-қарши маъноли сўзлар англлатувчи тушунчалар бир-бирига мутлақо зид (*ўт ва сув*) бўлиши, зидлик даражаси у қадар кескин бўлмаслиги (*қора ва қизил*), феълнинг бўлишли-бўлишсиз шакллари орасидаги каби (келди-келмади) фақат шарт-ли равишдагина зидланиши ҳам мумкин. Мумтоз адабиётшу-носликда шу жиҳатлардан келиб чиқиб Т.нинг бир неча турлари фарқланган бўлса ҳам, ҳозирги адабиётшуносликда зидликнинг қайси кўриниши бўлишидан қатъи назар, Т. атамаси билан юритилади. Мас., Лутфий газалларидан бирини:

*Йўқтурур ёлғиз бу Лутфий жонига жаври рақиб,  
Қайда бир доно дурур, ул жаври нодон тортадур, –*

мақтаъси билан яқунларкан, «рақиб жабру жафосини тортаётган фақатгина Лутфий эмас, қаердаки бир доно бўлса, у нодон жабрини тортади», аслида, ҳаётнинг қонуни шундай деган чуқур фалсафий хулосага келади. Байтда қўлланган Т., доно ва нодон сўзлари орасидаги зидлик мазкур фалсафий хулосага асос бўлиб, уни ёрқин ифодалашга хизмат қилган.

**ТАКРИР** (ар. تکرير – такрор) – мумтоз адабиётдаги шеърий санъат, бир сўзни байтнинг турли ўринларида такрорлаш. Айрим манбаларда *радд*нинг бир кўриниши сифатида таърифланса ҳам, Т.ни алоҳида санъат сифатида тушуниш, уни раддан фарқлаш мақсадга мувофиқдир. Чунки, биринчидан, Т.да сўзнинг такрорланиш ўрни қатъий белгиланган эмас: битта сўз кетма-кет такрорланиши ҳам, байт ё шеърнинг турли ўринларида такрорланиши ҳам мумкин; иккинчидан, Т.нинг бадиий-эстетик функцияси фикрни таъкидлаш бўлиб, ушбу санъат қўлланган байт (ёки шеър) оҳанги ҳам шунга мосдир. Мас., Ферузнинг:

*Қилурман ютуб шавқи лаълингда қон  
Фигону фигону фигону фигон, –*

байтида Т. маънони таъкидлаб кучайтиради ва шунга мос оҳанг билан ўқишни тақозо этади. Ёки Эркин Воҳидовнинг:

*Кечир, янглишмаган ким бор, менинг ҳам кўп гуноҳим бор,  
Одамзод асли нокомил, кечир, ё раб, кечир, ё раб, –*

байтидаги «кечир» сўзининг такрори илтижо оҳангини кучайтириб, лирик қаҳрамон руҳий ҳолатини ёрқин ифодалашга хизмат қилади.

**ТАКРОР** – матний, композицион ёки тематик бирликларнинг маълум бадиий-эстетик мақсадларни кўзлаган ҳолда такрорланиши, бадиий матн (ва асар композицион қурилиши)га хос шундай усулларнинг умумий номи. Т. бадиий асарнинг турли сатҳларида кузатилади. Жумладан: а) бадиий нутқда: фонетик (*аллитерация, ассонанс, фонетик анафора, иштиқоқ*), лексик (*сўз Т.и, климакс, анафора, эпифора, анадиплосис* ва б.), семантик (*градация, маъно Т.и*) синтактик (синтактик параллелизм, хиазм); б) ритмик бирликларнинг ўлчов асосида тартибли такрорланиши: туроқ (*рукн*), мисра (*ёки баҳр*), банд; в) шеър композицияси даражасида: мисра Т.и (*рефрен, тарже*), банд Т.и (*нақорат*); г) образли-тематик Т.лар (*тематик параллелизм, мотив*).

**ТАЛМЕХ** (ар. تلميح – чақмоқ чақиши, кўз қирини ташлаш, назар солмоқ) – мумтоз адабиётдаги шеърий санъат, шеърда машхур тарихий воқеа, шахслар, бадиий асарларга ишора қилиш. Т. шоирни кўзда тутилган фикрни батафсил айтиш, ҳолатни батафсил тасвирлаш заруратидан халос этиб, кўзланган самарага ўша фикр ёки ҳолатга мос келадиган бошқа бирор ҳаётий ёки бадиий фактга ишора қилиш биланоқ эришиш имконини беради. Натижада оз сўз билан кўп маъно ифода қилиш (қ. *ийжоз*) мумкин бўлади, зеро, Т. қўлланган байт мазмуни ишора қилинаётган тарихий воқеа ёки бадиий асар мазмуни билан бойийди. Т.даги ишора тарихий воқеа ёки бадиий асар номини келтириш, улар билан боғлиқ бирор лафзни тилга олиш орқали очиқ ёки яширин тарзда амалга оширилиши мумкин. Шу жиҳатдан Машрабнинг:

*Шайх Санъондин бўлуб тўрт юз мурид соҳибкамол,  
Кўрди тарсозодани, хўкбону тарсо қилди ишқ, –*

байти билан Нодиранинг:

*Зоҳидо, ишқу муҳаббат аҳлини маъзур тут,  
Ёр кўйида на бўлди шайх Санъон оқибат, –*

байтини қиёслаш мумкин. Иккала байтда ҳам машхур «Шайх Санъон қиссаси»га ишора қилинган. Байтлардаги маънони теран англаш учун, аввало, ўқувчининг қисса воқеаларидан, Шайх Санъон тақдиридан хабардор бўлиши талаб этилади. Келтирилган байтларнинг биринчисида ишора иккинчи байтдагига нисбатан батафсил ифодаланган: унда мазкур қиссани ёдга солувчи «Шайх Санъон», «тўрт юз мурид», «тарсозода», «хўкбону тарсо» каби бир неча тушунчалар бўлиб, қиссага ишора ҳам, ундан мурод ҳам очиқ ифодаланган. Шундай бўлса ҳам, шоирнинг ишқ қудрати ва қудратли ишққа мубтало бўлган ошиқ аҳволи ҳақидаги фикр-тасаввурларини тўла англаш учун Шайх Санъон ҳолатини ёдга олиш, қисса руҳини байт руҳига кўчириш лозим бўлади. Иккинчи байтдаги ишора эса у қадар очиқ эмас: шоир шайх Санъонга нима бўлганини очиқ айтмайди, «шайх Санъоннинг ёр кўйида нима бўлганига қара» дея эслатиш билан чекланади, биринчи байтдаги каби қисса воқеаларини эслатувчи сўзларни ишлатмайди, хуллас, ишора ва ундан кўзланган муддао бирмунча яширин қолади. Шунинг учун А.Хусайний Т.ни лугзга ўхшатади: «Билгилким, талмехнинг баъзиси лугзга ўхшар, ул жиҳатдинким, андин мақсад зоҳирий маъоний бўлмай, имо йўли била адо этилган маъно мақсад бўлур». Яъни Т.да шоир асл мақсадини гўё атайлаб яширгандай бўлади ва уни топиш учун худди топишмоқлардаги сингари асл мақсадга етакловчи белги-ишораларни келтиради, ўқувчи эса шу белгилар билан байтда айтилаётган фикрлар ўртасидаги ўхшашликлар асосида асл мақсадни англаб етади.

Т.да ишора қилинаётган тарихий ёки бадий фактнинг машхур, яъни кўпчиликка таниш бўлиши кўзда тутилади, шу шартнинг бажарилиши Т.нинг тушунарли бўлиши гарови ҳисобланиб, ишора қилинаётган фактнинг машхурлик даражаси нечоғлик юқори бўлса, Т. моҳиятини тушунувчилар доираси ҳам шунча кенг бўлади ва аксинча. Мас., Э.Воҳидовнинг:

*Минг Самарқанд, минг Бухоро ҳадя этгум ҳол учун,  
Лек нигоримда ҳавас йўқ мулку давлат, мал учун, –*

байтини ўқибоқ Ҳофиз Шерозийнинг машхур матлаъсига ишора

қилинаётгани, шоир салафи билан ижодий мусобақага киришгани англашилади. Зеро, бундаги ошиқ муҳаббати Ҳофиз талқинидаги ошиқникидан кам эмас – ундан минг карра ортиқ ҳадяга тайёр; маъшуқа эса мол-мулк ҳавасидан фориғ, яъни шу томони билан у ҳам Ҳофиз талқинидаги маъшуқадан баланд туради. Бу жиҳатдан қаралса, бадий асар ёки тарихий воқеага умумий тарзда қилинган ишорани тушунувчилар доираси улардаги конкрет эпизод, деталларга қилинган ишорани тушунувчилар доирасига қараганда тораяди. Мас.: Машраб ва Нодира байтларидаги каби Навоийнинг:

*Кўнглум ўтидин, не тонг, гар топса руҳсоринг фуруғ,  
Шўх тарсо мусхаф ўртар шайх Санъон ўтига, –*

байтида ҳам «Шайх Санъон қиссаси»га ишора қилинган. Бироқ аввалги байтларда ишора, умуман, асарга (яъни ишқ қудрати шайхни динидан-да кечтирганига) қаратилган бўлса, бунда қиссадаги конкрет эпизод – тарсо маъшуқа шартига биноан мусхафнинг куйдирилишига ишора қилинади. Яъни бу байтдаги Т. моҳиятини англаш учун қиссадан шунчаки хабардорлик кам, уни яқиндан билиш талаб этилади. Бундан ташқари, Э.Воҳидов байтида кузатилгани каби, Т.да ишора қилинаётган объект номи аталмасдан, унинг мазмунига ишора қилинган ҳолларда ҳам тушуниш қийинлашади. Мас., Машрабнинг:

*Ризо мулкидаман ҳалқумни тутдим тиғи Акбарга,  
Бу йўлда сийнаи поки Забҳуллога сигмамдур, –*

байтида Иброҳим алайҳиссаломнинг ўгли Исмоилни қурбонликка келтириши билан боғлиқ ривоятга ишора қилинади. Лекин байтда бу нарса ошкор айтилмайди-да, шоир ўз ҳолатини ризолик билан бўғзини пичоққа тутган пайғамбарзодага қиёсан ифода этади. Байтдаги Т. моҳиятини англаш учун ўқувчидан, аввало, ишора объектини таниб олиш, шундан кейингина лирик қаҳрамон руҳий ҳолатини ривоятга қиёсан тасаввур этиш талаб қилинади. Хуллас, шеърда тасвирланаётган ҳолат, ифода этилаётган фикр билан тарихий ёки бадий фактлар орасида муштарак нуқталар мавжудлиги Т. санъатининг замини бўлиб, у ҳамиша ўхшатиш асосида юзага келади. Яъни Т. матннинг мазмун доирасини кенгайтиради, байтдаги ва ишора қилинган фактлардаги фикр, ҳолат, воқеа ва ш.к.ни ана-

логиялар асосида қиёслаш, муқобил қўйиш, қаршилантириш орқали бадииятни кучайтиради, адабий асарларнинг диалогик алоқасини таъминлайди ва намоён этади.

**ТАМАННИЪ** (ар. *تمنيع* – орзу қилиш) – иншо йўлларида бири, фикрни ифодалаш усули, лирик қахрамон ўй-кечинмалари, ҳис-туйғуларининг орзу-истак изҳори тарзида ифодаланиши. Тда зоҳиран лирик қахрамон орзусигина ифодаланса ҳам, ботинда бошқа мақсад (маъшуқа васфи, ўз ҳолининг баёни ва б.) кўзда тутилади. Мас., Огаҳийнинг:

*Менинг мақсудим улдурким, сенинг бошингдин айлансам,  
Оёқингга бўлуб садқа, кўзу қошингдин айлансам, –*

байтида лирик қахрамоннинг «бошингдан, кўзу қошингдан айлансам, оёғингга садқа бўлсам» тарзидаги орзуси, бир томондан, маъшуқанинг ҳар жиҳатдан ётук ва гўзал эканлиги эътирофи бўлса, иккинчи томондан, ошиқнинг чексиз муҳаббати изҳоридир.

**ТАМСИЛ** (ар. *تمثيل* – мисол келтириш, далиллаш) – мумтоз адабиётдаги шеърий санъат, шеърда ифода этилган фикрни ҳаётий мисоллар ёрдамида далиллаш, тасдиқлаш, изоҳлаш. Моҳиятан Т. *ирсолу масал* (қ.) санъатига ўхшаш, фақат ундан фарқли ўлароқ фикр тасдиғи учун мисол ҳаётнинг ўзидан олинади. Яъни агар *ирсолу масал*да фикр тасдиғи учун халқнинг минг йилликлар давомидаги ҳаётий тажрибасини ўзида мужассам этган мақолларга таянилса, Тда кўпроқ шахсий тажриба, ҳаётий кузатишларга асосланилади. Т. ўхшатиш асосида воқе бўлади, чунки айтилаётган фикр (ёки тас-вирланаётган ҳолат) ва унинг тасдиғи (ёки иллюстрацияси) учун келтирилаётган ҳаётий мисол моҳиятида ўхшашлик бор. Бироқ ўхшатишдан фарқли равишда, Тда ўхшатиш воситаларидан фойдаланилмайди, фикр (ёки ҳолат) параллел берилсада, улар орасидаги ўхшашлик, боғлиқлик, алоқадорликни англаб олиш ўқувчининг ўзига ҳавола этилади. Мас., Алишер Навоийнинг куйидаги машҳур қитъасида фикрни далиллаш учун моҳирона Т. қилинган:

*Нокасу ножинс авлодин киши бўлсин дебон,  
Чекма мөҳнатким, латиф ўлмас касофат олами  
Ким, кучук бирла хўтукка неча қилсанг тарбият,  
Ит бўлур, доғи эшак, бўлмаслар асло одами.*

Қитъанинг биринчи байтида шоир тарбияда насл ҳал қилувчи аҳамиятга эга, шунинг учун «нокасу ножинс»лар авлодини одам қиламан деб уриниш бефойда деган асосий фикрини айтади, сўнг уни асослаш учун кучук билан хўтикни қанча тарбияласанг ҳам, одам бўлиб қолмайди тарзидаги ҳаётий мисолни келтиради.

**ТАНКА** (японча «қисқа кўшиқ») – япон шеъриятидаги кўҳна лирик жанрлардан бири, тургун шеърий шакл. Т. беш мисрадан таркиб топади, унинг биринчи ва учинчи мисралари беш бўгинли, қолган учта мисраси эса етти бўгинли ўлчовга эга (5+7+5+7+7), мисраларнинг қофияланиши талаб қилинмайди. Манбаларда бизгача етиб келган энг қадимги Т.лар VIII асрда ёзиб олинган. Жанрнинг гуркираб ривожланиши X – XIII асрларга тўғри келади, бунинг омиллари сифатида япон ҳукмдорлари саройларида мунтазам ўтказиб турилган мушоиралар, танканавислар мусобақалари, Т.лардан мамлакат миқёсида махсус тўппамлар тузиб борилгани кўрсатилади. Тематик жиҳатдан Т.лар чегараланмаган бўлса ҳам, анъанага кўра уларда кўпроқ севгимуҳаббат, ҳижрон, сафар, йил фасллари каби мавзулар қаламга олинган. Кейинча шакл томонларига эътиборнинг кучайиши жанр тараққиётида тургунликка сабаб бўлди. XIX аср охири – XX аср бошларида ижтимоий мавзуларда яратилган Т.лар жанр тараққиётида янги саҳифа очди. Т. жанрининг бошқа халқлар шеъриятига жадал кириб кела бошлаши ҳам шу даврга тўғри келади.

**ТАНОСИБ** (ар. *تناسب* – дахлдорлик, алоқадорлик) – мумтоз адабиётдаги шеърий санъат, фикрни бир-бирига алоқадор, маъно жиҳатидан яқин ва ўзаро мутаносиб тушунчаларни билдирувчи сўзлар орқали ифодалаш. Мас., Навоийнинг:

*Шаҳ ёнин фарзин киби кажлар мақом этса, не тонг,  
Ростравлар арсадин гар тутсалар руҳдек қироқ, –*

байтида шаҳ, фарзин, арса (шахмат тахтаси), руҳ сўзлари бир-бирига узвий алоқадор ва мутаносиб сўзлар бўлиб, шоир улар воситасида ўзига хос образли лавҳа яратган.

**ТАНСИҚ УС-СИФОТ** (ар. *تتميق الصفات* – сифатлар тизмаси, кетмакет, изма-из сифат келтириш) – мумтоз адабиётдаги шеърий санъат, нарса-тушунча ёки шахс таърифида бир неча сифатлашларни кетма-кет санаш. Изма-из келтирилаётган сифатлар

ёрдамида шоир ўша тушунча ёки шахсни васф этиш, тасвирлаш ёки салбий жиҳатларини эслатишни мақсад қилиб қўяди. Мас., Фурқатнинг:

*Узоринг барги гулдин нозигу, хушранг, хушбўйроқ,  
Бу янглиг тозау тар гулки, ё раб, қай чамандандур, —*

байтида сифатларни кетма-кет санашдан мурод тавсифланаётган нарсанинг белгида ортиқлигини таъкидлаб, муболағали таъриф тавсифни юзага келтиришдир. Т.с. санъати бир байт доирасида ҳам, бутун бошли шеър (рубойи, газал, қасида кабилар) доирасида ҳам юзага келиши мумкин.

**ТАНҚИД** (ар. *تنقيد* – сайлаш, саралаш; муҳокама қилмоқ) – бадиий танқид, кенг маънода ҳозирги бадиий жараён муаммоларини ўрганиш, янги пайдо бўлган санъат асарларини муҳокама қилиш, уларнинг мазмун-моҳияти, ютуқ ва камчиликларини очиб бериш, бадиий тафаккур тараққиётининг жорий ҳолати ва ижтимоий дид нуқтаи назаридан баҳолаш билан шугулланувчи соҳа. Санъат турларининг қайси бири билан шугулланишига қараб Т. соҳалари ажратилади: кино Т.и, театр Т., мусиқа Т.и ва ҳ. Бадиий адабиёт билан шугулланувчи Т. адабий танқид деб юритилади.

**ТАНҚИДИЙ РЕАЛИЗМ** – XIX асрнинг ўртапаридида майдонга келган адабий йўналиш, ижодий метод (қ. *реализм*). Термин илк бор М.Горький томонидан қўлланган ва шўро даври адабиётшунослигида фаол истеъмолда бўлган. Дарҳақиқат, XIX аср ўрталаридан адабий жараёнда етакчилик мақомини эгаллай бошлаган реалистик адабиётнинг кўплаб намуналарида мавжуд тузум теран бадиий таҳлил этилиб, унинг инсонийликка зид моҳияти очиб берилади (мас., О.Бальзак, Ф.Достоевский, Л.Толстой ва б.). Яъни реалист санъаткорлар ўз идеалларидан келиб чиқиб кўпинча воқеликка танқидий муносабатда бўладилар ва уни ғоявий-ҳиссий инкор қилдилар. Ҳолбуки, биринчидан, давр адабиётида воқеликни инкор эмас, тасдиқ этувчи асарлар ҳам бўлган, демак, ушбу атама давр адабиётидаги ҳодисани тўлиқ қамрай олмайди; иккинчидан, конкрет бадиий асардаги ғоявий-ҳиссий инкор куннинг долзарб ижтимоий-сиёсий эҳтиёжлари билангина боглиқ мазмун қатлами, холос, унда боқий умуминсоний қадриятлар ва мангу муаммолар талқинидан келиб чиқувчи умумбашарий мазмун қатлами ҳам бор, демак, бутун бошли адабий-бадиий ҳодиса

моҳиятини инкор руҳи билангина белгилаш унчалик тўғри бўлмайди. Ҳозирги адабиётшуносликда Т.р. термини анъанавий равишда қўлланиб турган бўлса-да, унинг фаоллиги сезиларли даражада пасайган.

**ТАРДУ АКС** (ар. *طرد عكس* – хувмоқ; тескари қилмоқ, тескари қилиб такрорлаш) – мумтоз адабиётдаги шеърий санъат, байт таркибидаги икки сўз ёки бирикмани аввал маълум бир тартибда келтириб, сўнг уларнинг ўрнини алмаштириб такрорлаш. Бу ҳолнинг бир мисра доирасида воқе бўлиши маҳраж (тугалланмаган) Т.а. дейилади. Мас.:

*Зулфи савдоси, бу савдойи бошинда кўптурур,  
Бўлса савдо аҳли, тонг йўқ, аҳли савдо бирла дўст* (Навоий).

Т.а. нинг байт доирасида воқе бўлган кўриниши мукамалроқ ҳисобланади, шунинг учун у *комил* (тугалланган) Т.а. деб аталади:

*Офатижон десам, кулиб роҳатижон ўзим деди,  
Роҳатижонмисан десам, офатижон ўзим деди* (Чустий).

Маъно нуқтаи назаридан ҳам Т.а.нинг икки кўриниши фарқланади. Агар ўрнини алмаштириб такрорлаганда сўз ёки бирикма маъноси ўзгармаса, акси мутаҳодий дейилади. Мас., Э.Воҳидовнинг қуйидаги байтида «Зухрою Ой» бирикмасини «Ою Зухро» тарзида такрорлаш билан маъно ўзгаришсиз қолади:

*Мен сени Зухрою Ой деб илтижо қилдим ва лек  
Сен йироқсан, гарчи менга Ою Зухро бир қадам.*

Т.а.нинг маъно жиҳатидан фарқланувчи иккинчи кўриниши акси мужрий деб номланиб, бунда ўрин алмашиши натижасида, янги маъно ҳосил бўлиши назарда тутилади. Мас., Э.Воҳидовнинг қуйидаги:

*Интилар борлиқни инсон баркамол этмоқ учун,  
Не ажаб, инсонни борлиқ баркамол этган эмас, —*

Байтида «борлиқни инсон» бирикмасининг «инсонни борлиқ» тарзида қайтарилиши натижасида, эга-кесим муносабати ўзгаради ва натижада янги мазмун ҳосил бўлади.

Шунингдек, Т.а. санъатида байтда аксланиб, ўрни алмашиб келаётган сўз ёки бирикмалар сони бирдан ортиқ бўлиши ҳам мумкин. Мас., Навоийнинг:

*Дема раъно қад ила жилвасидин холингни,  
Жилва жонимга бало, ул қади раъно офат, –*

байтида «раъно қад» бирикмаси ичида ҳам, бу бирикма билан «жилва» сўзи орасида ҳам ўрин алмашиб такрорланиш кузатилади.

**ТАРЖИБАНД** (ар. *ترجیع* – такрорлаш, айлантирмоқ, форс. *بند* – боғлаш) – мумтоз адабиётдаги ўзига хос композицион қурилишга эга йирик ҳажмли лирик жанр. Т. бир неча байтдан ташкил толиб, унинг ҳар бир банди газал типига қофияланувчи (а-а, б-а, в-а, г-а...) бир неча байтдан таркибланади, ҳар бир банд охирида эса маснавий типига қофияланган бир байт айнан такрорланади. Т.лар, одатда, ҳар бири 8 – 11 байтдан таркибланувчи 7 – 8 банддан ташкил топади, бироқ бу борада қатъий меъёрлар белгиланган эмас. Т.лар кўпроқ фалсафий-ахлоқий мавзуда ёзилади, шеър давомида қўйилган мавзу кенг ва атрофлича ёритилади. Мавзу бирлиги, яъни шеър давомида битта мавзунинг изчил ривожлантирилиши, бандларнинг барини боғловчи таржеънинг мавжудлиги Т.нинг яхлитлигини таъминлайди. Бандларни ўзаро боғлагани учун такрорланувчи байт – таржеъ *восила байт* (боғловчи байт) деб аталади, унга Т.нинг энг муҳим композицион унсури сифатида қаралади, жанрнинг номланиши ҳам шу билан изоҳланади. Такрорланаётган байтнинг яна бир вазифаси лирик қахрамон кечинмаларини таъкидлаш, ўқувчи диққатини асосий фикрга (қ. *лейтмотив*) қайта-қайта жалб қилишдан иборат. Мазкур хусусиятлари билан Т. жиддий фалсафий-ахлоқий масалаларни лирик мушоҳада қилишга кенг имкон беради, шу боис Ҳофиз Хоразмий, Навоий, Фузулий, Юсуф Амирий, Равнақ, Мирий, Мунис, Огаҳий, Увайсий, Нодира, Табибий каби мумтоз шоирлар ижодида кенг ўрин тутади.

**ТАРЖИЪ** (ар. *ترجیع* – такрорламоқ, айлантирмоқ) – мумтоз шеъриятдаги санъат, шеърнинг ҳар бир банди охирида мисра ёки байтни такрорлаш; такрорланиб келаётган мисра ёки байт ҳам таржиъ дейилади (қ. *рефрен*). А.Ҳусайний ажам шоирлари Т.ни шундай тушунганини, араб шоирлари эса Т.ни тақрир турларидан бири, байт таркибида бир маънони қайта-қайта такрорлашга асосланган

санъат деб ҳисоблашларини айтади. Шеъриятимизда Т. санъати қўлланган шеърлар кўплаб учрайди. Мас., Фурқатнинг «Сайдинг кўя бер, сайёд» мусалласининг ҳамма бандларидан сўнг куйидаги байт Т. сифатида такрорланади:

*Ҳижрон ўқидин жисми кўп ёра экан мендек,  
Куйган жигари бағри садпора экан мендек.*

Машраб, Фузулий, Муқимий каби шоирларнинг мусамматларида Т. санъатидан моҳирона фойдаланилган. Шунингдек, мумтоз шеъриятда Т. асосида фарқланувчи *таржибанд* (қ.) жанри ҳам мавжуд.

**ТАРИХИЙ-ФУНКЦИОНАЛ ЎРГАНИШ** – бадий адабиётнинг ижтимоий тақдирини, бадий асарнинг ўқувчи омма онгидаги яшаш тарихи, турли тарихий босқичлардаги талқинларини ўрганиш. Бу хил ёндашув бадий адабиётга коммуникация жараёни сифатида қарашни тақозо этади. Модомики, коммуникация амалга ошган шарт-шароитлар ўзгариб турар экан, Т.-ф.ў. бадий асарнинг илгари амалга оширилган талқинларини ўша давр контекстида тадқиқ қилишни тақозо этади. Шунинг учун муайян асарнинг илгари (адабий танқид, олимлар, ўқувчи омма, режиссёрлар, актёрлар, китоб безакчилари ва ш.к. томонидан) амалга оширилган талқинлари Т.-ф.ў. учун материал бўлиб хизмат қилади. Т.-ф.ў. адабий меросни тўғри баҳолаш, уларнинг ҳозирги кундаги аҳамиятини очиб бериш, ўтмишда яратилган асарларнинг илмий жиҳатдан тўғри, адекват талқин этилишида муҳим аҳамиятга эгадир. Аён бўладики, илгари яратилган асарларнинг ҳозирги ҳаётини ўрганиш Т.-ф.ў.нинг муҳим ва асосий масаласидир. Адабиёт тарихи конкрет асарга ўқувчи омманинг қизиқиш даражаси, талқинлари, унга берилаётган баҳолар ўзгариб туришига кўплаб мисолларни беради. Зеро, адабий асар мазмуни кўпқатламли бўлиб, муайян давр шарт-шароитлари (бадий диддаги ўзгаришлар, шу даврда туғилган маънавий-руҳий эҳтиёжлар) билан боғлиқ ҳолда улардан бири актуаллашаверди. Яъни бадий асарнинг турли даврларда турлича тушунилиши ва баҳоланиши қонуният мақомидадир. Мас., А.Қодирий «Ўткан кунлар» романида ўз даври ижтимоий муаммолари (миллат фожиаларининг илдизи, миллий озодлик масалалари)га муносабат билдириб, даври учун бениҳоя муҳим ғояларни сингдиришга интилган эди. 60-йилларда асар мазмунининг бу кирраси тушиб қолади-да, унинг бошқа қатлами (ота-она орзуси, севги ва вафо) актуаллашди,

у кўпроқ «ишқий маиший, саргузашт» асар сифатида тушунилади. 80-йиллар охирида, жамиятда истиқлол ва эрк соғинчи кучайган бир шароитда, ижтимоий-тарихий шароит асар яратилган даврдига моҳиятан яқин эди, бу эса яна асар яратилган даврдаги актуал мазмунни олдинги планга чиқарди. Ҳозирги кунда эса ўқувчини романдаги умуминсоний муаммолар талқини – ёзувчининг инсон эрки, қадри ва шаъни, адолат ва разолат, диёнат ва хиёнат, шахс ва жамият, шахсий манфаат билан ўзга шахслар манфаати муносабати каби қатор мураккаб масалалар ҳақидаги мулоҳазалари кўпроқ қизиқтиради. Истиқлол шароитида ўтмиш адабий меросини қайта баҳолаш зарурати юзага келдики, бу нарса адабиётимизни ўрганишда тарихий-функционал ёндашувни долзарб этиб қўйди. Шу боис ўтган аср охирларидан бошлаб ўзбек адабиёти Т.-ф.ў. борасида дадил қадамлар қўйилди. Жумладан, А.Расулов, С.Содик, Р.Кўчқор, Б.Каримов каби олимларнинг А.Қодирий ва А.Қаҳҳор асарларини тарихий-функционал аспектда ўрганишга бағишланган тадқиқотлари бу борадаги жиддий ютуқлардан саналиши мумкин.

**ТАРКИББАНД** (ар. *تركيب* – тузилиш, форс. *بند* – боғлаш) – мумтоз адабиётдаги ўзига хос композицион қурилишга эга йирик ҳажмли лирик жанр. Т.нинг ҳар бир банди газал типига қофияланувчи бир неча байтдан таркибланиб, охирида маснавий типига қофияланувчи байт келтирилади. Қурилишидаги бу жиҳатлари билан Т. *таржибанд*-га ўхшаш, фақат унда бандлар охиридаги байт *таржеъ* эмас, ҳар бир банд охирида бутунлай янги байт келтирилади. Т.нинг бандлари *газал*ни эслатади, фақат унда таҳаллус келтирилмайди. Т. бандларидаги байтлар сони қатъий белгиланган эмас, лекин ҳар бир Т.да бандлардаги байтлар сони бир хил бўлиши лозим (мас., Ҳофиз Хоразмий девонига киритилган Т. ҳар бири 8 тадан байтни ўз ичига олган 4 та банддан ташкил топган). Т.даги бандлар гоё ва мавзу жиҳатидан бир-бирига узвий боғлиқ бўлиб, битта мавзунинг изчил ривожлантирилиши асар яхлитлигини таъминлайди: қўйилган мавзу талқини банддан-бандга ёрқинлашиб боради, газал кўринишидаги ҳар бир банд мавзунинг қайсидир қиррасини атрофлича ёритишга хизмат қилади. Шу жиҳатлари билан Т. жиддий фалсафий масалаларни лирик мушоҳада этиш учун қулай шакл бўлиб, унга Ҳофиз Хоразмий, Навоий, Фузулий каби мутафаккир шоирлар айрича эътибор қилганлари шундандир.

**ТАРСЕЪ** (ар. *ترصیع* – дурни, гавҳарни илга тизмоқ) – мумтоз

адабиётдаги шеърий санъат, байтнинг биринчи мисрасидаги барча сўзларнинг кейинги мисрадаги муқобилларига қофиядош ва вазнда тенг бўлиши. Бироқ Т.нинг асосий шarti қофиядошлик бўлиб, «Агар қофия туфайли вазнда ихтилоф бўлса ҳам, зарари йўқдир» (А.Хусайний). Яъни биринчи мисрадаги сўзлар иккинчи мисрадаги муқобиллари билан қофиядош бўлса, вазнда тенглик бузилган ҳолда ҳам, Т. санъати юзага келаверади. Айни пайтда, мисралардаги муқобил сўзларнинг ҳам қофиядош, ҳам вазндош бўлиши Т.нинг мукаммал кўриниши ҳисобланади. Шеърга ўзгача мусиқийлик бахш этиши сабаб шеърятимизда Т. анча фаол қўлланган, унинг гўзал намуналарини турли жанрларга мансуб шеърларда кўплаб учратиш мумкин. Фақат қофияланиш тартиби ўзига хос бўлгани учун, газалдаги Т., одатда, матлаъда юзага келишини унутмаслик лозим. Бунинг сабаби шуки, Т. байт мисраларидаги барча сўзларнинг ўзаро қофиядош бўлишини тақозо этади. Газалда эса матлаъдан кейинги байтларнинг биринчи мисралари очиқ қолгани ҳолда, иккинчи мисраларининг матлаъга қофиядош бўлиши талаб этилади, шунингдек, аксар ҳолларда газал радифли бўлади – буларнинг бари матлаъдан бошқа байтларда Т.нинг юзага келишига халақит беради. Иккинчи томондан, матлаънинг Т. асосига қурилиши *ҳусни матлаъ* (қ.) санъати талабларига мос бўлиб, илк байтнинг ўқувчи ёдида муҳрланиб қолишига хизмат қилади, шу тариқа Т. санъатини қўллашда газал жанри хусусиятларидан келиб чиқувчи чеклов охир-оқибат унинг фойдасига ишлайди. Мас., Навоийнинг қуйидаги матлаъсида Т. санъати қўлланган:

*Не хуш келгайки, келгай нозаниним,  
Не хуш бўлгайки, бўлгай ҳамнишиним.*

Т. санъатининг қўлланиши, айниқса, бир байтдангина ташкил топувчи фардларда муҳим, чунки ҳикматли фикрнинг ўзига хос оҳанг билан жаранг топиши унинг ўқувчи ёдида сақланишида, оммалашиб кетишида катта аҳамият касб этади. Мас., Навоийнинг:

*Мурувват барча бермакдур, емак йўк,  
Футувват барча қилмакдур, демак йўк, –*

фарди мисраларидаги қофияланаётган сўзлар равийда ҳам, ҳаракату сукун (унли ва ундошлар)да ҳам бир-бирига мувофик, у Т.нинг энг мукаммал кўринишига мисол бўла олади.

Маснавий шаклида ёзилган дostonлар таркибидаги Т. санъати қўлланган байтлар матнда ритмик ўзига хослиги, муסיқийлиги билан алоҳида ажралиб туради. Шу боис бундай байтлар кўпроқ воқеалар шиддати ортган, қаҳрамон руҳиятида драматизм кучли намoён бўлган ўринларда, муаллиф аввал билдирган фикрларини умумлаштириб ифодаламоқчи бўлган ҳолларда учрайди. Мас., «Лайли ва Мажнун»да фарзандини ишқ балосидан халос этиш ниятидаги ота Қайсни Каъбага олиб боради: у ўглининг хурога ишқдан халос этишни сўраб муножот қилишини истади. Лекин Қайс ўзини ишқдан айро тасаввур қилолмайди, Навоий қаҳрамонининг бу ҳолатини унинг муножотидаги қуйидаги байтларда ифода этади:

*Кўнглумга фазо ҳарими ишқ эт,  
Жонимга гизо насими ишқ эт!*

*Ишқ исидин эт дамимни мушкин,  
Ишқ ўтидин эт юзумни рангин!*

*Лайли ишқин танимда жон қил,  
Лайли шавқин рагимда қон қил!  
Дардини нажотим эт, илоҳи,  
Ёдини ҳавтим эт, илоҳи!*

*Кун юзини айладинг мушаккал,  
Тун кўзини айладинг муқаҳҳал.*

Келтирилган байтлардаги айрим жуфтликлар (кўнгил-жон, ис-ўт, дам-юз, тан-рағ)да равийнинг йўқлиги мумтоз қофия қоидаларига мувофиқ бўлмаса-да, улардаги кўшимчалар ҳисобига юзага келаётган оҳангдошлик байтларда Т. санъати мавжуд дейишга имкон беради. Шунингдек, байтлардаги барча сўзларда вазндошлик кузатилгани учун, уларни мувозана (қ.) санъатига ҳам мисол қилиш мумкин.

**ТАСБЕЪ** (ар. تصبيح – бармоқ билан кўрсатиш) – мумтоз адабиётдаги шеърий санъат, байтнинг биринчи мисраси қайси сўз билан тугаса, кейинги мисрани шу сўз билан бошлаш, такрор турларидан бири. Биринчи мисра охирида ва иккинчи мисра бошида такрорланаётган сўз шоир фикрини таъкидлаш, маънони кучайтириш вазифаларини ўтайди. Мас., Навоийнинг:

*Йўқ демаким, ул қувш ёдида фарёд айламон,  
Айламон фарёдким, гардунни барбод айламон, –*

байтида такрорланаётган «айламон» сўзи Т.ни юзага келтирмоқда.

**ТАСВИР** (ар. تصوير – тасвирлаш, бирор нарсанинг суратини солиш) – бадиий воситалар ёрдамида воқеликдаги нарса-ҳодисаларни ўқувчи (томошабин) бевосита ва яхлит ҳолда, уларга хос индивидуал-бетакрор хусусиятлар билан бирликда конкрет ҳис эта оладиган тарзда акс эттириш. Гарчи моҳиятан Т. термини *тасвирий санъат*га хос бўлса-да, уни бошқа санъат турларига нисбатан, хусусан, бадиий адабиётга татбиқан қўллаш ҳам ўринлидир. Бадиий адабиётда Т. сўз воситасида амалга оширилади, шунга кўра, *тасвирий санъат*дан фарқли ўлароқ, адабий асарда тасвирланган нарса-ҳодиса «ички кўз» билан кўрилади: сўз воситасида ўша нарса-ҳодиса чизгилари муайян кетма-кетликда қайд этилади ва охир-оқибатда тасаввурда унинг Т.и сурати жонланади. Тасвирий санъатнинг, айниқса, адабиёт сингари динамик тасвирий санъат саналувчи кинонинг ривожланиши, санъат турлариаро алоқа ва таъсир жараёнининг мавжудлиги, ўқувчиларда эстетик объектни кўриш орқали қабул қилиш имконларининг кенгайгани бадиий адабиётдаги Т.ни сифат жиҳатидан ўзгартириб, имкониятларини кенгайтирди. Замонавий адабиётнинг Т. имкониятлари кенгайгани ҳозирда адабий асар таҳлипида *нуқтаи назар, перспектива, ракурс, йирик план, умумий план* каби терминлар тобора кенг қўлланаётганида ҳам кўринади. Бу эса ҳозирда *тавсиф*нинг ичида ва унинг бир сифат кўриниши деб тушуниладиган Т.га вақти келиб алоҳида композицион унсур сифатида қаралиши мумкинлигини кўрсатади.

**ТАТАББУЪ** (ар. تتبع – бирор нарсанинг кетидан туриши, изидан бориб текшириш) – қаранг: **назира**

**ТАФРЕЪ** (ар. تفرع – тармоқланиш, шохлаш) – мумтоз адабиётдаги шеърий санъат, реал нарса-ҳодиса, ҳолат кабиларни инкор қилган ҳолда бошқа нарса-ҳодиса, ҳолатга ўхшатиш. Моҳиятан Т. *хусни таълил* (қ.) санъатига жуда яқин туради. Уларнинг фарқи шундан иборатки, хусни таълилда шоир табиий ҳолатга нотабиий, шоирона сабаб кўрсатишга ҳаракат қилади, Т.да эса бир нарсани бошқа бир нарса сифатида кўрсатиб, шу ҳолатни исботлашга уринади, бошқача айтсак, шоир ўз фикрида қатъий туриб олади. Мас., Навоий машҳур:



*Лолазор эрмаски, оҳимдин жаҳонга тушди ўт,  
Йўқ шафақким, бир қироқдин осмонга тушди ўт, –*

байтида худди шундай йўл тутади: кенг лолазор ва қизариб турган уфқни «кўриниб турган кенглик лолазор эмас, менинг оҳимдан жаҳонга ўт тушди ва шунинг учун у қип-қизил олов ичида қолди, кўкда қизариб кўринаётган нарса ҳам шафақ эмас, ўша оҳимдан жаҳонга тушган ўт энди бир тарафдан кўкка ўрламоқда» дейди.

**ТАФРИТ** (ар. *تفريط* – ўтказиб юбориш, сусткашлик қилиш) – қаранг: **муболага**

**ТАФСИР** (ар. *تفسير* – шарҳ, изоҳ) – мумтоз адабиётдаги шеърини санъат, байт аввалида мавҳумроқ тарзда айtilган фикрни байт давомида батафсил тушунтириб бериш; илми бадиъга оид манбаларда *табйин* деб ҳам юритилади. Яъни шоир гўё ўзи айтган фикр қандайдир ноаниқ, тушунарсиз эканини ҳис қилади ва уни изоҳлаш, шарҳлашга эҳтиёж сезади, гўё ўқувчига мавҳум бўлиб қолаётган масала тушунтирилиб, тафсир қилинади. Мас., Навоийнинг:

*Равзада кавсар қирогинда ҳаёл эттим Билол,  
Юз аро лаб, лаб уза шабранг холингни кўруб, –*

байти биринчи мисрасида шоир ҳаёлига кавсар қирогинда ўтирган Билол келганини айтиб, кейинги мисрада бунинг сабабини изоҳлайди, яъни ёрнинг юзи жаннатни, лаби кавсарни, холи эса Билолни ҳаёлига келтирганини айтади. Э.Воҳидовнинг:

*Уч балодан сақласин, чархи балокаш бўлмасин,  
Дўст меҳрсиз, дардсиз улфат, ёр жафокаш бўлмасин, –*

байтида эса аввал «уч балодан сақласин» деган истак ифода этилади, кейин «уч бало» деганда нималар назарда тутилаётгани шарҳланади. Аввалида мавҳум ифодаланган «уч бало» «меҳрсиз дўст», «дардсиз улфат» ва «жафокаш ёр» тарзида конкретлаштирилади. Айрим манбаларда Т. доираси бир байт билан чегараланмасдан, бир байтдаги мавҳумлик кейинги байтда изоҳланиши мумкинлиги ҳам эътироф этилади.

**ТАХМИС** (ар. *تخميص* – бешлик қилиш) – қаранг: **мухаммас**

**ТАШБЕҲ** (ар. *تشبيه* – ўхшатиш) – мумтоз адабиётдаги шеърини

санъат, икки нарса ва тушунча, ҳаракат ёки ҳолат ва ш.к.ларни бир-бирига ўхшатиш, қиёслаш. Адабиётда, хусусан, шеърятда энг кенг тарқалган ва қадимий санъатлардан бири. Т.нинг юзага келишида икки нарса-тушунча, икки ҳаракат ва ҳолат орасидаги ўхшашлик асос бўлади. Ўхшатиш учун ҳақиқий, реал ҳаётини нарса-буюмлар танланган бўлса, *ҳақиқий* Т., ноаниқ, мавҳум нарсалар танланган бўлса, *мажозий* Т. юзага келади. Т. санъати тўрт жузв орқали юзага келади: *мушаббих, мушаббихун бих, важҳи шабих, воситаи ташбих.*

Мушаббих (ёки мушаббах) – ўхшатилаётган нарса. Тушунтириш учун «ой каби гўзал юз» Т.и мисол қилиб олинса, унда «юз» мушаббихдир. Мушаббихун бих (ёки мушаббах бих) эса ўхшаётган нарса, мисолимизда «ой» мушаббихун бих бўлади. Важҳи шабих (ёки важҳи шибх) – ўхшатилиш сабаби, яъни икки нарса-тушунчани бир-бирига ўхшатиш асоси, «ой каби гўзал юз»да юз билан ой гўзаллик ваҳидан ўхшатилаётир. Воситаи ташбих (ёки одоти ташбих) – ўхшатишли конструкциядаги грамматик восита, мисолимизда «каби» кўмакчиси ўхшатиш воситасидир.

Т.нинг юзага келишида мазкур унсурларнинг барчаси иштирок этиши ҳам, улардан айримлари иштирок этмаслиги ҳам мумкин. Мас. Бобурнинг:

*Ё қошинг янглиғ эгилган жисми зоримниму дей?  
Ё сочингдек тийра бўлган рўзгоримниму дей? –*

байти ҳар иккала мисрасида ҳам барча унсурлари мавжуд бўлган Т. қўлланган: биринчи мисрада «қош» – мушаббих, «янглиғ» – воситаи ташбих, «эгилган» – важҳи шабих, «жисм» – мушаббихун бих; иккинчи мисрада «соч» – мушаббих, «-дек» – воситаи ташбих, «тийра» – важҳи шабих, «рўзгор» – мушаббихун бих. Т.нинг бу тури, яъни тўртала унсур ҳам қатнашган кўриниши *ташбеҳи муфассал* дейилади.

Илми бадиъга оид адабиётларда Т. тузилиши (юқоридаги унсурларнинг иштироки), қиёсланаётган нарса-тушунчалар орасидаги ўхшашлик даражасига кўра, яна бир қанча турларга бўлинади. Уларда тасниф билан боғлиқ турличаликлар бўлса ҳам, Т.нинг кўпчилик томонидан эътироф этилган турлари сифатида қуйидагиларни санаш мумкин: *Т.и мужмал* (қ.), *Т.и муяққад* (қ.), *Т.и мутлақ* (қ.), *Т.и киноят* (қ.), *Т.и маршрут* (қ.), *Т.и тасвият* (қ.),

*Т.и акс (қ.), Т.и измор (қ.), Т.и тафзил (қ.), Т.и мусалсал (қ.), Т.и мўъкад (қ.)*

**ТАШБЕҲИ АКС** (ар. *تشبيه عكس* – тескари ўхшатиш) – ташбеҳ турларидан бири, аввал бир нарса иккинчи бир нарсага ўхшатилади, сўнг бунинг акси амалга оширилади, яъни иккинчи нарса биринчи нарсага ўхшатилади. Бошқача айтилса, Т.а.да аввал мушаббих бўлган сўз кейин мушаббихун биҳ, мушаббихун биҳ бўлгани эса мушаббихга айланади. Мас., Навоийнинг куйидаги:

*Юзунг қуёшми экин ё қуёш юзунгми экин  
Ки, қайси, қайси экан фарқ эмас, нечукки эгиз, –*

байтида аввал юз қуёшга, кейин эса қуёш юзга ўхшатилади, яъни «юз» биринчи ҳолда мушаббих бўлса, кейингисидан мушаббихун биҳга айланади.

**ТАШБЕҲИ ИЗМОР** (ар. *تشبيه اضماع* – яширин ўхшатиш) – ташбеҳ турларидан бири бўлиб, бунда, зоҳиран қаралса, шоир ўхшатишни мақсад қилмагандек туюлади, ҳақиқатда эса унинг мақсади ўхшатиш бўлади. Бошқача айтсак, Т.и. *ташбеҳи мутлақ*-нинг (қ.) тамом зиддидир, унда бир нарсанинг иккинчи нарсага ўхшатилаётгани ҳақида ҳеч бир ишора бўлмайди; *ташбеҳи муяққаддан* (қ.) фарқли равишда, Т.и.да мушаббих ва мушаббихун биҳ синтактик бирлик (*гул юз, сарв қад каби*) ҳосил қилмайди; ниҳоят, Т.и. ҳамиша ифодадаги бошқа бир мақсад билан гўё пардаланади. Шулардан келиб чиқиб мумтоз шеърятдаги *таажжуб, тажохул ул-ориф, ҳусни таълил* каби санъатлар ўхшатиш асосида воқе бўлган ҳолларнинг барида Т.и. мавжуд бўлади дейиш мумкин. Мас., *тажохул ул-ориф санъати* қўлланган куйидаги:

*Тун яримда кун тугурди ёки бепарво чиқиб,  
Зулф аросидин юзини ойга кўрсатганмукин, –*

байтида, зоҳиран қараганда, шоирнинг муддаоси ўзини ҳайрону беҳабар қилиб кўрсатишдек кўринса ҳам, аслида, мақсади ёр зулфини тунга, юзини кунга ўхшатишдир.

**ТАШБЕҲИ КИНОЯТ** (ар. *تشبيه كناية* – кўчимли ўхшатиш) – ташбеҳ турларидан бири, тўрт унсурдан фақат мушаббихун биҳ иштирок этувчи ташбеҳ. Яъни Т.к.да *мушаббих, воситаи ташбиҳ* ва *важҳи*

*шабиҳ* тушириб қолдирилади, мушаббихун биҳ эса мушаббих маъносида, яъни кўчма маънода ишлатилади. Моҳиятан, Т.к. *истиора*-дан фарқланмайди. Мас., Навоийнинг:

*Оташин лълидурким, анда музмар бўлди жон,  
Оташин гулбаргидан хильатки жононимдадур, –*

байтида «лаъл» сўзи кўчма маънода қўлланиб, «лаб» маъносини билдиради.

**ТАШБЕҲИ МАШРУТ** (ар. *تشبيه مشروط* – шартланган ўхшатиш) – ташбеҳ турларидан бири, нарса-ҳодисани бошқа нарса-ҳодисага маълум бир шарт билан ўхшатиш. Яъни Т.м.нинг юзага чиқиши учун аввал ўша шарт бажарилиши лозим бўлади. Мас.:

*Эй Навоий, дурри назминг хутбадек топқай шараф,  
Лутф ила қилса назар байрам куну султон анга, –*

мақтаъсида Навоий ўзининг шеърлари хутбадек шараф топишини айтади, бироқ бунинг учун султоннинг уларга «лутф ила» назар солиши шарт қилиб қўйилади. Ёки бошқа бир байтда Навоий:

*Ҳалол она сутидекдур гар ўзбаким тутса,  
Тобуқ қилиб юкунуб тўстагон ичинда қимиз, –*

дейдики, қимиз «она сутидек» ҳалол бўлиши учун уни «ўзбаким тутиши» шарт қилиб қўйилмоқда.

**ТАШБЕҲИ МУЖМАЛ** (ар. *تشبيه مجمل* – ноаниқ ўхшатиш, ўхшатилиш сабаби номаълум) – ташбеҳ турларидан бири, *важҳи шабиҳ* тушириб қолдирилган ташбеҳ. Мас., Навоийнинг:

*Кўрди то сарв қаду гулдек юзунгни богбон,  
Гулшан ичра қилмади шамшод ила сунбул-ҳавас, –*

байтидаги «гулдек юз» ташбеҳида тўрт унсурдан учтаси бор: «гул» – мушаббихун биҳ, «юз» – мушаббих, -дек – воситаи ташбиҳ, лекин «гул» билан «юз»нинг ўхшатилиш сабаби айтилмаган, *важҳи шабиҳ* тушириб қолдирилган.

**ТАШБЕҲИ МУСАЛСАЛ** (ар. *تشبيه مسلسل* – кетма-кет ўхшатиш) –

ташбех турларидан бири, бир нарсани бир неча нарсага кетма-кет ўхшатиш. Яъни бунда шоир бир нарса (мушаббих)ни бир пайтнинг ўзида кетма-кет бир неча нарса (мушаббихун бих)га ўхшатади. Мас., Сайфи Саройининг:

*Сўзунг дурру жавохирдур кўнгуллар ганжина лойиқ,  
На лойиқ? Лойиқи хисрав. На хисрав? Хисрави кишвар, –*

байтида сўз аввал дурга, кейин жавохирга, Атойининг:

*Эй лаблари шаҳду шакару Миср наботи,  
Юсуф киби ширин ҳаракату саканоти, –*

байтида ёр лаблари асал (шаҳд), шакар ва Миср новвотига кетма-кет ўхшатишмоқда. Т.м. кўпинча *тажохул ул-ориф* санъати билан қоришиқ ҳолда учрайди, зеро, мазкур санъат аксар ҳолларда Т.м. асосида юзага чиқади. Буни Атойининг қуйидаги байтида кўриш мумкин:

*Сочму ё сунбулму ё ганж устида ётур илон,  
Ё келибдур Рум злига Чину Мочин лашкари?*

**ТАШБЕҲИ МУТЛАҚ** (ар. *تشبيه مطلق* – очик ўхшатиш) – ташбех турларидан бири. Т.м. манбаларда *ташбехи сарих* деб ҳам юритиладики, аслида, шу ном моҳиятни аниқроқ ифода этади. Зеро, *сарих* сўзи луғатда «очик, ошкор, равшан, аниқ» маъноларини ифодалайди. Т.м.да мушаббих ва мушаббихун бих орасидаги муносабатни белгиловчи воситаи ташбех (*каби, сингари, худди, янглиг, гўё, -дек, -дай* ва б.)нинг бўлиши шарт ва худди шу ҳол икки нарса-тушунчанинг бир-бирига ўхшатилаётганини аниқ билдириб туради. Мас., Лутфийнинг:

*Пистадек оғзинга шакар дедилар,  
Ғайб сирин не мухтасар дедилар, –*

байтида -дек қўшимчаси оғзининг пистага ўхшатилаётганини ошкор билдириб туради.

**ТАШБЕҲИ МУФАССАЛ** (ар. *تشبيه مفصل* – тўлиқ ўхшатиш) – қаранг: **ташбех**

**ТАШБЕҲИ МУЯҚҚАД** (ар. *تشبيه معقد* – ноаниқ ўхшатиш) – ташбех турларидан бири, таркибида фақат *мушаббих* ва *мушаббихун бих* иштирок этган ташбех. Мас., Бобурнинг:

*Хазон япроги янглиг гул юзинг ҳажрида сарғардим,  
Кўриб раҳм айлагил, эй поларух, бу чехраи зардим, –*

байтидаги «гул юзинг» ташбехида тўрт унсурдан иккитаси («гул» – мушаббихун бих, «юз» – мушаббих) бор, лекин унда *воситаи ташбих* билан *важҳи шабих* тушириб қолдирилган: ўхшатиш грамматик воситаларсиз амалган оширилган, ўхшатиш асоси кўрсатилган эмас.

**ТАШБЕҲИ МЎЪКАД** (ар. *تشبيه مؤكد* – таъкидли ўхшатиш) – ташбех турларидан бири. Т.м. тузилишига кўра *ташбехи муяққад*га яқин: унда ҳам фақат *мушаббих* ва *мушаббихун бих* иштирок этади, фақат фарқи шуки, бунда *мушаббих* эга, *мушаббихун бих* эса от кесим вазифасида бўлади. Яъни кесим вазифасидаги *мушаббихун бих* *мушаббих* ҳақидаги ҳукми таъкидлайди. Т.м. таркибидаги *мушаббих* ҳам, *мушаббихун бих* ҳам биргина сўз ёки сўз бирикмаси билан ифодаланиши мумкин. Мас., Навойининг:

*Чугз бўлмиш ганжи васлинг шавқидин кўнглум қуши,  
Заҳми кўп кўнглум уйи ул чугзнинг вайронидур, –*

байтида «кўнглум уйи» – *мушаббих* эга бўлса, «чугз вайронаси» – *мушаббихун бих* кесим вазифасидадир.

**ТАШБЕҲИ ТАФЗИЛ** (ар. *تشبيه تفضيل* – чекиниш йўли билан ўхшатиш) – мумтоз адабиётдаги шеърий санъат, ташбех турларидан бири. Шоир бир нарсани иккинчи бир нарсага ўхшатиб, сўнг бу фикрдан қайтади-да, ўхшатишмиш (*мушаббих*)ни ўхшаётган нарса (*мушаббихун бих*)дан устун қўяди. Яъни «юзингни қуёшга ўхшатай десам, қуёшнинг заволи бор, юзинг эса безаволдир» *каби*. Мас., Бобурнинг:

*Такаллуф ҳар неча суратда бўлса андин ортуқсен,  
Сени жон дерлар, аммо бетакаллуф жондин ортуқсен, –*

байтида аввал ёрнинг ўзгалар томонидан жонга ўхшатилиши эътироф этилиб, сўнг ёрнинг жондан-да ортиқлиги таъкидланади.

**ТАШХИС** (ар. *تشخيص* – шахслантириш) – мумтоз адабиётдаги шеърий санъат, шахсга хос хусусиятларнинг ҳайвонлар, қушлар, жонсиз нарса-предметларга нисбат берилиши. Яъни Т.да инсонларга хос бўлган ҳис-туйғу, хатти-ҳаракатлар бошқа мавжудотларга ёки жонсиз нарсаларга кўчирилади. Бироқ бу кўчириш механик тарзда ёки шунчаки ўйлаб топилган бўлмай, муайян мантикий асосга эгадир. Бошқача айтсак, кўчирилатган инсонга хос хусусиятлар билан ҳайвонлар, қушлар, ўсимликлар ёки бошқа жонсиз нарсаларнинг айрим жиҳатлари орасида ўхшашлик, муштаракликлар кузатилади. Мас., «ёмғир ёгиши» инсоннинг кўзёш қилишига монанд, шунинг учун метафорик асосда «булутлар кўзёш тўқди» дейиш маълум мантикий асосга эга бўлади. Жалолиддини Румийнинг куйидаги рубоийсида Т. санъати маҳорат билан қўлланган:

*Рухсорингдан рангин ўгирлабди гул,  
Йўлтўсардек дорга осилмиш кокил.  
Қанча нола қилди фойда бўлмади,  
Фарахбахш бўйингдан жон олди булбул.*

Рубоийдаги гулнинг ёр рухсоридан ранг ўгирлаши, кокилнинг дорга осилиши, булбулнинг нола қилишию жон олиши – булар бари инсонга хос хусусиятларнинг гул, кокил ва булбулга кўчирилиши натижасида воқе бўлган Т.дир. Бунда гул ранги билан ёр рухсорининг ранги, кокилнинг осилиб туриши билан дорда йўлтўсарнинг осилиб туриши, булбулнинг сайраши билан инсоннинг нола қилиши ўртасида ўхшашлик борлиги Т. нинг юзага келишига мантикий асос бўлган.

**ТАЪДИЛ** (ар. *تعديل* – тўғриламақ) – мумтоз адабиётдаги шеърий санъат, бир байт таркибида бир неча содда отларнинг маълум тартибда саналиши. Мас., Машрабнинг:

*Малаксан ё башар, ё ҳуру гилмонсан, билиб бўлмас,  
Бу лутфу, бу назокат бирла сендин айрилиб бўлмас, –*

байти Т.га яхши мисол бўла олади.

**ТАЪРИЗ** (ар. *تعريض* – киноя билан сўзлаш, эътироз билдириш) – мумтоз адабиётдаги шеърий санъат, бирор кишини олқиш сўзлар, дабдабали мақтов орқали ҳажв қилиш. Яъни зоҳиран шоир бировни мақтаётгандай кўринса-да, асл муддао унинг кирдикорларини фош қилиш, кесатиш, киноя бўлади. Мас., Завқийнинг:

*Хўқандлик, андижонлик, Ўротепа мардумин  
Бир қурашда йиқитти, полвон экан Бектурбой, –*

байтида Бектурбой (Виктор) бир қарашда полвон сифати билан мақталаётгандай кўринса-да, аслида, хўқандлик, андижонлик, ўротепалик савдогарларни бошлаб алдаб кетган фирибгар сифатида таърифланади.

**ТАЪРИХ** ёки **ТАРИХ** (ар. *تاريخ* – ўтмиш) – муҳим тарихий саналар (улуғ кишиларнинг таваллуд ва вафот йиллари, муҳим ижтимоий-сиёсий воқеаларнинг юз бериш, асарнинг ёзилиш, бинонинг қурилиш вақти ва ш.к.)ни *абжад ҳисоби* (қ.) ёрдамида қайд этиш. Шарқ мумтоз шеъриятида Т., одатда, шеърий йўл билан, кўпроқ байт ичида қайд қилинган. Байт таркибида керакли санага ишора қилаётган ҳарф, сўз ёки сўз бирикмаси «Т. моддаси» деб юритилади. Мумтоз адабиётшуносликка оид манбаларда Т. гоҳ бадиий санъат, гоҳ эса жанр сифатида кўрсатиб келинадики, бу хил турличалик муайян асосга эга. Чунки Т. мумтоз жанрлар (достон, қасида, марсия, рубоий, қитъа ва б.) таркибидаги байтларда берилиши ҳам, маълум бир санани қайд этиш учун алоҳида байт (мас., бирор бино пештоқига битиш учун) сифатида махсус ёзилиши ҳам мумкин. Иккинчи томондан, айрим Т.лардан кўзланган муддао муайян санани қайд этиш билан чекланса, бошқаларида буни санъаткорона маҳорат билан амалга оширишга интилиш кузатилади. Мас., «Юсуф ва Зулайхо»даги:

*Зод эди тарих тақи ҳею дол,  
Муддати ҳижратдин ўтиб моҳи сол, –*

байтида Т. ҳарфларни оддийгина қайд этиш билан чекланади. Бунда зод (800), ҳе (8) ва дол (4) ҳарфлари ифодаловчи рақамлар йигиндисидан достон ҳижрий 812 йилда ёзилгани аён бўлади. Албатта, бу байтдаги Т.ни санъат аталса, бироз зўракилик бўлади. Лекин Т.нинг шундай намуналари борки, уларни санъат ҳисоблаш жоиз. Мас., Навоий золим амалдорлардан бири, Мозандаронда қатл этилиб, калласи Ҳиротга олиб келинган Муҳаммад Амин вафоти Т.ини куйидагича ифодалайди:

*Золимеро кушта сўйи шаҳр оварданд сар,  
Ончи оварданд қатлашро ҳамон таърих буд.*

Таржимаси: Золимни ўлдириб, бошини шаҳарга олиб келдилар, нимаики олиб келган бўлсалар, ўша унинг тарихидир. Байтда воқеа тарихига «шаҳарга золимнинг бошини олиб келдилар» жумласи орқали ишора қилинмоқда. Бундан мурод эса «золим» (ظالم)нинг боши, яъни «зе» (ظ) ҳарфидир. У абжад ҳисоби бўйича 900 га тенг. Демак, Муҳаммад Аминнинг қатл этилиши ҳижрий 900, милодий 1495 йилга тўғри келади. Т.ни бу каби санъаткорлик билан ифодалаш учун катта маҳорат талаб этилади. Зеро, бу ўринда шоир байт таркибига киритаётган сўз ёки жумла мазмунга мос бўлиши билан бирга абжад ҳисоби бўйича керакли рақамга тенг келиши ҳам зарур. Шунингдек, бу йўсин битилган Т.ларда ишора қилинаётган рақамни аниқлаш учун ўқувчидан худди муаммода яширинган сўзни топишдаги каби ўткир зехн, топқирлик талаб этилади.

**ТАЪСИС** (ар. تاسيس – асослаш) – қаранг: **муқайяд қофия**

**ТАҚЛИД** (ар. تقليد – эргаштириш, ўхшатиш) – адабиётда ўзигача мавжуд бўлган асар хусусиятларини қайта яратиш, ижод амалиётида у ёки бу санъаткорга эргашиш тарзида намоён бўлувчи ҳодиса. Адабиётшунослиқда Т. ва *тақлидчилик*ка нисбатан кўпроқ салбий муносабат кузатилса-да, булар адабий жараёнда табиий равишда мавжуд ҳодиса бўлиб, турли омиллар (ворисийлик қонунияти, адабий-эстетик қарашлар муштараклиги, ижодий ўрганиш) натижаси ўлароқ юзага келади. Ворисийлик қонунияти асосидаги Т. адабиёт тараққиётининг аънаана таъсири устувор бўлган босқичларида (традиционализм босқичи, Ғарб адабиётида XVIII асргача) кенг кузатилади: бунда аънанавий тарзда эталон деб қабул қилинган асарларга Т. қилиш одатий ҳолгина эмас, маълум даражада ижодкорга қўйилувчи талаблардан бири (қ. *классицизм*) бўлиб, маълум сюжетлар, образларга қайта-қайта мурожаат қилиниши одатий эди. Худди шунга ўхшаш ҳол Шарқ адабиётида ҳам кузатилади (мас., хамсачилик аънанаси, газалчиликдаги поэтик образ, лирик ҳолатлар ва б.). Бироқ буни Т. объектига, гарчи унинг кўплаб хусусиятлари сақлаб қолинса-да, кўр-кўрона эргашиш деб тушунмаслик керак, зеро, у аввалдан мавжуд образ, сюжет мотивларининг аънаана доирасида янгиланган бадиий талқинини тақозо этади. Бадиий ижодда индивидуалликнинг аҳамияти ортиб бориши баробарида, Т. қилинаётган асар билан унинг асосида яратилган асар орасидаги фарқ очик кўзга ташланмайдиган, мос равишда Т.га муносабат ҳам салбийлашиб бориши кузатилади. Мас., ҳозирги ўзбек насрида кузатилувчи Ғарб модерн ада-

биётига эргашиш ҳолларига аксарият мутахассислар хушламайроқ қарайдилар. Ҳолбуки, бу Т. адабий-эстетик қарашлар муштараклиги маҳсули бўлиб, Ғарб адабиётида қарийб бир асрдан зиёд муқаддам бошланган изланишлар бизда энди-энди кузатилмоқда, зеро, шундай адабий-эстетик қарашларнинг шаклланишига замин бўла оладиган, шундай асарларга эҳтиёж тугдирадиган шароит бизда бирмунча кечроқ етилди. Яъни бунда Т. унсурлари бўлган чоқда ҳам кўр-кўрона эмас, аксинча, ижодий ўзлаштириш бўлиб, ёш адибларнинг миллий ҳаётимизни ғарблик ҳамкасблари тажрибасини ижодий ўзлаштирган ҳолда идрок этишга интилишидир. Шу билан бирга, бу ҳодисага умумий баҳо бўлиб, унинг ичида салбий баҳога лойиқ, кўр-кўрона Т. унсурлари мутлақо йўқ дегани эмас. Ҳар қандай ижодкор фаолиятининг илк босқичи Т.дан холи эмас, бунинг омили ўрганиш истагидир. Ҳатто улкан истеъдодлар ҳам ижодининг аввалида салафларидан ўрганади, уларнинг тажрибаларини ўзига сингдириб, онгио қалбида қайта ишлаб, ўзиникига айлантириши ва шу асно ўз ижодий индивидуаллигини шакллантириши учун маълум вақт керак. Мас., улуг адибимиз А.Қаҳҳор ҳикояларида Чехов, Гоголь асарларига, илк романи «Сароб»да Ж.Лондонга; А.Ориповнинг илк ижодида эса Пушкин, Лермонтов, Ғ.Ғуломларга Т. унсурлари сезилиб туради. Муҳими, уларнинг ўрганиш босқичидаёқ ижодий ёндашув, ўз йўлини топиш ва ўз сўзини айтишга интилиш кузатиладигани, шу нарса уларнинг салафлардан самарали сабоқ олиши ва кейинчалик бетакрор индивидуаллик касб этишларига асос бўлди. Сираси, истеъдод кучи ўрганиш босқичини ижодий ёндашган ҳолда ва нечоғлик тез, самарали босиб ўта олишда намоён бўладигани, сабоқни куруқ «ёд олган»лар юксак чўққиларни асло забт этолмайди. Ижодий ёндашувдан мосуво Т. эса асло истеъдоддан эмас, *графоманлик* (қ.) дардига йўлиққанликдан, *эпигонликдан*гина (қ.) дарак беради.

**ТАҚСИР** (ар. تقصير – камчилик кўрсатиш) – мумтоз адабиётдаги шеърый санъат, фахриянинг акси. Яъни фахрияда шоир ўзини юксак баҳоласа, Т.да қусурларини (осий, оми, ўқувсиз, девона ва ш.к.) эътироф этган ҳолда ўзини паст олади. Мас., Ҳувайдонинг:

*Девона Ҳувайдосан, помолу халойиқ бўл,  
Кўп тепмагунча бу лой, чинни бўлори йўқтур, –*

байтида Т. санъати тамсил санъати билан қоришиқ ҳолда юзага чиқади: шоирнинг ўзини «девона», «помолу халойиқ» дейиши

Т. бўлса, ишлатилган тамсил (лой кўп тепкиланиб чинни бўлиши) камтар, ҳокисор бўлишнинг афзаллигини таъкидлашга хизмат қилади.

**ТАҚТИЪ** (ар. **تقطيع** – кесиш) – арузда ёзилган байтни ритмик бўлақларга, рукнга тенг қисмларга бўлиш, мисралардаги маълум тартибда жойлашган мутаҳаррик ва сокин ҳарфларни гуруҳлаш. Т. қилиш орқали байтнинг баҳри аниқланади. Ҳозирги арузшуносликда мисраларни чўзиқ ва қисқа ҳижолаарга ажратиш орқали гуруҳлаш усули кенг тарқалган. Байтдаги ҳар бир мисранинг бир рукнга тенг қисми, яъни Т.си алоҳида ном билан юритилади: биринчи мисранинг биринчи Т.си садр, охириги Т.си аруз (ёки ажуз), иккинчи мисранинг биринчи Т.си ибтидо, охириги Т.си зарб, садр ва ажуз, ибтидо ва зарблар орасидаги Т.лар ҳашв деб аталади. Мас., Навоийнинг куйидаги байтида Т.лар мазкур кўринишда жойлашган:

садр ҳашв ҳашв ажуз

Хилъатин то / айламиш жо / нон қизил, со / риг, яшил,

– V – – / – V – – / – V – – / – V –

фоилотун фоилотун фоилотун фоилун

ибтидо ҳашв ҳашв зарб

Шуълаи о / хим чиқар ҳар / ён қизил, со / риг, яшил.

– V – – / – V – – / – V – – / – V –

фоилотун фоилотун фоилотун фоилун

Байт Т.ларга ажратилгач, ундаги рукнлар сони, зиҳофга учраган ёки учрамаганига қараб турлича номланади. Юқоридаги байт *фоилотун* рукнининг саккиз марта такрорланиши ва мисралар сўнгига рукннинг ҳазф зиҳофига учраши кўринишида шаклланган, шундан келиб чиқиб байт вазни *рамали мусаммани маҳзуф* деб номланади. Агар байтда рукн олти марта такрорланса, ундаги ҳашвлар сони иккита бўлади, тўрт марта такрорланса, байтда ҳашв иштирок этмайди. Мас., Навоийнинг куйидаги байтида рукн олти марта такрорланган:

садр ҳашв ажуз

Бизинг шайдо / кўнгул бечо / ра бўлмиш,

V – – – / V – – – / V – –

мафойилун мафойилун фаулун

ибтидо ҳашв зарб

Мапопāt даш / тида ово / ра бўлмиш.

V – – – / V – – – / V – –

мафойилун мафойилун фаулун

Байтда мафойилун рукни олти марта такрорланмоқда ва мисра охиридаги рукн ҳазф зиҳофига учраган. Шундан келиб чиқиб байт вазни *ҳазажи мусаддаси маҳзуф* деб номланади.

**ТЕКСТ** (лот. *textus* – мато, тўқима, матн) – 1) ёзувда қайд этиб кўйилган нутқ, термин бу маъносидо оғзаки нутққа қарши кўйилади; 2) нутқий асар, жумладан, адабий асарнинг ёзма (ҳарфлар) ёки оғзаки (товушлар) белгилар воситасида қайд этилган конкрет-ҳиссий (кўриш ё эшитиш) қабул қилинадиган томони. Бу маънодаги Т. *матншунослик*нинг объекти саналади; 3) нутқий коммуникациянинг нисбий бутунлик, яхлитлик касб этган ва нисбий автономлик, алоҳидалик хусусиятига эга энг кичик бирлиги, яъни адабий-бадий асар. Бу маънодаги Т.нинг мазмуни уни ташкил қилаётган нутқ бирликлари, уларнинг ўзаро алоқалари билангина чекланиб қолмайди. Бутун сифатида у муаллиф томонидан муайян нутқий ситуацияда яратилган, унинг бутун сифатидаги мазмун-моҳияти ўзидан ташқаридаги реаллик билан боғлиқ ҳолда воқе бўлади.

**ТЕКСТОЛОГИЯ** – қаранг: **матншунослик**

**ТЕМА** (юн. *thema* – асосга кўйилган) – қаранг: **мавзу**

**ТЕМАТИКА** – тор маънода муайян асарга кўйилган катта-кичик тема (мавзу)лар жами бўлиб, бу ўринда тема (мавзу) ўз ичига «проблема» маъносини ҳам сингдирган бўлади (қ. *мавзу*). Ҳаётни кенг кўламда акс эттирувчи йирик ҳажмли асарларда бош мавзудан ташқари у билан боғлиқ бўлган бошқа бир қатор тема (мавзу)лар ҳам кўйилади. Одатда, бу мавзулар ўзаро интегратив алоқада бўлиб, улар бир-бирини тўлдирди, бири иккинчисини очишга хизмат қилади. Мас., «Ўткан кунлар»нинг бош мавзуси *юрт (миллат) тақдири* бўлса, уни кўламли тасвирлаш ва теран бадий идрок этиш учун *муҳаббат, шахс эрки, оталар ва болалар муаммоси, эскилик ва янгилик кураши, манфаати шахсия ва манфаати миллия муносабати* каби қатор мавзулар ҳам ишланадики, уларнинг жами роман Т.сини ташкил қилади. Бундан ташқари, Т. термини муайян адиб ижоди, адабий авлод, адабий оқим кабиларга нисбатан ҳам қўлланилиб, уларнинг ижодий фаолиятида асосий ўринни тутган мавзулар жами тушунилади. Мас., жадид адабиётининг Т.си *миллат тақдири, маърифат, тараққий, миллий истиқлол* (пардаланган ҳолда) каби мавзуларни ўз ичига олади.

**ТЕНДЕНЦИЯ** (лот. *tendere* – йўналтириш, интилиш) – тасвирланаётган воқеа-ҳодисаларга муаллифнинг гоёвий-ҳиссий муносабати, образлар системаси орқали акс этувчи асар проблематикасининг бадиий идрок этилиши ва баҳоланиши. Т. асар проблематикасидан келиб чиқиб танланган ҳаёт материални муайян мақсадга мос умумлаштирган ва йўналтирган ҳолда бадиий гоёни юзага чиқаради. *Аслида, Т. яратилажак асарнинг гоёвий-тематик томонларига ижод жараёнининг илк босқичидан бошлаб фаол таъсир қилади. Зеро, муаллиф ўзини қийнаётган муаммолар ҳақида маълум даражада шаклланган хулосага эга, шунга кўра, Т. қайси материалнинг танлалишини ҳам муайян даражада белгилайди. Иккинчи томондан, ижодкор ўзи тасвирлаётган нарса-ҳодисаларга мутлақ бетараф мавқеда туриши мумкин эмас. Ижод жараёни учун табиий ва қонуний саналувчи бу ҳол Т.нинг ҳаммиша мавжуд бўлишини кўрсатади. Шунга қарамай, Т.нинг очиқ-ошкор ифодаланиши тенденциозликка олиб келиши, бу эса гоёвий-бадиий жиҳатдан жиддий нуқсонларни келтириб чиқаришини унутмаслик лозим.*

**ТЕРЦЕТ** (итал. *terzetto* – учинчи) – уч мисрали банд шакли бўлиб, унинг учта кўриниши бор: 1) банднинг учала мисраси ҳам ўзаро қофияланади; 2) банднинг 1- ва 2-мисралари ўзаро қофияланиб, учинчиси очиқ қолади; 3) банддаги икки мисра қофияланади, учинчи мисра терцинадаги (қ.) каби кейинги банддаги мисралардан бири билан қофияланади. Тор маънода Т. термини сонет таркибидаги уч мисрали бандларни билдиради.

**ТЕРЦИНА** (итал. *terza rima* – учинчи қофия) – итальян шеърлятидаги уч мисрали бандлардан таркибланган шеър шакли. Т. банд шаклида ёзилган шеър *aba bcb cdc ded...* шаклида, яъни банднинг 1- ва 3-мисралари ўзаро, 2-мисраси эса кейинги банднинг 1- ва 3-мисралари билан қофияланади. Т. шаклида ёзилган шеър (ёки дostonнинг боби) битта алоҳида мисра билан якунланиб, у охириги банднинг 2-мисраси билан қофияланади: шу тариқа шеър ритмик-интонацион жиҳатдан тугаллик касб этади. Данте Алигъерининг машҳур «Илоҳий комедияси» Т. шаклида яратилган бўлиб, бу асар мазкур банд шаклининг эталонига айланиб қолди.

**ТИП** (юн. *typos* – нусха, намуна) – бадиий образнинг умумлаштириш даражасига кўра турларидан бири, инсоннинг муайян тарихий давр ва ундаги конкрет ижтимоий муҳитга хос умумий хусусиятларни ўзида жам этган умумлашма образи. Термин адабиётшуносликда икки хил маънода қўлланади. Биринчиси – Т. сўзининг лексик маъ-

носига мос, бунда ўзида инсонга хос муқим феъл-хусусиятни мужассам этган образ назарда тутилади. Яъни моҳият эътибори билан бундай образ эмблемага яқинлашади (мас., Шарқ мумтоз адабиётидаги Ҳотами Тоӣи; Фарб адабиётида Дон Жуан), бундай образлар маълум бир феъл-хусусият (сахийлик, хасислик, очкўзлик, иккиюзламачилик ва ш.к.)нинг белгисига айланади, уларда шахс индивидуаллиги муҳим эмас. Иккинчи маъносида эса Т. муайян ижтимоий-тарихий шароит, давр ва муҳитга хос муҳим характерли хусусиятларни ўзида намоён этган инсон образини англатади. Реалистик адабиёт инсонни бутун мураккаблиги билан, унда ўз даври ва муҳитига хос умумий ҳамда индивидуал хусусиятларни (қ. *характер*) жам этган ҳолда тасвирлашни кўзда туттади. Шу билан бирга, конкрет асардаги барча образлар бадиий характер даражасига етмайди, қатор образлар характерлар (етақчи персонажлар) учун фон вазифасини ўтайди. Мас., Чўлпоннинг «Кеча» романидаги Мирёқуб, Акбарали, Раззоқ сўфи ва қисман Зеби образлари бадиий характер даражасида яратилган бўлса, Қурвонбиби, Эшонбобо, Нойиб тўра, Пошшахон, Марям кабилар кўпроқ Т., яъни давр ва муҳитга хос умумий хусусиятларни жам этган образлар сифатида кўзга ташланади. Шу жиҳатдан қаралса, шўро даври адабиётшунослигида мавжуд бўлган Т.га характерлиликнинг олий даражаси сифатида қараш, уни характердан юқори қўйишга интилиш тўғри эмас. Бундай қараш адабий Т.ни бироз ўзгача тушуниш натижасида юзага келди. Унга кўра, инсонда унинг ўзигагина хос бетакрор характер хусусиятлари билан бирга ўз даври ва муҳити кишилари учун умумийлик касб этган хусусиятлар ҳам мавжуд, Т.да шу икки жиҳат уйғун акс этиши лозим, бунда индивидуаллик типикликни намоён этиш шакли бўлиб қолиши талаб этилади. Яъни бу хил қарашда бадиий характер билан Т. орасида фарқ қолмайди, шунинг учун Т.га характерлиликнинг юқори даражаси деб қараш ва шундан келиб чиқиб Павел Власов, Павел Корчагин, Гофир, Йўлчи каби образларни бошқалардан устун қўйиш имкони тугилади. Иккинчи томони, воқелиқдаги инсон типларини тўғридан-тўғри адабиётга киритиш натижасида, инсон образи жонлиликдан маҳрум бўлиб, *схематиклик* касб этади ва муайян гоёни ифодалаш воситасигина бўлиб қолди. Шўро даври ўзбек адабиётида, айниқса, 30 – 50-йилларда яратилган асарларда ҳаракатланган «бой», «камбағал», «диндор», «большевик», «босмачи», «колхоз фаоли», «қулоқ» ва ҳ. Т.ларнинг аксариятида шу ҳол кузатиладиги, бу нарса ўша асарларнинг ўткинчи ҳодисага айланиб қолишига сабаб бўлди.

**ТИПИК** – конкрет давр воқелигидаги шарт-шароитлар (тузум, ижтимоий ҳаёт, ижтимоий муносабат шакллари, маданий-маърифий савия, муайян ижтимоий муҳит ва ш.к.) билан боғлиқ ҳолда энг кўп учрайдиган, муайян даражада нормага айланган воқеа-ҳодисалар, ҳаётий ҳолатлар, характер ва ш.к.лар.

**ТИПИКЛАШТИРИШ** – умумийликнинг индивидуаллаштириш орқали ифода этилиши, конкрет бадий образ (воқеа-ҳодиса, ҳаётий ҳолат, характер ва ш.к.)да муайян даврга хос умумий (типик), характерли хусусиятларни мужассамлаган ҳолда акс эттириш, адабиёт ва санъатдаги воқеликни бадий идрок этиш принципларидан бири. Агар антик адабиётда воқеликнинг бадий идроки «табиатга тақлид қилиш» (мимесис), ўрта асрларда символлар воситасида амалга ошган бўлса, реализм босқичига келиб Т. етакчи принципга айланди. Т. адабиётнинг билиш имкониятларини кенгайтирди, чунки у ўзигача мавжуд бўлган тамойилларга хос кучли томонларни бирлаштирди, яъни агар *мимесис* воқеликдаги хусусий ҳолларга, символаштириш эса хусусийга кўз юмган ҳолда умумийга урғу берган бўлса, Т. бу иккисини уйғун бирликда олишни тақозо этади. Адабиётнинг *билиш функцияси*ни устувор билган реализм босқичига келиб Т. олдинги планга чиқди, энди «Типиклаштириш ижоднинг қонунларидан бири, усиз ижоднинг ўзи мавжуд эмас» (В.Г.Белинский) деб қарала бошланди, ҳуллас, Т. реализмнинг назарий асоси бўлиб қолди. Шўро даври адабиётида, гарчи сўзда ушбу принципнинг етакчилиги эътироф этилса ҳам, ижод амалиётида воқеликнинг ҳақиқатда эмас, балки социалистик реализм талабидан келиб чиққан ҳолда, мафкура нуқтаи назаридан характерли саналган хусусиятлари умумлаштирилди, бадий асарлар шу нуқтаи назардан баҳоланди. Бунинг натижасида схематизм Т. деб тушунила бошланди. Таъкидлаш керакки, шўро даври адабиёти социалистик реализм адабиётигана бўлиб қолмади, чунки ҳақиқий санъаткорлар схематизм билан Т.ни фарқлай билдилар, шу принципга таянган ҳолда воқеликни бадий идрок этишга интилдилар. Ҳуллас, ҳозирги адабиётшунослиқда Т. масаласи бирмунча эътибордан қолгандек кўринса-да, у реализмнинг асосий принципи бўлиб қолаверади.

**ТРАГЕДИЯ** (юн. *tragoidia* – эчки кўшиги) – драматик турнинг учта асосий жанридан бири, жанр сифатида антик даврда шаклланган бўлиб, унинг асосий эстетик белгиси трагикликдир. Т. генетик жиҳатдан маъбуд Диониснинг ўлими ва қайта тирилиши муносабати билан ижро этилган маросим кўшиқларига бориб тақалади. Т.нинг

жанр хусусиятлари *трагик конфликт*, *трагик ҳолат* ва *трагик қаҳрамон* тушунчалари билан белгиланади. Трагик конфликт деганда моҳиятан ечими йўқ, мавжуд шароитда ҳал қилиб бўлмайдиган зиддият тушуниладики, у ҳар вақт қаҳрамон онгида кечади. Қадимги Т.ларда конфликт шахс ва тақдири азал ўртасида (мас., «Шоҳ Эдип») кечган бўлса, кейинроқ бу конфликтнинг иккинчи томони ўзгарди: тақдири азал ўрнини энди шахсдан юқори турувчи олий маънавий кучлар (бунда ёзилмаган, бироқ инсон ҳаётини муайян тартибга солувчи маънавий қонун-қоидалар, мас., бурч ҳисси кабилар назарда тутилади) эгаллайди. Трагик конфликт асосида юзага келувчи трагик ҳолатнинг моҳияти шундаки, қаҳрамон ташқи кучлар билан эмас, ўзи билан ўзи олишади, мана шу олишув оқибати ўлароқ чуқур маънавий изтироб, руҳий қийноқларга дучор бўлади. Ўзининг фоже ҳолатида ҳам мақсад сари интилишлик, руҳий изтироблару қийноқларга қобиллик трагик қаҳрамонга хос хусусиятдир. Трагик қаҳрамон қаршисида эркин танлов имконияти мавжуд – у мақсаддан воз кечиши, осон йўлни танлаши мумкин, бироқ у бундай қилмайди, ўзининг жисман ёки маънан ҳалокатга учраши мумкинлигини билган ҳолда ҳам мақсадидан, эътиқодидан қайтмайди. Худди шу асосда трагик қаҳрамоннинг характер кучи, унинг фавқулдда шахслиги намоён бўлади. Мас., «Шоҳ Эдип»даги Эдип юрт бошига келган офатнинг сабабчиси ўзи бўлиши мумкинлигини сезганидаёқ тафтишни тўхтатиши, «ёпиқлиқ қозон ёпиқлигича» қолавериши мумкин эди. Бироқ у – трагик қаҳрамон, чекига тушган изтиробу қийноқлар қадаҳини тубигача сипқоради. Реализм босқичигача яратилган Т.ларда трагик қаҳрамон сифатида кўпроқ мифологик персонажлар, шоҳлар, шахзодалар, маликалару саркардаларнинг олингани бежиз эмас, зеро, ўзининг фоже ҳолатини идрок эта олиш, қалбию онгида маънавий-руҳий изтиробларни кечири билиш, шунда ҳам руҳан синмай мақсад томон юришга ўртамиёна одамларнинг чоғи келмайди. Шу сабабли адабиётимизда ХХ аср ўрталарида яратилган Т.нинг жанр талабларига тўла жавоб беришга яроқли «Мирзо Улуғбек», «Жалолиддин Мангуберди» асарларидан бирининг марказига шоҳ, иккинчисининг марказига саркарда чиқарилган. Т.лар жанр проблематикаси нуқтаи назаридан турлича: уларда маънавий-ахлоқий («Шоҳ Эдип», «Қирол Лир»), миллатнинг тарихий тақдири («Жалолиддин Мангуберди») ёки романий проблематика («Мирзо Улуғбек») бадий талқин қилиниши мумкин. Т. жанри фаоллигини йўқотган, замонавий драматургияда бу жанр деярли ишланмайди,



бирок *трагиклик* бадиий адабиётда эстетик белги (қ. *бадиийлик модуслари*, *пафос*) сифатида сақланиб қолган.

**ТРАГИКЛИК, ТРАГИЗМ** (русчадан калька: «трагическое») – воқеликка муносабат тури; бадиийлик модуси. Т. *сатира* каби, қахрамонлик модусининг кейинги даврларда трансформацияга учраши натижасида, юзага келган бўлиб, бу жиҳатдан трагизм қахрамонликка нисбатан вертикал, сатирага нисбатан горизонтал параллел қўйилади. Трагик модус қахрамони ўз ичидан белгиланган чегаралар унинг учун ташқаридан белгиланган чегаралардан анча кенг бўлиши билан қахрамонлик ва сатирик модуслардан фарқланади. Трагизмга хос «мен-оламда» концепциясига кўра, трагик қахрамон оламдаги ўзи учун белгиланган ўринга сиғмайди, қахрамоннинг оламда ўз мавжудлигини тасдиқлашга интилиши олам тартиботига зид келади, бу эса ташқи олам унинг учун белгиланган чегараларни бузиш (трагик хато, трагик айб) билан тенгдир. Шунинг учун трагик конфликт мавжуд шароитда ечими йўқ, келиштириб бўлмас зиддият дея таърифланади. Трагик қахрамон учун иккита йўл бор: ё ўзлигидан воз кечиш, ё хато ва айб орқали бўлса-да ўзлигини тасдиқлаш. Натижада қахрамон ҳатто ҳаётдан кетиш орқали бўлса-да ўз мавжудлигини, ўз тақдирини ўзи белгилаш, ўзига белгиланган чегараларни кенгайтириш истагини намойиш қилади (Эдипнинг маъбудлар ҳукмини кутиб ўтирмай ўз-ўзига жазо бериши, Анна Каренинанинг ўлими). Трагик қахрамон учун ўз-ўзини тасдиқлаш фақат ўзи учунгина муҳим бўлиб қолмай, ташқи олам унга белгиланган чегараларни ўзгартириш, ўзини ташқи олам учун тасдиқлатиб олиш ҳам бирдек заруратга айланади. Шунинг учун трагик қахрамон (унинг истаклари, интилишлари) ва унга қарама-қарши турган кучлар (олий даражадаги кучлар, умуминсоний қадриятлар, мавжуд шароитда ўзгартиришнинг иложи йўқ бўлган шароит ва б.) ўртасидаги зиддият асар қахрамоннинг ўз ички зиддияти сифатида бўй кўрсатади. Яъни қахрамоннинг ўзини борича тасдиқлатиб олиш истаги (ички чегараларига мос мавжудлиги) билан олам тартиботининг бунга имкон бермаслигига иқрорлик қахрамон қалбида, руҳиятида тўқнашади (Эдип, Ҳамлет, Анна Каренина). Шунга кўра, трагик қахрамоннинг «оламдаги мен»и бартараф қилиб бўлмайдиган иккиланганлик хусусиятига эга бўлиб (Достоевскийнинг «Ака-ука Карамазовлар»ида: Иван Карамазов – Иблис; Н.Отахоновнинг «Оқ бино оқшомлари» ҳикоясида Ҳафиза – хаёлий дугона), иккинчи томон биринчисини инкор қилади. Шу жиҳатдан қаралса, мавжудликнинг трагик кўрини-

ши – сатиранинг зидди: сатирада қахрамон ўз-ўзини тасдиқлаш йўлидан боргани ҳолда, пировардида ўзини инкор этишга келса, Т.да ўз-ўзини инкор қилиш моҳиятан ўзини тасдиқлаш демакдир.

**ТРАДИЦИЯ** (лот. *traditio* – бериб юбормоқ, ўтказмоқ) – қаранг: **адабий анъаналар**

**ТРИЛОГИЯ** (юн. *tri* – қўшма сўзлар таркибида *уч* ва *logos* – сўз, ҳикоя, ривоят) – сюжет-композицион қурилиши жиҳатидан нисбий мустақилликка эга бўлган учта асарнинг умумий персонажларга эгалиги, сюжет чизиқларининг давомийлиги, муаллиф ниятининг ягоналиги ва шулардан келиб чиқувчи яхлит концепция туфайли бутунликка бирикувидан ташкил топган асар. Антик адабиётда учта трагедиядан таркиб топувчи туркумлар Т. деб юритилган. Жаҳон адабиёти тарихида драматик асарларни бирлаштирувчи Т.лар ҳам, эпик асарларни бирлаштирувчи Т.лар ҳам кўплаб яратилган. Жумладан, П.Бомарше ижодида комедиялардан («Севильялик сартарош», «Фигаронинг уйланиши», «Айбдор она»), Л.Н.Толстой меросида автобиографик қиссалардан («Болалик», «Ўсмирлик», «Ёшлик») таркиб топган Т.лар мавжуд. Т.нинг ўзбек адабиётидаги намунаси сифатида С.Аҳмаднинг «Уфқ» («Қирқ беш кун», «Ҳижрон кунларида», «Уфқ бўсағасида») асарини кўрсатиш мумкин.

**ТРОП** (юн. *tropos* – кўчим) – қаранг: **кўчим**

**ТУГУН** (русчадан калька: «завязка») – эпик ва дараматик асарлардаги воқеабанд сюжетнинг муҳим унсур, воқеаларнинг бошланишига туртки бўлган воқеа, асар конфликтини қўйилган жой. Т. сюжетнинг зарурий элементи саналади, яъни у сюжетда ҳар вақт ҳозирдир. Фақат айрим ҳолларда, хусусан, баъзи хроникали сюжетларда, шунингдек, «ички ҳаракат» динамикаси асосидаги сюжетларда у етарлича бўртиб кўринмаслиги мумкин. Т., одатда, асарнинг бошланишида, *экспозициядан* (агар у бўлса) кейиноқ берилади. Муайян бадиий-эстетик мақсадни кўзда тутган ҳолда Т.нинг ўрни ўзгартирилиши ҳам мумкин. Мас., «Ўткан кунлар» романида Отабек билан Кумушнинг дафъатан учрашиб қолиши – биринчи бўлим Т.и, бироқ бу воқеа шу бўлим ниҳоясида баён қилинади. Яна бир жиҳати, «Ўткан кунлар»нинг учала бўлими ҳам ўз Т.га эга: биринчи бўлимдаги сюжет *ечими* – Отабек билан Кумушнинг *туғи* иккинчи бўлим воқеаларига туртки берган Т. бўлса, иккинчи бўлимдаги сюжет *ечими* – Отабекнинг *ўчини олган Тошкентга кетиб қолиши* учинчи бўлим воқеаларига туртки берувчи Т.дир. Ўзгачароқ ҳол «Кеча ва кундуз»да ҳам кузатилади: Акбаралининг Зебига сов-

чи кўйиши битта Т. бўлса, Мирёқубнинг Марямга ишқи тушгани иккинчи Т.ни ташкил қилади. Демак, йирик ҳажмли асарлар сюжетида бир эмас, бир нечта Т. бўлиши, асарнинг нисбий тугалликка эга қисмлари ёки ҳар бир мустақил сюжет линияси ўз Т.ига эга бўлиши мумкин экан.

**ТУЮҚ** (туркий *تويوق* – туймоқ, ҳис қилмоқ) – туркий халқлар шеърлятидаги тўрт мисралик, тажнисли қофияга асосланган, рамали мусаддаси мақсур (камдан-кам ҳолларда рамали мусаддаси маҳзуф) вазнида ёзилувчи лирик жанр. Т.лар кўпроқ а-а-б-а тарзида қофияланади, шунингдек, а-а-а-а ёки а-б-в-б тарзида қофияланган кўринишлари ҳам мавжуд. Дастлаб халқ оғзаки ижодида пайдо бўлган Т. жанри кейинчалик кўплаб мумтоз шоирлар эътиборини тортган: Лутфий, Навоий, Бобур, Юсуф Амирий, Убайдий, Огаҳий сўз санъаткорлари жанр такомилга катта ҳисса қўшганлар. Айрим манбаларда Т.нинг тажнисли қофияга эга бўлиши шарт ҳисобланмайди (мас., Бобур. «Мухтасар»). Шунга қарамай, тажнисли қофияга эга бўлган Т.лар кенгроқ тарқалган, тажнисли қофияни жанрни белгилувчи хусусият сифатида тушуниш кўпроқ оммалашган. Жумладан, А.Навоий ҳам «туюқдирким, икки байтқа муқаррардур ва саъй қилурларким, тажнис айтилғай ва ул вазн рамали мусаддаси мақсурдир...» деб ҳисоблайди, яъни тажнисли қофия масаласида қатъий талаб қўймаса-да, «тажнис айтиш»га ҳаракат қилиш лозимлигини уқтиради. Ҳақиқатан ҳам тажнисли қофия Т. жанрига ўзига хос жозиба бахш этади, ўқувчига бетакрор завқ беради. Мас.:

*Кўз ёшим тупроқ ила гар қотила,  
Келмагайман жавридин, ҳаққо, тила.  
Ғамзаси ўлтирди-ю, ул беҳабар,  
Мен агар ўлсам, не ғам ул қотила.*

Лутфийнинг мазкур Т.ида тажнисли қофия орқали кўйидаги маънолар ифодаланмоқда: биринчи мисрада «агар кўз ёшим тупроқ билан қотилса, аралашса», иккинчи мисрада «жабридан, эй худо, тилга келмайман», тўртинчи мисрада «мен ўлиб кетсам, у қотилга нима ғам». Яъни Т.да шаклдош сўзлар мўъжазгина матн доирасида турли маъноларда ва ўринли қўлланиши даркор, бу эса шоирдан юксак бадий маҳоратни талаб қиладики, бунга жавоб бера оладиган Т. она тилининг гўзаллигидан завқланиш, унинг беқиёс имкониятлари билан фахрланишга асос бўлади.

**ТЎРТЛИК** – 1) тўрт мисралик банд тури; *катрен, мураббаъ*. Т.

шеърлятда энг кўп тарқалган банд турларидан саналади. Т. бандда қофияланиш тартибининг *кесилган* (abab), *ўрама* (abba), *жуфтлик* (aabb) шакллари кўпроқ тарқалган. Шунингдек, Т.нинг *мурабба* шаклидаги қофияланиш тартиби (aaab cccb) ҳам бўлиб, бу шакл нисбатан кам тарқалган. «Девону лугатит турк»да мисол қилиб келтирилган халқ кўшиқлари, асосан, Т. бандлардан таркиб топгани унинг туркий халқлар адабиётида қадимдан мавжуд бўлганини кўрсатади. Мумтоз шеърлятимизда Т. банд *мураббаъ* жанрида сақланган бўлса, XX асрда у янада фаоллашди. Ҳозирги ўзбек шеърлятидаги лирик шеърларнинг аксарияти Т. бандлардан таркиб топган; 2) тўрт мисрадан таркиб толувчи шеър, халқ оғзаки ижоди ва мумтоз шарқ шеърлятидаги *рубойинавислик* анъаналарининг давоми сифатида ҳозирги ўзбек шеърлятида анча кенг тарқалган шеър шакли; шакл жиҳатидан таснифланувчи лирик жанр. Мумтоз лирикадаги *рубойи* ва *туюқдан* фарқли ўлароқ, Т. жанрига киритиш учун шеърнинг тўрт мисрадан иборат бўлиши кифоя: унга *рубойи* ёки *туюққа* кўйилган каби вазн, композиция билан боғлиқ қатъий талаблар қўйилмайди. Маълумки, арузда ёзилган ҳар қандай тўрт мисрали шеър ҳам *рубойи* бўлолмайди, бунинг учун шеър ҳажаз баҳрининг 24 тармоғидан бирида ёзилиши шарт. Демак, мантиқан қаралса, Т. арузда ҳам, бармоқда ҳам ёзилиши мумкин. Мас., Чўлпоннинг «XX аср», «Парча» номли ҳамда «Лола гулнинг доғидур...» деб бошланувчи Т.лари рамал баҳрида ёзилган. Шунга қарамай, янги ўзбек шеърлятида Т.лар, асосан, бармоқда ёзилмоқда. Мавзу жиҳатидан чегараланмагани, воқелиқдан олинган таассуротлар, ҳаёт ҳақидаги фикр-хулосаларни ихчам, лўнда ифодалаш имконини бергани учун Т. жанри янги давр шеърлятида ҳам кенг оммалашди. Ўзбек адабиётида Ойбек, Ҳ.Олимжон, М.Шайхзода, Уйғун, Шухрат, Рамз Бобожон, Т.Йўлдош, А.Орипов, Э.Воҳидов, Р.Парфи, О.Матжон, Ҳ.Худойбердиева каби шоирлар ижодида Т. жанрининг яхши намуналарини учратиш мумкин.

# У

**УРЖУЗА** (ар. *ارحوزه* – ражазда ёзилган) – маснавий типда қофияланиб, «ражази мусаддас» вазнида ёзилувчи илмий шеър. Арабларда дастлаб яратилган барча шеърлар ражаз баҳрида бўлган, шу боис ражаз атамаси, умуман, шеър маъносида ишлатилган. XI асрда яратилган «Девону луготит турк» муаллифи М.Кошғарий ҳам атамани шеър маъносида қўллайди, унинг: «Мен бу китобни махсус алифбе тартибида ҳикматли сўзлар, сажълар, мақоллар, ражаз ва наср деб аталган адабий парчалар билан безадим», – деб ёзиши шуни кўрсатади. Аруз имкониятлари кенгайиб, баҳрлар кўпайгач, энди ражаз атамаси, умуман, шеър эмас, баҳрлардан бири маъносида қўллана бошланди. Этимологик жиҳатдан ражаз атамаси билан боғлиқ У. термини эса юқорида зикр этилган шакл хусусиятларига эга илмий мавзудаги шеърни англата бошлади. Терминнинг бу маъноси У. шаклидаги илмий шеърларнинг илгари ражазда битилган қасидалардан келиб чиққани билан изоҳланади. Мас., Ибн Синонинг «Тиббий уржуза» достони, «Тиббий ўғитлар ҳақида уржуза», «Анатомияга доир уржуза» каби табобатга оид жами саккизта асари, XIII асрда яшаган араб тилшуноси Муҳаммад ибн Моликнинг араб грамматикаси ҳақидаги «Алфийя» («Минг байт») асари, XV асрнинг иккинчи ярмида яшаган араб денгизчиси Аҳмад ибн Можиднинг сувда сузиш қоидаларига оид учта асари шундай У.лардандир. Таъкидлаш жоизки, У. бўлиши учун асар ражаз баҳрида бўлиши ва, албатта, а-а, б-б, в-в тарзида қофияланиши шарт ҳисобланган. Мас., Ибн Синонинг «Тиббий уржуза» достонидан келтирилган қуйидаги байтлар шу кўринишда қофияланган:

*Танада гар пайдо бўлса қандай мараз,  
Тибдан топар давосини ҳар бир арав.  
Илмий, амалийга бўлинди тиб аввал,  
Бўлди уч нарсадан илмийси мукаммал.*

*У нарсанинг бири етти табиатдир,  
Андин сўнгра келган олти заруратдир.*

**УСЛУБ** (ар. *اسلوب* – тартиб, усул, йўсин, тарз) – поэтиканинг муҳим категорияларидан бири; бадиий асарнинг у ёки бу тарздаги шаклий қурилишини белгилувчи умумий принцип. У. антропологик, яъни ижодкор шахси билан боғлиқ категория саналиб, унинг ижодий индивидуаллигини белгилайди. У.да намоён бўлувчи ижодий индивидуаллик бадиий асарнинг барча сатҳларида (бадиий матннинг тузилиши – риторика, бадиий воқеликни яратиш принциплари – поэтика) бирдек кўзга ташланади. Яъни У. бадиий шаклнинг унсурлари эмас, балки унга хос хусусиятдир. У. асардаги шакл унсурларининг ўз ҳолича эмас, балки муайян қонуният асосида яхлитликка бирикишини таъминлайди, ҳар бир унсурнинг бутун таркибидаги моҳияти ва функциясини белгилайди. Илмий муомалада «Услуб – одам» (Ж.Бюффон) деган қарашнинг оммалашини бежиз эмас: асар ўзида ижодкор шахсини ифодалар экан, буни У.да намоён этади. Айтайлик, А.Қаҳҳорга хос жумла тузиш, А.Қаҳҳорга хос ривоя, А.Қаҳҳорга хос бадиий деталлар функционаллиги, А.Қаҳҳорга хос сюжет қурилиши дейлишининг боиси шундаки, буларнинг бари А.Қаҳҳор услуби билан, унинг ижодий ўзига хослиги билан изоҳланади. Шу билан бирга, адабиётшунослиқда У. термини индивидуал услубдан кенгрок доирада ҳам тушунилади. Маълумки, ижодкор фаолияти муайян бир даврда, адабий-эстетик принциплари жиҳатидан яқин бўлган гуруҳлар доирасида кечади, демак, унга хос бадиий асар шаклини белгилувчи принциплар билан бошқа ижодкорлар таянган принципларда муштарак жиҳатлар кузатилиши табиий. Бу эса муайян *адабий давр* У.и (мас., уйғониш даври У.и), *адабий йўналиш* У. (мас., классицизм У.и, романтизм У.и) ҳақида гапириш имконини беради. Демак, У. фақат ижод жараёни, конкрет ижодкор билангина эмас, маълум даражада адабий жараён билан ҳам боғлиқ категория экан. Ҳар икки ҳолда ҳам У. қатор муҳим вазифаларни бажаради. Жумладан, ижод жараёнида У. санъаткорни воқеликни яхлит идрок қилиш, ҳаёт материалини (диспозиция) яхлит бадиий системага (композиция) айлантиришга йўналтиради. Адабий жараёнга нисбатан олинса, У. бадииятнинг ривожланиш ўзанидаги ижодкорни адабий анъана билан боғлайди ва шу тариқа, бир томондан, ўзида адабий-бадиий анъанани ташувчи, иккинчи томондан, уни янгиловчи ҳодиса сифатида намоён бўлади. Шунингдек, бадиий асарнинг кейинги ҳаёти, ижтимоий мав-

жудлиги (онтологияси) ҳам У. билан белгиланади. Зеро, У. асарни конкрет ўқувчига мўлжаллайди, бадиий шакл ўқувчининг тафаккур даражаси ва эстетик дидига мос бўлишини таъминлайди. Буларнинг бари У. ҳаёт материали ва адабий аънаналарга сайлаб муносабатда бўладиган, жамиятнинг бадиий-эстетик талаб-эҳтиёжлари, умум-маърифий ва маданий савияси, эстетик дид даражаси билан боғлиқ ходиса эканлигини кўрсатади.



**ФАБУЛА** (лот. *fabula* – ҳикоя, масал) – сюжетшунослик категорияси. Адабиётшуносликда Ф. терминини қўллашда турличаликлар мавжуд: у *сюжет* терминига синоним сифатида ҳам, ундан фарқлаб ҳам ишлатилади. Гап шундаки, асарда ҳикоя қилинаётган воқеаларни Арасту «миф» ёки «тарих», антик римликлар эса «фабула» деб юритган бўлсалар, XVII асрга келиб француз классицизми назариётчилари худди шу нарсани французча «сюжет» термини билан аташган. Шунга кўра, Ф. ва сюжет терминларини синоним сифатида қўллашга ҳам асос бор. Шу билан бирга, бу икки термин билан бошқа-бошқа тушунчаларни аташга интилиш ҳам мавжуд. Жумладан, ўтган асрнинг 20-йилларида рус формал мактаби вакиллари бошлаб берган аънанга мувофиқ, Ф. деганда асарда тасвирланган воқеаларнинг ҳаётда юз бериш тартибини, сюжет деганда эса уларнинг асарда ҳикоя қилиниш (жойлаштирилиш) тартибини тушуниш ҳозирда кенгроқ оммалашган. Худди шуни тескари тартибда, яъни воқеаларнинг ҳақиқатда юз бериш тартибини сюжет, улар ҳақида ҳикоя қилиш тартибини Ф. деб аташ эса илгарироқ, XIX аср ўрталаридан, А.Н.Веселовский ва унинг издошлари ишларида кўзатилади. Шунингдек, адабиётшуносликда Ф. термини ортиқча, у бериши мумкин бўлган маънони сюжет, сюжет схемаси, сюжет композицияси терминлари тўла ифодалайди деган қараш ҳам мавжуд.

**ФАНТАСТИКА** (юн. *phantastike* – тахайюл санъати) – ҳақиқатда мавжуд бўлмаган, тахайюл кучи билан тасаввурдагина яратилган нарса-ҳодисалар тасвири, шунга асосланувчи адабий асарлар жами. Фантастик асар юқори даражадаги шартлилик касб этувчи фантастик образлиликка таянади, у муаллифдан ҳам, ўқувчидан ҳам ижодий фантазияни тўла қувват билан ишлатишни талаб этади. Айни чоғда, Ф. фақат хаёлот маҳсули эмас, унинг замирида мавжуд воқеликнинг излари сезилиб туради, зеро, хаёл шу мавжудликдан куч олган ҳолда парвоз қилади. Бадиий тафаккур ривожи давоми-

да Ф.нинг ўрни ва аҳамияти, функциялари ўзгариб боради. Қадим аждодларимиз хаёлотининг маҳсули бўлган фантастик образлар уларнинг ўзлари томонидан шартли образ эмас, балки айна ҳақиқат деб тушунилган. Бу хил тушуниш аждодлар онгида узоқ вақтлар сақланган бўлса-да, унинг муттасил сусайиб боргани кузатилади. Халқ оғзаки ижодидаёқ, мас., қахрамонлик эпосида Ф. энди ёрдамчи унсур сифатида намоён бўлади: моҳиятан реал шароитда ҳаракатланаётган қахрамон мақсадга, асосан, ўз кучи, ақл-заковати билан эришади, ғайриоддий кучларнинг аралашуви эса ёрдамчилик мақомида қола бошлайди (мас., «Алпомиш»). Албатта, бунда ҳам ҳали ғайритабиий, илоҳий кучларга, уларнинг ҳаётда юз берувчи воқеаларга бевосита аралашушига ишонч сақланиб қолган, лекин Ф. элементлари маълум даражада шартлилик касб этгани ҳам сезилади. Инсон табиат сир-синаотларини чуқур англаб бориши баробарида, Ф.ни шартли образлилик, бадий восита сифатида тушуниш барқарорлашиб боради. Энди унга кўпроқ муаллиф бадий ниятини амалга ошириш, муайян бадий-эстетик мақсадга эришиш воситаси сифатида қарала бошлайди. Жумладан, жаҳон адабиётининг «Гулливёрнинг саёҳатлари» (Ж.Свифт), «Дориан Грей портрети» (О. Уайлд), «Сағри тери тилсими» (Бальзак), «Портрет» (Н.Гоголь) каби нодир намуналарида Ф. асарнинг композицион қурилишини белгилаган, бадий концепцияни шакллантириш ва ифодалашда етакчи аҳамиятга эга бўлган унсурга айланади. Илм-фан тараққиёти Ф.нинг алоҳида бир кўриниши – *илмий Ф.ни юзага келтирди*. Жаҳон адабиётида илмий Ф.нинг асосчилари сифатида Ж.Верн, Г.Уэллс эътироф этилади. Анъанавий Ф.дан фарқли ўлароқ, илмий Ф. реал воқеликни тасвирлайди, фақат бу воқелик илм-фан ва техника тараққиёти натижаси ўлароқ муайян даражада ўзгарган; ундаги Ф. ғайритабиий ё илоҳий кучлар эмас, балки инсон тафаккур кучи туйғули воқе бўлади. Мас., турли халқлар оғзаки ижодида «кўринмас одам» мотиви мавжуд бўлиб, кўринмасликка турли сеҳрли буюмлар (таёқча, узук, қалпоқ ва б.) ёрдамида эришилади. Г.Уэллснинг «Кўринмас одам» асарида эса «кўринмаслик» қахрамон ўз кўли билан синтез қилиб олган модда воситасида амалга ошади.

Янги ўзбек адабиётида Ф. унсурларидан самарали фойдаланиш Фитрат («Қиёмат», «Абулфайзхон»), А.Қаҳҳор («Қабрдан товуш» ҳикояси), О.Мухтор («Тўрт томон қибла»), Х.Дўстмуҳаммад («Жажман») каби адиблар ижодида кузатилади. Шунингдек, XX асрда ўзбек *саргузашт-фантастик адабиёти* (Х.Тўхтабоев, Т.Малик

ва б.) ва *илмий-фантастик адабиёти* (Х.Шайхов) ҳам шаклланди ва муайян ютуқларга эришди.

**ФАРД** (ар. *فرد* – якка, ёлғиз) – ўзаро қофияланган икки мисра – ёлғиз байтдан иборат, тугал мазмунга эга шеър, мумтоз адабиётдаги энг кичик мустақил лирик жанр. Ф. бир бэйтдангина иборат бўлса ҳам, унда муҳим фалсафий-ахлоқий масала қаламга олиниб, ихчам поэтик хулоса ифодаланади. Шу боис Ф.лар аксар афористик характерда бўлиб, уларнинг кўплари ҳикматлар, халқ мақоллари даражасига кўтаришган. Мас.:

*Аблаҳ ани билки, оламдан баҳо қилғай тамаъ,  
Аҳмоқ улким, олам аҳлидин вафо қилғай тамаъ (Навоий).*

Бироқ бу Ф.га мазмун жиҳатидан қўйилувчи қатъий талаб эмас, Ф.лар мазмунига кўра турлича (лирик қахрамон ҳолати, оний кечинма, ёр вассфи ва б.) бўлиши мумкин. Мас.:

*Истарам – шўхе чиқиб, жонимни бедод айлағай,  
Сабру хушу вқлу имонимни барбод айлағай (Навоий).*

*Белу оғзидан, дедиларким, дегил афсонае,  
Бошладим филҳолким, «бир бор эди, бир йўқ эди» (Навоий).*

Ўзбек шеърлятида Навоийга қадар мисралари қофияланмаган Ф.лар ҳам кўп учрайди. Навоий эса мисралари қофияланган Ф.ни маъқул кўрган: унинг туркийда ёзилган 86 та Ф.идан 82 тасида мисралар ўзаро қофияланган. Навоийдан кейинги шеърлятимизда Ф.нинг шу кўриниши кенгроқ оммалашган. Мисолга олинган Ф.ларнинг дастлабки иккитасида мисралар ўзаро қофияланган бўлса, учинчиси қофияланмаган мисралардан таркиб топган.

**ФАХРИЯ** (ар. *فخرية* – мақтаниш) – шоирнинг ўзи эришган ижодий муваффақиятлардан фахр-ифтихор туйғуларини изҳор қилиши. Ф. айрим манбаларда жанр, бошқаларида эса шеърини санъат сифатида таърифланади. Агар Ф. турли жанрдаги шеърлар ичида воқе бўлиши мумкинлиги эътиборга олинса, уни *хусни ибтидо*, *хусни матлаб* (қ.) каби маънавий санъатлар қаторига қўшиш тўғрироқ бўлади. Ф.ни оддийгина мақтанчоқлик деб тушунмаслик керак, зеро, унинг яхши намуналарида фахр туйғуси шарқона одоб доирасида ифодаланади. Одатда, шоир ифтихори устозларга миннатдорлик ҳислари

билан қоришиб кетади, улардан ўрганибгина юксак натижаларга эришгани эътироф этилади. Мас., А.Навоийнинг:

*Олибмен тахти фармонимга осон  
Черик чекмай Хитодин то Хуросон, –*

байти Ф. бўлиб, у матннинг бир қисми, холос: матнда бу байтга қадар шоир устозларини эслайди, уларга юксак баҳо беради. Бу ҳам Ф. жанр эмас, балки санъат деб қараш тўғрироқ эканига далолат қиладики, шеърятимизда ўз ютуқларидан фахр-ифтихорни ифодалаш учунгина махсус ёзилган асарни топиш маҳол. Яна бир жиҳати, Ф. шоирнинг ўз тилидан, салафлари тилидан ёки бошқа шахслар тилидан ҳам ифодаланиши мумкин. Мас., Машрабнинг:

*Ҳама айтурки: Машраб, мунча илмни кимдин ўргандинг?  
Худо лутф айлади, ман барчани Маелодин ўргандим, –*

байтида шоирга ўзгалар тилидан баҳо («мунча илмни кимдин ўргандинг?») берилади, у эса буни камтарлик билан «худонинг лутфи» деб изоҳлайди. Баъзи ҳолларда Ф.да шоир ижодининг камолот даражасию аҳамиятини кўрсатиш мақсадида ўзи билан бошқа шоирлар орасида қиёс ўтказади. Табиийки, бунда шарқона одоб меъёрларига риоя қилиш, таққосланаётган шоирларга ҳурмат билан қараш, уларни камситмаслик, баҳода ҳолисликни сақлаш талаби янада кучаяди.

**ФЕЛЬЕТОН** (фр. feuilleton – варақ, саҳифа) – бадиий-публицистик жанр, долзарб мавзуда ёзилган танқидий руҳдаги, кўпинча ҳажвий-сатирик йўналишдаги асар. Ф. атамаси публицистиканинг ижтимоий-сиёсий танқид руҳидаги алоҳида жанрини англата бошлаши XIX аср охирига тўғри келади. Унга қадар Ф. сўзи бошқа маънода ишлатилган. «Журналь де деба» номли Париж газетаси 1800 йил 28 январь сонига қўшимча варақ илова қилади, кейинча бу газетанинг «Фельетон» номли доимий рубрикаси бўлиб қолади. Шу номли рубрика Европа матбуотида тез оммалашиб, бу рубрика остида носийсий, норасмий материаллар: эълонлар, мода янгиликлари, театр тақризлари, хикоя ва ҳатто романлар эълон қилинади. Жадид матбуотида ҳам шу номда рубрика ташкил этилган бўлиб, мас., Чўлпоннинг «Қурбони жаҳолат», «Дўхтур Муҳамадиёр» хикоялари «Садои Туркистон»нинг Ф. рубрикаси остида чоп этилган. Бу ҳол адабиётшунослигимизда Чўлпон ушбу хикоялари жанрини Ф.

тарзида белгилаган деган янглиш қарашнинг пайдо бўлишига олиб келган. XX асрнинг 20 – 30-йилларидан бошлаб ўзбек матбуотида кўннинг долзарб муаммоларига бағишланган Ф.лар кенг ўрин эгаллайди, жумладан, А.Қодирий, Ғ.Ғулом, А.Қаҳҳор, С.Аҳмад сингари машҳур адибларимизнинг қатор асарлари ўзбек Ф.чилиги ривожига салмоқли ҳисса бўлиб қўшилган.

**ФИГУРА** (лот. figura – шамойил, ташқи кўриниш) – нутқ курилишида, фикр ифодасида кузатилувчи жонли сўзлашув учун одатий, табиий нормалардан чекинишларнинг умумий номи; *стилистик фигуралар, риторик фигуралар, нутқ фигуралари* каби кўринишларда ҳам ишлатилади. Мас., шеърин нутқда гап бўлаклари тартибининг ўзгартирилиши – *инверсия* одатий нормадан чекиниш бўлиб, у муайян бадиий-эстетик мақсадларга хизмат қилади. Ф.ларни ўрганиш, таснифлаш ишларини антик риторика бошлаб берган. Жумладан, антик риторикада Ф.лар дастлаб иккига – фикр Ф.лари ва сўз Ф.ларига ажратилган, уларнинг ҳар бири ўз ичида бир нечтадан турларга бўлинган. Ўз вақтида муҳим масалалардан бири сифатида ўрганилган нутқ Ф.ларига эътибор XVIII асрлардан сусайган. Ўтган асрнинг иккинчи ярмига келиб структурал адабиётшунослик намояндалари (Р.Якобсон, Т.Тодоров ва б.) ўтмишда яратилган Ф. ҳақидаги таълимотни ҳозирги тилшунослик нуқтаи назаридан қайта кўриб чиқиш йўлида муайян ишларни амалга оширдилар. Ф.лар масаласини ўрганиш, бу борада антик даврлардан бошлаб амалга оширилган ишлар ва сўнги тадқиқотлар билан танишиш ўзбек адабиётшунослиги учун ҳам жуда муҳим. Мас., Шарқдаги *илми бадий* (қ.) антик риторика аънаналарининг бевосита давомидир.

**ФОРМАЛИЗМ** (лот. forma – ташқи кўриниш) – бадиий шакл ва мазмуннинг уйғун бирлиги талабидан чекиниб, шаклнинг нисбий мустақиллигини мутлақлаштирган ҳолда унга бадииятнинг бош мезони сифатида қарашда намоён бўлувчи эстетик тенденция. Ф. тамойиллари XIX аср охири – XX аср бошларида қатор адабий оқимларда намоён бўлади. Хусусан, адабиёт тарихидаги *футуризм, имажинизм, дадаизм, авангардизм* каби оқимлар бадииятни кўпроқ шаклда кўриб, турли-туман янги шаклларни ихтиро қилишга интилдилар. Бироқ уларнинг изланишлари аксар «шакл – шакл учун» шiori остида кечиб, мазмундан кўпинча айро тушгани боис ҳам, ўзлари кутган самарани беролмади. Шунингдек, ўз вақтида айни шу хил қарашларни ёқлаган, уларни назарий жиҳатдан асосламоқчи бўлган адабиётшуносларнинг ишлари ҳам бадиий асар табиатида

номувофиқ бўлгани сабабли бир ёқламалигича қолди. Аини чоғда, формалистларнинг бадиий асар шаклини ўрганишга айрича эътибор қилганлари адабиётшунослиқда изсиз кетди дейиш ҳам тўғри эмас (қ. *формал метод*). Адабиётшунослиқда Ф. термини баъзан кенг маънода ҳам қўлланади, бунда кескин ва ошкор намоён бўлган юқоридаги давргина эмас, умуман, адабиётда кузатилувчи ҳодиса кўзда тутилади. Зеро, шаклга айрича эътибор бериш, бадиийлик услубий-шаклий хусусиятларда (сўзни турфа кўйларда ўйнатиш, услубий воситалардан фойдаланиш, вазн, қофия ва ш.к.ларда воқе бўлувчи маҳорат), шуларнинг ўзи ўз ҳолича бадиий қиммат касб этади деб билиш адабиёт тарихида илгаридан бор нарса. Жумладан, Европа адабиётидаги «эстетизм» хусусиятларини касб этган *барокко*, *маринизм*, *гонгоризм* каби йўналишларга ҳам бу ҳол ёт эмас. Шунингдек, Ф. тамойиллари Шарқ адабиётида ҳам бўй кўрсатмай қолмаган: мувашшаҳбозлик, назирабозлик, турли сўз ўйинларию жимжимадор ифодаларга мазмун қурбон берилган ҳоллар бунга ёрқин мисол бўла олади.

**ФОРМАЛ МЕТОД** – адабиётшунослиқдаги бадиий шаклни адабиётнинг моҳиятини белгиловчи категория сифатида тушунган назарий йўналиш. XIX аср охири – XX аср бошларида импрессионистик танқид ва адабиётга позитивистик ёндашувларга қарши ўлароқ майдонга келган, кейинчалик бадиий асарнинг ички тузилиши қонуниятларини ўрганишга қаратилган методика сифатида қарор топган. Шунга кўра, ўзининг илк босқичларида Ф.м. адабий асарни ўрганишда матндан ташқарида қолувчи барча омилларни, адабиётни ўрганишга генетик, социологик ёндашувларни инкор қилади; шакл унсурларини белгилаш ва таснифлаш билан чекланувчи тавсифий ўрганиш йўлидан боради. Ф.м. вакиллари қарашларида бир-биридан фарқли нуқталар бўлса-да, уларни асосий принцип – эътиборни бадиий шаклга қаратишлари бирлаштиради. Яна бир жиҳати, қарашлар такомили охир-оқибат уларнинг кўпчилигини оралик мавқени эгаллашга, яъни мазмунни буткул эътибордан соқит қилиш тўғри эмаслигини англашга олиб келган. Ф.м. тарафдорлари бадиий асар шаклига хос кўп жиҳатларни: бадиий тил, услуб, шеър тузилиши, шеър композицияси, ритм, метр, сюжет қурилиши, бадиий асар композицияси каби муҳим масалаларни махсус ва чуқур тадқиқ этдилар. Хусусан, рус *формал мактаб*ининг В.Шкловский, В.Жирмунский, Ю.Тинянов, Г.Винокур, Б.Эйхенбаум каби намоёндалари амалга оширган тадқиқотлар адабиётшунослиқ ривожидан

муҳим аҳамиятга моликдир. Уларнинг изланишлари кейинчалик структур адабиётшунослиқ, семиотика каби йўналишлар учун асос, ривожланиш омили бўлиб хизмат қилди.

**ФОСИЛА** (ар. *فائسلة* – наमत; ажратувчи, оралик) – сокин ва мутаҳаррик ҳарфларнинг муайян тартибда бирикишидан ҳосил бўлувчи ритмик бирлик, жузе (қ.). Ҳарфларнинг қай тартибда бирикишидан келиб чиқиб Ф.нинг икки тури фарқланади: Ф.и *сугро* (кичик Ф.) ва Ф.и *кубро* (катта Ф.). Кетма-кет келган учта мутаҳаррикка битта сокин ҳарфнинг қўшилишидан Ф.и *сугро* ҳосил бўлади: «келаман», «капалак», «хапалак» каби сўзлар шу вазнга мос. Мас., «капалак»: мутаҳаррик (ка) + мутаҳаррик (па) + мутаҳаррик (ла) + сокин (к). Ф.и *кубро* эса кетма-кет келган тўртта мутаҳаррикка битта сокин ҳарф қўшилишидан ҳосил бўлади: «чидамадим», «яшамадим», «қарамадим» каби сўз шакллари шу вазнга мос. Мас., «қарамадим»: мутаҳаррик (қа) + мутаҳаррик (ра) + мутаҳаррик (ма) + мутаҳаррик (ди) + сокин (нг). Қайд этиш керакки, арузшунослиқка оид айрим мўнабаларда Ф. алоҳида жузе сифатида эътироф этилмайди. Жумладан, Бобур бу масалада Насриддин Тусийнинг фикрини қувватлаб, Ф.и *кубро* битта сабаби сақийл ва битта ватади мажмуъ қўшилишидан, Ф.и *сугро* эса битта сабаби сақийл ва битта сабаби ҳафиф қўшилишидан ҳосил бўлади деб ҳисоблайди.

**ФУТУРИЗМ** (лот. *futurum* – келажак) – XX аср бошларида майдонга келган авангардистик оқим, санъатнинг деярли барча турларида кузатилган, айниқса, тасвирий санъат ва ҳайкалтарошлиқда таъсири кучли бўлган, бадиий адабиётда ҳам сезиларли из қолдирган. Ф.нинг ўз ватани Италияда, шунингдек, Россияда кенгроқ оммалашди. Ф.нинг адабий-эстетик ва гоъвий қарашлари Ф.Маринеттининг «Футуризм манифести» (1909) асарида ўз ифодасини топган. Ф. адабий-маданий анъаналар билан алоқани тўла узиш, янги замон (келажак)нинг янги адабиёт ва санъатини яратиш даъвоси билан майдонга чиқди. Қисқача айтилса, Ф. намоёндалари жамиятдаги тараққиёт тенденцияларидан келиб чиққан ҳолда унинг эртасини, эртанги инсон ва инсоний муносабатларни ўзларича тасаввур қиладилар ва шунга мос адабиётни яратиш даъвоси билан майдонга чиқдилар. Яъни Ф. асрлар давомида шаклланган анъанавий маданиятга илмий-техник тараққиёт ва урбанизациялашув даври маданиятини қарши қўяди. Келажак ҳақидаги тасаввур эса мазкур жараёнлар билан боғлиқ ҳолда кишилар дунёқараши, ахлоқи, турмуш тарзи ва ш.к.ларда юз бераётган ўзгаришларни (ҳаёт ритмининг тезлашуви,

ҳолат ва таассуротларнинг кескин ўзгариши, маънавий-ахлоқий та-наззул, шахснинг емирилиши ва оломоннинг қисмига айланиши ва б.) мутлақлаштириш асосида амалга ошади. Бу ўзгаришларни табиий ва қонуний билгани учун Ф. адабиёти, реализмдан фарқ қилароқ, уни ғоявий-ҳиссий тасдиқлаш йўлидан боради. Жумладан, итальян Ф.и жамиятда қарор топган «одам одамга бўри», «кучли одам ҳамиша ҳақ» қабилдаги ақидаларни ҳақиқатда мавжуд деб ҳисоблайди ва уларга нормал ҳодисадек қарайди. Шундай мавқени тутганлари учун ҳам итальян футуристларининг бир қисми кейинроқ Муссолини бошчилигидаги фашистик ҳаракатга қўшилиб кетган. Россия воқелигида пайдо бўлган рус Ф.и итальян Ф.и билан муштарак жиҳатларга эга бўлгани ҳолда, дунёқараш бобида жиддий фарқланади: унда гуманистик асос сақланган. Адабий-эстетик қарашларда муштараклик кўпроқ кузатилади. Рус Ф.и эскиликнинг муқаррар тугашига ишонган ҳолда санъат воситасида келажакни, туғилажак «янги инсоният»ни идрок қилишга интилади, санъатнинг вазифаси шунда деб билади. Унинг учун бадиий ижод табиатга тақлид эмас, балки унинг давоми бўлиб, у тамом янги дунёни яратади. Рус Ф.и намояндалари учун «Академия ва Пушкин иероглифлардан кўра ҳам тушунарсизроқ», шунинг учун уларни «замона кемаси»дан улоқтирмақ лозим. Улар учун нафақат ўтмиш адабиёти, балки аънаналар йўлидан бораётган замондошлар ижоди ҳам мутлақо қимматга эга эмас, «осмонўпар бинолар юксаклигидан» назар солган Ф. намояндаларига улар нияҳоятда ҳақир ва тубан кўринади. Албатта, «осмонўпар бинолар» урбанизация жараёнлари кучайган шароитда келажакни билдиради, яъни футуристлар наздида бу гўё келажак ҳукмидир. Ўзларини «янги дунёнинг янги одамлари» деб билган футуристлар келажак адабиёти поэтикасини ҳам буткул янгилашга интиладилар. Айтиш керакки, киритилган поэтик янгилекларнинг аксарияти аънаналарни инкор қилиши, уларга диаметрал зидлиги билан характерланади. Жумладан, тил соҳасида улар грамматика ва имло қоидаларини тан олмайдилар, сўзларнинг аҳамиятини туширади дея тиниш белгиларини инкор қиладилар, синтактик конструкцияларни истаганча ўзгартирадилар. Футуристларга кўра, ижодкорнинг янги сўз ихтиро қилиш ҳуқуқи чекланмаган, ҳатто ҳар бир ижодкор ўз шеvasини яратиши мумкин; сўзнинг ёзувдаги шакли ва фонетик жаранги ўз ҳолича мазмундор, шу боис шеърлари ёзувда турфа шакллар топади, товушларга тақлид ёки уларнинг маънисиз такроридан иборат шеърлар яратишади ва х. Умуман, аънавий қоидаларни онгли равишда

(мас., шеъринг ритми жонли нутқдан фарқланмайдиган қилишга интилиш, битта асарда турли эстетик белгилар, жанр ёки услубий хусусиятларни қориштириб юбориш каби) бузиш Ф.нинг ғоявий-эстетик табиатидан келиб чикувчи хусусиятдир. Ф. адабий жараёнда узоқ яшаб қола билмади: 20-йилларга келиб унинг фаолияти, асосан, барҳам топди. Албатта, бу адабий ҳодиса изсиз кетмади: ижодий фаолиятини рус Ф.ининг «Гилея» (кубофутуристлар: В.Маяковский, В.Хлебников), «Эгофутуристлар ассоциацияси» (И.Северянин), «Поэзия равони» (В.Шершеневич), «Центрифуга» (Б.Пастернак, Н.Асеев) каби турли уюшмаларида бошлаган ижодкорлар кейинча рус шеърини ривожига сезиларли ҳисса қўшдилар.



# Х

**ХАРАКТЕР** (юн. *charakter* – из, белги, фарқловчи хусусият) – бадиий характер; муайян давр ва муҳит кишиларига хос энг муҳим умумий хусусиятлар билан алоҳида шахсга хос индивидуал хусусиятларни ўзида уйғун мужассам этган инсон образи. Бадиий Х. ўзида объектив ва субъектив жиҳатларни бирлаштиради. Инсон ҳаётининг ижтимоий-психологик реаллиги (бу ўринда Х.нинг реал асоси, яъни унинг ҳаётий кузатишлар ёки муайян прототип асосида яратилгани назарда тутилади) бадиий Х.нинг объектив томони бўлса, унинг ижодкор томонидан ҳиссий идрок этилиши ва ғоявий-ҳиссий баҳоланиши субъектив томонидир. Бадиий Х.нинг субъектив жиҳати, бир томондан, унинг ижодкор томонидан яратилган янги мавжудлик, бадиият ҳодисаси бўлишини; иккинчи томондан, унинг концептуал функцияга хосланишини таъмин этади. Бошқача айтсак, адабиётнинг бадиий концептуал функцияси Х. орқали амалга ошади, яъни жамиятнинг жорий ҳолати Х.(лар) воситасида бадиий тадқиқ этилади ва яхлит бадиий концепция ишлаб чиқилади. Айтиш керакки, Х.нинг бу қадар катта аҳамият касб этиши кўпроқ адабиёт тараққиётининг сўнги давларида кузатилади. Хусусан, антик адабиётда бадиий концепцияни ифодалашда Х. эмас, тасвирланган воқеанинг ўзи ҳал қилувчи роль ўйнаган. Негаки антик ижодкорлар учун Х.нинг муайян тургун типлари (золим, мушфиқ ва б.) мавжуд бўлиб, улар асар сюжетида шу типга мос ҳаракатлантирилган. Уйғониш даврига келиб эса қаҳрамон бу тургун хусусиятларни ўзгартириш, турли ниқобларда ҳаракат қилиш имконига эга бўлган, яъни антик адабиётта нисбатан бунда Х. индивидуал чизгилар ҳам касб этган. Хуллас, жамиятда шахс мақомининг ўзгариб бориши баробарида, бадиий Х.да индивидуаллик салмоғи ортиб, инсон Х.и унга табиатан ато этилган тургун хусусиятлар жамигина эмас, айтиш чоғда, давр ва муҳитнинг маҳсули экани ҳам англаниб борган ва шу тариқа реализм босқичига яқинлашган сари, адабиётда бадиий

Х.нинг роли ва аҳамияти ҳам ортган. Реализм адабиётида бадиий Х. ҳаётни кўламли ва теран бадиий идрок этиш учун кенг имкониятлар яратади. Зеро, бадиий Х.ларнинг шаклланиши ва ривожланиши, ҳаётий амаллари, ўзаро курашлари, руҳияти ва ш.к.ларни тасвирлаш орқали воқеликни атрофлича чуқур бадиий идрок этиш, унга ғоявий-ҳиссий баҳо бериш – бадиий концепцияни шакллантириш ва ифодалаш мумкин бўлади.

**ХАФИФ** (ар. *خفيف* – енгил) – аруз баҳрларидан бири, айтилиши ва тақтиъси енгил бўлгани учун шундай номланган. Фоилотун (–v – –) ва мустафъилун (– – v –) аслларининг кетма-кет такроридан ҳосил бўлади. Ўзбек шеърлятида фаол қўлланадиган баҳрлардан бири. Навоийнинг «Мезон ул-авзон» асарида Х. баҳрининг беш вазни, Бобурнинг «Мухтасар»ида эса йигирма икки вазни мисоллар билан кўрсатиб берилган. Шеърлятимизда мазкур баҳрнинг олти рунгли саккиз вазнидан кенг фойдаланилади. Х. баҳри дастлаб Атойи ва Лутфий шеърлятида учрайди. Бундан ташқари, Ҳофиз Хоразмий шеърларининг каттагина қисми, Навоийнинг «Сабъаи сайёр» достони ва яна олтмиш ижита турли жанрлардаги лирик шеърлари Х. баҳрида ёзилган. Чунончи, «Сабъаи сайёр»даги қуйидаги байт *хафифи мусаддаси солими махбуни мақтуъ* (–v – – | v – v – | – –) вазнида:

*Бир неча заврақ асрабон тайёр,  
Янги ой заврақи киби сайёр.*

**ХИАЗМ** (юн. *chiasmus* – юнон алифбосидаги Х ҳарфидан, яъни шу ҳарф шаклида жойлашган) – тескари тартибдаги синтактик параллелизм, мисрадаги сўз (бўлак)ларни тескари тартибда такрорлашга асосланган стилистик фигура. Х. моҳиятан мумтоз шеърлятдаги *тарду акс* (қ.) санъатига яқин туради. Аксарият ҳолларда Х. шеърнинг кетма-кет келувчи мисраларида намоён бўлади. Мас.:

*Гилослар лабингиз акси бўлгандек,  
Лабингиз аксидир бу борда гилос* (Ғ.Ғулом)

ёки

*Созим – менинг овозим,  
Овозим – менинг созим* (Ғ.Ғулом).

Шунингдек, Х. баъзан шеърнинг дастлабки мисраларидан биридаги сўз (бўлак)ларни тескари тартибда жойлаштирган ҳолда

такрорлаш асосида ҳам юзага чиқиши мумкин. Мас., М.Юсуфнинг «Осмон чўкиб қолди бу оқшом» сатри билан бошланувчи шеърида биринчи банд «Яшаш керак, севиш шарт эмас» мисраси билан якунланса, охирги банд «Севиш керак, яшаш шарт эмас» мисраси билан якун топади. Бунда Х. шеър гоясини юзага чиқарувчи муҳим композицион унсур вазифасини ўтайди.

**ХОККУ, ХАЙКУ** (японча «илк мисралар») – япон шеъриятидаги анъанавий қатъий шеърининг шакли, лирик жанр. Х. уч мисрадан ташкил топиб, биринчи ва учинчи мисраси беш бўгинлик, иккинчи мисраси эса етти бўгинлик ўлчовда бўлади ва бу жиҳатдан у танканинг (қ.) дастлабки уч мисраси билан бир хил бўлиб, шеърнинг асосий фикри акс этган «илк мисралар» Х. номли қатъий шеър шакли сифатида қарор топган. Жанрнинг асосчиси сифатида XVII аср япон шоири М.Басё эътироф этилади, у жанрнинг гўзал намуналарини яратиш билан бирга унга қўйилувчи шаклий ва мазмуний талаблар, эстетик принципларни ишлаб чиққан.

**ХРИЯ** (юн. *chrao* – маълум қилмоқ, нақл қилмоқ) – афористиканинг жанр кўринишларидан бири, улуғ зотнинг конкрет шароит билан боғлиқ ҳолда айтган ибратли гапи ёки амали ҳақидаги жажжи ҳикоя. Антик риторикада Х.ларга нотик фикрини далиллаш учун ишлатилган восита деб қаралган. Афоризмдан фарқи шуки, Х.да ибратли гап айрилган конкрет шароит ҳам баён этилади. Мас., «Кексайган чоғида хасталаниб қолган Сукротдан кимдир ҳол сўраб, ишлари қандай кетаётганини сўради. Файласуф айтдики: «Ҳар жиҳатдан яхши: мабодо соғайиб кетсам, ҳасадгўйларим кўпаяди, ўлсам – дўстларим».

## Ц

**ЦИКЛ** (юн. *kuklos* – айлана, гилдирак) – муаллиф томонидан бир неча мустақил асарнинг жанр, мавзу, персонажлар, ҳикоячи ва ш.к. жиҳатлардан умумийлиги асосида битта гуруҳга бирлаштирилиши, туркум. Адабиётшунослиқда Ц. масаласида яқдил фикрга келинган эмас. Айрим мутахассислар Ц.га алоҳида жанр сифатида қарайдилар. Бироқ бу ҳолда, биринчидан, Ц.ни ташкил қилаётган ҳар бири мустақил ва муайян жанр шаклига эга асарларни бутуннинг қисми (худди асарнинг битта боби каби) ҳисоблаш керак бўладиги, ҳақиқатда уларнинг ҳар бири том маънода мустақилдир. Шунга кўра, иккинчидан, Ц. адабий асарга хос бир бутунлик хусусиятига эга эмас. Яна бир жиҳати, мавжуд Ц.лар барчаси учун хос жанр хусусиятларини намоён қилмайди: мас., жанр жиҳатидан туркумланган Ц.да тематик ранг-баранглик, тематик жиҳатдан туркумланган Ц.ларда эса жанрий ранг-баранглик кузатилаверади; муаллиф томонидан таркибланган Ц.лар ҳам, ноширлар томонидан туркумланган Ц.лар ҳам мавжуд ва х. Ц.нинг кўринишлари сифатида қаралувчи *диалогия*, *трилогия*, *тетралогия* ёки *хамса* типидagi туркумлар таркибидаги асарлар қатор муштарак белгиларга эга бўлса-да, ҳамма ҳолда ҳам битта асар деб бўлмайди – улардаги қисмлар орасидаги алоқадорлик турли даражада намоён бўлади. Мас., «Кеча ва кундуз» диалогиясининг биринчи қисми – «Кеча»нинг қандай талқин қилиниши кўп ҳолларда иккинчи қисм – «Кундуз»нинг қандай тасаввури этилишига боғлиқ бўлиб қоладиги, диалогияни битта асар санаш ўринли. Бироқ худди шу гапни «Қутлуг қон» ва «Улуғ йўл» романларига нисбатан айтиш қийин, чунки биринчиси иккинчисининг мантикий давоми бўлса-да, муаллиф аввалдан диалогия ёзишни режалаштирган эмас. Бундан диалогия, трилогия тарзида номланувчи асарлар ҳам турлича бўлиши, уларнинг айримлари битта асар (жанрнинг, яъни роман, қисса ва ш.к. сифат кўриниши), бошқалари муайян умумий белгилар асосида жамланган асарлар туркуми экани кўринади. Шу

билан бирга, айрим лирик Ц.ларда бутунлик бордек (мас., С.Есенин «Форс тароналари»; Миртемир. «Қорақалпоқ дафтари» ва б.), чунки уларни мавзу, жой, лирик қахрамонга хос нисбатан яхлит кайфият бирлаштиради. Шунга қарамай, улардаги шеърлар орасида ҳам бутун-қисм алоқаси мавжуд эмас, уларнинг ҳар бири мустақил асардир. Шунга кўра, Ц.ни ҳозирча жанр деб эмас, муайян умумий белгилар асосида жамланган мустақил асарлар мажмуи сифатида тушуниш тўғрироқ бўлади.

**ЦИТАТА** (лот. cito — чақираман, келтираман) — асарда бировга тегишли асар (матн)дан олинган сўзма-сўз кўчирма келтириш. Матн ичида Ц.лар, одатда, қўштирноққа олинади, элиграф сифатида келтирилганида эса график жиҳатдан (саҳифанинг ўнг томонида жойлашади, асосий матнга қараганда кичик ўлчамли ҳарфлар билан ёзилади) ажратилади ва остида манбаси кўрсатиб қўйилади. Мумтоз шарқ шеърлятидаги *назира*лар, *татаббул*ларда Ц.лар (ўзга шоир мисраси ёки байти) ёзувда ажратилган эмас. Муайян маънода *тахмис* ҳам Ц. асосига қурилувчи асар саналиши мумкин. Тахмис сарпавҳасида муҳаммас кимнинг ғазалига боғлангани кўрсатилади, мақтаёсида эса ғазал муаллифи билан тахмис боғловчининг тахаллуси келтирилади, шулар асосида Ц.ларни фарқлаб олиш мумкин бўлади. Ҳозирги ўзбек шеърлятида ўзга шоирдан олинган парча-ни (кўпроқ мисра, баъзан бир неча мисра) қўштирноқсиз келтириб, саҳифа ости изоҳида муаллифини кўрсатиб қўйиш усули ҳам кенг оммагашди. Адабиётшуносликда Ц. термини баъзан кенг маънода ҳам қўлланиб, бунда асар матнидаги ўзга матндан (қай тарзда киритилганидан қатъи назар) кириб қолган ҳар қандай унсур тушунилади. фақат ўзга матн қай даражада аниқликда киритилишидан қатъи назар, ўқувчи уни таниб оладиган бўлиши шарт. Мазкур маънодаги Ц. *аллюзия* ва *реминисценция*ларни ҳам қамраб олади.

## Ч

**ЧИСТОН** (форс. *چست آن* — у нима?) — қаранг: *лугз*  
**ЧҶЗИҚ ҲИЖО** — қаранг: *ҳижо*

# Ш

**ШАКЛ** – қаранг: бадий шакл

**ШАҲДУ ШИРУ ШАКАР** (ар. شهد – асал, форс. شیر – сут, ар. شکر – шира) – қаранг: муламмаъ

**ШЕЪР** – 1) муайян ўлчов асосидаги ритмга эга нутқ шакли, назм; 2) шеърий йўлда ёзилган кичик ҳажмли асар, лирик шеър. Бу маънода Ш. термини кенг қўлланиб, жанридан қатъи назар, ҳар қандай лирик асарни билдиради ва уларни шеърий йўлда ёзилган бошқа асарлар (достон, шеърий драма, шеърий роман ва ҳ.)дан фарқлайди. Умуман олганда, терминнинг мазкур маънода қўлланиши Ш. сўзининг этимологик (*лирика, поэзия*) маъносига кўпроқ мос келади.

**ШЕЪРИЙ НУТҚ** – поэтик нутқ, назм; муайян бир ўлчов (вазн) асосидаги ритмга эга, ўзининг мусиқий жаранги, эмоционал-хиссий тўйинтирилганлиги билан фарқланувчи нутқ шакли. Ш.н.даги ўзига хос интонация, мусиқийлик ритмик бўлақлар ва ритмик воситалар, ўзига хос фонетик ва синтактик ташкилланиш орқали вужудга келади. Шеърий йўлда ёзилган лирик асардаги кайфиятнинг ҳосил қилиниши, кечинманинг ўқувчига «юктирилиши»да унинг ритмик-интонацион томони муҳим аҳамият касб этади. Яъни шеърнинг ритмик-интонацион хусусиятлари унинг мазмуни билан белгиланади, мазмун билан уйғунлик касб этади. Ўзининг келиб чиқиши жиҳатидан Ш.н. бадий нутқнинг насрий шаклидан қадимийроқ, аниқроғи, ўз вақтида у бадий нутқнинг ягона шакли бўлган. Миллий адабиётлар тарихининг илк босқичларида адабий асарлар шеърий йўлда ёзилган, насрда ёзилган бадий асарларнинг пайдо бўлиши, насрнинг бадий нутқ кўриниши сифатида шаклланиши эса нисбатан кейинги даврларга тўғри келади. Сабаби, шеърий нутқдаги ўзига хос ташкилланиш уни одатдаги нутқдан кескин фарқлайди ва шунинг ўзиёқ етказилаётган информация санъатга алоқадор эканини таъкидлаб туради. Зеро, насрий нутқ ўзининг қурилиши жиҳатидан кундалик

мулоқотда қўлланилувчи нутққа яқин, шеърий нутқ сўз санъатига хос махсус ҳодисадир.

**ШЕЪР ТИЗИМИ** – маълум ўлчов принципи асосланган шеърий вазн (ўлчов)лар тизими, мажмуи. Ш.т. шеър тузилишининг асосини, унинг асосий қонуниятларини белгилаб беради. Ҳар бир халқ шеъриятидаги Ш.т. ўша халқ тилининг ўзига хос хусусиятларидан келиб чиқади. Мавжуд Ш.т.ларининг ҳаммасида асосий ўлчов бирлиги сифатида бўгин олинган. Бўгин эса, маълумки, турли тилларда турлича сифатий ва миқдорий кўрсаткичларга эга. Шунга кўра, жаҳон халқлари шеъриятида мавжуд Ш.т.лари бўгиннинг миқдори (силлабик Ш.т.), ургули ёки ургусизлиги (тоник Ш.т.), чўзиқ ёки қисқалиги (метрлик Ш.т.), баланд ёки паст талаффуз қилиниши (мелодик Ш.т.) каби жиҳатларни ўлчов асоси қилиб олади. Шунингдек, бир йўла икки жиҳатни асос қилиб олган Ш.т.лари ҳам мавжуд (силлабо-тоник Ш.т., ўзбек арузи). Маълумки, илмий термин муайян фан тармоғи доирасида фақат битта тушунчани англатиши мақсадга мувофиқ, бироқ амалиётда бундан кўп чекинилади. Шундай ҳол Ш.т. ва вазн терминларини ишлатишда тез-тез кузатилади. Мас., биз аниқ бир газал ҳақида «аруз вазида ёзилган», адабиёт тарихи ҳақида гапиратуриб эса «аруз вази мусулмон шарқ шеъриятида етакчи мавқени эгаллаган» деяверамиз. Ҳақиқатда эса конкрет газал «аруз вази»да эмас, арузнинг «фалон вазида» (рамали мусаммани мақсур, ҳазажи мусаммани маҳзуф ва ҳ.) ёзилган бўлади, яъни вазн конкрет шеърда намоён бўладиган ҳодиса, у конкрет шеърнинг ўлчовини билдиради. Шунга биноан, иккинчи ҳолда «аруз вази мусулмон шарқи шеъриятида етакчи мавқени эгаллаган» дейилганда «вазн» эмас, балки вазнлар системаси – Ш.т. назарда тутилган. Демак, «вазн» термини ҳам конкрет шеърнинг ўлчови (метр) маъносида, ҳам Ш.т. маъносида ишлатилмоқда ва шу боис терминологик чалкашлик юзага келмоқда. Ҳолбуки, Ш.т. муайян ўлчов тамойилига асосланган вазнлар мажмуи бўлиб, мас., «аруз тизими» дейилганда мисраларда чўзиқ ва қисқа ҳижоларнинг маълум тартибда такрорланиб келишига асосланган Ш.т. тушуниладиги, бу тизим юзлаб конкрет вазнларни ўз ичига олади.

**ШИБҲИ ИШТИҚОҚ** (ар. شبه اشتقاقى – иштиқоққа ўхшаш, ўзақдошга ўхшаш) – мумтоз адабиётдаги шеърий санъат, шеърда асли ўзақдош эмас, бироқ талаффуз ёки имло жиҳатидан бир-бирига яқинлиги боис бир қарашда ўзақдош бўлса керак деган шубҳа уйғотувчи сўзларни ишлатиш. Илми бадиъга оид манбаларда Ш.и. алоҳида

шеърий санъат сифатида ҳам, *иштиқоқ*нинг бир кўриниши сифатида ҳам таърифланади. Лутфийнинг куйидаги байтида иштиқоқ санъати ҳам, Ш.и. санъати ҳам қўлланган:

*Ҳар кимки шаҳид ўлмади дилбар қиличидин,  
Бечора бориб топмади ул шаҳди шаҳодат.*

Бу ўринда шеърий санъатлар, «шаҳид», «шаҳд» ва «шаҳодат» сўзларининг қўлланиши туфайли, юзага келмоқда. Байтда «шаҳодат» сўзи «гувоҳлик» эмас, балки «шаҳидлик» маъносида қўлланган, яъни шоир «дилбар қиличидан шаҳид бўлмаган одам шаҳидлик лаззатини топмайди» демоқчи. Демак, байтдаги «шаҳид» ва «шаҳодат» сўзлари ўзакдош, уларнинг қўлланиши иштиқоқ санъатини юзага чиқармоқда. Бироқ «шаҳд» сўзи уларга ўзакдош бўлмагани ҳолда, талаффузи ва ёзилиши жиҳатидан яқин, шу туфайли ҳам ўзакдошдай туюлади (ўзакдош деган шубҳа тугдиради) ва шу асосда Ш.и. санъати юзага чиқади.

**ШИРУ ШАКАР** (форс. شیر – сут, ар. شكر – шира) – қаранг: мулам-маъ



**ЭВФОНИЯ** (юн. euphonia – хушоҳанглик) – бадий нутқнинг хушоҳанглиги, оҳангдорлик. Нутқда Э., асосан, фонетик воситалар ёрдамида юзага келади, нутқнинг хушоҳанглиги кўп жиҳатдан унинг фонетик ташкилланишига боғлиқдир. Э. шеърий нутқда, айниқса, катта аҳамият касб этадики, шунинг учун шеърнинг фонетик ташкилланишига алоҳида эътибор берилади. Шеърий нутқнинг ритмиклиги, унда турли сатҳдаги тақрорларнинг (қ.) қўлланиши Э.га асос бўлади. Мас., Э.Шукурнинг:

*•Мен сени боладай суйсам, нетайин,  
Куйида бевадай куйсам, нетайин.  
Суйгунчигим менинг, суйгунчигим-ай... –*

мисраларида «уй» товуш бирикмаси билан «ай» товуш бирикмаси беш мартадан, «ен» товуш бирикмаси «не» тарзида тескари тартибда икки мартадан тақрорланади; биринчи мисрадаги «боладай суйсам» бирикмаси билан иккинчи мисрадаги «бевадай куйсам» бирикмаси вазндоз ва оҳангдош; «нетайин» ва «суйгунчигим» сўзлари айнан тақрорланади. Буларнинг бари бирликда шеърнинг хушоҳанг бўлишини таъминлайди. Ёки шу шоирнинг тўртта уч мисралик банддан иборат шеърининг график шакли ўзгартириб кўрилса, Э.нинг юзага келиши ҳақида етарли тасаввур ҳосил бўлади:

*Алласин юлдуз айтсин, Тун айтсин, кундуз айтсин,  
Эна киз ухласин, эна киз...  
Кемадай чайқалар беланчак, Шамоллар сопади ҳалинчак,  
Эна киз ухласин, эна киз...  
Очилиб-сочилар кечалар, Эркалар нордон ёб чечалар,  
Эна киз ухласин, эна киз...  
Қадамларга кулсин эшиклар, Гудакларга тўпсин бешиклар,  
Эна киз ухласин, эна киз...*

**ЭЗОП ТИЛИ** – муайян сабабларга кўра айтилмоқчи бўлган фикр-ни очиқ-ошкор ифодалаш мумкин бўлмайдиган ҳолларда пайдо бўлувчи ифода йўсини; фикрнинг пардалаб, «коса тагида нимкоса» тарзида, турли ишоралар орқали ифодаланиши. Э.т. ижод эркинлиги, сўз эркинлиги бўғилган ҳар қандай шароитда санъаткорнинг воқеликка муносабат билдириш эҳтиёжининг маҳсули ўлароқ воқе бўлади, шу боис бу хил ифода йўсини адабиёт тарихининг деярли барча босқичларида учрайди. Жумладан, ўз даврида Гулханий «Зарбулмасал»ида мажозий образлар орқали, Фитрат «Чин севиш» ва «Ҳинд ихтилолчилари» пьесаларида ўзга юрда кечган воқеалар тасвири орқали, Чўлпон турли поэтик рамзлар ёрдамида ўзларини қийнаган муаммоларга муносабатларини ифода этганлар. XX аср ўзбек адабиётида яратилган тарихий мавзудаги асарларда кузатилувчи ўтмиш манзараларининг тасвири орқали замонага ишора қилишни ҳам Э.т.нинг бир кўриниши ҳисоблаш мумкин. Мас., «Навоий» романида Ойбекни ўз даврида қийнаган муаммолар (мас., Мажидиддиннинг сўроқ қилиниши, Султоналига тазйиқлар уюштирилиши) акс этган, Х.Давроннинг «Абулхай сўзи» шеърида «социалистик реализм» санъати ва адабиётга муносабат «йўли билан» ифода этилган.

**ЭКСПОЗИЦИЯ** (лот. *expositio* – баён, тушунтириш) – сюжет компоненти, персонажларнинг бевосита тугун юзага келиши вақтида кечган ҳаёти, асосий *конфликт* етилган шарт-шароитлар тасвири. Э. ўқувчини асар воқеалари кечадиган жой, воқеа иштирокчилари бўлмиш персонажлар, конфликтни юзага келтирган шарт-шароитлар билан таништиради, уни сюжет воқеаларини идрок қилишга тайёрлайди. Э. ҳажм эътибори билан турлича бўлиши, асарнинг турли ўринларида келиши, баъзан умуман тушириб қолдирилиши мумкин. Мас., «Меҳробдан чаён»да Э. жуда катта ўринни – хондан совчилар келгунга қадар бўлган эпизодларни ўз ичига олиб, персонажларнинг *олдинги тарихи* билан аралаш тарз-да берилади. «Қутлуг қон»да у жуда қисқа ва тугундан кейин берилади, «Кўшчинор чироқлари»да эса экспозиция умуман тушириб қолдирилади. Э. персонажларнинг ўтмиш ҳаёти ҳақида маълумот берувчи *олдинги тарихдан* бевосита асар бадийи вақтига алоқадорлиги билан, *прологдан* матннинг алоҳида композицион бўлаги сифатида ажратилмаслиги билан фарқ қилади.

**ЭКСПРЕССИОНИЗМ** (фр. *expression* – ифодалаш) – XX аср бошларида немис адабиётида шаклланиб, бошқа миллий адабиётларга ҳам ёйилган адабий йўналиш. Э. фақат адабиёт доираси билан

чекланмайди, у санъатнинг бошқа турларида ҳам кузатилган ва шу боис адабий-эстетик йўналиш ҳисобланади. Э. дастлаб Дрездендаги «Кўприк», Мюнхендаги «Мовий чавандоз» номлари билан фаолият олиб борган мусаввир ва ҳайкалтарошлар уюшмалари ҳамда «Штурм» (1910 – 1932) журнали теварагига уюшган ижодкорлар доирасида пайдо бўлган. Э.нинг майдонга чиқиши ўтган аср биринчи чораги Фарб мамлакатлари ижтимоий ҳаётининг барча жабҳаларида кузатилган инқироз билан боғлиқ бўлиб, уни ижодкорларнинг мавжуд ҳолатга нисбатан норозилиги, ўзига хос исёни сифатида тушунилади. Э. намояндалари ижодида ўткир ижтимоий-танқидий пафоснинг устуворлиги, бу пафоснинг инсониятга беадад кулфатлар келтирган жаҳон урушига, ижтимоий адолатсизликка, мавжуд ижтимоий тартиботлар шахсни топташи, унинг эркини бўғишию ёлғизлатиб қўйишига, жамиятда маънавий инқироз кучайиб бораётгани ва ш.к.ларга қаратилгани бунинг ёрқин далилидир. Бошқа модернистик йўналишлар сингари Э. ҳам ўтмиш маданияти, хусусан, натурализм билан алоқасини узганини эълон қилди. Шундай бўлса-да, мутахассислар Э. сиртдан нечоғлик ғаройиб бўлмасин, адабий-маданий анъанадан буткул узилиб кетмагани, хусусан, унда Маърифатчилик даври комедиясига, диний театр драмаларига хос образлар тизими, ифода йўсини мавжудлигини таъкидлайдилар. Албатта, бу бежиз эмас, чунки мазкур жанрларга хос даъват, умумлашма образлар орқали муайян гояларни сингдиришга интилиш Э. исёнини ифодалаш учун қулай эди. Зеро, давр руҳига мос ҳолда Э., айниқса, унинг сўл қаноти дунёни ўзгартириш зарурлигини эътироф этади, образлар орқали қалб «қичқирғи»ни оммага етказишга интилади. Э. адабиёт ва санъатда объектив воқелик эмас, балки муаллиф қалби, унинг ички «мен»и устувор бўлиши лозим деган ақидани илгари сурди. Яъни объектив воқеликни *тасвирлаш* эмас, ижодкор қалбини *ифодалаш* (айни шу нарса йўналишга ном берган) муҳим, ифодалаш тасвирлашдан, интуиция мантиқдан устун бўлмоғи лозим деб билди. Воқеликни тўлақонли тасвирламай унинг субъектив талқинини беришга интилиш туфайли Э.да образ конкретлилик хусусиятини йўқотади, унда тушунча, гоя, маънавий-ахлоқий принциплар ўрнини абстракциялар эгаллайди. Шу боис бадийи концепция ифодасида умумлашма образлар (конкрет инсон эмас – умуман Одам, умуман Ишчи, умуман Зиёли ва ҳ.), рамзлар, фантастика, гротескнинг аҳамияти ортади. Э. вакиллари яратган бадийи воқелик марказида бешафқат дунё зиддиятларидан пора бўлган «қалб» туради, бадийи

воқелик эса воқеликнинг деформацияланган ва гоят кучли эмоционалликка йўғрилган оксидир. Мазкур фонда «қалб»нинг ижтимоий шарт-шароитларга боғланиб қолган инсон фожиасидан норозилиги, жамиятнинг эртасидан огоҳ этаётган «кичқириги» баралла янграйди. Э. ҳаётнинг мураккаб муаммою зиддиятларини бадийий идрок этишга интилмайди, улардан келган таассурот, изтиробу аламларни – муаллиф учун муҳим бўлган гоёни шартли йўсинда, муболағали кучайтириб ифодалаш билан чекланади.

Э.га хос исёнкор руҳ фашистлар ҳокимиятга келган Германияда қувгин қилинди, тушкунликни тарғиб этадиган, нацизм мафкурасига мос келмайдиган, унга хизмат қилмайдиган ҳодиса сифатида тақиқ остига олинди. Э.нинг ижодий тажрибалари кўплаб адиблар, жумладан, Ф.Кафка (айрим мутахассислар уни Э. вакили санайдилар), И.Бехер, Г.Гессе каби улкан истеъдодлар ижодига самарали таъсир кўрсатди. Э.га хос кайфият, руҳ, унинг тажрибасидан ўтган усул ва воситалар бошқа миллий адабиётлар томонидан ҳам ижодий ўзлаштирилди ва турли адабий-эстетик тизимлар доирасида қўлланди. Э. анъаналарининг излари ҳозирги адабиётда ҳам сезилиб турадики, бу унинг жаҳон бадийий тафаккурига сингиб кетгани, уни маълум даражада бойитганидан далолатдир.

**ЭКСПРОМТ** (лот. *expromtus* – тайёр) – ижодий импровизациянинг бир кўриниши, бирон нарса-ҳодиса ҳақида ҳеч бир тайёргарликсиз, шу пайтнинг ўзидаёқ айтилган ёки ёзилган шеър (қ. *бадиҳа*).

**ЭЛЕГИЯ** (фригияликлар тилида «*elégō*» – қамишдан ясалган най) – ҳозирги маъносида кўпроқ фалсафий мазмундаги, қайгули ўйларни ифодаловчи шеър; мазмун жиҳатидан таснифланувчи лирик жанр. Адабиёт тараққиёти давомида Э. термини маъно ўзгаришларига учраган. Жумладан, антик юнон адабиётида, мазмундан қатъи назар, ҳар қандай иккилик лирик шеър Э. деб юритилган. Антик Рим адабиётидаги Э.ларда эса, вососан, муҳаббат мавзуси қаламга олинган. Ҳозирги тушунчадаги Э.нинг мазмуний белгиси Овидийнинг «Қайгули элегиялар»идан кейин қарор топди ва у энди «гамгин кўшиқ» маъносига эга бўлди. Худди шу маънодаги Э. XVIII асрнинг иккинчи ярмидан Европа адабиётида, Э.ни сарой қасидаларига қарши қўйган сентименталистлар орасида, айниқса, кенг оммалашди. Шу тариқа Э. жанрга хос шакл қатъийлигини йўқотди ва мазмун аниқлигига эришиб, кўпроқ фалсафий қарашлар, қайгули ўй-изтиробларни акс эттирадиган шеър маъносида тушунила бошлади.

**ЭЛЕГИЯВИЙЛИК** (русчадан калька: «элегическое», «элегичность») – бадийийлик модуси. Э. *идиллиявийлик* ва *драматизм\** билан биргаликда *қаҳрамонлик*, *сатира* ва *трагизм*дан фарқланувчи модуслар гуруҳини ташкил этади. Агар қаҳрамонлик модусидаги асар архитектоникасини белгилувчи асосий мотив жасорат, сатирада мунофиқлик, трагизмда айбдорлик (хато ёки жиноят) бўлса, Э. учун энг муҳим мотив йўқотишдир. Бироқ йўқотишнинг ўзи Э. модусини белгилай олмайди (йўқотиш мотиви трагизм ёки драматизмда ҳам бўлиши мумкин). Э. учун муҳими йўқотишдан келадиган изтироб, айна шу нарса Э. модусидаги асар қаҳрамони учун ўз «мен»ини намоён қилиш усулига айланади. Элегиявий қаҳрамонга макон ёки замонда атрофдагилардан четлашиш – узлатнишинлик ёки бир жойда кўним топмай, жаҳонгашта бўлиб яшаш хос, шунинг ўзида қаҳрамоннинг атроф-муҳитга қарши сокин исёни ботиндир (мас., Х.Султоновнинг «Ўзинг ёлғиз ёдгори» қиссасидаги Адаш Карвон ва Саттор образлари).

**ЭЛЛИПСИС** (юн. *ellipsis* – тушириш, тушиб қолиш) – стилистик фигуралардан бири, нутқда жумла таркибидаги сўз (бўлак)ни атайин тушириб қолдириш. Яъни Э. муайян бадийий-эстетик мақсадни кўзлаган ҳолда амалга ошади, иккинчидан, сўз (бўлак) тушириб қолдирилса-да, унинг борлиги назарда тутилади ва англашилиб туради. Ўзбек шеъриятида кўпроқ бош бўлақлардан бирининг тушириб қолдирилиши ҳисобига воқе бўлувчи Э.лар кузатилади. Мас.:

*Булбулларми?! Етар!*

*Гулларми?! Бўлди!*

*Сўз навбати – юракка...*

Келтирилган парчада кесим (*берилади*) тушириб қолдирилган, натижада «юракка» сўзи мантиқий ургу олади, шеърнинг дастлабки мисраларидаги оҳанг шиддатининг сақланишига эришилади.

**ЭПИГОНЛИК** (юн. *epigonoí* – кейин тугилган) – адабиётдаги ўзлаштириш кўринишларидан бири, ўзигача мавжуд бўлган асарларга, муайян адабий йўналиш, оқим ёки алоҳида сўз санъаткорига хос услуб, тасвир манераси кабиларга кўр-кўрона эргашиш. Э. ижодий ёндашувдан маҳрум бўлиб, унда адабий ҳодиса (муайян асар, йўналиш ё ижодкор услуби ва ш.к.)нинг у ёки бу даражада муваффақият топган ва муқим қарор топиб улгурган жиҳатлари механик қайта яратилади. Шу маънода, Э. иқтидори етарли бўлмаган ижодкор-

нинг ўқувчи омма диди, талаб-эҳтиёжларига мослашишга интилиши маҳсулидир. Бироқ ноижодий ёндашув, эргашилаётган намунанинг ташқи жиҳатларинигина механик қайта яратилиши сабаб, Э. ҳамиша муваффақиятсизликка маҳкум, зеро, жонсиз схема, қуруқ услубий воситалару композицион усуллар мажмуи бадиият ҳодисасига айланолмайди. Э.нинг кўринишларидан бири сифатида *автоэпигонлик* ҳам кўрсатилади. Бунда ижодкорнинг ўз-ўзини такрорлаши (мавзу, оҳанг, сюжет қурилиши, образлар, ҳаётий ҳолатлар тасвири ва ш.к.) назарда тутиладики, бу ижодий ўсишдаги оқашдан дарак беради. Табиийки, Э. каби автоэпигонлик ҳам салбий ҳодиса, зеро, чинакам ижод муттасил изланишни, «ортдаги кўприкларни бузиб бориш»ни тақозо этади.

**ЭПИГРАФ** (юн. epigraphe – битик, сарлавҳа) – асарнинг бошланишида сарлавҳадан кейиноқ ёки унинг бўлим (боб, фасл)лари бошида келтирилувчи қисқа, одатда, эътиборли манбалардан (халқ ижоди, машҳур кишиларнинг пурҳикмат сўзлари ва ш.к.) олинган кўчирма, цитатанинг бир кўриниши. Кўп ҳолларда Э. ўзининг афористик мазмуни билан асар моҳиятини очиб беради. Мас., А.Қаҳҳор «Ўғри» ҳикоясига Э. қилиб олган «Отнинг ўлими – итнинг байрами» мақоли ҳикоя моҳиятини, ундаги воқеага ғоявий-эмоционал муносабатни ифода этади. Бироқ Э.нинг бадиий-эстетик функциялари шу билангина чекланмайди. Баъзан Э. экспозиция вазифасини ўташи, ўқувчини асар воқелигига олиб кириб, унга илк маълумотларни бериши мумкин. Мас., Х.Султоновнинг «Бунчалар ширинсан, аччиқ ҳаёт» ҳикоясига Э. қилинган Ғ.Ғуломнинг Қурбонжон додхоҳ ҳақида айтган сўзлари шундай вазифани бажаради. А.Ориповнинг «Тунислик бола» шеърига Римда тунислик бола миллатчи-ирқчилар томонидан ёқиб юборилгани ҳақидаги газета хабари Э. қилиб олинганки, бу асарнинг ёзилиш сабабини изоҳлаш билан бирга лирик қаҳрамон кечинмаларини асослашга ҳам хизмат қилади. Чўлпоннинг «Кеча» романига эпиграф қилиб олинган М.Горький сўзлари эса полуфункционаллик касб этади: у ҳам турли айбловлардан ҳимоя воситаси, ҳам адибнинг асарни ёзишдан мақсадни (муҳими, ҳам очик ифодаланаётган, ҳам пардалаб айтилаётган мақсадни) ифодалайди. Э.нинг *пародия*даги вазифаси эса жанр табиатига мос: пародияга объект бўлган асардан келтирилган парча, бир томондан, ўқувчини ҳажв қилинаётган асарга йўналтиради, иккинчи томондан, пародия-нависнинг услубий «ўйин»лари учун асос бўлади.

**ЭПИЗОД** (юн. epeisodien – киритма) – эпик, лиро-эпик ва драматик асарларда тасвирланаётган воқеанинг макон ва замонда кечиши

жиҳатидан ажралувчи, маконий ва замоний жиҳатдан аниқ чегараланганлик асосида нисбий мустақиллик касб этувчи бўлаги. Агар шу жиҳатдангина қаралса, драматик асарларнинг ҳар бир пардасини Э.га тенг санаш мумкин. Лекин саҳнанинг ўз ичида кўринишларга бўлиниши, кўриниш вақт ва жой бирлигидан ташқари умумий иштирокчилар билан ҳам ажралиши эътиборга олинса, унда Э.ни кўринишга тенг дейиш тўғри бўлади. Эпик турнинг кичик жанрлари (латифа, масал; айрим эртақлар, кичик ҳикоялар) аксар ҳолларда битта Э.дан ташкил топади. Айни чоғда, кичик эпик жанрлар мазмуни кўпинча икки (баъзан ундан ортиқ) Э.ни бир-бирига зидлаш, қиёслаш ёки тадрижий (градуал) муносабатда қўйиш орқали ҳам юзага чиқади. Одатда, битта воқеа қаламга олинадиган ҳикоя (новеллалар)ларда шу воқеанинг ўзи бир неча Э.дан таркиб топади. Шунга ўхшаб юқоридагича тамойил асосида катта ҳажмли эпик асарлар сюжетидаги воқеалар ҳам ўз ичида Э.ларга ажратилиши мумкин.

**ЭПИК ТУР** – қаранг: **эпос**

**ЭПИЛОГ** (юн. epilogos – сўнгсўз) – асарда тасвирланган асосий воқеалардан алоҳида ажралиб турувчи якун, хотима. Антик даврлардан шаклланган аънамага кўра, саҳна воқеалари якун топгач, Э. қисми берилиб, улар мундарижаси (саҳнада ўйналган томоша мазмунини тушунтириш, қиссадан ҳисса чиқариш, томошабинларга миннатдорчилик билдириш, камчиликлар учун узрхоҳлик қилиш ва ш.к.) ва шакли (хор кўшиги, рақс, актёрларнинг залга бевосита мурожаати ва б.) жиҳатидан турлича бўлган. Кейинчалик Э. эпик асарларда ҳам қўллана бошланди. Эпик асарларда ҳам Э. турли шаклларда (воқеа, бирон-бир ривоят, табиат манзараси ва б.) берилиши мумкин. Э.нинг кўп ҳолларда алоҳида бир воқеа шаклида берилиши сабаб бўлса керак, баъзан Э. ҳам сюжет элементи сифатида кўрсатиладики, бу тўғри эмас. Чунки бу ҳолда ҳам Э. асосий сюжетнинг бевосита давоми эмас, балки асосий воқеалар якунига етгач юз берган воқеа бўлиб, у асар мазмунини, муайян ғояни ойдинлаштириш, конкретлаштиришга хизмат қилади (мас., «Ўткан кунлар»да Отабекнинг қабристонда Зайнаб билан тўқнаш келиши), бу эса, қандай шаклда берилишидан қатъи назар, барча Э.ларга хосдир. Шу маънода, Э.ни персонажларнинг кейинги тақдири ҳақида маълумот берувчи *кейинги тарих* (мас., «Ўткан кунлар»даги Отабекнинг ўлими ҳақидаги хабар; «Ёзгувчидан» деб номланган Отабекнинг авлодлари тақдири ҳақидаги маълумотлар) дан ҳам фарқлаш керак.



**ЭПИСТОЛЯР АДАБИЁТ** (юн. *epistole* – мактуб, нома) – бировга мактуб шаклида ёзилган адабий ёки публицистик асарлар. Ижодкор мактублари аввалдан (бадий ниятда) кўпчиликнинг ўқишига мўлжалланган бадий ёки публицистик асар сифатида режалаштирилган бўлиши ҳам, унинг биров билан ёзишмалари кейинча ўқувчилар томонидан шундай деб қабул қилиниши ҳам мумкин. Масофадан мулоқот қилишнинг ягона шакли бўлгани учун антик даврларда мактуб ёзишга жиддий қаралган, улар *риторика* қоидаларига риёя қилган ҳолда битилган. Шу боис Эпикур, Цицерон, Сенека кабиларнинг мактублари Э.а.нинг нодир намуналарига айланган. Ўрта асрларга келиб Фотий, Августин, Лютер каби диний арбоблар мактубнинг дидактик имкониятларидан кенг фойдаланиб ўз қавмларига турли масалаларни тушунтирганлар. Э.а.нинг ўзбек мумтоз адабиётидаги намунаси сифатида А.Навоийнинг «Муншаот» асарини келтириш мумкин. Адабиёт тараққиётининг кейинги даврларида шахслараро бевосита ёзишмалар ҳам аҳамиятини йўқотмагани ҳолда, адабий асарларни мактуб шаклида ёзиш кенг оммалашди. Мас., «Форс хатлари» (Монтескье), «Юлия ёки янги Элоиза» (Ж.Ж.Руссо), «Ёш Вертернинг изтироблари» (Гёте), «Камбағал кишилар» (Ф.М.Достоевский) каби қатор асарлар мактуб шаклида ёзилган. Янги ўзбек адабиётида ҳам мактуб шаклидан самарали фойдаланилган асарлар талайгина: «Севгим, севгилим» (Ў.Умарбеков), «Чўл ҳавоси» (Ў.Ҳошимов).

**ЭПИТАФИЯ** (юн. *epitaphos* – қабртошдаги ёзув) – қабртошга ёзилган битик; ҳақиқатда қабртошга битилган ёки қабртошга битилмасда, тўлламдан жой олган мўъжаз шеър. Одатда, Э.лар ё марҳумга мурожаат шаклида, ё марҳумнинг тириклар (қабр ёнига келувчи ёки қабр ёнидан ўтувчи)га мурожаати шаклида бўлади. Ушбу анъанавий шаклдан ташқари Э.нинг ҳажвий шакли ҳам бўлиб, у мазмун-моҳиятига кўра *эпиграмма*га яқин туради. Генетик жиҳатдан антик адабиётдаги эпиграммаларнинг бир кўриниши бўлган Э.лар Европада ўрта асрлар ва Уйғониш даврида кенг оммалашган. Ўзбек шеърлятида Э. жанри оммалашган эмас, лекин, сийрак бўлса-да, учраб туради. Жумладан, айрим эпик асарларда (мас., А.Қодирий, «Ўткан кунлар»; А.Мухтор, «Чинор»; У.Ҳамдам, «Сабо ва Самандар») келтирилган қабртошлардаги назмий битикларни Э. намунаси санаш мумкин. Шунингдек, Э.нинг қабртошга битилмаган кўринишига мисол сифатида Х.Давроннинг «Менинг сочим оққа кўмилгай, Сочинга оқ тушмай кетдинг, хайр» мисралари билан

бошланувчи шеърини келтириш мумкинки, муаллифнинг ўзи унинг жанрини Э. деб белгиллаган.

**ЭПИТЕТ** (юн. *epitheton* – ипова этилган, изоҳловчи) – бадий сифатлаш; нарса-ҳодисанинг белгисини образли ифодалайдиган бадий аниқловчи. Тил нуқтаи назаридан қаралса, Э. ҳамisha аниқловчи вазифасида қолади, лекин оддий аниқловчидан фарқли равишда, бадий функцияни ўтайди: агар оддий аниқловчи нарса-ҳодисани бир турдаги бошқа предметлардан ажратса (*ёлғиз аёл*), Э. унга хос муайян белгини ажратиб-таъкидлаб («Ёбондаги *ёлғиз* дарахт...») кўрсатади. Кўп ҳолларда Э. белгини кўчма маъно орқали ифодалайди ва бу ҳолда *метафорик* эпите́т (қиёсланг. *хирва* ойна – *хирва* кўнгил) деб юритилади. Айрим Э.лар халқ оғзаки ижодида, шунингдек, ёзма адабиётда анъанавий тарзда кенг қўллангани сабабли муайян тургунлик касб этган бўлиб, улар *доимий*, *барқарор* Э.лар деб юритилади (*алпкелбат* паҳлавон, *сунбул* соч, *қундуз* қош, *ой* юз, *лаъл* лаб, *сарв* қомат). Адабиётда ижодий индивидуалликнинг кучайиши баробарида, бетакрор, нарса-ҳодисани қутилмаган жиҳатлардан таъсифловчи Э.ларнинг салмоғи ва қиммати ортиб боради. Бундай Э.лар ифоданинг ёрқин, тасвирнинг жонли бўлишига хизмат қилиб, эстетик таъсир кучини оширади (мас., «*Шойи* шафақларга ўранар юрак»; «*О, уятчан* намозшомгуллар»; «*Маъсум* майсаларни тирилтгувчи сен, Музлаган ҳисларни илитгувчи сен»; «*Дастурхонда* фақат *көмтилган* юрак» – Э.Шукуров.)

**ЭПИФОРА** (юн. *epiphora* – кўшимча) – такрорнинг хусусий кўринишларидан бири, шеърдаги бир неча мисра охирида битта сўз ёки сўз бирикмасининг такрорланиши. Мумтоз шеърлятимиздаги *радиф* муайян маънода Э.нинг кўриниши саналиши мумкин, фақат радифнинг қофиядан кейин ўрин олиши шарт, Э.га эса бундай шарт қўйилмайди. Шунга қарамай, мумтоз шеърлят анъаналарининг давомчиси бўлган ҳозирги ўзбек шеърлятида Э. қофиядан сўнг келувчи сўз (бирикма) такрори сифатида кенгроқ тарқалган. Мас.:

*Олтин ойга олма отар Ойбодом,  
Ойботарда йиглаб ётар Ойбодом.  
Ойқизларнинг ойпариси Ойбодом,  
Кунботардан куйиб ўтар Ойбодом* (Э.Шукур).

Ушбу парчада қофиядан кейин Ойбодом сўзининг такрорланиши Э. бўлиб, у жойлашиш ўрни жиҳатидан радифга ўхшайди. Бироқ

радиф бутун шеър давомида такрорланса, бу шеърда такрор бир банд давомидагина кузатилади. Шунга кўра, уни радиф эмас, Э. ҳисоблаш тўғрироқдир.

**ЭПОПЕЯ** (юн. *epoia*, яъни *epos* – ривоя, ҳикоя ва *poieo* – яратмоқ, ижод қилмоқ) – ҳажман йирик, асосига умумхалқ аҳамиятига молик проблематика кўйилган эпик асар. Э.нинг илк намуналари сифатида *қахрамонлик эпоси* (қ. *эпос*) кўрсатилади. Кейинроқ ўрта асрлар ва Уйғониш даврларидан қахрамонлик эпоси анъаналарининг давоми, уларга тақлид тарзида дунёга келган Э.лар ёзма адабиётда ҳам қарор топди (Вергилий. «Энеида»; Тассо. «Озод қилинган Иерусалим»; Вольтер. «Генриада»). Бадиий насрнинг, хусусан, романчиликнинг тараққий этиши баробарида, миллат ҳаётининг муҳим тарихий босқичини қаламга олиб, умумхалқ аҳамиятига молик муаммоларни бадиий идрок этишга қаратилган роман-Э.лар пайдо бўлди (Бальзак. «Инсон комедияси»; Л.Толстой. «Уруш ва тинчлик»; М.Горький. «Клим Самгиннинг ҳаёти»; М.Шолохов. «Тинч Дон» ва б.). Асосга кўйилган проблематикаси ва тасвир кўлами жиҳатидан ўзбек адабиётидаги «Қуллар» (С.Айний), тугалланмаган «Кеча ва кундуз» дилогияси (Чўлпон), «Навоий» (Ойбек) романларида ҳам Э.га хос айрим хусусиятлар кузатилади.

**ЭПОС** (юн. *epos* – ривоя, ҳикоя) – 1) бадиий адабиётнинг учта асосий туридан бири. Э.нинг специфик хусусияти – воқеабандлик, эпик асарда макон ва замонда кечувчи воқеа-ҳодисалар тасвирланади, сўз воситасида ўқувчи тасаввурида реаллик картиналарига монанд жонлана оладиган тўлақонли бадиий воқелик яратилади. Тасаввурда реалликдагига монанд, ўзининг ташқи шакли билан жонлангани учун ҳам Э.даги бадиий воқелик «пластик» тасвирланган деб айтилади. Э.да пластик элементлар билан бир қаторда нопластик элементлар (муаллиф мушоҳадалари, фикрлари, тасвир предмети-га ҳиссий муносабати ва ш.к.) ҳам мавжуд бўлиб, бу элементлар муаллиф образини тасаввур қилишда муҳим аҳамият касб этади. Улар, пластик унсурлардан фарқли ўлароқ, асарни ўқиш давомида ўқувчи тасаввурида жонланмайди. Э.да объектив ва субъектив ибтидоларнинг уйғун бирикиши кузатилади: асардаги бадиий воқелик объектив ибтидони, асарнинг ҳар бир нуқтасига сингдириб юборилган муаллиф шахси субъектив ибтидони ташкил этади. Бадиий воқеликнинг «объектив ибтидо» дейилишида шартлилик бор, чунки у реалликдан олинган оддийгина нусха эмас, балки воқеликнинг ижодкор кўзи билан кўрилган, идеал асосида идрок этилган, баҳоланган ва ижодий

қайта ишланган оксидир. Шундай экан, ҳатто «объектив тасвир» йўлидан борилиб, муаллиф имкон қадар ўзини четга олган асарларда ҳам муаллиф образи мавжуд бўлади. Демак, эпик асарларда бадиий воқелик билан бир қаторда нопластик муаллиф образи ҳам ҳар вақт мавжуддир.

Э.да макон ва замонда кечувчи воқеалар ровий (муаллиф, ҳикоячи-персонаж) томонидан ҳикоя қилинади. Шунга кўра, Э.да ривоя анъанавий равишда етакчи ўринни эгаллайди, унинг воситасида асарга диалог ҳамда тафсилотлар (пейзаж, портрет, нарис-буюмлар ва Ҳ.) олиб кирилади. Ривоя бу унсурларнинг барини яхлит бутунликка бирлаштиради. Э.нинг такомилли жараёнида ривоя салмоғининг камайиб бориши кузатилади. Ривожланиш жараёнида Э.да диалог ҳамда тафсилотларнинг салмоғи ва аҳамияти ортиб боради. Бу бадиий адабиётнинг бошқа санъат турлари билан алоқаси, уларга хос усул ва воситаларни ўзига сингдириши натижаси сифатида тушунилиши мумкин. Мас., театрнинг ривожи натижасида инсон характери-ни яратишнинг драматургик усуллари ишлаб чиқилди, сайқалланди; ўқувчи омма драматургик усулда яратилган инсон характери-ни англашга, диалоглар воситасида яратилаётган бадиий воқеликнинг моҳиятини тушунишга тайёрланди, яъни бадиий дид ривожланди. Шу асосда Э.га драматик унсурлар кириб келди. Айни пайтда, Э.даги диалог драмадаги диалогдан ўзининг ҳаётийлиги, маъно кўламининг кенглиги билан ажралиб туради. Чунки Э.да диалог амалга ошаётган конкрет ҳаётий ситуация, унда қатнашаётган персонажларнинг руҳий ҳолати, характер хусусиятлари ҳақида кенгрок тасаввур бериш имкониятлари мавжуд, персонаж диалогда айтаётган ҳар бир гап асар бутунлиги контекстида тушунилиши мумкин.

Э.да насрий (сочма) нутқ шакли етакчилик қилади. Шу билан бирга, шеърий йўлда ёзилган эпик асарлар ҳам анча кенг тарқалган. Мас., Б.Бойқобилонинг «Кун ва тун» шеърий қиссаси, Ҳ.Шариповнинг «Бир савол», Муҳаммад Алининг «Боқий дунё» шеърий романлари шеърий йўлда битилган эпик асарлардир. Демак, насрий йўлда ёзилганининг ўзи асарни Э.га мансуб этмайди, «насрий асар» ва «эпик асар» тушунчалари битта маънони англатмайди. Э.да «ўтмишда бўлиб ўтган» воқеалар қаламга олинади, зеро, замонда кечиб бўлган воқеаларгина ҳикоя қилиниши мумкин. Ҳатто олис келажак қаламга олинган фантастик асарларда ҳам муаллиф бўлиб ўтган воқеаларни ҳикоя қилади, ўқувчи гўё бўлиб ўтган воқеалар билан танишади. Демак, эпик асарда ёзувчи билан у тасвирлаётган

бадий воқелик, ўқувчи билан у тасаввурида қайта тиклаётган бадий воқелик орасида ҳамиша «мен – ўтмиш» тарзидаги вақт ҳисси мавжуддир. Агар драматик асарларда характерлараро конфликт, лирик асарларда ички конфликт (асардаги акси жиҳатидан) етакчилик қилса, Э.да конфликтнинг учала тури қоришиқ ҳолда намоён бўла олади.

Э.ни жанрларга ажратиш принциплари масаласида адабиётшуносликда турличалик мавжуд. Бунда бир қатор хусусиятларни эътиборга олиш зарур бўлади. Аввало, эпик асарлар ҳаётни қамраб олиш кўламига кўра фарқланади. Мас., эпик асар қаҳрамон ҳаётидан биргина эпизодни (ҳикоя), бутун бир этапни (қисса) ёхуд қаҳрамон ҳаётининг катта бир даврини (роман) қаламга олади. Шунга кўра, адабиётшуносликда катта, ўрта ва кичик эпик жанрлар ажратилади. Бироқ Э.га драманинг кириб келиши ва сюжет вақтининг қисқара бориши баробарида, бу тамойилнинг оживлиги аён бўлиб қолмоқда. Ҳозирги адабиётда қаҳрамон ҳаётининг катта бир даври эмас, атиги бир босқичи қаламга олинган романлар ҳам яратилмоқда (мас., «Кеча ва кундуз», «Улугбек хазинаси»). Табиийки, бундай ҳолатда эпик асарларни жанрларга ажратишда уларнинг бошқа жиҳатларига ҳам эътибор қаратиш зарур бўлади. Жумладан, асарда қўйилган муаммолар кўлами жанр хусусиятларини белгиловчи унсур сифатида олинishi мумкин. Бу жиҳатдан роман дунёю даврни билиш мақсадига қаратилган бўлса, қисса марказида қаҳрамон характери, ҳикояда эса конкрет ҳаётий воқеа туради. Кўринадики, роман, қисса, ҳикоя жанрларига мансуб асар қаҳрамонлари асарда тутган мавқеи, аҳамияти, вазифаси жиҳатидан фарқланади. Роман муаллифи учун қаҳрамон – восита, дунёни англаш (буниси мақсад) воситаси, қиссанавис учун қаҳрамоннинг ўзи мақсад (воқеа-ҳодисалар восита), ҳикоянавис учун воқеанинг ўзи мақсад бўлиб қолади. Э.ни жанрларга ажратишда ҳажм ҳам мезон бўлолмайди. Зеро, айрим ҳикоя ёки романлар ҳажман қиссаларга яқин бўлиши ва аксинча ҳолатлар кузатилиши мумкин. Бироқ, одатан, ҳикоя, қисса ва романлар ҳажми санокдаги тартибга мос тарзда каттариб бориши ҳам инкор қилиб бўлмайдиган ҳақиқатдир. Э. жанрлари бадий шакл хусусиятлари билан ҳам фарқланади. Мас., сюжет нуқтаи назаридан олинса, роман кўп чизиқли мураккаб сюжетга эгаллиги, қисса сюжети, асосан, бош қаҳрамон теварагида уюшиши, ҳикоя сюжети, одатда, битта ёки бир-бирига узвий боғлиқ бир неча воқеа асосига қурилиши кузатилади.

Ҳикоя, қисса ва роман Э.нинг асосий жанрлари саналади. Шу билан бирга, эпик турнинг асосий бўлмаган қатор жанрлари ҳам мавжуд. Уларни ҳаётни бадий қамраш кўлами жиҳатидан қуйидаги тартибда таснифлаш мумкин: а) кичик эпик шакллар: латифа, масал, ҳикоят, ривоят, эртақ, афсона, бадиа, этюд, очерк, эссе; б) ўрта эпик шакллар: қисса (повесть); в) халқ эпоси, эпик дoston, роман, эпопея.

Мазкур таснифга айрим изоҳларни киритиб ўтиш зарур. Мас., бадиа, этюд, очерк кабилар соф бадий проза намунаси бўлмай, бадий-публицистик жанрлардир. Ҳозирги адабиётда оммалашиб бораётган эссе жанри, биринчидан, бадий-публицистик характерга эгаллиги, иккинчидан, ҳажм эътибори билан турлича кўринишларга (кичик ҳикоя шаклидан то катта роман шаклигача) эгаллиги билан характерланади. Мас., Х.Давроннинг «Бибихоним қиссаси ёхуд тугамаган дoston», Б.Аҳмедовнинг «Мирзо Улугбек» асарлари моҳиятан эссе, бироқ улар ҳажм эътибори билан кескин фарқланади. Ёки айрим тадқиқотчилар масални лиро-эпик жанрга мансуб ҳисоблаб, бунда қиссадан чиқарилган ҳиссани лирик ибтидо сифатида қабул қиладилар. Ҳолбуки, ҳар қандай масалда воқеа (жуда қисқа бўлса ҳам) ҳикоя қилиниши эътиборга олинса, уни эпик асар санаш керак. Акс ҳолда, воқеабанд шеърларни ҳам, чиқарилаётган хулоса очикроқ ифодаланган эпик асарларни ҳам лиро-эпик турга мансуб этишга тўғри келар эди. Шунга ўхшаш ҳолат «дoston» жанри лирикага ҳам, Э.га ҳам тааллуқли бўла олади, шу сабаб «лирик дoston», «эпик дoston», «лиро-эпик дoston» сингари жанр атамалари қўлланилади, бунда конкрет дostonни у ёки бу турга мансуб этиш учун ундаги эпик ва лирик унсурлар салмоғи асосга олинади; 2) тор маъносида халқ оғзаки ижодидаги шеърый ёки насрий йўлда яратилган воқеабанд асар; халқ Э.и, қаҳрамонлик Э.и терминлари билан ҳам юритилади. Гарчи қаҳрамонлик Э.и ва халқ Э.и терминлари синоним сифатида ишлатилса ҳам, назарда тутилаётган маънога халқ Э.и термини мувофиқроқ. Чунки бу ҳолда халқ Э.и термини қаҳрамонлик Э.и, романик Э., тарихий Э., жангнома ва ҳ. жанр кўринишларини ҳам қамраб олади. Халқ Э.и таркибидаги мазкур жанр кўринишларининг ҳар бири ўзига хос специфик белгиларга эга. Халқ Э. уни яратган халқнинг қаҳрамонона ўтмиши, юрт тақдиридаги муҳим воқеалар, қаҳрамонларнинг эл-юрти учун фидокорона кураши ҳақида ҳикоя қилади, халқ (маданияти, маиший турмуши, ижтимоий-сиёсий ҳаёти, эътиқоди, урф-одатлари ва ҳ.) ҳаётининг муайян даврдаги яхлит манзарасини тасвирлайди. Халқ Э.ининг илдизлари

жуда қадим замонларга бориб тақалади: «Гильгамеш», «Илиада», «Одиссея», «Рамаяна», «Маҳабхорат», «Алпомиш», «Манас» сингари Э.ларнинг ёши мингйилликлар билан ўлчанади. Саналганлар каби йирик ҳажмли асарлар билан бир қаторда халқ Э.и нисбатан кичик ҳажмли шаклларда (тарихий кўшиқ, балладалар, билина, достон) ҳам мавжуд бўлиб, улар муайян туркумга бирлашади ва бу нарса эпик кўламдорликни таъминлайди. Мас., «Гўрўгли» туркум достонлари, Илья Муромец ҳақидаги билиналар, Роланд ҳақидаги кўшиқлар ва Ҳ.

**ЭРКИН ШЕЪР** (русчадан калька: «вольный стих») – рус шеърия-тидаги силлабо-тоник шеър тизими асосида пайдо бўлган, мисраларидаги стопалар сони бир хил бўлмаган шеър шакли. Э.ш.да барча стопалар бир хил (ямб) бўлгани ҳолда, уларнинг мисралардаги сони бир хил эмас, яъни шеър бошидан-охирига қадар битта ўлчовда ёзилмаган, унда изометрия ҳодисаси кузатилмайди. Кейинча аналогия асосида мисралардаги *хорей* ёки *анапест* стопалари (қ. *стопа*) сони турлича бўлган шеърлар ҳам Э.ш. деб аталган. Рус шеършунослигида бир-биридан фарқланувчи шеър шаклини билдирувчи «вольный стих» ва «свободный стих» бирикмаларидаги «вольный» ва «свободный» аниқловчилари ўзбек тилига бир хил – «эркин» сўзи билан таржима қилиниши сабабдир, манбаларда ва амалиётда Э.ш. термини кўпинча *верлибр* ва *сарбаст*га синоним тарзда ишлатилади. Бироқ бу тўғри эмас (қиёсланг: *верлибр*, *сарбаст*). Ўзбек шеъриятида Э.ш. бармоқ асосида шаклланган бўлиб, XX асрнинг 20 – 30-йилларидан оммалашди. Э.ш.га хос хусусият шуки, унда мисралардаги бўгинлар сони, уларнинг ўзаро қофияланиши қатъий тартибда эмас, бироқ шеър давомида ўлчовда тенг ва ўзаро қофиядош мисралар эркин тарзда такрорланади. Худди шу жиҳати уни бармоққа яқинлаштиради. Яъни рус силлабо-тоник шеърияти негизида пайдо бўлган Э.ш. (*вольный стих*) ўзида силлабо-тоник шеърга хос белгилар (стопалар)ни сақлаб қолгани каби, ўзбек Э.ш.и ҳам ўзида бармоққа хос айрим хусусиятларни сақлайди. Мас.,

<i>Алкоголь</i>		а	
<i>бизнинг қонларга</i>	3+5		б
<i>ва рўзгорларга,</i>	5		б
<i>дин аҳкомлари,</i>	5		в
<i>феодал арконлари,</i>	7		в
<i>капитал қонунлари-ла,</i>	3+5		б
<i>урф-одатларга</i>			б

<i>уйланиб,</i>	5+3		г	
<i>ичкуёв,</i>	3			д
<i>яъни ёв</i>				д
<i>бўлиб</i>	3+2		г	
<i>қирмишдир.</i>	3			е
<i>Алкоголь –</i>	3	а		
<i>бизлар қул,</i>	4			ж
<i>руҳан тушқун,</i>	4			з
<i>ўзван тутқун,</i>	4			з
<i>ризқимиз жигархун,</i>	6			з
<i>ҳаёт хумори – банг</i>	6			и
<i>бўлганда,</i>	3	б		
<i>нозли бир бузук,</i>	5			й
<i>созли бир сатанг,</i>	5			и
<i>инжиқ бир келин</i>				з
<i>сингари,</i>	5+3		в	
<i>ўз ҳукмин ўтқазиб,</i>	6		г	
<i>маишат – чимилдиққа</i>	7		б	
<i>қирмишдир.</i>	3			е

Ғ.Ғулумнинг «Алкоголь» шеърдан олинган бу парчада 3, 4, 5 ва 6 бўгинли туроқлар қатъий эмас, эркин тарзда такрорланади, шундай эркинлик мисраларнинг қофияланишида ҳам кузатилади.

**ЭРТАК** – халқ оғзаки ижодидаги эпик жанр, чўпчак. Э. барча халқлар оғзаки ижодида қадимдан шаклланган ва фаол жанрлардан саналади. Э.лар, асосан, насрда яратилиб, сюжети асосида сеҳрли-фантастик, саргузашт ёки маиший характердаги воқеалар ётади, воқеалар баёни ва талқинда ижодий фантазия, тўқима салмоқли ўрин тутади. Шунинг учун эртақчилар томонидан ҳикоя «илинган Э. тингловчилар томонидан, аввало, эртақ деб, ижодий фантазия маҳсули деб қабул қилинади. Бироқ бу Э.лар воқелик билан алоқасини тамомила узган дегани эмас, Э.ларда (айниқса, маиший Э.ларда) реаллик билан алоқа яққол кўзга ташланади. Қадимийлиги туфайли Э.ларда аждодларимизга хос мифологик тафаккур элементлари, тотемизм, анимизм қолдиқлари сақланиб қолган. Мазкур ҳол сеҳрли Э.лар билан ҳайвонлар ҳақидаги Э.ларда кўпроқ сезиладики, бу уларнинг нисбатан қадимийроқ эканлигининг далолатидир. Кишилиқ жамияти тараққиёти баробарида Э.лар ҳам сифат жиҳатидан ўзгариб боради: ҳаётий тажриба ва кузатишларга

асосланган маиший мавзудаги Э.лар кенгроқ ўрин эгаллай бошлайди, сеҳр-жодудан деярли фориғ саргузашт-авантюр сюжетли Э.лар яратилади, ҳайвонлар ҳақидаги Э.ларнинг *тотемистик* ва *анимистик* мазмун йўналиши мажозийлик билан алмашади ва ҳ. Хуллас, Э. жанри тараққиётида ҳаётга яқинлашиб бориш тенденцияси кузатилади: уларда ижтимоий ҳаётнинг турли қирралари, мураккаб ижтимоий муносабатлар, ота-боболарнинг ижтимоий идеаллари акс этади. Фаол ва кенг оммалашган жанр сифатида Э.лар кишилик жамиятида улкан тарбиявий миссияни ўтагани шубҳасиздир. Кўплаб ижодкорлар (мас., А.Пушкин, Ҳ.Олимжон) дилларида сўз санъатига меҳр болалиқда эшитган Э.лар туфайли тугилганини эътироф этадиларки, ёзма адабиётда жанрга хос унсурлардан кенг фойдаланилиши, адабий Э.нинг турли кўринишлари мавжудлиги шундан. Ҳ.Андерсен, Ш.Перро, ака-ука Гриммлар, А.Пушкин каби ёзувчилар яратган *адабий* Э.лар жаҳон миқёсида шуҳрат топган. Ўзбек адабиётида Ғ.Фуллом, Ҳ.Олимжон, А.Мухтор ижодида адабий Э.нинг яхши намуналари бор.

**ЭССЕ** (фр. *essai* – тажриба, синаб кўриш) – муаллифнинг у ёки бу масала (муайян воқеа-ҳодиса, ҳаётий ҳолат ва ш.к.) бўйича шахсий мулоҳазалари баён қилинувчи насрий асар; адабий жанр. Э.нинг композицион қурилишига ҳам, тематик томонига ҳам чекловлар қўйилган эмас, у муаллифга ўз фикр-мулоҳазалари, кечинмаларини том маънода эркин ифодалаш имконини беради. Тематик жиҳатдан тарихий, биографик, адабий-танқидий, илмий-оммабон ва ш.к. кўринишларга эга бўлган Э.га хос яна бир хусусият шуки, у қўйилган масаланинг тугал ечимини тақдим этиш даъвосини қилмайди, масала муаллиф ҳаётий тажрибасидан келиб чиққан ҳолда, унинг онгию қалбидан ўтказиб ёритилади. Шу боис Э. марказида муаллиф шахси туради, баён кўзга яққол ташланувчи субъектив бўёқдорликка эга бўлади. Мутахассислар Э.нинг мустақил адабий жанр сифатида шаклланиши XVI асрга тўғри келади деб ҳисоблайдилар ва буни француз адиби М.Монтень (1533 – 1592) фаолияти билан, жанрнинг номи эса унинг 1580 йили чоп этилган «Essays» (Тажрибалар) асари билан боғлайдилар. Аини чоғда, Э.га хос элементлар бунга қадар ҳам бўлгани, жумладан, уларни антик давр адиби Лукиан нутқларида кузатиш мумкинлигини таъкидлайдилар. Э.га хос хусусиятлар Шарқ адабиётида, хусусан, ўзбек адабиётида ҳам қадимдан мавжуд (мас., Навоий. «Маҳбуб ул-қулуб»). Шуни ҳам қайд этиш жоизки, Э. табиатида хос эркинлик унинг ривожига нафақат профессионал ёзувчилар,

балки бошқа соҳа кишилари (олимлар, файласуфлар ва б.)нинг ҳам сезиларли ҳисса қўшишига имкон берди. Э.га хос хусусиятлар сўнги давр адабиётидаги бошқа жанрлар структурасига ҳам сезиларли таъсир этди, айрим йўналишларнинг эса (мас., *постмодернизм*) устувор белгиларидан бирига айланди. Ҳозирги ўзбек адабиётида Ш.Холмирзаев, О.Мухтор, Х.Даврон, Х.Султонов каби ижодкорлар, шунингдек, М.Кўшжонов, О.Шарафиддинов, У.Норматов, Н.Каримов каби адабиётшуносларнинг Э. жанридаги асарлари китобхонлар орасида машҳур.

# Ю

**ЮМОР** (ингл. *humour* – кайфият, мойиллик) – 1) комиклик турларидан бири. Бадиий асарда кишилар, воқеа-ҳодисалар устидан енгил, дўстона, бегараз кулиш. Ю.да кулгилик очик-ошкора намоён бўлади, аммо ошкор кулги остида енгил-еппи ҳазил, кўнгилхушлик мақсади эмас, жиддийлик мавжуд. Ю. ўз объектида қисман бўлсада идеалга мувофиқ жиҳатларни кўради, уни мукамаллаштириш, нуқсонларини бартараф қилиш, ундаги умуминсоний қимматга молик жиҳатларни юзага чиқариш мақсадини кўзлайди. Шунинг учун Ю.да танқид руҳи, нуқсонлар устидан кулиш билан бирга хайрихоҳлик, ачиниш ҳам мавжуд. Ю.нинг қатъий чегараларини белгилаш ниҳоятда мушкул, шу боис у кўпинча комикликнинг *сатира, киноя, сарказм* (қ.) каби кўринишлари билан қиёсан тушунтирилади. Жумладан, манбаларда Ю.нинг, сатирадан фарқли ўлароқ, объектни тўла эмас, балки унинг айрим жиҳатларинигина инкор қилиши таъкидланади. Ю.да кулги ниқоби остида жиддийлик, кинояда эса жиддийлик ниқоби остида кулги яширинган бўлади. Шу қарашлардан келиб чиқиб баъзан объектга нисбатан хайрихоҳ муносабатни Ю.нинг белгиловчи хусусияти сифатида кўрсатиш ҳоллари ҳам бор. Бироқ бу қарашга тўла қўшилиб бўлмайди, чунки Ю.нинг эмоционал диапозони гоятда кенг бўлиб, у шафқат ва ҳамдардликдан (Ғ.Ғулом. «Менинг ўғригина болам») тортиб шафқатсиз (А.Қаҳҳор. «Бошсиз одам»), ҳатто «қора юмор»гача қамраб олади. Сарказм, закийлик, карикатура каби комиклик кўринишларидан фарқли равишда, Ю. ва сатира асар пафоси даражасига кўтарилиши мумкин. Ю.га пафос кўриниши сифатида қаралганда унинг идеалга бутунлай зид бўлмаган объектга қаратилган бўлиши (Ғ.Поспелов) назарда тутилади. Агар юмористик пафос объектга маънавий-ахлоқий мавқедан ёндашса, сатирик пафос объектнинг ижтимоий мавқедан туриб инкор қилинишини кўзда тутлади. XX аср жаҳон адабиётида Ю.даги хайрихоҳлик, асосан, сақланиб қолгани ҳолда, ачиниш туйғуси сусайиб боргани ку-

затилади. Мазкур ҳол, айниқса, модернистик ва постмодернистик адабиётларда яққол кўзга ташланадики, уларда «қора юмор» устуворроқ мавқе тутлади. Бу эса уларнинг дунёқарашидан келиб чиқувчи объектни ўзгартириш, тузатиш имконларига ишонмаслик, бунга умидсиз қараш натижасидир; 2) бадиийлик модуси. Ю.га хос «мен – оламда» концепциясига кўра, қаҳрамон ижро этаётган роль унинг тақдири ёки бурчи эмас, балки бир ниқоб, холос. Юмористик модусдаги энг олий қадрият – индивидуаллик, фақат бу индивидуаллик қаҳрамон муттасил алмаштириб турувчи ниқоб ортида қолиб кетади. Юморист ўз вазифасини ниқоб ортидаги моҳиятни, индивидуалликни кўриш ва кўрсатишда деб билади. Муҳими, бошқа модуслардаги каби қаҳрамон юморист учун ҳам ўзини англаш объекти, яъни муаллиф қаҳрамон (унинг ўз ниқобига мос далли-девова қилиқ-ҳаракатлари) орқали ниқобдан халос бўлиш йўлини «яшаб ўтади». Худди шу йўлни асарни қабул қилиш жараёнида ўқувчи ҳам босиб ўтадики, шу жиҳатдан субъект – объект – ўқувчи бирлиги ҳақида, демак, бадиийлик модуси ҳақида гапириш мумкин бўлади. Мас., Э.Воҳидовнинг «Донишқишлоқ латифалари» туркумига кирган шеърларнинг ҳар бири – Матмусанинг турли ҳаётий ҳолатлардаги «ниқоб»лари. Бу воқеалар – Матмусанинг ўзини намоён этиш, нималарга қодирлигини кўрсатиб қўйиш, мавжудлигини тасдиқлаш йўлидаги хатти-ҳаракатлари. Лекин мазкур хатти-ҳаракатларда кўп номувофиқликлар (мақсад билан имкон, мақсад билан восита, даъво билан реаллик ва ҳ.) кузатиладики, қачонки қаҳрамон шуни англа-са, ниқобдан халос бўлиши ва ўзлигига қайтиши мумкин. Э.Воҳидов латифаларида Матмуса доим ҳам ниқобдан халос бўлмайди. Лекин шоир ниқобдан халос бўлиш заруратини англади, яъни Матмуса эплай олмаган ишни китобхон удаллашига умид қилади. Шу асосда туркумни ўқиш жараёнида субъект – объект – ўқувчи бирлиги таъминланади, «Донишқишлоқ латифалари» яхлит ҳолда юмористик бадиийлик модусига тааллуқли бўлади.

## Я

**«ЯНГИ РОМАН»** – XX асрнинг 50-йилларида майдонга чиққан бир қатор француз ёзувчилари (Н.Саррот, А.Роб Грийе ва б.)нинг роман бобидаги экспериментал изланишларига хос хусусиятларни англатувчи шартли термин. Я.р. тарафдорлари анъанавий проза ўз имкониятларини тўла сарф этиб бўлган деб ҳисоблаб, янгича ривоя йўсинини ишлаб чиқишга ҳаракат қилганлар. Я.р. намояндаларининг қарашлари «инсон ўлими» фалсафасига (А.Фуко) ҳамоҳанг: улар шахс тушунчасининг ўзи эскирган, шунинг учун уни анъанавий прозадаги каби марказга қўйиб тасвирлаш, анъанавий тарзда бадиий талқин қилишни ноўрин билиб, қаҳрамонсиз ва воқеабанд сюжетсиз романлар яратишни тажриба қиладилар. Анъанавий роман, умуман, эпосга хос мазкур энг муҳим унсурлар Я.р. намояндалари тажрибаларида ташқи дунёдаги нарсаларнинг холис ва бўртиқ тасвири, онгости қатламларидаги сирли эврилишлар, мозаика қонунияти асосида бутунликка бирикувчи фикр-кечинмалар билан алмаштирилади, ривоя кўпроқ эссега хос хусусиятлар касб этади.

## Ў

**ЎЗЛАШТИРИШ** – адабий алоқанинг кўринишларидан бири, адабий таъсирнинг натижаси; ижодкорнинг адабиётда ўзига қадар мавжуд бўлган сюжет, образ, гоя ва ш.к.ларни истифода этиши. Адабий жараёнда Ў. англанган ё англанмаган тарзда воқе бўлиши мумкин. Биринчи ҳолда ижодкор аввал яратилган асардан Ў.га чоғланаркан, салафи билан ижодий мусобақага киришади, натижада ўзлаштирилган сюжет, образ ва ш.к.ларнинг янгича ва ўзига хос бадиий талқини вужудга келтади. Мас., А.Навоий онгли равишда «Низомий панжасига панжа урган»и, ҳазратнинг Низомий билан ижодий мусобақага киришиш нияти, асарининг устози яратган дostonдан қайси жиҳатлари билан фарқ қилиши «Фарҳод ва Ширин» дostonи дебوحасида аниқ-равшан ифодаланган. Айтиш керакки, А.Навоий амал қилган ижодий ёндашувгина Ў.нинг адабий жараёнда ижобий ҳодиса бўлишини, пировард натижада бадиий тафаккур ривожига самарали таъсир кўрсатишини таъминлайди. Бадиий ижод амалиётида анча кенг учрайдиган англанмаган тарзда воқе бўлувчи Ў.нинг омиллари турлича бўлиб, асосийларидан бири сифатида таъсирланиш кўрсатилиши мумкин. Ижодкор қачондир ўқиган асардаги воқеа, ҳолат, ифода ва ш.к.лардан кучли таъсирланиши мумкинки, вақт ўтиб ўша воқеа, ҳолат, ифода ва ш.к.ларнинг ўзи унутилса-да, таассурот унинг онгости қатламларида чуқур из қолдирган, бас, у вақти келиб ижод жараёнида онгости қатламларидан қалқиб чиқиши ва беихтиёр асарда ақс этиши ҳам мумкин. Шу йўсин воқе бўлган Ў.лар, мас., Навоий шеърларидаги оҳанг, руҳ, ташбеҳу тамсиллар, лирик ҳолатлар Бобурдан тортиб ҳозирги ғазалчиликка қадар кузатилиши мумкин. Мазкур ҳол, умуман, Ў.лар адабий ҳодисаларнинг, қайси замон ва маконга мансублигидан қатъи назар, бир-бири билан диалогик алоқада мавжуд эканини ёрқин намоён этади.

Ў. қамрови ниҳоятда кенг тушунча бўлиб, у турлича кўриниш ва турли даражада намоён бўлади: *тақлид* (қ.), *стилизация* (қ.), *пародия* (қ.), *реминисценция* (қ.), *парафраза* (қ.) каби. Умуман олганда, Ў. адабий жараёнда қонуният мақомида мавжуд бўлган ижобий ҳодиса ва шу маънода уни кўр-кўрона тақлиддан, *плагиат* (қ.), *эпигонлик* (қ.) кабилардан фарқламоқ зарурдир. Шунингдек, Ў. билан миллий адабиётлар орасидаги типологик ўхшашликларни фарқлаш керак. Мас., Европа маърифатчилиқ адабиёти билан жаҳид адабиёти орасида мавзу, гоё, образ, бадиий шакл кабиларда кузатилувчи ўхшашликлар адабий алоқа ва таъсир (гарчи бунга тўла инкор қилиб бўлмас ҳам) натижаси эмас, балки уларни келтириб чиқарган ижтимоий-тарихий, маданий-маърифий омилларнинг ўхшашлиги билан изоҳланади. Ёки 80-йиллар ўзбек насрида бўй кўрсатган «ортиқча одам», «кичкина одам» каби персонаж типларини ҳам XIX аср рус адабиётидан Ў. дейиш унчалик тўғри эмас, чунки давр ижтимоий воқелигининг ўзида шундай шахс типлари бўлган ва адабиёт уларни акс эттирган.

**ЎХШАТИШ** – тасвир объектини бошқа нарса-ҳодисага ўхшатиш орқали ёрқин ва бўрттириб тасвирлашга асосланган бадиий тасвир воситаси бўлиб, бунда ўхшатилаётган нарса-ҳодисалар учун умумий белги-хусусиятларга таянилади. Айрим адабиётларда Ў. кўчимнинг содда тури деб ҳам юритилади. Бироқ бу унчалик тўғри эмас. Чунки Ў. да маъно кўчиши кузатилмайди, унда, маъно кўчишининг ўхшатиш асосидаги тури бўлмиш метафорадан фарқли ўлароқ, ўхшатилаётган нарса ҳам, ўхшаётган нарса ҳам матнда сўз билан ифода этилади. Мас., қиёсланг: «Камондек қошлари киприкларидан ўқ отар доим» – «Бағрим нишон айлар икки камонинг». Иккала мисрада ҳам қош камон (ёй)га ўхшатишмоқда, бироқ биринчи мисолда ўхшатилаётган нарса (қош) ҳам, ўхшаётган нарса (камон) ҳам матнда бор, иккинчи мисолда ўхшатилаётган нарса тушириб қолдирилган ва у ўхшаётган нарса номи билан аталган. Яъни биринчи мисол ўхшатиш бўлса, иккинчиси метафора (истиора)дир. Аксарият ҳолларда Ў. турли грамматик воситалар: -дек (-дай) кўшимчаси ёки «гўё», «каби», «худди», «мисли», «мисоли», «янглиғ», «бамисоли» каби кўмакчилар воситасида амалга ошади. Шу билан бирга, Ў. грамматик воситаларсиз амалга ошган ҳоллар ҳам тез-тез кузатилади. Мас., «Муҳаббат – чиройли капалак...», «Умр – қумсоат ҳам яримлаб қолди» (Ш.Раҳмон). Мумтоз адабиётшунослиқда Ў. *ташбех* деб юритилади ва у шеъриятда жуда кенг қўллангани боис, илми бадиёда муфассал ишланган санъатлардан саналади (қ. *ташбех*).

**ЎТА ЧЎЗИҚ ҲИЖО** – қаранг: **ҳижо**

## Қ

**ҚАЙД** (ар. *قيد* – банд, боғланган) – қаранг: **муқайяд қофия**

**ҚАЛБ** (ар. *قلب* – тескари қилмоқ, ағдармоқ) – мумтоз адабиётдаги шеърий санъат, сўзни чаппасига ўқиса ҳам маъно чиқадиган тарзда қўллаш, жумлага шу тарзда тартиб бериш; Ғарб адабиётшунослигида *паллиндром* (қ.) деб юритилади. Қ.нинг бир қатор кўринишлари фарқланади: 1) *мақлуб-и кулл* – бунда байтдаги сўз (ёки жумла)нинг ҳарфлари, уларнинг тартиби ва миқдорини ўзгартирмаган ҳолда чаппасига ўқилса, бошқа бир сўз қелиб чиқади: роз – зор, кўй – йўк, лўқ қилгай – ёғлиқ қўл; 2) *мақлуб-и баъъ* – сўз (ёки жумла) таркибидаги ҳарфлар ўрнини қисман ўзгартриб чаппа ўқилса, бошқа бир сўз қелиб чиқади: қарам – қамар, қамар – рақам; 3) *мақлуб-и мужаннаҳ* – бунда *мақлуб-и кулл* талабпарига жавоб берадиган сўзлардан бири мисра (ёки байт) бошида, иккинчиси мисра (ёки байт)нинг охирида жойлашади; 4) *мақлуб-и муставий* – бунда бутун бошли ибора чаппасига ўқилганда, шу иборанинг ўзи ҳосил бўлади. Қ.нинг ушбу нави турли даражада (мисранинг бир қисми, мисра ёки байт доирасида) воқе бўлиши мумкин.

Бу ўринда Қ. санъати араб имлоси қоидалари асосида амалга ошгани, ҳозирги ёзувда мазкур санъат қўлланган ўринларни илғаб олиш қийинлигини ҳам ёдда тутиш лозим.

**ҚАРИБ** (ар. *قريب* – яқин) – аруз бахрларидан бири, музорий бахрига яқин бўлгани учун шундай номланган. Манбаларда бу бахрни Юсуф Нишопурий кашф этгани айтилади. 2 та *мафойилун* (v --- / v ---) ва 1 та *фоилотун* (-v ---) аслларининг такроридан ҳосил бўлади. Қ. бахри араб шеъриятига хос бўлиб, ўзбек шеъриятида қўлланмаган. Навоийнинг «Мезон ул-авзон» асарида ҳам, Бобурнинг «Мухтасар»ида ҳам *қариби мусаддаси солим* (v --- / v ---) вазнига:

*Жамолингадин қуёш асру бор уётлик,  
Сочингга банда боғ ичра сунбул отлик, –*



байти мисол сифатида келтирилган. Бундан ташқари, Бобур мазкур баҳрнинг яна ўн уч вазнига махсус мисол сифатида байтлар битган. Мас.:

*Қаро кўзум, бериға кел карам этгил,  
Мени висол бирла муҳтарам этгил, –*

байти қариби мусаддаси мақбузи махбун (v – v – / v – v – / v v – –) вазнида ёзилган.

**ҚАСИДА** (ар. قصيده – мақсад, ният қилиш) – мумтоз лирикадаги жанр; бирор шахс (шоҳ, арбоб, қахрамон), бирор муҳим воқеа, табиат ва ш.к.ларни мадҳ этиш, уларнинг юксак фазилат ва хусусиятларини эътироф этиш мақсадида ёзиладиган шеър. Қ. газал типига (а-а, б-а, в-а...) қофияланади, лекин ундан фарқли ўлароқ ҳажм жиҳатидан чекланмаган бўлиб, унда тахаллус келтириш шарт ҳисобланмайди. Кимнидир ёки ниманидир мадҳ этиш мақсади устувор бўлгани учун, Қ., одатда, кўтаринки, тантанавор услубда, баланд пардаларда ёзилади. Мумтоз шеърятда Қ.нинг композициясига қўйилувчи талаблар ишлаб чиқилган. Унга кўра, Қ. кириш (*насиб* ёки *ташбиб*), таъриф жойи, объектнинг баёни (*гузиргоҳ*), мадҳ ва мамдуҳ (мақталувчи) ҳақиға дуо ва шоир нияти (*қасд*) каби қисмлардан иборат бўлади. Агар Қ.да кириш қисми бўлмаса, маҳдуд деб аталади. Шарқ мумтоз шеърятини Носир Хисрав, Унсурий, Анварий, Хоқоний, Дақиқий, Рудакий, Сақкокий, Лутфий, Жомий, Гадоий, Навоий, Мунис, Комил каби шоирлар ижодида Қ. жанрининг яхши намуналари бор. Мумтоз адабиётда Қ.лар, асосан, ўша давр ҳукмдорлари, подшоҳларнинг мадҳига бағишланган. Шоир бирор шахсни ёки жойни мадҳ этар экан, ўзига хос муболағали ташбеҳлар қўллашга уринади. Мас., Навоийнинг Хусайн Бойқаро мадҳига бағишланган «Ҳилолия» қасидасида шундай мисралар бор:

*Шоҳлар шоҳи демай, ул шоҳларнинг шоҳиким,  
Ҳар бири юз шоҳлар шоҳича тутқай мукнатин.*

Яъни «Уни (яъни Хусайн Бойқарони) шоҳлар шоҳи демайман, чунки (у) ҳар бири юз шоҳларнинг шоҳи бўлган шоҳларнинг шоҳидир. (Унинг) юксаклиги шу даражадаки, ҳар бири юз шоҳга шоҳ бўлган шоҳларнинг ҳар бири (унга) ўз мукнати, яъни бор давлатини, бойлигини тутайди, оёғининг остига келтириб ташлайди». Қ.ни даст-

лаб икки турга бўлишган: 1) ортиқча мақтов, дабдабалардан холи бўлган фалсафий мазмундаги Қ.лар. Қ.нинг бу тури дастлаб араб адабиётида пайдо бўлган; 2) Қ.и *маснуъ* – ўзига хос безакларга эга бўлган, санъат даражасидаги Қ.лар. Шунингдек, айрим манбаларда Қ.лар мазмунига кўра Қ.и *бахория*, Қ.и *мадҳия*, Қ.и *фаҳрия*, Қ.и *хазония*, Қ.и *ҳажвия*, Қ.и *ҳолия*, Қ.и *ишқия*, Қ.и *хамрия* каби турларга ҳам ажратилган. Янги давр шеърятини ҳам, жумладан, Чархий, Чустий, Ҳабибий, Улфат, Э.Воҳидов каби шоирлар ижодида Қ. жанрида ёзилган асарлар учрайди. Хусусан, Эркин Воҳидовнинг машҳур «Ўзбегим», «Инсон», «Қўллар» каби Қ.лари катта шухрат қозонган.

**ҚАҲРАМОН, АДАБИЙ ҚАҲРАМОН** – 1) асар персонажлари тизимида етакчи мавқеа тутиб, гоёвий-бадий концепцияни шакллантириш ва ифодалашда муҳим роль ўйнавчи шахс образи. Терминни бу маънода тушуниш эпик ёки драматик асар персонажларини даражалашни кўзда тутаяди: сюжет воқеалари Қ. атрофида уюштирилиб, бошқа персонажлар у билан боғлиқ ҳолда асар воқелигига киритилади; улар Қ. билан интегратив алоқада (ҳоким-тобе) бўлиб, унга нисбатан ёрдамчи функцияларни бажаради. Кўп қизиқли мураккаб сюжет қурилишига эга йирик ҳажмли асарларда бир эмас, бир нечта Қ. ҳаракатланиши ҳам мумкин. Бу ҳолда персонажлар системаси ўз ичига микросистемаларга ажралиб, уларнинг марказида Қ.лардан бири туради. Мас., «Кеча» романининг бошланишида шундай микросистемалар иккита: бирининг марказида Зеби, иккинчисининг марказида Акбарали туради. Воқеалар ривожини давомида Зеби микросистемаси емирилиб, унинг ўзи Акбарали микросистемасининг элементига айланади, Мирёқуб ва Раззоқ сўфилар эса янги микросистемани ташкил қилади. Бундан аён бўладики, «Кеча»да тўртта Қ. бор: Зеби, Акбарали, Мирёқуб ва Раззоқ сўфи. Ўз навбатида, бу Қ.лар ҳам асар сюжет-композицион қурилишидаги ўрни ва муаллиф концепциясини ифодалашдаги аҳамияти нуқтаи назаридан даражаланиши, бош ва иккинчи даражали Қ.ларга ажратилиши мумкин: романининг сюжет-композицион қурилиши нуқтаи назаридан Зеби бош Қ. бўлса, бадий концепциясини бутлаш ва ифодалашдаги роли нуқтаи назаридан Мирёқуб бош Қ.дир. Кичик ҳажмли эпик асарларда (ҳикоя ва аксарият қиссаларда), одатда, битта Қ. ҳаракатланади. Бироқ бунга қатъий қоида деб қарамаслик керак, ундан чекинган ҳолатлар ҳам кўп бўлиши учрайди. Мас., тасвирланаётган ҳаётнинг ўзи етакчи эстетик аҳамият касб этган «Анор» (А.Қаҳҳор) ҳикоясида Туробжон ҳам, унинг хотини ҳам бирдек Қ. саналиши мумкин.

Қ. фақат эстетик категориягина бўлмай, этик категория ҳамдир. Шунинг учун адабиётшунослиқда *ижобий Қ.*, *салбий Қ.* тушунчалари ҳам фарқланади. Гарчи сўнгги йилларда адабий Қ.ларни бу тарзда таснифлаш танқид остига өлиниб, унга адабиётни жўнлаштириш деб қаралаётган бўлса ҳам, тасвир предметиға муаллиф муносабати мавжуд экан, бу қонуний ҳодиса бўлиб қолаверади. Фақат бу ўринда битта муҳим шарт бор: ижобий ёки салбий Қ.ға аввалдан шаклланган симпатия ёки антипатия асосида муносабатда бўлмай, унга, аввало, эстетик ҳодиса сифатида ёндашиш зарур. Бу шарт бажарилмаган ҳолда ўқувчи бадиий воқеликни Қ.лардан бири ёки нари борса ровий нигоҳи билангина кўрадики, натижада ўқиш жараёни ижодийликдан Мосуво бўлади. Адабиётшунослиқда *аксилқаҳрамон* (қ) тушунчасининг мавжудлиги Қ. эстетик категориягина бўлмай, этик категория ҳам эканлигининг яна бир далилидир; 2) муомала амалиётида, баъзан илмда Қ. термини адабий асарда ҳаракатланувчи ҳар қандай шахс образи маъносида ҳам қўлланади. Бу ҳолда у *персонаж* терминига синоним бўлиб, ҳеч қандай даражаланишни кўзда тутмайди.

**ҚАҲРАМОНЛИК** (русчадан калька: «героическое») – бадиийлик модуси. Қ. бадиийлик модуслари ичида энг қадимийси саналади. Кишилиқ жамияти тараққиётининг илк босқичларида яратилган асарлар марказида ғайриоддий куч-қудрат, матонатға эга қаҳрамонлар ҳаракатланади. Халқ даҳоси уларни илоҳийлаштиради ва шунга яраша чексиз эҳтиром билан муносабатда бўлади (мас., Геракл, Ахиллес; Алломиш, Гўрўгли ва б.). Буни қаҳрамон атамасининг этимологияси ҳам ошкор қилиб туради: «*heros* – яримхудо, илоҳий одам». Қ. модусидаги асар марказига чиқарилган шахс учун умуминсоний қадриятларға асосланган олий мақсадни амалға ошириш мавжудлигини тасдиқлашнинг ягона усулиға айланади. У ўзини ана шу олий мақсадни амалға оширувчи сифатида англайди, адолат, ҳақиқат йўлида фидойилиқ билан курашади; фавқулудда ақл-заковат ва куч-қудрати билан атрофдагилардан яққол ажралиб туради. Энг муҳими, бундай шахс тақдир ўзига белгилаган роль билан шахсий манфаатлари, майллари, имкониятлари орасида қарама-қаршилиқ кўрмайди. Аниқроғи, у ўзининг шахсий манфаатларию орзу-истакларини шу мақсадға бўйсундиради, зарур бўлса, мақсад йўлида улардан иккиланмай воз кечади. Манбаларда Қ. модус сифатида фақат «қаҳрамонлар асри» учунгина хос (Гегель) тарзидаги қарашлар ҳам мавжуд. Бироқ бунга қўшилиш қийин. Чунки миллий давлатчилик-

ни шакллантириш, миллий озодлик ва мустақилликни ҳимоя қилиш жамият олдидаги энг муҳим ва долзарб вазифаға айланган даврларда уларни удалаш айрим кучли шахслар зиммасига тушади. Яъни мамлакат мустақиллиги учун жиддий хавф туғилган палларда, жамият тараққиётидаги инқироз ҳолатларида ёки таназзулдан кейинги қайта тикланиш даврларида кишиларнинг қаҳрамонона хатти-ҳаракатлари учун имкон ва эҳтиёж туғилади. Ана шу эҳтиёжни англаш, ўз навбатида, адабиётда Қ. модусини заруриятға айлантирадики, натижада моҳиятан шунга мос кўплаб образлар яратилади. Мас., уруш йилларида яратилган «Муқанна» (Ҳ.Олимжон), «Маҳмуд Торобий» (Ойбек), «Жалопиддин» (М.Шайхзода) каби кўплаб асарларда, шунингдек, истиқлол арафаларида яратилган айрим асарларда (мас., Х.Султонов. «Бунчалар ширинсан, аччиқ ҳаёт»; А.Ибодинов. «Қуёш ҳам олов») Қ. модуси етакчилик қилади.

**ҚИЁСИЙ МЕТОД** – фаннинг турли соҳаларида, жумладан, адабиётшунослиқда ҳам кенг қўлланувчи тадқиқот усули. Ушбу усул моҳияти икки ёки ундан ортиқ нарса-ҳодисаларни ўзаро қиёслаб, уларнинг ўхшаш ҳамда фарқли томонлари, буларни келтириб чиқарган омилларни аниқлаш орқали муайян илмий хулоса ва умумлашмалар чиқаришдан иборатдир. Адабиётшунослиқда Қ.м.ни қўллаш имконлари жуда катта, чунки қиёслаб ўрганилиши илмий жиҳатдан аҳамиятли бўла оладиган объектлар доираси бениҳоя кенг: асар билан бошқа бир асар (бир адибнинг ёки бир неча адибнинг асари; бир жанрда яратилган асарлар, турли даврларда яратилган асарлар ва ҳ.); бир адабий ҳодиса билан бошқа бир адабий ҳодиса (бир даврдаги адабий ҳодисалар; турли даврлардаги адабий ҳодисалар ва ҳ.), бир давр адабиёти билан бошқа бир давр адабиёти, бир миллий адабиёт билан бошқа бир миллий адабиёт ва ҳ. Қ.м. асосидаги тадқиқотлар кенг қўламли назарий умумлашмалар чиқариш, адабиётнинг яшаши ва тараққиётиға оид умумий қонуниятларни аниқлаш имконини беради. Адабиётшунослиқда Қ.м. XIX асрдан, айниқса, кенг қўлланила бошлади, адабий ҳодисаларни тарихий аспектда қиёслаб ўрганишға эътибор кучайди: тарихий-қиёсий адабиётшунослиқ (қ. *компаративизм*) майдонға келди. Ҳозирги адабиётшунослиқда ҳам Қ.м.дан, жумладан, тарихий-қиёсий, қиёсий-типологик тадқиқ усулларида кенг фойдаланилади.

**ҚИССА** (ар. *قصة* – ҳикоят, саргузашт) – 1) халқ оғзаки ижодида кенг тарқалган воқеабанд характердаги, қаҳрамон ҳаёти ва саргузаштларини ҳикоя қилувчи ривоявий асар. Халқ ижодидаги Қ.лар оғзаки

ижро қилинган, фольклорнинг бошқа жанрлари каби вариантлик хусусиятига эга бўлган. Кейинча кўплаб халқ Қ.лари иқтидорли кишилар томонидан (кўп ҳолларда уларнинг исми номаълумлигича қолган) адабий қайта ишланиб, ёзма шаклда — *халқ китоблари* сифатида яшай бошлаган (мас., «Қиссаи Машраб», «Иброҳим Адҳам қиссаси», «Зуфунун қиссаси»). Ўзбек адабиётида пайгамбарлар ва авлиёлар ҳаётидан ҳикоя қилувчи ривоявий асарлар ҳам Қ. деб аталган (мас., Рабғузий. «Қисас ул-анбиё»; А.Навоий. «Тарихи анбиё ва ҳукамо»); 2) эпик турнинг ҳикоя ва роман қаторидаги учта асосий жанридан бири, повесть. Ўзининг жанр хусусиятлари билан Қ. ҳикоя ва роман оралигидаги ҳодисадир: ҳикояда қаҳрамон ҳаётидан биргина воқеа, романда қаҳрамон ҳаётининг мураккаб ижтимоий муносабатлар тизимидаги катта бир даври, Қ.да қаҳрамон ҳаётининг бир босқичи қаламга олинади. Ҳикоянинг диққат марказида воқеа, романнинг диққат марказида қаҳрамон воситасида идрок этилаётган олам (жамиятнинг жорий ҳолати) турса, Қ.нинг марказида ҳамиша қаҳрамон туради. Яъни роман учун қаҳрамон восита, Қ. учун эса мақсаддир. Шунга кўра, Қ.даги барча воқеалар қаҳрамон атрофида уюштирилади, унинг сюжети романники каби кўп тармоқли бўлмайди. Адбиётшунослиқда Қ. билан повесть терминларининг кўлланиши турлича: улар синоним сифатида ҳам, бошқа-бошқа жанр номлари сифатида ҳам ишлатилади. Қ. билан повестни бошқа-бошқа жанрлар деб тушуниш ётарли асосга эга эмас, шунинг учун уларни синоним сифатида тушуниш кенгроқ оммалашган. Ҳозирги ўзбек адабиётида Қ. фаол эпик жанрлардан саналиб, XX аср давомида ўзбек қиссачилиги жиддий муваффақиятларга эришди. Бунда, жумладан, жанрнинг яхши намуналарини яратган Ғ.Фулум, А.Қаҳҳор, О.Ёқубов, П.Қодиров, Ш.Холмирзаев, Ў.Ҳошимов, М.Муҳаммад Дўст, Э.Аъзамов, Х.Султонов каби адибларнинг изланишлари, айниқса, самарали бўлди.

**ҚИСКА ҲИЖО** — қаранг: *ҳижо*

**ҚИТЪА** (ар. *قطعة* — парча, бўлак, қисм, бир ҳесим) — Шарқ мумтоз шеъриятида кенг тарқалган, икки байтдан бир неча ўн байтгача (айрим манбаларда 19 байтгача деб белгиланган) ҳажмдаги, жуфт мисралари ўзаро қофияланиб, тоқ мисралари очиқ қолувчи (б-а, в-а, г-а тарзида) шеър шакли; лирик жанр. Гарчи кўпроқ ижтимоий-сиёсий, ахлоқий-тарбиявий, фалсафий мавзуларда яратилса-да, Қ. мазмун жиҳатидан ҳам, вазн жиҳатидан ҳам чегараланган эмас. Шарқ адабиётида насрий (дидактик, фалсафий, адабий-танқидий,

илмий ва б. характердаги) асарларда фикрни далиллаш, хулосалаш, изоҳлаш каби мақсадларда Қ.лар келтирилган бўлиб, улар бошқа ижодкорлар асарларидан олинган фалсафий жиҳатдан те-ран, дидактик характерга эга бўлган байтлар — парчалардир. Яъни бу асарларнинг муаллифлари ўз мақсадларига мос байтларни келтираркан, аввал «қитъа» сўзини қайд этишган. Шунга кўра, айрим манбаларда билдирилувчи Қ. мустақил асар сифатида яратилиши ҳам, қасида ёки ғазал ичидан бир неча байтни ажратиб олиш натижасида пайдо бўлиши ҳам мумкин қабилдаги фикрларга қўшилиб бўлмайди. Бу ҳолда Қ. сўзининг луғавий ва истилоҳий маънолари фарқланмаган бўлади. Ҳолбуки, истилоҳий маънода Қ. муайян шакл хусусиятларига эга бўлган мустақил шеърий жанрни англатади, иккинчи томондан, муайян жанрга мансуб асар (ғазал ёки қасида)дан ажратиб олинган бир неча байт (ҳатто мазмунан ғоят бой бўлса-да) янги ва мустақил асар бўлиб қолмайди, парча парчалигича қолади. Модомики, насрий асарлардаги парчалар кўпроқ қасида ва ғазаллар таркибидан ажратиб олинган экан, уларда кейинча пайдо бўлган Қ. жанри белгилари (мас., қофияланиши) бўлиши табиий. Демак, бу ўринда Қ.нинг икки хил йўл билан яратилиши ҳақида эмас, жанрнинг генезиси ҳақида гапириш ўринли бўлади. Яъни насрий асарлардаги парчалар айти шундай (қофияланиши бирмунча эркин, ҳажми кичик, мазмун ва вазн жиҳатидан чекланмаган) шакл тақдим этувчи имконларни кўрсатганки, шу асосда мустақил Қ. жанри пайдо бўлган. Ўзбек адабиётида Қ.нинг илк намуналари А.Яссавийда уч-раса, кейин юқоридагича қулайликлари сабаб бўлса керак, деярли барча мумтоз шоирларимиз лирик меросида салмоқли ўрин эгаллади. Ўзбек адабиётида Қ. жанрининг қарор топиши ва такомилда А.Навоийнинг ўрни беқиёс (ҳатто баъзан Навоийни шеъриятимиздаги Қ. жанри асосчиси сифатида эътироф этадилар), «Хазойин ул-маоний»га 210 та, «Девони Фоний»га 72 та, шунингдек, «Муншаот», «Ҳолоти Паҳлавон Муҳаммад», «Хамсат ул-мутаҳаййирин» каби қатор бошқа асарларига яна ўнлаб Қ.лар киритилган. Шуни ҳам қайд этиш лозимки, Навоий меросида Қ.нинг ғазал типига эмас, маснавий типига қофияланувчи хиллари ҳам учрайди. Мас.:

*Нукта асносида Ҳабибуллоҳ  
Деҳи, алқасибу Ҳабибуллоҳ.  
Маъни айтур бу сўзга пири комил  
Ки, сўзи эрди ҳақ сари шомил.*

*Ғараз эрмас бу касбдин дунё,  
Бал эрур касбдин мурод фано.*

**ҚОЛИПЛАШ** – воқеабанд асарларга хос композицион усул, ривояни «ҳикоя ичида ҳикоя» тарзида бериш. Яъни бунда битта қолипловчи ҳикоя бўлади ва шу ҳикоя ичида бир неча (ўнлаб, юзлаб) ҳикоялар берилади. Қ. усули жуда қадим замонлардан бошлаб қўлланган. Жумладан, ҳиндларнинг «Панчататра»си шу усулда қурилган энг кўҳна асарлардан саналади. Шарқда машҳур «Минг бир кеча» эртаклари ҳам шу усулда қурилган бўлиб, уни Қ. усулининг бетакрор намунаси дейиш мумкин. Кейинчалик ёзма адабиётда ҳам Қ. усули кенг оммалашди (Ж.Боккаччо. «Декамерон»; А.Навоий. «Лисон ут-тайр»; Гулханий. «Зарбулмасал» ва б.).

**ҚОФИЯ** (ар. *قافية* – мисра охиридаги сўзларнинг бир-бирига мос бўлиши) – шеърий мисралар охиридаги қўшимча, сўз, баъзан сўз бирикмаларининг оҳангдош бўлиб келиши, аниқроғи, уларнинг таркибидаги товушлар гуруҳининг оҳангдошлиги. Қ. ритмик жиҳатдан мисрани таъкидлаш билан шеър ритмининг ҳис қилинишида муҳим аҳамият касб этади. Шеърни ўқиш давомида (бу нарса, айниқса, ёддан ўқилганда ёки шеър тингланганда яққол сезилади) Қ. мисранинг тугаганидан дарак беради, пауза бажараётган ажратиш функцияси таъкидлайди. Шеъриятда Қ.нинг бир қатор кўринишлари (тўлиқ ва тўлиқсиз Қ.; унлилар оҳангдошлигигагина асосланган ассонанс Қ., ундош товушлар оҳангдошлигигагина асосланган диссонанс Қ.; рус шеъриятида очик ёки ёпиқ бўгин билан тугашига қараб очик – «женская рифма», ёпиқ – «мужская рифма» ва б.) мавжуд. Жумладан, ҳозирги ўзбек шеъриятида қофиядаги товушларнинг қай даражада мослиги жиҳатидан оч (тўлиқсиз) ва тўқ (тўлиқ) Қ.лар ажратилади. Тўқ Қ.да қофиядош сўзларнинг товуш таркиби тўла (мас., «бузиб – узиб», «лўқиллаганда – лопиллаганда», «излардан – юзлардан») мос келса, оч Қ.ларда қисмангина («дахрий – қаҳридан», «тутун – Аловуддин», «титраб – гулдурак») мос келади. Қ. шеърий нутқнинг оҳангдорлиги, мусикийлиги ва таъсирдорлигини таъминловчи муҳим унсурлардан бири саналади. Шеърда аҳамияти катталаги боис, мумтоз адабиётшунослиқда Қ.ни ўрганувчи махсус соҳа – *илми қофия* (қ.) шаклланган бўлиб, унда Қ., унинг унсурлари, турлари, эстетик вазифалари, Қ. билан боғлиқ санъатлар чуқур ўрганилган. Жумладан, мумтоз шеършунослиқда Қ.нинг унсурлари (*равий, ридф, ноира* ва б.), турлари (*мутлақ Қ., муқаййяд Қ.*) мукамал таърифланган.

**ҚЎШИҚ** – халқ оғзаки ижодида шаклланган лирик жанр. Қ.нинг муҳим белгиси – ижро учун мўлжалланганлик. Қ.лар бирор мусиқа жўрлигида (лапар, ёр-ёр), муайян иш-ҳаракат ритми (қўш қўшиқлари, чархчи қўшиқлари ва б.) ёки маълум бир руҳий ҳолат моҳиятига (йўқловлар) мос тарзда ижро қилинган. Ёзма адабиёт, хусусан, XX аср ўзбек адабиётида фольклор аъёнларининг давоми сифатида Қ. жанри фаоллашди. Айрим манбаларда куйга солиб ижро этилган шеърни Қ. деб айтадиларки, бу фикрда ноаниқлик бор. Мас., Фурқатнинг «Сайдинг кўябер, сайёд» мусаддаси ёки Ҳазинийнинг «Фарғона тонг отгунча» ғазалини куйга солиб ижро этиш билан, улар Қ. бўлиб қолмайди, биринчиси мусаддас, иккинчиси ғазаллигича қолаверади. Яъни уларни қўшиқчилик санъати нуқтаи назаридангина Қ. дейиш мумкин, адабиётшунослик нуқтаи назаридан эмас. Адабий жанр сифатидаги Қ., юқорида айтилганидек, халқ оғзаки ижоди аъёнлари заминида шаклланган бўлиб, у бир қатор жанр хусусиятларига эга. Аввало, Қ. ижро учун мўлжалланади, унда ижро имкониятлари ҳаммиша кўзда тутилади. Шунинг учун: 1) аксар Қ.лар мавжуд халқ куйларига мослаб ёзилади (мас., Ҳамзанинг «Миллий ашулалар учун миллий шеърлар» тўпламига киритилган «Йиғла, Туркистон» шеъри халқда машҳур «Лўм-лўм Мамажон» ашуласи оҳангига мосланган); 2) мавжуд куйларга мосланмасдан, янги куй басталаш кўзда тутилган ҳолда ҳам Қ.нинг ритмик-интонацион, композицион қурилиши жиҳатидан шунга мос (енгил, ўйноқи оҳанг, товушлар уйғунлиги, мисра такрорлари ва б.) бўлиши талаб қилинади. Ҳозирги шеъриятдаги халқ оғзаки ижодига *стилизация* (қ.) тарзида ёзилган шеърлар (мас., М.Юсуф. «Ёр-ёр»; С.Саид. «Хоразмча», И.Мирзо. «Фарғонача» ва б.)нинг аксарияти Қ. жанрига мансуб. Таъкидлаш керакки, адабий жанр сифатидаги Қ. ижро учун мўлжалланган, куйи билан бирга туғилган бўлса ҳам, ҳофизлар томонидан куйланиши ё куйланмаслигидан қатъи назар, Қ. бўлиб қолаверади.

**ҚЎШМА ВАЗН** – бармоқ шеър тизимидаги вазн кўринишларидан бири, мисраларида бўгинлар сони бир хил бўлмаган, бироқ мисралар муайян тартибда қўшилганда *изосиллабизм* (бўгинлар сонининг тенглиги) тикланадиган ўлчов. Мас., У.Азимнинг куйидаги шеъри Қ.в.да ёзилган:

*Қоқилади / ҳоргин отлар, 8 (4 + 4)  
ғижирлайди / арава, 7 (4 + 3)*

*Ғулдираклар / изи йўлда 8 (4 + 4)*

*тўзғиётган / калава. 7 (4 + 3)*

Ушбу шеър вазнининг Қ.в. дейилишига сабаб шуки, агар унинг иккита мисрасини бирлаштирсак, гўё мисралардаги бўғинлар сонининг тенглиги тикланади:

*Қоқилади / ҳорғин отлар, / гижирлайди / арава. 15 (4+4+4+3)*

*Ғулдираклар / изи йўлда / тўзғиётган / калава. 15 (4+4+4+3)*

## Ғ

**ҒАЗАЛ** (ар. *غزل* – аёлларга хушомад қилиш, аёлларни мадҳ этиш) – Шарқ мумтоз шеъриятида энг кўп тарқалган лирик жанр, 3–4 байтдан 19 байтгача бўлган ҳажмда ёзилиб, а-а, б-а, в-а, г-а... тарзида қофияланувчи шеър. Гарчи манбаларда Ғ. ҳажми 19 байтгача деб кўрсатилса ҳам, адабиёт тарихида 23 байтгача бўлган Ғ.лар ҳам учрайди. Ғ. VII аср араб шеъриятида пайдо бўлган, форс-тожик адабиётидаги илк Ғ.лар муаллифи сифатида «одам уш-шуаро» Абу Абдулло Рудакий (тахминан 860–941) эътироф этилади. Ғ.нинг ўзбек адабиётидаги илк намуналари эса Рабғузийнинг «Қисаси Рабғузий», Хоразмийнинг «Муҳаббатнома», Саид Аҳмаднинг «Таашшукнома» асарлари таркибида учрайди. Кейинги даврларда яшаб ижод қилган деярли барча шоирлар ижодида Ғ. етакчи жанр бўлиб қолди. Айтиш мумкинки, ўзбек мумтоз адабиётида мазкур жанрда ижод қилмаган шоир деярли топилмайди. Жумладан, Сайфи Саройи, Атоий, Саккокий, Лутфий, Навоий, Бобур, Машраб, Ҳувайдо, Сўфи Оллоёр, Огаҳий, Увайсий, Нодира каби мумтоз шоирлар ўзбек адабиётида Ғ. жанри тараққиётига сезиларли ҳисса қўшганлар. Адабиётимизда Ғ. жанри ривожига қўшган тенгсиз ҳиссаси учун Алишер Навоий ҳақли равишда «ғазал мулкининг султони» деган юксак эътирофга сазовор бўлган. Янги давр шеъриятида ғазалчилик аъъаналари Ҳабибий, Чархий, Чустий, Э.Воҳидов, Ж.Камол каби ўнлаб шоирларимиз томонидан муваффақиятли давом эттирилдики, Ғ.ни ҳозирги шеъриятда ҳам нисбатан фаол бўлган жанрлардан санаш учун етарли асос бор.

Дастлабки Ғ.лар, асосан, ишқ-муҳаббат мавзусида яратилган бўлса-да, кейинчалик унинг мавзу доираси муттасил кенгайиб борган ва пировардида мавзу жиҳатидан чекловлардан буткул фориғ бўлган. Шунинг учун Шарқ шеъриятида Ғ. мавзусига кўра гоаят рангбаранг бўлиб, бу жиҳатдан уни *ошиқона, орифона, риндона, ҳажвий, публицистик, ахлоқий-таълимий* каби турларга бўлиш мумкин.

Мумтоз шеъриятда жуда кенг ўрин тутгани сабабли, адабиётшунослиқда Ғ.нинг бундан бошқа қатор кўринишлари ҳам фарқланади. Жумладан, қофияланиш тартиби ёки қофия санъатларининг қўлланишига кўра *Ғ.и хусни матлаъ* (а-а, а-а, б-а, в-а...), *Ғ.и қитъа* (б-а, в-а, г-а...); *Ғ.и мусажжаъ* (барча байтларида икки қофия бор), *Ғ.и зебоқофия* (а-а, а-а, а-а, а-а...), *Ғ.и зулқофиятайн* (а-а, б-б, в-в, г-г...); бирор шеър санъати асосига қурилгани ёки яратилиш тарзига кўра *Ғ.-мувашишах*, *Ғ.-чистон*, *Ғ.-назира*, *Ғ.-му-шоира* ва б. Ғ. байтлари, одатда, нисбий мустақилликка эга, айни чоғда, улар бир-бири билан узвий боғлиқ бўлади. Байтларнинг ўзаро муносабати нуқтаи назаридан ҳам Ғ.нинг бир қатор кўринишлари таснифланади: *якпора Ғ.* – унинг барча байтларида бир мавзудан сўз юритилади; *пароканда Ғ.*нинг байтларида турли мавзуларда сўз юритилади, унинг бутунлиги вазн, қофия, радиф бирлиги ҳисобига таъминланади; *мусалсал Ғ.*нинг байтлари ўзаро занжирли боғланиш ҳосил қилиб, матлаъда қўйилган мавзу силсилавий тарзда ривожлантириб борилади. Буларнинг қаторига кейинги давр адабиётшунослиги қўшган *воқеабанд Ғ.*да *кечинма бирон-бир воқеанинг мўъжаз баъни орқали* ифодаланади.

Ғ.нинг ўзаро қофияланган мисралардан иборат биринчи байти *матлаъ* ёки *мабдаъ* (бошланма, бошланиш), охириги байти эса *мақтаъ* (туғалланма, хотима) деб юритилади. Мумтоз шеърият анъанасида Ғ.ни номлаш, унга *сарлавҳа қўйиш одат қилинмаган*. Шунинг учун адабиётшунослиқда ёки шеърхонлар орасида конкрет Ғ. турлича, кўпинча *матлаъси* (Навоийнинг «*Кеча келгумдур дебон ул сарви гулрӯ келмади, Кўзларимга кеча тонг отқунча уйқу келмади*» матлаъли Ғ.и), *илк мисраси* (Навоийнинг «*Эй сабо, ҳолим бориб сарви хиромонимга айт*» мисраси билан бошланувчи Ғ.и), *радифи* (Навоийнинг «*Топмадим*» радифли Ғ.и), *баъзан эса матлаъдаги илк сўзлар* (Навоийнинг «*Қаро кўзим*» Ғ.и) билан номланаверади.

**ҒАРИБ** (ар. *غريب* – четдан келган) – аруз баҳрларидан бири, четдан янги қўшилгани учун шундай номланган. У янги деган маънода *жадид баҳри* деб ҳам номланади. 2 та фоилотун (–v – / –v –) ва 1 та мустафъилун (–v –) аслларининг *тахроридан ҳосил бўлади*. Асосан, араб шеъриятига хос бўлиб, ўзбек шеъриятида қўлланмаган. Навоий «Мезон ул-авзон»да:

*Ики рухсоринг эзур гул чаман аро,  
Арақинг юз уза шабнам суман аро, –*

байтини *ғариб (жадид)и мусаддаси махбун* вазнига мисол сифатида келтирган. Бобурнинг «Мухтасар»ида Ғ. баҳрининг ўн бир вазни саналиб, уларнинг ҳар бирига туркий тилда битилган махсус байтлар мисол қилинган.

**ҒОЯ** – бадий ғоя, бадий мазмуннинг муҳим компоненти, асардан келиб чиқадиған образли, умумлашма фикр. Асарда тасвирланган воқеа-ҳодисаларга муаллифнинг гоёвий-ҳиссий муносабати, образлар системаси воситасида қўйилган проблематиканинг бадий идрок этилиши ва баҳоланиши (қ. *тенденция*) натижасида намоён бўлувчи бадий ҳукм. Мазмуннинг ўзак компоненти сифатида Ғ. ҳар қандай асарда мавжуд, лекин мазмун-моҳияти, қўлами, ифодаланиш йўсини каби жиҳатларидан фарқланади. Бадий Ғ.нинг мазмун-моҳияти, йўналиши бевосита ижодкор дунёқараши билан боғлиқ. Зеро, ижодкорни воқелиқдаги қайси жиҳатлар қизиқтириши, уларга қандай гоёвий-ҳиссий муносабатда бўлишини дунёқараш белгилайди. Ғ. ҳар бир ижодкор дунёни ўзича кўради, уни ўзича идрок қилади ва ўзича баҳолайди. Шунга кўра, ижодкор томонидан қўрилган воқелиқ реал воқелиқ эмас, балки унинг ижодкор кўролган ва идрок этолган акси – индивидуал воқелиқдир. Шунинг учун воқелиқнинг бир жойда, бир даврда яшаб турган икки ижодкор онгидаги акси айни бир хил бўлмайди. Мас., «*Кеча*» билан «*Кутлуғ қон*» романлари муаллифлари бир даврда яшагани, бир даврни қаламга олганлари ҳолда, иккала романда акс этган бадий воқелиқ бир-биридан тубдан фарқ қилади. Сабаби, ҳар икки адибнинг асарида ҳам индивидуал борлиқ – уларнинг онгида аксланган воқелиқнинг бадий модели яратилган. Модомики, воқелиқнинг ижодкор онгида қай тарзда аксланиши унинг дунёқарашига боғлиқ экан, бадий Ғ. ижодий ниятдаёқ муайян даражада шаклланган, унинг умумий чизгилари тортилган бўлади. Фараз қилинг, Иккинчи жаҳон уруши воқеаларини икки қарама-қарши томон вакиллари бўлган адиблар қаламга олди. Улардан бири, мас., Берлинда ўз жонини хавфга қўйиб, танк остидан немис қизалогини қутқарган шўро аскарини, иккинчиси эса вужуди интиқом оловида ёнган ва ёвузликка ёвузлик билан жавоб беришга жазм қилган шўро аскарини бўрттириб тасвирлаши мумкин. Ҳолбуки, урушда униси ҳам, буниси ҳам содир бўлиши мумкинлигини инкор қилиш ноўрин. Демак, воқелиқнинг қайси жиҳатларини кўриш, қайсиларини унинг моҳияти сифатида бўрттириб тасвирлаш ва уларга қандай гоёвий-ҳиссий муносабатда бўлиш ижодкор дунёқараши билан боғлиқ экан. Бироқ бу бадий Ғ. том маънода индивидуал ҳодиса, ҳар бир ижод-

кор ўз дунёқарашидан келиб чиқиб исталган Ғ.ни ифодалаши мумкин дегани эмас. Ҳақиқий санъаткор қайси ижтимоий гуруҳга мансублиги, қандай ижтимоий мақсадларни кўзлашидан қатъи назар, у яратган бадиий асарда умуминсоний қадриятлар устуворлик қилиши шарт. Чинакам бадиият ижодкорнинг эзгулик, гўзаллик, адолат, инсонийлик каби мангу қадриятлар томонида туришини тақозо этади, умуминсоний қадриятларга зид Ғ.ларни ўзига сингдирган асар чинакам бадиий қимматга эга бўлолмайди.

Бадиий асар проблематикаси, унда тасвирланган ҳаёт материали кўлаמידан келиб чиқиб Ғ.нинг кўлами ҳақида гапириш мумкин. Мас., А.Навоийнинг «Ғурбатда ғариб шодмон бўлмас эмиш» мисраси билан бошланувчи рубоийсидаги бадиий Ғ. бир неча сўз билан ифода этилиши мумкин. Ҳолбуки, воқелик кенг кўламда тасвирланган, бадиий идрок учун даврининг долзарб проблемалари билан бирга қатор мангу муаммолар қўйилган «Ўткан кунлар»даги бадиий Ғ. ҳақида бундай деб бўлмайди. Бу ўринда асарда қўйилган проблемалар талқинидан келиб чиқувчи Ғ.лар тизими – бадиий концепция ҳақида гапириш мумкин. Унутмаслик керакки, кўлами ё мазмунмоҳияти бадиий Ғ.нинг қиммати, аҳамиятини белгиловчи мезон эмас. Бунинг асосий мезонлари, бир томондан, миллий ва умуминсоний қадриятларга мувофиқлик бўлса, иккинчи томондан, образли тарзда, гўзал ва таъсирли ифодаланганлиқдир.



**ҲАЖВ** (ар. **حجوة** – устидан кулмоқ) – бирор шахсни танқид қилиш, аёвсиз қоралаш, камчиликларини санаб, айблаш мақсадида яратилувчи асар, адабий жанр. Аввал араб шеъриятида кенг тарқалган Ҳ.ларда рақибни қоралаш, шарманда қилиш учун ёлғон уйдирмалар тўқиш, жисмоний нуқсонларни юзга солиш, ҳатто уятсиз сўзларни ишлатиш ҳам одатий бўлиб, баъзан Ҳ.нинг ҳақорат ва тўхматга айланиб кетиш ҳоллари ҳам учраган. Мутахассислар Ҳ.нинг сатирадан фарқи сифатида конкрет шахсга қаратилганликни кўрсатадилар, яъни ҳажвчининг мақсади ижтимоий ҳаётдаги муайян ҳолатни бадиий умумлаштириб, ғоявий инкор қилиш эмас. Бироқ бу фикрнинг мутлақлаштириш ҳам тўғри бўлмайди. Аниқроғи, бу Ҳ. жанрининг илк босқичларига хос бўлиб, кейинги давр шеъриятида унда сатирага хос хусусиятлар, хусусан, ижтимоий йўналтирилганлик ҳам кўзга ташлана боради. Ҳ.нинг конкрет шахсга йўналтирилганлиги унда субъективликнинг кучайишига замин яратади, яъни муаллифнинг ўша шахсга муносабати ҳал қилувчи аҳамият касб этиб қолиши мумкин бўлади. Шу боис Ҳ.нинг қадимги намуналарида, айниқса, араб шеъриятида аёвсиз танқид ортида шоирнинг шахсий манфаатлари туриб қолиши кўп кузатилади. Лекин ҳақиқий шоирлар Ҳ.га ҳамма вақт умум манфаатини кўзлаган ҳолда кўл урганлар, танқид қилинаётган шахсда ижобий хислатларни шакллантириш, халққа фойдаси тегадиган инсонга айлантиришни мақсад қилганлар. Мас., манбаларда араб шоири Абул Фатҳ ал-Бустий бир Ҳ.ида Махмуд Ғазнавий отаси каби халққа зулмни ошириб юборганини айтаркан. «отанг қайсар эшакка ўхшаб қолган эди» дейишга журъат қилгани ёки Сомоний вазирларидан бирортаси Мовароуннаҳр шоирлари Ҳ.идан омон қолмагани, мансабдорларни танқид қилишда улар энг ҳақоратли сўзларни ишлатишдан ҳам кўрқмаганлиги қайд этилади. Ўзбек мумтоз шеъриятида шоҳлар ёки мансабдорларга танқидий муносабат билдирилган ўринлар кўплаб учраса-да, Ҳ. жанри XVIII

асрдан бошлабгина оммалашдики, бу айна шу даврдан шеърятимизда ижтимоийлашув жараёни бошлангани билан изоҳланади. XVIII асрнинг иккинчи ярми – XIX аср бошларида яшаган Мужрим Обид ижодида «огзига ҳар на келса деб, олдига ҳар на келса еб» юрадиган, камбағални турткилаб, бойларга лаганбардорлик қиладиган шахслар танқид қилинган Ҳ.лар учрайди. Араб шеърятисидаги Ҳ.ларда бўлгани каби, ўзбек Ҳ.ларида ҳам аниқ бир шахс объект қилиб олинган. Мас., Муқимийнинг «Ҳажви Викторбой», «Ҳажви Виктор», «Воқеаи Виктор»; Муҳйининг «Дар мазаммати Вектур» Ҳ.ларида бир қатор ўзбек савдогарларини чув туширган Қўқондаги ака-ука Каменскийлар савдо идорасининг иш бошқарувчиси Виктор Ахматов объект қилиб олинган (Муҳйи Виктордан кўра кўпроқ унга алданган лақма ўзбекларни танқид қилишни кўзлаган). Муқимий ўз даврида ҳажвчи шоир сифатида шуҳрат қозонган. Унинг 1910 йили босилган тўпламини «Девони Муқимий маа ҳажвиёт» деб номлаши ҳам шундан далолат. Шоирнинг юқорида саналганлардан ташқари «Тўйи иқонбачча», «Московчи бой таърифиди», «Сайлов», «Дар шикоят Лахтин», «Воқеаи кўр Ашурбой ҳожи» асарлари ҳам аниқ шахслар танқид қилинган Ҳ.лардир. Умуман олганда, XIX аср охири – XX аср бошларида Ҳ. шеърятимиздаги энг фаол жанрлардан бирига айланган, Муқимий, Завқий, Абдулқодир Савдо (Бепул тахаллуси билан), Тавалло (Мағзава тахаллуси билан) каби шоирлар ёзган Ҳ.лар машҳур бўлган. Юқорида айтилганидек, бу Ҳ.лар энди ўзида сатирага хос хусусиятларни ҳам мужассам этган, гарчи конкрет шахс объект қилиб олинса-да, улар ижтимоий ҳаётдаги ҳолатларни умумлаштириб танқид қилишга қаратилгандир. Буни Завқийнинг машҳур «Аҳли раста ҳажви»да яққол кўриш мумкин. Шоир Завқий 1905 – 1906 йилларда 47 байтли «Аҳли раста ҳажви»ни ёзиб, 46 кишини номма-ном санаб, ҳар бирини аёвсиз танқид қиларкан, умуман, «раста аҳли»га хос кирдикорларни фош қилиш мақсадини кўзлайди. Яъни асар, бир томондан, мумтоз ҳажвчилик аънаналарини давом эттирса, иккинчи томондан, замонавий сатира хусусиятларини намоён этади. Мумтоз Ҳ. аънаналари, мас.,

*Шокир қора тарзи одам зрмиш,  
Минг лаънат ўшап қора зшакка, –*

каби сатрларда кўзга ташланади. Табиатан мутойибага мойил бўлган Завқийнинг саяҳатномаси ҳам «Обид мингбоши ҳақида ҳажв» номи билан шуҳрат қозонган.

**ҲАЗАЖ** (ар. *حزج* – замзама қилиш, бир хил овозни такрорлаш, овозни ёқимли қилиш, куйлаш) – аруз баҳрларидан бири, *мафоиьлун* асли (v – – –) такроридан ҳосил бўлади. Бундай номланишига сабаб сифатида айрим манбаларда *мафоиьлун* аслининг охирида *ватад* (v –)дан кейин иккита сабаб (– –) такрорланиши, бошқаларида эса ушбу баҳрнинг вазнлари замзамага ўхшаши кўрсатилади. Ҳ. ўзбек мумтоз шеърятисида энг фаол қўлланган баҳрлардан бири саналади. Жумладан, «Хазойин ул-маоний» қўллитига киритилган газалларнинг 669 таси (тахминан 22 фоизи) Ҳ.да ёзилган; мумтоз шеърятда кенг тарқалган *рубоий*лар Ҳ. баҳрининг ахраб ва ахрам шажараларида битилиши шарт бўлган. Шунингдек, Ҳ.да қатор йирик ҳажмли дostonлар ҳам яратилган (мас., А.Навоий, «Фарҳод ва Ширин», «Лайли ва Мажнун»). Навоийнинг «Мезон ул-авзон» асарида Ҳ.нинг 46 вазни, Бобурнинг «Мухтасар» асарида эса 105 вазни кўрсатилиб, уларнинг ҳар бирига туркий ва форсий шеърятдан мисоллар келтирилган. Ўзбек шеърятисида Ҳ. баҳрининг, асосан, саккиз ва олти рукли ўттиздан ортиқ вазнидан кенг фойдаланилади. Мас., Навоийнинг:

*Ғамидин гарчи жон йўқ эрди танда,  
Тирилдим лаълидин ўлдум деганда, –  
v – – – v – – – v – – –*

матлаъси билан бошланувчи газали *ҳазажи мусаддаси маҳзуф* вазнида, Бобурнинг машҳур

*Баҳор айёмидур даги йигитликнинг авонидур,  
Кетур, соқий, шароби нобким, ишрат замонидур, –  
v – – – v – – – v – – – v – – –*

матлаъли газали эса *ҳазажи мусаммани солим* вазнида ёзилган.

**ҲАЗВ** (ар. *حزو* – орқасидан бормоқ, ўхшамоқ) – қаранг: **муқай-йад кофия**

**ҲАРФ** (ар. *حرف* – товушнинг ёзувдаги шакли, белги, нишона, қирра) – араб арузшунослигида энг кичик ритмик бўлак. Ҳ. икки турли бўлади: мутаҳаррик (чўзгили) ва сокин (чўзгисиз). Чўзги деганда унли товуш тушунилиб, «мутаҳаррик Ҳ.» (ҳаракатли) ва «сокин Ҳ.» (ҳаракатсиз) атамаларининг маъноси шу билан боғлиқ англашилади. Мас., «кўз» сўзи иккита Ҳ.: бир мутаҳаррик («кў») ва бир со-



аруздаги *васл* (қ.) қондаси асосида ундаги «н» товуши кейинги сўзнинг биринчи бўғинига қўшиб талаффуз этилади (ме-но-шиқ-ман) ва шу ҳисобга *мафоиълун* рукни ҳосил бўлади – вазн бузилмайди.

**ҲИКОЯ** – эпик турнинг кичик шакли. Ҳ., одатда, қахрамон ҳаётидан битта (баъзан бир-бирига узвий боғлиқ, қисқа муддат давомида кечган бир неча) воқеани қаламга олади. Тасвирланаётган воқеаларнинг қисқа вақт давомида кечиши Ҳ.нинг ҳажман кичик, сюжети содда, иштирок этувчи персонажлар сони кам бўлишини тақозо этади. Ҳар қандай воқеа ҳам ҳикоябоп эмас. Ҳ. асосида ётган воқеанинг яхлит, тугал бўлиши талаб этилади, бунинг учун у ўзининг бошланиши ва якунига эга бўлиши (масал, латифадаги каби) лозим. Яхлит воқеани тасвирлаш асносида ҳикоянавис ё шу воқеанинг, ё унинг воситасида характернинг моҳиятини очиб беради. Ҳ.нинг икки типи бўлиб, биринчисида очерклилик (тавсифий-ривоявий), иккинчисида новеллистиклик (конфликтли-ривоявий) хусусияти устундир. Адабиётшуносликда буларнинг биринчисини Ҳ., иккинчисини *новелла* (қ.) деб фарқлаш амалиёти ҳам мавжуд.

**ҲОЖИБ** (ар. *حاجب* – парда, ёпувчи, беркитувчи) – байт мисраларидаги қофиядан олдин сўз ёки сўз бирикмасини айнан такрорлаш. Такрорланаётган сўз ёки сўз бирикмаси қофиядан олдин жойлашиб, уни пардалаб тургандек бўлгани учун шундай номланади. Ҳ. кўпроқ ғазал ёки қасиданинг матлаъсида ёхуд маснавий шаклида қофияланган байтларда қўлланади. Мас., Хўжандийнинг «Латофатнома» асаридаги куйидаги байтда «этти» сўзи Ҳ. ҳисобланади:

*Кўнгул мулкин хароб этти фироқинг,  
Қамуг оламни сайд этти қароқинг.*

Байтда *радиф* (қ.) ҳам Ҳ. ҳам қўлланса, унинг оҳангдорлиги янада ошади. Мас., Хоразмийнинг «Муҳаббатнома»сидаги куйидаги байтда «хур – нур» қофияларидан олдин такрорланаётган «минг» сўзи Ҳ., кейин такрорланаётган «етмас» сўзи радифдир:

*Сочинг бир торина минг хур етмас,  
Юзунгунг нурина минг нур етмас.*

**ҲУРУЖ** (ар. *هروج* – чиқиш) – қаранг: **мутлақ қофия**

**ҲУСНИ ИБТИДО** (ар. *حسن ابتدا* – гўзал, чиройли бошлаш) – қаранг: **хусни матлаъ**

**ҲУСНИ МАТЛАБ** (ар. *حسن مطلب* – мақсадни чиройли баён қилиш) – мумтоз адабиётдаги шеърини санъат, илми бадиъга оид манбаларда *хусни талаб*, *бароати талаб*, *хусни суол* каби номлар билан ҳам аталади. Ҳ.м.нинг моҳияти шундан иборатки, шоир шоҳ ёки маъшуқадан ўзи учун бирор нарса талаб қилади, бироқ бу талаб нозик лутф, нафис ва ёқимли сўзлар ёрдамида баён этилади. Маълумки, аксар мумтоз шоирларимиз шоҳлару йирик амалдор, бою боёнлар ҳомийлигида ижод қилганлар, уларнинг хизматларида бўлганлар. Шу боис, табиийки, бот-бот ўзлари ёки халқнинг моддий ё бошқа эҳтиёжларини қондириш учун ҳомийлардан нимадир сўрашларига тўғри келган. Бироқ сўрашда ҳам сўраш бор: гўзема илинжини яширмай сўраш ҳам, валинеъматни ийдириш мақсадида ҳамду сано ўқиш ҳам, ҳеч бир андишасиз талаб қилиш ҳам, ўз инсонлик шаънини ерга урмай сўраш ҳам мумкин. Мас., «Муҳаббатнома»да ҳомийси Муҳаммадхўжабекни «Масиҳ анфослик», «Юсуфлик», «Саховатидан базм ичра Ҳотам уяладиган» дея таърифлагач, Хоразмий ўз талабини очиб баён этади:

*Айтсун банда Хоразмий дуолар,  
Карамдин ҳар замон қилгил атолар.*

Мазкур байт билан Огаҳийнинг:

*Эй шаҳ, қарам айлар чоғи тенг тут ямону яхшини  
Қим, меҳр нури тенг томур вайрону обод устина, –*

байти мазмунан бир-бирига яқин, иккисиди ҳам сўров бор. Фақат Огаҳийнинг талаби назокат билан, санъат даражасида ифода этилган. Огаҳийнинг шоҳга таърифи Хоразмий мадҳидан кам эмас: у «шоҳ бамисоли куёш» тарзидаги қиёсни ўтказди, куёшнинг нури барчага барабар тушишини эслатиб, ўзини шоҳона саховатдан бебаҳра қўймасликни сўрайди. Талаб санъаткорона ифодалангани учун ҳам, шоир оддийгина маддоҳ ё таъмагир бўлиб суратланмайди, балки тасаввуримизда шарқона андиша эгаси ва хокисор бир киши, инсонлик шаънини юксак тутган зот сифатида гавдаланади.

Ишқий мавзудаги шеърларда ҳам Ҳ.м. кўплаб учрайди. Уларда маъшуқага хитоб этаётган ошиқ дилидаги висол талаби назокат би-

лан, турли сўз ўйинлари ва ҳаётий тамсиллар орқали шундай ифода этиладики, бундайин латиф изҳор ўқувчини беихтиёр ҳайратга солади. Мас., Навоийнинг:

*Садақа, чунки балоларни рад айлагай, ё раб,  
Жон анга садқа қилай, манга бағишла они, –*

байтида ошиқ ўз жонини маъшуқига садқа қилишга тайёрлигию уни (ёрни) ўзига бағишлашини Оллоҳдан ўзига хос тарзда чиройли йўл билан сўрамоқда.

**ҲУСНИ МАТЛАЪ** (ар. *حسن مطلع* – матлаънинг безаги, ҳусни) – мумтоз адабиётдаги шеърий санъат, илми бадийга оид манбаларда *ҳусни ибтидо* деб ҳам юритилади. Ҳ.м. санъати ғазал ёки қасидани ўқувчи диққатини беихтиёр ўзига жалб этадиган, унда шеърнинг давомини ўқишга рағбат, қизиқиш пайдо қиладиган тарзда бошлашни тақозо этади. Яъни бундай матлаъ имкон қадар ёқимли, чиройли сўзлардан таркиб толиши, улар воситасида яратилган ғўзал поэтик образ шунга яраша чуқур мазмунни ифодалаши керак. Хуллас, шеърнинг бошланишиёқ ўқувчини ҳайратга солиши, завқлантириши лозим. Шунинг учун Ҳ.м. шеър бошланишида ўқувчи таъбинини хира қиладиган, кайфиятига салбий таъсир ўтказадиган сўзлар ишлатилмаслигини, фикрни ортиқча дабдабали, жимжимадор ёки саёз ва мантиқсиз сўзлар билан ифодаласликни, яъни лафз ва маъни орасида уйғун мувофиқлик бўлишини талаб қилади. Мумтоз шоирларимиз шеърни Ҳ.м. талабларига мос тарзда яратишга жиддий эътибор қаратганлар, зеро, матлаъ ғазалнинг илк тақдимоти экани, асарга муносабат илк мисралар қолдирган таассурот асосига қурилишини яхши билганлар. Бунинг ёрқин далили сифатида Рашидиддин Вотвот «Ҳадоийқ ус-сехр» асарида келтирган бир ҳикоят мазмунини эслаш кифоя. Унда айтилишича, бир шоир қасида битиб, шоҳ ҳузурига келтирибди. Шоир қасидани ўқий бошлаганида, шоҳ матлаъни эшитиб: «Қасиданинг қолганини ўқишдан тўхта!» – деб хитоб қилибди ва хизматкорига минг динор келтириб, шоирга беришни амр қилибди. Ўзи эса шоир истеъдодига таҳсинлар айтиб: «Агар қасиданинг қолган байтлари ҳам матлаъ каби бўлса, унинг ҳар бир байти баҳоси минг динор. Менинг хазинамда эса бунча маблаг йўқ», – деган экан. Шеър ибтидосига бу қадар катта эътибор берган мумтоз шоирларимиз ижодда юқорида мазкур талабларга риоя қилганлар, шу боис уларнинг аксар ғазаллари матлаъси билан номланади, эсланади.

**ҲУСНИ МАҚТАЪ** (ар. *حسن مقطع* – чиройли якунлаш) – мумтоз адабиётдаги шеърий санъат, шеър ёки бошқа асарни тингловчига хуш келадиган ёқимли сўзлар, эзгу ниятлар изҳори ёки дуолар билан якунлаш; *ҳусни интиҳо*, *ҳусни хотима*, *бароати мақтаъ* деб ҳам юритилади. Манбаларда Ҳ.м.дан кўзланувчи мақсадлар ёритиладики, улар мумтоз шоирларимиз асарнинг ўқилиш жараёни, ўқувчи психологиясини ҳамиша эътиборда тутганларини кўрсатади. Жумладан, Ҳ.м., аввало, шеърнинг ўқувчи хотирасида муҳрланиб қолишига, иккинчидан, шеърда йўл қўйилган саҳву хатоларни хуш калом билан ювиб юборишга хизмат қилади. Шунинг учун Атоуллоҳ Хусайний Ҳ.м.ни «таомларнинг охирида ейилган лазизу ширин таом»га ўхшатади. Шунингдек, манбаларда асарнинг тугалланганига ишора қилиш ҳам Ҳ.м.нинг бадий-эстетик функцияларидан бири сифатида кўрсатилади. Мас., Сайид Аҳмаднинг «Таашуқнома» асари шундай мисралар билан тугайди:

*Билурсен барчанинг ҳолини, эй шох,  
Иноят чоғидур валлоҳу биллоҳ.  
«Таашуқнома»ни ҳиммат бўлуб ёр,  
Тугаттим етти кунда бемададкор.  
Секиз юз ўттизу тўққизда эрди  
Ки, сўз повна элтмак даст берди,  
Сўзумни ким ўқиб қилса дуойи,  
Илоҳи кўрмасун ҳаргиз балойи.*

**ҲУСНИ ТАЪЛИЛ** (ар. *حسن تعليل* – чиройли далиллаш) – мумтоз адабиётдаги шеърий санъат, чиройли далиллаш. Ҳ.т.да шоир ўзи айтаётган фикр (тасвир, ҳолат ва ш.к.) далили учун шундай асос келтирадики, аслида, у ҳақиқий далил бўлолмайди, у фақат бадий жиҳатдангина далил сифатида қабул қилинади. Мас., Лутфийнинг:

*Юзингдин лола ранг элтиб, уёлиб шаҳрга кирмас,  
Анинг бўйнин киши боғлаб кетурмагунча саҳродин, –*

байтида айтилишича, лола рангини ёрдан ўғирлаган, шу сабабли уялиб шаҳарга киролмайди. Яъни лола ҳақиқатан чўлда, кенгликларда ўсади, бунинг сабаби юқоридагича чиройли тарзда бадий далилланади, аслида эса бу ҳақиқий сабаб эмас. Лутфийнинг бошқа бир байти:

*Кун тушта кўргали сени тушти заволга,  
Ой тонга қолди кеча боқиб ул жамолга.*

Айтилишича, кўёшнинг ботиш сабаби шуки, у ёрни туш кўриш учун уйқуга кетади; ой тонг отгач ҳам ботмади, сабаби ёр юзини узоқроқ кўриб олмоқчи ёхуд ёр гўзаллигига маҳлиё бўлганидан қотиб қолган. Албатта, ушбу табиий жараёнларнинг ҳақиқий сабаби буткул бошқа, шоир келтирган далиллар эса ёр гўзаллиги васфига хизмат қилувчи бадий восита, холос. Ҳ.т. санъати ташбеҳ асосида юзага чиқади, аксар ҳолларда *тажохули ориф*, *тамсил*, *муболаға* каби санъатлар билан қоришиқ ҳолда воқе бўлади.

Д.ҚУРОНОВ, З.МАМАЖОНОВ, М.ШЕРАЛИЕВА

## АДАБИЁТШУНОСЛИК ЛУҒАТИ

Муҳаррир: Абдулла ШАРОПОВ  
Мусахҳиҳ: Марҳабо ЖЎРАЕВА  
Бадий муҳаррир: Феруза НАЗАРОВА  
Техник муҳаррир: Хуршид ИБРОҲИМОВ

Наشريёт лицензияси: AI № 134, 27.04.2009

Теришга берилди: 08.08.2012 й.

Босишга рухсат этилди: 04.03.2013 й.

Газета қоғози. Қоғоз бичими 60x84 <sup>1</sup>/<sub>16</sub>.

Arial гарнитураси. Офсет усулида босилди.

Ҳисоб-наشريёт т: 20,98. Шартли б.т.: 23,72.

Адади: 2000 нусха.

Буюртма № 070

«AKADEMNASHR» нашриётида тайёрланди.  
100156, Тошкент шаҳри Чилонзор тумани 20<sup>А</sup>-мавзе 42-уй.

**Тел.:** (+99871)217-16-77

**e-mail:** akademnashr@mail.ru

**web-site:** www.akademnashr.uz

«KO'HI-NUR» МЧЖ босмахонасида чоп этилди.  
100097, Тошкент шаҳри Бунёдкор кўчаси 44-уй.

ISBN 978-9943-389-57-1



9 789943 389571